



BIBLIOTECA NAZ.
Vittorio Emanuele III

XVI

B

9

NAPOLI

1871

+ auctore Jacobo Evertson

D E
PROCESSIONIBVS
ECCLESIASTICIS.
LIBER.

*In quo earum institutio, significatio, ordo
& ritus, ex sacris Scripturis, Con-
ciliis, & variorum Auctorum
scriptis, explicantur.*

Auct. Jacobo

Evillon



PARISIIS,
Apud MATTHÆVM GVILLEMOT,
viâ Iacobæâ, ad insigne Bibliothecæ.

M. DC. XLI.
Cum Privilegio Regis.



1811

1811



CLAVDIVS

DEI ET SANCTÆ SEDIS

APOSTOLICÆ GRATIA

Episcopus Andegauensis, omni-

bus Ecclesiarum parochialium

Rectoribus, & Presbyteris nostræ

Dicæcesis, salutem in Domino.



Acriter Ecclesiæ Ca-
tholicæ ritus, cum
sint sanctissimorum
mysteriorum sym-
bola, ad Dei cultum, & Reli-
gionis splendorem, ac populi
Christiani eruditionem & edifica-
tionemque instituta; rectè &
conuenienter obiri non possunt,
nisi mysteria ipsa, eorumque or-

a ij

dinem & formam oculis aptè exhibeant, & veri ac legitimi cultus signa atque officia in se contineant. Quod ut fiat, necesse est Sacerdotes, & alios sacrorum ministros, eorum quæ representant mysteriorum rationem intelligere, & Ecclesiæ mentem atque institutionem in ijs celebrandis sequi: ut signa ipsa cum rebus significatis consentiant. Si ipsi quid agant nesciant, non possunt non in multis graviter delinquere, & procul à mysteriorum veritate, & rectæ fidei disciplina, temerè agendo, aberrare. Qua ratione fit, ut non tantùm absurda pleraque & ridicula in sacros ritus introducantur (quæ cum in consuetudinem venerint, pro lege haberi

solent, & hoc nomine vim Religioni facere) sed etiam ut ipsa quæ exhibenda erant mysteria, profanis moribus superinductis, ex memoria hominum prorsus evanescant. Quæ in re non mediocre detrimentum patitur Christiana Religio. In eo genere non ultimum locum tenent processiones publicæ: quæ cum à populo singulari frequentia & alacritate celebrentur, à pristina tamen pietate & reuerentia his temporibus plurimum degenerarunt. Id verò eâ causâ factum est, quòd cum ubique ferme Sacerdotes, æquè ac laici, earum mysteria, institutionem & finem penitus ignorent, neque illi eas debito ordine celebrare student, neque hi cum ea, quæ rebus

sanctis digna sit, veneratione &
modestia prosequi. Quod cum
sine graui animi dolore videre
non possemus, appetente editio-
ne Processionalis nostri, duxi-
mus è re Christiana esse, preci-
bus in eo contentis adiungere
breues aliquas Admonitiones de
singulis generibus processionum,
eo modo quo ante nos felicitis re-
cordationis Dominus Guillel-
mus de Varenna, huius sedis
Episcopus, Observationes de usu
Sacramentorum, & alijs pasto-
ralis cure functionibus, Rituali
suo inferendas censuerat: vt ha-
berent Ecclesiarum parochia-
lium Rectores ad manum prom-
pta rerum earum documenta,
que, usu poscente, populis sibi
commisissis traderent; & Sacer-

dotes reliqui , unde facillimè
discerent, quid sibi in Ecclesiasti-
cis ministerijs, pro rerum agen-
darum varietate , præstandum
foret. Sed, eo labore inchoato,
cum esset animaduersum, parū
momenti habituras eiusmodi
Admonitiones , hoc præsertim
tempore, quo fastidiosa sunt ho-
minum in rebus pietatis iudicia,
nisi ea idoneis Auctorum testi-
monijs & probationibus fulci-
nentur, id autem si fieret, grauior
moles voluminis futura videre-
tur quàm ut manu posset cir-
cumferri: visum est in omnem
partem commodius fore, si Tra-
ctatus de doctrina processionum
à Processionali seiungeretur. Ita,
liberius spatio ad excurrendum
dato, supplicationum Ecclesia-

sticarum materiam uniuersam
habetis hoc libello copiosius ex-
plicatam, & rationibus suis ex
diuinis Scripturis, Concilijs, &
sanctorum Patrum aliorumque
piorum Auctorum monumentis,
illustratam. Qua in re id preci-
puè à nobis curatum est, ut om-
nis procedendi ordo & ritus, at-
que adeo ipsa precationum suf-
fragia quæ in Processionali con-
tinentur, ad pristinam sanctæ
Romanæ Ecclesiæ institutionem,
& formam ab omni memoria
in nostra Andegauensi Ecclesia
usitatam, tamquam ad regulā,
componerentur. Quippe, ut illa
omnium Christiani orbis Eccle-
siarum, ita hæc diœcesanarum
dux & magistra est: & dignum
admiratione videri potest, in

tanto temporum interstitio, tam
religiosè hanc priscis illius insti-
tutis ad hunc usque diem adha-
sisse, ut, quisquis antiquum Or-
dinem Romanum diligenter ob-
servauerit, eius imaginem ad-
uiuum expressam in nostra Ec-
clesiæ caremonijs atque Officijs
agniturus sit. Studuimus etiam;
quoties instituti nostri ratio fer-
re potuit, Romanos & patrios
ritus adhibita Græcorum com-
paratione illustrare: tum ut illi
traditionum antiquissimarum
exemplis, & dissitarum gen-
tium consensione firmarentur;
tum etiã ut ex utrisque Catho-
lica Religionis unanimitas, ad
maiores Dei gloriam, elucesce-
ret. Nonnumquam id nobis iu-
ris sumpsimus, ut, oblata occa-

sione, ritus nonnullos ad process-
sionis argumentum non perti-
nentes obiter attingeremus, ve-
lut qui iter faciunt, flores vel
fructus in viam propendentes
per ludum carpunt; rati non in-
iucundum fore lectoribus aliò
tendentibus tantillum lucri sine
diuerticulo capere. Nostrum in
suscipiendo hoc opere consilium
fuit, prospicere, ut & vos qui
pastorum personam geritis, &
qui pastoribus ad Ecclesiæ mini-
sterium adiuncti estis, libelli v-
nius lectione sinceram de sacris
processionibus & earum myste-
rijs doctrinam adepti, eas in pa-
rochijs ritè & secundum Ecclesiæ
regulam celebretis; & populus
Christianus vobis docentibus
discat, quid in ijs venerari, qua

reuerentia & pietate se gerere
debeat. Qua ex re id speramus
euenturum, quod votis omnibus
semper optauimus, ut non tan-
tum ritè ac decenter, sed etiam
uno atque eodem modo, Deus
in omni genere supplicationum
per vniuersam Diœcesim cola-
tur; & sit hac terra, quæ nobis in
Domino regenda obtigit, terra
labij vnius. Atque id etiam per-
tinere volumus ad Ecclesias
Collegiatas: quæ, velut filiæ Sion
in circuitu Ierusalem, quantum
cæteris excellunt, tanto studiosius
Ecclesiæ Cathedralis formam
& similitudinem emulari de-
bent, eiusque in sacris faciendis,
& legitimis ritibus obseruan-
dis, diligentiam imitari. Habe-
te igitur omnes penes vos hunc.

*librum, & studiosè perlegite: ut
ex eo discatis religiosè obseruare
legitima Dei, & caremonias
quas tradiderunt nobis patres
Dender. s. nostri. Non declinabitis, neque ad
dexteram, neque ad sinistram: sed
per viam, quam præcepit Dominus
Deus vester, ambulabitis; ut viuatis,
& bonè sit vobis. Datum Euen-
tardi apud Andegauum, die
nona Augusti, anno Domini
millesimo sexcentesimo qua-
dragesimo primo.*

CLAVDIUS EPISCOPVS
ANDEGA VENSIS.

Per Illustrissimum ac reuerendis-
simum Dominum Dominum
Episcopum prædictum.

AVCENT.

INDEX CAPITVM
huius libri.

| | |
|---|----------|
| D E Processionum nomine, & va- rietate. Caput 1. | pag. 1. |
| Deratione & institutione Processio- num. Caput. 2. | pag. 5. |
| De ordine & apparatu Processionum. Caput 3. | pag. 19. |
| De preparatione ad Processionem. Caput 4. | pag. 39. |
| De Processione ad Altare, quæ fit in Missa solenni. Caput 5. | pag. 50. |
| De Processione ad Euangelium. Ca- put 6. | pag. 66. |
| De Processione in Festo Purificationis B. Mariae. Caput. 7. | pag. 87. |
| De Processione in die Cinerum. Ca- put 8. | pag. 91. |
| De Processione Palmarum. Caput 9. | pag. 94. |
| De Processione in die Cænæ Domini, ad consecrationem Chrismatis, & | |

Olei sancti. Caput 10. pag. 103
De Processione sanctissimi Sacramenti,
quæ fieri solet in die Cœnæ Domini,
& die sancto Parasceues. Caput 11.
pag. 130.
De Processione ad lauanda Altaria.
Caput 12. pag. 139
De Processione in Sabbato sancto, ad
benedictionem Fontis baptismalis.
Caput 13. pag. 150
De Processione matutina ante Laudes,
in die Paschæ. Caput 14. p. 171.
De Processione matutina ante Mis-
sam, in die Paschæ. Caput 15. p. 197.
De Processione vespertina ad Fontes,
in die Paschæ. Caput 16. pag. 203.
De Processione ante Officium, in die
Paschæ, & alijs solennioribus Festis.
Caput 17. pag. 209
De Processionibus Dominicalibus, &
ijs quæ fiunt in Festis. Caput. 18. p. 217
De Stationibus. Caput. 19. pag. 221.
De Litania maiore. Caput. 20. p. 226.

De Litania minore, seu Rogationibus.

Caput 21. pag. 234.

De Processione in Festo Ascensionis

Domini. Caput 22. pag. 243

De Processione ad Fontem, in Sabba-

to Pentecostes. Caput 23. pag. 248

De Processione in die Pentecostes.

Caput 24. pag. 251.

De Processione in Festo Corporis

Christi. Caput 25. pag. 256.

De Processione vespertina in Festo Af-

sumptionis B. Maria, pro Rege et

Regno. Caput 26. pag. 278.

De Processionibus mensuris, anniver-

sarijs, & alijs similibus. Caput 27.

pag. 282.

De Triduanis & Nouemdiabibus Pro-

cessionibus. Caput 28, pag. 287.

De Processionibus ambarualibus.

Caput. 29. pag. 293.

De Litaniis Sanctorum. Caput. 30. p. 298

De benedictionibus Ecclesiasticis.

Caput 31. pag. 302.

Approbatio Doctorum.

NO s infrà scripti Doctores
Theologi Facultatis Parisien-
sis, è Societate Sorbonica, fidem
facimus, legisse & examinasse li-
brum, cui titulus est, *De Processio-
nibus Ecclesiasticis*, auctore Iacobo
Eueillon, Canonico Ecclesiæ Ande-
gauensis : nihilque in eo fidei Or-
thodoxæ & bonis moribus contra-
rium reperisse; imò Ecclesiæ peru-
tilem iudicasse. Parisijs die 15. Oc-
tobris, anno Domini 1641.

I. Charton,

A. De Machy.



D E
PROCESSIONIBVS
ECCLESIASTICIS.
LIBER.

*De Processionum nomine,
& varietate.*

CAPVT PRIMVM.

PROCESSIONES Christiano more vocantur supplicationes publicæ, quæ fiunt solenni ordine & ritu procedendo ab Ecclesia ad alia loca sancta, seu per Ecclesiam, aut circa eam; vel etiam circa vrbes, vicos, parochias, agros, cœmeteria, &

A

alia eiusmodi: qua ratione à Græcis appellantur *προσδοι*, *προσδοι*, & *προελεύσας*, nonnumquam etiam *εισοδοι*, quando scilicet earum finis est ingressus in Sacrarium: unde *προδοποισι* & *εισοδουεν* in eorum Liturgiis, *processionem agere*, vel, *procedentibus praire*: et in Ordine Romano, *Processores* dicuntur ij, qui simul cum Episcopo procedunt à Secretario ad Altare sacri faciendi causâ, & qui Diaconum antecedunt progredientem ad legendum Euangelium. *Procedere* enim verbum sacrorum est, quod significat, compositè, & grauitè, & cum apparatu incedere: quo verbo innuere voluit Ecclesia, in supplicationibus, non festinanter aut inconditè, sed modestè, ordinatè, & cum religioso quodam decòre ac reuerentia, esse progrediendum. Eadem ab ipsis precibus, quarum causâ institutæ sunt, dicuntur *Litaniae*, idest, *supplicationes*: unde apud Græcos *λιτανίαι*, *processionem obire*. Aliquando etiam *Stationes* appellantur, vt obseruatum est à Durando Rational. lib. 7. c. 1. sumpto nomine à veteri Ecclesiæ Romanæ ritu: quo, cum Statio apud aliquam Ecclesiam haberetur, populus cum Clero in aliam vicinam ædem conueniebat, expectans Pontificem; quo adueniente, solenni ordine inde ad locum Sta-

tionis procedebatur, vt ex pluribus locis Ordinis Romani planum est, ex Anastasio Bibliothecario in vita Leonis tertij, Durando Rational. lib. 4. c. 15. & lib. 7. c. 1. & Onuphrio Panuino in libello de Stationibus vrbis Romæ. Ita processio, quia ad Stationem pertinebat, Stationis nomen sortita est. Processiones enim vt plurimum celebrantur ad ea templa, in quibus Statio publica est, vel ratione Festi solennis, vel specialis sanctitatis loci, vel venerandarum Reliquiarum, vel alias inuocandi patrocini eius Sancti, cuius nomini illa sacra sunt.

Earum alie sunt statæ seu ordinariæ, quæ ex more certis diebus fieri solent: alie imperatiuæ seu extraordinariæ, quæ, pro varietate causarum, seu necessitatum ingruentium, extra ordinem indicuntur aut suscipiuntur. Prioris generis sunt, quæ fiunt in Missa solenni, in Festo Purificationis beatæ Mariæ, feria quarta Cinerum, Dominica Palmarum, feria quinta in Cœna Domini ad consecrationem Chrismatis, & ad lauanda Altaria, in Parasceue ad sanctissimum Sacramentum, Sabbato Paschæ & Pentecostes ad benedictionem Fontis, in Pascha & Paschalibus feriis, in Festo S. Marti, in Rogationibus, in Ascensione Domini, in

4 De Proceſſionibus

Pentecoſte, in Feſto Corporis Chriſti, in diebus Dominicis & Feſtis ſolennibus, quæ verno tempore circum agros & ſata, quæ in primis Dominicis menſium, anniuerſariæ, quæ feriis quartis & ſextis Quadrageſimæ, vespertina in Feſto Aſſumptionis, & aliæ eiufmodi, ſi quæ ſunt Eccleſiarum propriæ.

In poſteriori genere numerantur, quæ ſunt ad agendas Deo gratias pro ſingulari aliquo beneficio, pro pace, pro ſalubritate ſeu ſerenitate æris, pro frugum vbertate & tempeſtiua maturitate, pro pluvia, pro obtinenda victoria, pro remiſſione peccatorum, in deportatione ſeu translatione Reliquiarum, pro Iubilæo ſeu Indulgentiis, pro auerruncanda peſte & morbis popularibus: & cæteræ eiufmodi, quæ, ſeu deuotionis, ſeu neceſſitatis cauſa, quoquo modo extra ordinem celebrantur.

Tertium quoddam genus eſt earum, quæ legitimæ quidem ſunt, & ab Eccleſia conſtitutæ, ſed raro accidunt; vt in Dedicatione Eccleſiæ, in collocatione primarij lapidis pro Eccleſia ædificanda, in aduentu Pontificis vel Regis, in receptione Episcopij, ſeu alterius cuiuſcumque viſitantis Eccleſias, & ſi quæ aliæ ſimiles.

*De ratione & institutione
Processionum.*

CAPVT II.

Religiosa est omnis actio, quæ suscipi-
tur animo colendi Deum, & ei debi-
tum honorem atque obsequium reddendi,
quocumque tandem modo fiat: id est, siue
interno tantum affectu & meditatione
concipiatur, siue externis & sensibilibus si-
gnis edatur; siue palam & publicè, siue pri-
uatim & secretò; siue in templo, siue in
agris aut viis; siue hærendo in eodem ve-
stigio, siue progrediendo & locum mutan-
do; siue stando, siue insistendo genibus;
siue laudando, siue confitendo; siue oran-
do & inuocando; siue sacrificando & offe-
rendo; siue cantu, siue recitatione, aut aliis
cuiusmodi reuerentiæ ac pietatis officiis, quæ
corporis ministerio & operatione exercen-
tur: quam speciem externi cultus Theolo-
gi proprio nomine Adorationem vocant.
Itaque, si natura ipsa rei absolutè spectetur,
quàm antiqua est lex colendi Deum, tam
antiqua est ratio tum colendi processioni-

A iij

bus ac ſupplicationibus publicis, perinde atque aliis actibus piis ac religioſis: ex eodem enim omnes Religionis fonte manant, & ad eandem Dei gloriam ſuapte natura & inſtitutione referuntur: neque eſt aliud proceſſionem agere, quàm procedendo orare, vel orando procedere. Qua in re orationis vocabulum latè accipimus, prout complectitur, non ſolùm petitionem, ſeu poſtulationem & obſecrationem, ſed etiam laudem Dei, & gratiarum actionem. Quin hoc genus orandi uſque adeò proprium eſt Religioni, & quodammodo naturale, ut, quoties, ſive in lege veteri, ſive in Chriſti Eccleſia, publica aliqua neceſſitas incidit confugiendi ad Dei miſericordiam, aut cauſa interceſſit publicæ ſolennitatis ac lætitiæ celebrandæ, communi ſenſu omnium Deum colentium, ac velut natio quodam pietatis inſtinctu, fermè ſemper ad procedendi ritum concurſum fuerit.

Exodi c. 15. etiam ante legem ceremonialem datam, Iſraëlitiæ, attoniti miraculo tranſitus maris rubri, quo diuina virtute ex *Ægyptiorum* perſequentium manibus euaserant, cùm gaudium animis continere non poſſent, ut ſcribit Philo Iudæus libro de vita Moſis, ſolò legis naturalis ductu, alternis choris viroꝝ ac mulierum, illinc Moyſe

diuina spiritu præcinente, hinc Maria eius
sorore, in ipso litore ad quod appulerant,
cum exultatione procedentes ac tripudian-
tes, laudis hymnos & gratiarum actionis
Deo cecinerunt. Iosue c. 6. iidem Israëlitar
Dei iussu urbem Iericho per septem dies
circumeunt, certo ordine ac ritu diuinitus
præscripto religiosè procedentes; Sacerdo-
tibus aliis Arcam deferentibus, aliis ante
eam tubis Iubilati, quas Septuaginta Inter-
pretes sacras appellant, clangentibus; po-
pulo armato acie instructa ante Sacerdotes
incedente, reliqua autem vulgi multitudine
sequente post Arcam, alto cum silentio
more sacrorum, & tacitis votis Dei virtu-
tem implorante; quæ septimo tandem die
apparuit, muris obsessæ urbis ad sonitum
tubarum sacerdotalium, & populi clamo-
rem, illicò omni ex parte collapsis. Libro
1. Regum, c. 10. Prophetarum agmen psal-
lens à templo procedit, præeuntibus can-
toribus, tympano, tibia, & cithara canenti-
bus: quibus Saül superueniens se adiungit
ex consilio Samuëlis, ac diuino spiritu in-
citatus, laudes Dei simul cum illis cundo
canere pergit. Libro 2. Regum, c. 6. & 1.
Paralip. c. 13. & apud Iosephum lib. 7. Anti-
quit. c. 4. indicto per vniuersam Iudæam
publico conuentu, Arca fœderis à Sacerdo-

tibus ex ædibus Abinadab elata, solenni processione deducitur à Dauide & populo Israël à colle Cariathiarim in domum Obededom, nouo plauistro ad maiorem reuerentiam imposita, Ahio Leuita eius custode precedente, Oza verò eiusdem fratre, & ipso Leuita, plaustrum regente; rege autem ac populo ad numerum musici concentus saltantibus coram ea, in omni virtute, in canticis, & in citharis, & psalteriis, & tympanis, & cymbalis, & tubis: et, tertio mense transacto, conuocato vniuerso populo Israël, eadem Arca, pari solennitate, humeris Leuitarum gestata, perducitur in montem Sion, David rege accincto ephod lineo, & compositis motibus ad sacrorum carminum modulos subsiliente; septem choris Sacerdotum ac Leuitarum per varios ordines omni genere musicorum organorum personantibus, & sexto quoque passu, toto itinere, septenos tauros & arietes immolantibus, vt narrat Scriptura lib. 2. Regum c. 6. & 1. Paralip. c. 15. & 16. Denique tertij Regum cap. 8. & 2. Paralip. c. 5. eadem Arca simili processionis pompa transfertur à ciuitate David in templum recens ædificatum, frequenti populi & principum concursu, Sacerdotibus eam consueto ritu portantibus, Leuitis autem omnem paraturam

Tabernaculi, & vasa Sanctuarij, iuxta ordinem à Deo institutum, deferentibus. Rex autem Salomon (inquit Scriptura) & omnis multitudo Israel, quæ conuenerat ad eum, gaudiabatur cum illo ante Arcam, & immolabant oues & boues absque æstimatione & numero: & intulerunt Sacerdotes Arcam fœderis Domini in locum suum, in Oraculum templi, in Sæctum sanctorum. Quam quidem processionem sic describit Iosephus lib. 7. Antiq. Iudaic. c. 2. Tollentes igitur Arcam, & Tabernaculum quod Moyses construxerat, & omnia vasa ad ministerium sacrificiorum Dei parata, transportauerunt in templum. Procedebant autem cum victimis, tum rex, tum vniuersus populus, & Leuitæ, libaminibus & multo hostiarum sanguine viam perfundentes & infinitam vim odoramentorum adolentes, ut circumquaque totus aer repletus, etiam ad eos, qui longè remoti erant, cum suauitate perueniret, & notum faceret, iuxta humanum sensum, Deum aduentare ad inhabitandum recens extructum ac dedicatum sibi domicilium. Nam neque hymnos canentes, neque choroꝝ agentes, donec in templum venerunt, defatigati sunt. Atque in hunc modum Arca est translata. Libro 2. Paralip. c. 20. cum nuntiatum esset Iosaphat regi Iudæ, Moabitarum & Ammonitarum exercitum infestis signis ad se ve-

nire; rex ipſe timore perterritus totum ſe contulit ad rogandum Dominum, & prædicauit ieiunium vniuerſo populo Iuda. Congregatúsque eſt Iudas ad deprecandum Dominum: ſed & omnes de urbibus ſuis venerunt ad obſecrandum eum. Cúmque ſteriſſet Iofaphat in medio cœtu populi in domo Domini, & longa oratione Deum precatus eſſet; Iahaziel Propheta, Deo inſpirante, ita locutus eſt: *Nolite timere, nec paueatis hanc multitudinem: non enim eſt veſtra pugna, ſed Dei: cras egrediemini contra eos, & Dominus erit vobíſcum.* Poſtridie manè, illis inſtructa acie ad hoſtem pergentibus, Iofaphat ſtatuít cantores Domini, vt laudarent eum in turmis ſuis, & antecederent exercitum, ac voce conſona dicerent; *Confitemini Domino, quoniam in æternum miſericordia eius.* Cúmque cœpiſſent laudes canere, vertit Dominus inſidias eorum in ſemetipſos, filiorum ſcilicet Ammon & Moab, qui egreſſi fuerant vt pugnarent contra Iudam, & percuſſi ſunt. Die autem quarto, exercitu victore in valle benedictionis congregato, reuerſus eſt omnis vir Iuda, & habitatores Ieruſalem, & Iofaphat ante eos, in Ieruſalem cum lætitia magna; ingreſſique ſunt in Ieruſalē, cum pſalteriis, & citharis, & tubis, in domum Domini. Li-

bro 2. Esdra, c. 12. post reditum populi Iudaici è captiuitate Babylonica, vrbe Ierusalem, quæ euerfa fuerat, inftaurata, Nehemias Dedicationem eius celebrauit hoc ritu. Sacerdotes & Leuitæ, ex omnibus locis fuis euocati, cum ritè mundati eſſent, populum quoque & portas & muros ſolenni ordine purificauerunt. Deinde, iis in duos magnos choros laudantium diuiſis, alter ad dextram, alter ex aduerſo ad ſiniſtram, procedentes, mœnia vndeque obierunt, in actione gratiarum & cantico, & in cymbalis, pſalteriis, & citharis, & tubis; hos antecedente Eſdra, optimatibus autem & parte populi ſequentibus; illos verò ſequentem ipſo Nehemia cum altera parte principum ac populi; donec tandem, ſibi inuicem occurrentes, perueniunt in templum, vbi ſtantes mutuo concentu laudes Dei celebrauerunt, &, oblatiſ victimis, vota Dedicationis impleuerunt.

En igitur in veteri Teſtamento, variis temporibus, ante legem, & poſt legem, publicæ proceſſiones cum religione ſuſceptæ atque peractæ, ex mandato Dei, & conſilio ſeu denuntiatione Prophetarum ac ſanctorum virorum; en conuentus ad ſupplicandum publicè indiſti, & ab omni genere hominum celebrati; en in procedendo certus

ordo, certique ritus ac cæremoniæ; en preces, en hymni & cantica; en Sacerdotes & populi loco ac functione diſtincti; en cantus, & canentium chori diuerſi; en muſica inſtrumenta iis adhibita; en progreſſio continua, en ſtationes inter procedendum per interualla factæ; en ſupplicationes, aliæ incedentes directo itinere, aliæ per circuitum; en Arca fœderis cum reliquiis in ea recôditis à Sacerdotibus delata; en ferula vaſorû ſacrorum cum honore geſtata; en thurificationes, en ſacrificia; en ex templo diſceſſio ſupplicantium, en in templum com meatio ac reuerſio; en proceſſiones, aliæ in gratiarum actionem inſtitutæ, aliæ ad Reliquiarum translationem, aliæ ad celebritatem Dedicationis, aliæ ad propulſandam vim hoſtium; en ante proceſſionem præmiſſæ expiationes & purificationes, tum perſonarum, tum locorum, ex aqua ſcilicet aſperſionis, de qua Numerorum c. 19. Quid igitur in noſtris proceſſionibus deſiderari poſteſt, quod non habeat in ſacris literis, aut inſtitutionem, aut exemplum?

Habet verò etiam inſignem quandam ſpeciem proceſſionis eccleſiaſticae egreſſio illa populi Ieroſolymitani in occurſum Domini Seruatoris, quæ deſcribitur Matth. c. 21. Marci II. Lucæ 19, & Ioan. 12. Quam

uis enim neque auctoritate publica facta fuerit, neque certo consilio aut condita, aut indita: tot tamen circumstantiis illustrata fuit, vt hoc nomine non incongruè possit appellari. Et certè ita eam appellauit, procedendique rationem exposuit, S. Bernardus in tribus Sermonibus de Dominica in Ramis Palmarum. Etenim concursus ille publicus omnis generis hominum, effundentis se extra ciuitatem; festiua omnium alacritas; ordo, aliorum antecedentium Christum, aliorum sequentium; solum ramis virentibus & vestibus occurrentium constratum; palmæ & oliuæ in manibus; concentus turbarum gaudentium laudare Deum voce magna; deductio Christi in tēplum; acclamationes illæ, tum per viam, tum in templo, quæ & preces & laudes Dei continebant, *Hosanna filio David, Benedictus qui venit rex in nomine Domini, hosanna in altissimis, pax in cælo, & gloria in excelsis*; nonne hæc omnia magis religiosæ pompæ, quàm officiosæ salutationis, significationem præferunt? Certè ex imitatione huius concursus in consuetudinem venit, vt Ecclesia obuam prodiens aduenientibus Regibus, Legatis, Episcopis, Archidiaconis, & aliis visitationis officio fungentibus, eos processionaliter excipiat.

Preclarè Tertullianus in Apologetico, c. 39. *Corpus sumus de conscientia religionis, & disciplina unitate, & spei fœdere: coimus in cœtum & congregationem, ut ad Deum, quasi manu facta precationibus, ambiamus orantes.* Cum enim Ecclesia sit corpus religionis visibile, postulat ratio cultus diuini, ad quem ordinatur, & fœdus illud sanctæ societatis, quam inter se habent omnia eius membra, ut sæpe fideles in vnum conueniant, coniunctis votis, & communibus pietatis officiis, Deum vnanimiter veneraturi, aspectabili ritu in mutuam ædificationem. Vnde, quemadmodum in ipso sui ortu atque exordio omne religionis exercitium in conuentibus celebrandis posuit: ita loca ipsa, ad quæ fideles orandi & adorandi causâ conueniebant, iam tum Ecclesiarum, id est conuentuum, nomine appellauit. Conuentus autem Christianorum ad sacra & preces in duplici sunt genere: alij statarij, quibus in eodem loco consistendo oratur, vnde iis in primitiua Ecclesia, Stationum appellatio tributa est: alij verbambulatorij, in quibus supplicationes fiunt eundo & progrediendo; vnde Processiones nominantur: nam & hæ conuentus Ecclesiæ dicuntur à S. Augustino

Serm. 173. de tempore, & à Cæsario Arelatenſi homil. 37. de Litania. Ac primis quidem temporibus in vſu fuerunt tantum cœtus ſtatarij: quia, propter perſecutiones Gentilium, non poterant Chriſtiani in publicum cum apparatu & pompa Religionis prodire. Ex quo factum eſt, vt, quemadmodum publicè templa non habuerunt, donec Constantini lege licuit eis publicos conuentus Chriſtiano ritu agere; ita ad id vſque tempus proceſſiones publicas celebrare non potuerint. Sed ab eo tempore frequens & celebris earum apud omnes gentes vſus fuit, vt paſſim tum Græcæ tum Latinæ hiftoriæ teſtatum faciunt. Et credibile eſt, Dedicationem nouæ Romæ, ſeu Conſtantinopolis, non aliter factam ab Episcopis, quos ipſe Conſtantine ea cauſâ è Concilio Nicæno aduocauit, apud Nicephorum lib. 8. hift. Eccleſ. c. 26. quàm ſolenni ordine proceſſionis vrbiſ muros circumeundo, ad exemplum Dedicationis vrbiſ Ieruſalem lib. 2. Eſdræ c. 12. qui eſt legitimus & ab Eccleſia vſitatus ritus Dedicationis, vt cernere eſt in exemplo ciuitatis Leoninæ apud Anaſtaſium Bibliothecarium in Leone 4. & patet ex Ordine Romano, ex Pôſticali, & perpetuo vſu omnium ſæculorum.

Certè antiquissimæ fuerunt illæ Festorum solennium ad Ecclesiam in qua habebatur statio, de quibus scribit Ordo Romanus, c. 1. 3. & 4. & in Purificatione Beatae Mariæ, & in die sancto Paschæ, quarum forma à nobis refertur inferius c. 15. Et harum similitudinem gerunt quæ diebus Dominicis & Festis solenni more fiunt ante Missam publicam, & quæ vulgò diriguntur ad eas Ecclesias in quibus celebratur aliqua solennitas, vel statio Indulgentiarum: cuiusmodi est illa cuius meminit S. Ambrosius epist. 29. *processio Monachorum, qui, prohibentibus iter Valentinianis, Psalmos canentes ex consuetudine vsuque Veteri, pergebant ad celebritatem Machabæorum Martyrum.* Antiquissimæ quoque, quas imperantibus Iuliano, Theodosio utroque, Arcadio, & Martiano, factas memorant Scriptores historię Ecclesiasticæ variis locis: item quæ in Actis Concilij Ephesini referuntur, tomo 2. c. 19. & de quibus sanctionem fecit Iustinianus Nouella 123. de sanctissimis Episcopis: itémque illæ quarum meminit S. Augustinus lib. 22. de Civitate Dei, c. 8. & serm. 173. de tempore, & S. Leo epist. 81. c. 2. Antiquissima Litanía minor, quam Ado Viennensis in Chronico institutam scribit circa

annum Domini 452. Antiquissima Litania maior, quæ S. Gregorium Magnum habet auctorem.

Quarum omnium exemplis insistentes posteriorum ætatum pastores & populi, eandem religionem supplicandi ad nos usque perpetua successione transmiserunt. Nam, ut omittam eas supplicationes quæ singulis Festis ratione mysteriorum adiunctæ sunt, & quæ statis diebus quotannis renouantur; in more semper fuit, ut in publicis gratiarum actionibus, & aliis eiusmodi celebritatibus, atque adeo in communibus periculis, calamitatibus, & necessitatibus, ad hoc genus orandi confugeretur: in translatione & deportatione sanctarum Reliquiarum, apud Socratem Eccles. hist. lib. 2. c. 16. Theodoretum lib. 3. c. 9. Sozomenum lib. 5. c. 18. & lib. 7. c. 10. Euagrium lib. 1. c. 16. S. Hieronymum libro a iuersus Vigilantium, S. Augustinum dicto libro 22. de Ciuit. c. 8. in Concilio Nicæno secundo, Actione 4. apud Gregorium Turonensem lib. 4. hist. Franc. c. 40. & lib. 1. de gloria Mart. c. 44. & passim in Vitis Sanctorum apud Suerium: ad venerationem sanctæ Crucis, apud Euagrium lib. 4. c. 25. & Nicephorum lib. 17. c. 15. Codinum de offic. Constantin. c. 65. Nicephorum Gregoram lib. 8. in Meno-

logio Græcorum prima die Augusti : ad placandam iram principis, apud Nicephorum lib. 12. c. 43: ad sedandam pestem, apud Eustathium in vita S. Eutychie, Gregorium Turonensem lib. 4. hist. Franc. c. 3: pro obtinenda pluuia, apud Cyrillum in Actis vitæ S. Euthymij, & Marcum Gazæum in vita S. Porphyrij : pro serenitate aëris, apud Socratem lib. 7. c. 22. Nicephorum lib. 14. c. 3. Anastasium Bibliothecarium in Adeodato : contra inundationes fluminum, apud eundem Anastasium in Gregorio secundo: ad compescendum terræ motum, apud Nicephorum lib. 14. c. 46: contra hostes imminentes, apud Euagrium lib. 4. c. 25. Rufinum lib. 2. c. 33. Sidonium lib. 7. epist. ep. 1. Sanctum Gregorium Magnum ep. 45. lib. 9: in obsidione vrbs, apud Gregorium Turonensem lib. 3. hist. Franc. c. 29. & in Triodio Græcorum: in collocandis fundamentis Ecclesiæ vel Monasterij, Iustiniani Nouella 67. & apud Marcum Gazæum loco citato : in solennitate Dedicationis, apud Cedrenum in Iustinianno, & Anastasium Bibliothecarium in Leone quarto: aduersus hæreticos, apud Socratem lib. 6. c. 8. Sozomenum lib. 3. c. 8. & Nicephorum lib. 13.

De ordine & apparatu
Processionum.

CAPVT III.

Ecclēsia, cum sit acies Dei viuētis, tunc maximē debet esse ordinata, cum instructo agmine procedit ac progreditur non tantum ad speciem & decorem diuini cultus, quem celebrat, aut dignitatem sponsæ, quæ progreditur quasi aurora consurgens, pulchra ut luna, electa ut sol; sed etiam ad ædificationem videntium, & terrorem inimicorum; aduersus quos pugnam instituit cum supplicationes publicas obit; ut appareat in conspectu eorum terribilis velut castrorum acies ordinata. Idcirco, quem ordinem tenet in templis, vbi statariæ cœtus religionis causâ celebrantur, eundem in processionibus, seu extra templa, seruare consuevit. Templâ autem Christiana tribus omnino partibus constant; Sanctuario seu Altari, in quo præsentia diuinæ maiestatis exhibetur; Choro, in quo Sacerdotes & clerici laudes Dei hymnis assiduè celebrant ad imitationem cœlestium spirituum, & preces pro vniuerso populo fundunt.

naui, qui populi orantis locus eſt. Sic proceſſio velut templi ambulantis ſpeciem habet. In prima acie ſunt cruceſ pro Sanctuario, quas qui ſequuntur intuentes, in Chriſto crucifixo Deum præſentem cernunt, vñ cum modestia ac deuotione incedant, & cum ſanctè ac reuerenter adorent. In ſecunda acie collocatur robur exercitus, nempe Sacerdotum & Eccleſiaſticorum miniſtrorum turmæ: qui duplici ordine diſtincti, laudes Dei, tum alternis, tum coniunctis vocibus modulantur, & qualiſ interuen- tores medij inter Deum & populum, huius vota & preceſ offerunt. Extreum agmen claudunt laici vtriuſque ſexus, ſilentio orantes. De Sanctuario primo loco dicendum.

*Cru*x (inquit Durandus lib. 4. Rational. c. 6.) *quaſi regale Vexillum, & triumphale ſignum, in proceſſionibus præmittitur: primo, vt fugiant qui oderunt eum a facie eius, Pſal. 67. Eſt enim ſignum victoriæ Chriſti, iuxta illud, Vexilla regis prodeunt, quo Dæmoneſ victi ſunt, vnde illo viſo timent & fugiunt: & propter hoc in quibuſdam locis tempeſtatibus aeris opponitur, vt Dæmoneſ fugiant, & ab aeris concitatione deſiſtant. Et paucis interie- ctis: Secundo crucis Vexillum præmittitur, quia, ſicut ait Apoſtolus ad Galatas, Abſit nobis gloriari, niſi in cruce Domini noſtri Jeſu*

Christi, per quem mundus nobis, & nos mundo crucifigi debemus. Addo & tertiam rationem: quia, cum processio Ecclesiam in hoc mundo peregrinantem & militantem significet, æquum est eam sub Christi Imperatoris signis ad bellum procedere, cuius auspiciis militat. Ea de causa, ex quo per legem Constantini Magni licuit Christi militibus copias suas in publicum explicare, & aperta fidei professione pro gloria Crucifixi dinicare, præferri cœperunt cruces pro signis in omnibus processionibus ecclesiasticis. Causam huic rei dedit victoria eiusdem Constantini de Maxentio, eadem quæ Imperium ex Gentili Christianum fecit. Cùm enim ille consilium cepisset Romæ à tyrannide Maxentij, & aliorum à quibus opprimebatur, vindicandæ; & superiorum Imperatorum, qui Deorum multitudinem coluerant, omnes ea in re tentanda conatus irritos celsisse animaduverteret, ad vnicum Deum, quem pater Constantius coluerat, confugiendum sibi esse duxit. Itaque eum obtestatus, vt qui esset sibi significaret, opemque ad rem conficiendam præberet; claro meridie vidit in cœlo crucis signum admirabili quodam splendore supra solis orbem affulgens, inque eo hæc verba Græcis literis inscripta, *Εν τούτῳ νικά*, In hoc vin-

ce. Quo viſo anxius cum ſuperueniente nocte obdormiſſet, Chriſtus ei ſecundum quietem apparuit, cum eodem ſigno quod ipſe per diem in cœlo erat conſpicatus: iuſſitque eiſdem effigiem in bello deferre, quoties ſignis collatis eſſet cum hoſte dimicaturus. Qui, vt primùm illuxit, accerſitis præſtantiſſimis artificibus, crucem ad illius cœleſtis ſimilitudinem, intexto auro, & gemmis inſertis, fieri iuſſit in hanc ſpeciem. Haſtile erat oblongum, auro vndique obductum, tranſuerſo ligno in modum crucis impoſito: in cuius ſummo faſtigio corona eminebat ex auro & lapillis pretioſis affabrè implexa, in qua ſalutare Chriſti nomen, duabus primis literis X & P inter ſe conſerſis expreſſum, cernebatur: ex tranſuerſario autem ligno appenſum erat velum quoddam purpureum, admirabili textura lapillorum varij generis, inductoque auro refulgens; de quo Prudentius lib. i. contra Symmachum,

Chriſtus purpureum, gemmanti textus in auro,

Signabat labarum:

huic enim vexillo labaro nomen fuit. Atque, hoc ſigno deinceps Imperator, tâquam munimento firmiſſimo, aduerſus omnem viſum hoſilem uſus eſt, ad cuiusque ſimilitu-

dinem facta vexilla omnibus exercitibus suis præferri sanxit; ut refert oculatus testis Eusebius lib. 1. de vita Constantini, c. 20. 21. 22. 23. 24. & 25. & apud Surium Acta martyrij S. Artemij, qui & ipse rei gerendæ interfuit.

Ex illo tempore, non tantum crux vexillifera ad modum labari, sed etiam aliæ cruces argenteæ processionibus sacris, tanquam propria Christianæ militiæ signa, præferri consueverunt; vexillo scilicet in locum labari, crucibus argenteis in locum aquilarum argentearum succedentibus, quæ erant militaria signa legionum Romanarum. Legitur eius rei exemplum in processionibus à S. Ioanne Chrysostomo institutis contra Arianos paucis annis post Constantinum, apud Socratem lib. 6. c. 8. Sozomenum lib. 8. c. 8. Nicephorum lib. 13. c. 8. & in processionibus S. Porphyrij Episcopi Gazensis, in eius vita scripta à Diacono suo Marco apud Surium in Febuario; in vita Theodori Archimandritæ per Georgium presbyterum, ubi refertur eam esse consuetudinem Ecclesiasticam; in Concilio Nicæno secundo, Actione 4. in antiquo Concilio Nannetensi, c. 5. in Iustiniani Nouella 123. c. 32. apud Gregorium Turo-nensem libro de vitis Patrum, c. 7. lib. 1. de

gloria Martyrum, c. 44. & de gloria Confeſſ. c. 79. ac deinceps in ſubſequentium ſæculorum Scriptoribus. In Eccleſia Andegauenſi nonnumquam præferuntur duæ cruces: in proceſſionibus S. Marci, & Rogationum, aliſſque inſignioribus tres.

Neque verò proceſſionum Sanctuarium ſola cruce ſacratum eſt: ſed, quemadmodum olim in Arca Sanctuarij Moſaici reconditæ erant legis diuinæ tabulæ (lib. 3. Regum, c. 8. & Epit. ad Hebræos c. 9.) atque ex circumferebantur ſimul cum Arca in publicis eius deductionibus; ita ex vetere Eccleſiæ inſtituto liber legis gratiæ, id eſt, ſacri Euangelij, religioſe detertur à Diacono poſt crucem in proceſſionibus Chriſtianis; vt pro teſtimonio antiquitatis habetur multis locis in Ordine Romano, in exemplo S. Porphyrij loco citato, vbi Episcopuſ ipſe Euangelium geſtat, apud Hincmarum in vita S. Remigij, apud Codinum lib. de officio Conſtant. c. 1. vbi *Præſectus Euangelio* appellatur iſ, qui tenet Euangelium ad publicas ſupplicationes, & c. 10. vbi Archidiaconuſ gerit Euangelium in proceſſione Palmarum; & eius rei hic exempla ſunt c. 4. & 10. Conſuetudo eſt apud nos, vt in celebrioribus proceſſionibus generalibuſ ciuitatis, non tantum Eccleſia Andegauenſis, ſed

singulæ Collegiatæ, vt propriam crucem, ita & proprium Euangelium præferant.

Adduntur etiam sæpe in processionibus Reliquiæ Sanctorum, præcipuè in solennioribus, tum ordinariis, tum indistinctis: vt cerere est in Ordine Romano, & Antiphonario S. Gregorij; & exempla sunt in processionibus S. Porphyrij supra, & apud Gregorium Turonensem lib. de gloria Confess. c. 79. & passim apud Auctores. Sed Concilium Mediolanense quartum, c. *Quæ ad sanctissimum Eucharistiæ Sacramentum pertinent*, vetat eas deferri in solenni illa processione, in qua sanctissimum Domini Corpus religioso cultu circumgestatur: ne scilicet eas plebs imperita pro sanctissimo Sacramento, vel eodem honore quo sanctissimum Sacramentum, imprudens veneretur.

Crucem antecedunt cerei ardentes, ex antiquo more Ecclesiæ, vt constat ex processionibus S. Ioannis Chrysostomi, & Gregorio Turonensi, lib. 1. de glor. Mart. c. 44. & 51. non tantum ad honorem sanctæ Crucis, cuius virtus toti mundo illuxit, sed præcipuè propter Euangelium quod sequitur. Est enim Christianis in via ad patriam, cuius symbolum est processio, Crux pro duce, Euangelium, id est doctrina Christi, pro

luce præeunte; ne à recto itinere, aut propria ignorantia, aut occurrentium viarum, id est conſiliorum ambiguitate, aut mundi illecebris, aut peruerſorum hominum ſeductione, aberrant. Et crux quidem præit, velut exemplar praxis Euangelicæ doctrinæ, ſtans in ſignum populorum, iuxta prophetiam Iſaiæ c. 11: vt qui ſubſequentur omnes intelligant Chriſtum ex ea, tanquam ex cathedra, docentem, *Qui vult venire poſt me, abneget ſemetipſum, & tollat crucem ſuam, & ſequatur me*: hæc enim eſt recta & compendiaría via ad ſalutem, & ſumma perfectionis Chriſtianæ. Quod forſan reſpexerunt, qui olim cereos & lucernas ipſi Cruci impoſitas tulerunt in proceſſionibus, vt videre eſt in iis quas retulimus de S. Ioanne Chryſoſtomo, & apud Gregorium Turonenſem lib. de gloria Conf. c. 79. Et ad hanc ſignificationem ſpectat mos antiquus Græcæ Eccleſiæ apud Cōdinum libro cit. c. 12. quo, in Officio veſpertino Vigiliæ ſanctæ Paraſceues, quod ad paſſionem Domini pertinet, dum leguntur duodecim Euangelia, Imperator & aulici omnes cereos ardentes manibus geſtant. Huc referenda eſt explicatio quæ habetur inferius c. 5. & 6. de cereis Euangelio prælucentibus.

Præfertur cereis vas aquæ benedictæ

cum aspersorio, ex constitutione Concilij Nannetensis, c. 5: vt eius aspersione purificetur obuius quisque, & simul loca per quæ transitur, ad effugandam omnem potestatem inimici. Ideo, quemadmodum in templis ad ostium collocatur labrum aquæ benedictæ, vt qui ad sacra veniunt, in ipso adiutus sanctificentur: ita in fronte & quasi vestibulo processionum præfertur aquam anile sacrum, vt qui se per viam supplicantibus volunt adiungere, eius aquæ lustratione prius expientur.

Campanulæ manuales ex ære, quæ ante signa clangere solent, tubarum argentearum veteris Testamenti locum tenent; quarum vsus erat ad conuocandum populum, & dandum signum processionis quoties castra mouenda essent, Numer. c. 10. Et certè forma non absimili constata sunt, si attendatur descriptio tubarum illarum, quæ habetur apud Iosephum lib. 3. Antiquit. c. 11. Hæ verò significant præcones Euangelicæ veritatis, siue diuini verbi prædicatores, qui sono vocis suæ ad fidem & Ecclesiæ congregationem quoslibet obuios vocant: & in processionibus pulsantur, vt qui earum sonum audierint, ad supplicandum simul cum aliis inuitentur, sicut illæ quæ in templorum turribus suspensæ signum dant fidei;

libus conueniendi ad ſacrâ & orationem publicam. In Concilio Nicæno ſecundo, in celebri illa proceſſione translationis reliquiarum S. Anaſtaſij Martyris, quam ſuperius inſinuauimus, ſigna pulſantur, non ærea, ſed lignea, quæ ibi appellantur *ligna ſacra*, cuiusmodi illa ſunt quibus vtimur in diebus tenebrarum: & huiusmodi ſignorum ligneorum dicitur uſus etiamnum perſeuerare in Eccleſia Græca, de quo Amalarius lib. 4. de Eccleſiaſt. offic. c. 21. *Adhuc iunior Roma, quæ antiquis temporibus ſub vno Domino cum antiqua Roma regebatur, uſum lignorum tenet, non propter æris penuriam, ſed propter vetuſtatem.*

Portatur etiam aliquibus in locis Dracōnis effigies ſimul cum cruce & vexillo in quibuſdam proceſſionibus, vt putà in Litania maiore & Rogationibus: pro qua laborant nonnulli vt myſticas explicationes comminiſcantur. Sed nimis quàm probabile eſt mea quidem ſententia, iſtius generis ferculum obrepiſſe in ſupplicationes publicas, errore vulgi magis, quàm certa illa ratione, aut inſtitutione Eccleſiaſtica. Neque enim, ſi tale portentum auctoritate Eccleſiæ introducitur foret, ad ſignificandum (vt fabulantur) Dæmonem à Chriſto deuiſtum, ſublimis & elatus portandus eſſet

Draco, hianti ore & minaci quasi victor; aut floribus & fertis redimitus quasi sacra quæpiam & veneranda imago; sed terræ afflictus ad pedes Crucifixi, ad eum modum quo sub pedibus calcantis & proterentis Michaelis Archangeli effingi in templis solet: vel quo Constantinus imaginem suam in tabula depictam pro foribus palatii proposuit, victrici signo crucis in vertice capitis prominente, sub pedibus autem strato Dracone, labari cuspide transfixo, & fluctibus obruto: qua descriptione symbolicè adumbrabatur, Draconem antiquum, Idolatriæ principem, ab ipso Constantino virtute crucis prostratum, confossum, & submersum fuisse, iuxta prophetiam Isaia c. 27. *In die illa visitabit Dominus in gladio suo duro, & grandi, & forti, super Lenian serpentem vectem (id est, in longum protensum instar vectis) & super Lenian serpentem tortuosum: & occidet eum qui in mari est.* Ad quam imaginem allusit Prudentius libro *de Expositio*, Hymno 1. loquens de duobus Draconariis, qui è militibus Gentilium Christiani facti, crucem in exercitu pro Dracone ferebant, his versibus:

*Proque ventosis Draconum, quos gerebant,
pallis,*

*Præferunt inſigne lignum, quod Draconem
ſubdidit.*

Si, inquam, ſublimis ad pompam in ſuppli-
cationibus portandus eſſet Draco, eo habi-
tu ac ſpecie iacens exponendus eſſet, quo à
S. Gregorio Nazianzeno deſcribitur in ip-
ſius epitaphio, Orat. 42. *Vbi eſt (inquit)
mors, ſtimulus tuus? Vbi tua, inferne, victo-
ria? Crux te proſtrauit, vita auctor tibi necem
attulit. Exanimus es, mortuus, immobilis, iners,
ſerpentis licet figuram ſerues, in ſublimi loco
quaſi in columna publica, dedecoris & ignomi-
nie notis inuſtus.* Deinde quid cauſæ eſt, cur
Draco iſte in Litania maiore & Rogationi-
bus potius quàm aliis proceſſionibus defe-
ratur? nonne æquè in omnibus triumphatur
Dæmon à Chriſto crucifixo?

Videntur error iſte natus ex nomine Dra-
conariorum. In militia Romana, ſingulæ
legiones ſuam aquilam habuerunt pro ſigno
militari; ſingulæ cohortes draconem, ſeu
draconis ſpeciem in vexillo expreſſam, iux-
ta deſcriptionem Ammiani Marcellini lib.
26. & Prudentij in ſupradiſtis verſibus,
quam Græci vocant *δρακόντιον*. Vnde, ſi-
ent qui aquilam portabant, Aquiliferi, ſic
qui Draconem, *Draconarij* appellati (Græ-
cis *δρακοντοφόροι*) vt docent Vegetius de
re militari lib. 2. c. 7. & 13. & Modestus libro

de vocabulis rei militaris. Sed, sublati tandem è militia Draconibus, inque cruce mutatis, mansit appellatio Draconariorum pro quibusvis signiferis; sicut Draconis nomen plerumque pro alio quouis genere vexilli usurpatur, vt apud Ionam Aurelianensem initio libri 2. de cultu imaginum, pro labaro, in his verbis: *Exinde signum* (loquitur de Constantino) *quod de cælo sibi fuerat demonstratum, in militaria vexilla transformat, ac labarum, quem dicunt Draconem, in speciem Crucis Dominica exaptat; & ita armis vexillisque religionis instructus, aduersum impiorum arma proficiscitur: & similiter in his verbis Prudentij è libro 2. contra Symmachum,*

— cecinere tubæ, prima hasta

Draconis

Præcurrit, quæ Christi apicem sublimior effert:

quæ Baronius interpretatur de labaro. Vnde in Ordine Romano Draconarij dicuntur, qui signa portant in processione ante Pontificem. Putarunt igitur, vt coniectamur, qui id ignorarunt, Draconariorum gestamen in processionibus debere esse Draconis imaginem, vt in militia Romana fuit; atque ita, sapientes in oculis suis, eam vexilliferis Ecclesiasticis portandam im-

suerunt. Faut opinioni eorum forsā Dra-
co ille, qui aquarum vi raptatus in agrum
Romanum, vniuersæ regioni pestem intul-
lit; cuius causâ S. Gregorius Magnus dici-
tur Litaniam maiorem instituisse. Sed à ne-
mine Historicorum est proditum, sanctissi-
mum Pontificem tam populariter & otiose
in negotio religionis egisse, vt, in summa
omnium ordinum consternatione, tam hor-
rendi prodigij simulacrum populi Romani
oculis objiceret: neque, si id verum foret,
posset Draconis gestatio ad Rogationes,
aliâve quascumque processiones trahi, qua-
rum institutioni & mysterio nullo modo
conuenit. Addimus, nullam de hac Dra-
conis deportatione mentionem in antiquis
Auctoribus haberi, nullum vsquam eius in-
stituendæ aut institutæ monumentum. Rem
tamen in medio relinquimus, vt de ea quis-
que, prout vult, sentiat: quandoquidem
præclarissimarum Ecclesiarum vsum, si quæ
huiusmodi ferculum inter sacra gerere so-
lent, damnare, nostrineque consilij, neque
iuris est.

Secunda pars processionis Ecclesiasticæ
est Chorus sacerdotalis: cuius ordo est, vt
statim post signa & Euangelium incedant
pueri symphoniaci, & subinde inferiores
clerici ac ministri, postremo loco qui sunt
digniores:

digniores. Sed in Ecclesia Andegauensi hic ordo inuertitur feria quarta Rogationum. Nam, redeunte processione, Dignitates seu Personæ crucem propius sequuntur, & deinceps antiquiores Canonici succedunt suo quisque loco; in extremo autem agmine honoratiorem locum tenent iuniores, & receptionis ordine posteriores. Id verò pertinet ad mysterium Ascensionis, quæ tunc imminet: vt intelligant qui præsumunt & honores gerunt in Ecclesia, sibi eo magis impositam esse disciplinam humilitatis, & crucis ferendæ post Christum, quo aliis se sciunt gradu & dignitate anteire: & eos demum Christo propinquiores futuros in cæli ascensu, & cælestis gloriæ sortitione, qui se magis infra alios voluntaria animi demissione abiecerint, iuxta sententiam Domini Lucæ c. 22. *Qui maior est in vobis, fiat sicut minor; & qui præcessor est, sicut ministrator.* Eundem ordinem seruauit S. Bernardus in processione Purificationis B. Mariæ, Serm. 2. de eiusdem Festo, vbi etiam consequenter explicat, quare bini in processionibus incedant Ecclesiastici. *Ad hæc (inquit) futuri sunt in processione nostra nouissimi primi, & primi nouissimi: & cantabimus in viis Domini, quoniam magna est gloria Domini. Merito sanè bini & bini procedunt.*

mus: sic enim ad commendationem fraternæ charitatis, & socialis vitæ, missos à Salvatore Discipulos Euangelia sacra testantur. Turbat processionem, si quis solitarius incedere curat: nec sibi soli nocet, sed etiam ceteris cū molestus. Hi sunt qui segregant semetipsos, animales spiritum non habentes, nec solliciti seruare unitatem spiritus in vinculo pacis.

De ordine, deuotione, & modestia Clerici in processionibus, sic statuit Concilium Mediolanense primum, c. de process & supplic. Omnes ordines grauitè & modestè procedant, colloquiisque exclusis, psalmis, hymnis, & reliquis sacris precibus, operam dent. Nemo ordinem in processione deserat, antequam ad Ecclesiam, vnde profecti sunt, redierint. Laici a Clericis, feminae a viris, separatim prosequantur. Videant Episcopi, ut in supplicationibus & processionibus quibuscumque, præsertim cum sanctissima Eucharistia circumferitur, & cum frequentior populus ad Ecclesias, Indulgentiæ, Festi, sacra concionis gratia, vel alia de causa conuenire solet, ea modestia & reuerentia adhibeatur, quæ piis & religiosis huiusmodi actionibus maxime debetur. Ne inter viam inaniter spectandi gratia subsistatur. Ne petulanti factò dictòve cuiquam molestia afferatur. Ne, quæ minus decant, spectacula adhibeantur; nève actiones

pro foribus aditum, aut in via, represententur. Concilium Mediolanense secundum, decreto 9. Clericus, cum in aliquam Ecclesiam, vel ad processiones, vel ad stationes obeundas, vel ad finis conuenerit, illud meminerit, se esse in domo Dei sancta, quæ domus est orationis. Quare nullus cuiusvis ordinis Clericus, aut Sacerdos, in Ecclesia deambulet; nec in confabulationibus & congressibus eo loco indignis versetur: sed unusquisque, aut solus, aut comitibus sociisque aliis adiunctis, religiosas preces Deo in causa adhibeat, quamobrem Clerus vniuersus conuocatus est. Concilium quartum Mediolan. c. de processionibus. Clerici omnes, sæculares & regulares, & qui in basilica Cathedrali Dignitates obtinent; bini semper procedant: neque item inter Episcopum & eosdem laicis locus sit.

Tertia & extrema pars processionis complectitur laicos, de quibus in hunc modum statuit Concilium Turonense vltimum, c. de Christi fidelibus laicis. Certis testimoniis cum didicerimus, plerisque in paræciis prauam illam inualuisse consuetudinem, vt in litaniis & processionibus, quæ Deo supplicandi & preces offerendi gratia ab antiquis patribus instituta sunt, misceantur ludi, ioci, choreæ, comessationes, & alia ridicula actiones, unde contentiones oriuntur: Ecclesiarum paræcia-

lium Rectores, quantum possumus, in Domino hortamur, ne huiusmodi, quæ Deum Optimum Maximum ad iram potius prouocant, quàm orationes in his processionibus fusa ab eo petita impetrent, in suis paræciis fieri sinant: imò magis suos paræcianos ab his abstinere, etiam sub anathematis pœna, moncant; eosdem in dictis processionibus, viris a mulieribus separatis, ordinatè, deuotè, & modestè procedere, non verò inuicem confabulari, sed preces suas Deo, qua decet humilitate, offerre docentes & commonescentes. Dignum etiam est quod hîc addatur Decretum Concilij Mediolanensis quarti de officio laicorum, loco citato. Quod in multis huius prouinciæ locis religiosæ consuetudinis est, retinere, aut, si ubi non est, introducere Episcopi studeant: Ut omnes, tum mares, tum feminae, sacro solennitatis sanctissimi Corporis Domini religiosoque die, eam processionis celebritatem, non è fenestris, neque omnino è superiori loco inspiciant, sed eam prosequantur omni pia religiosaque venerationis studio. Idem præterea curent de aliis publicis processionibus: cum illas omnes populum supplicem prosequendo piè obire institutum sit. Sed illud in primis notatu dignum quod eodem loci habetur: Musicis cuiusvis generis instrumentis in processionibus sonari, ne vllò modo permittatur. Sed hoc da-

tum est apud nos tolli processioni quæ fit in Festo Corporis Christi, ut eorum concentus illi adhibeatur, ad imitationem populi Israëlitiæ Arcam omni genere cantus celebrantis, ut infra suo loco dicitur c. 25. & iam superiori capite è Scriptura recitatum est.

Pertinent etiam ad conseruationem ordinis processionum sacrarum duo capita 31. & 32. Nouellæ Iustiniani Imperatoris 123. superius citata pro crucibus, & earumdem antiquitate, quæ his verbis concepta sunt. Si quis, cum sacra ministeria celebrantur, in sanctam Ecclesiam ingrediens, Episcopo, aut clericis, aut ministris aliis Ecclesiæ, iniuriam aliquam inferat: iubemus hunc verbera sustinere, & in exilium mitti. Si Verò hac sacra ministeria conturbauerit, aut celebrare prohibuerit, capitaliter puniatur: hoc ipso & in litanis, in quibus Episcopi aut clerici reperiuntur, custodiendo. Et, si quidem iniuriam solum fecerit, is verberibus exiliòque tradatur. Si Verò etiam litaniam concusserit, capitale periculum sustinebit: & vindicare iubemus non solum ciuiles, sed etiam militares Iudices. Omnibus autem laicis interdiciamus litanias facere sine sanctis Episcopis, & qui sub eis sunt reuerendissimis clericis. Qualis enim est litania, in qua Sacerdotes non inueniuntur, & solen-

nes orationes faciunt? Sed & ipsas honorandas cruces (cum quibus & in litanis ingrediuntur) non alibi nisi in venerabilibus locis reponi: & si quando opus vocauerit ad litanias celebrandas, tunc solum ipsas sanctas cruces accipere eos qui consuetè eas portare solent, & cum Episcopo & clericis litanias celebrare: hoc custodientibus sanctissimis locorum Episcopis, aut etiam eorum clericis, & per loca Indiciibus. Si quis autem in hoc capitulo presentis nostre legis virtutem aut transcenderit, aut non vindicauerit, prædictas pœnas patietur, *Monasteriorum & reuerendissimorum Monachorum dispositione.* Quod Iustinianus in hac Nouella statuit de iis qui cruces portare debent, idem, sed explicatiùs, sancit Concilium Mediolanense primum loco antè citato: Cruces clerici ferant, talari veste & superpelliceo induti: iique eiusmodi sint, ut eas aptè & decorè ferre possint. Ea similiter Concilium Mediolan. quartum dicto c. *Sacrarum imaginum insignia, vexillâ ve Clerici, ne laicus homo in processione præferat, ubi clericus quisquam est, qui hoc munus præstare possit.*

*De preparatione ad
Processionem.*

CAPVT IV.

ANte orationem prepara animam tuam
(ait Sapiens Ecclesiastici 18.) & noli
esse quasi homo qui tentat Deum. Non sunt
temerè & incogitanter incundæ supplica-
tiones publicæ, sed cum debita animi præ-
paratione. Qui enim ad orandum accedit
imparatus, non potest non distrahi in va-
rias cogitationes: quibus quàm longè mens
à Deo abducitur, tam longè à proposito
orationis fine & fructu aberrat. Qua in re
& temeritas est, & irreuerentia, & plerum-
que etiam iniustitia.

Temeritatis enim est, arduum & magni
momenti opus tentare, non instructum iis
subsidiis & adiumentis, sine quibus nequo
illud perficere potest, neque fructum vllum
cœpti laboris percipere. Atque id propriè
est tentare Deum, vt loquitur Sapiens.
Nam Deum orare, non adhibendo eas con-
ditiones quæ necessariæ sunt ad obtinen-
dum id quod petitur, perinde est atque ex-

periri velle, vtrum Deus malè petentibus gratiam faciat, & ſua beneficia largiatur. Ita-
que videtur, quifquis ita agit, non orare vt
impetret (qui eſt finis legitimus orationis)
ſed laborare vt periculum faciat benigni-
tatis ſeu voluntatis Dei indebito modo,
quippe quem ſciat non promiſiſſe ſe exau-
diturum niſi benè diſpoſitos: quod facien-
do magis prouocat iram Dei, quàm miſeri-
cordiam aut beneficentiam. Duo autem
ſunt neceſſaria ad orationem; ex parte Dei
auxilium gratiæ; ex parte hominis conue-
niens mentis applicatio, & conatus ad de-
bitè & vtiliter orandum. Quis autem fieri
potest, vt debitè & conuenienter oret, qui
ne cogitat quidem quid agat, neque eniti-
tur ad id opus quidquam afferre quod iu-
uet ad orandum? Dei autem gratiam, &
benignum concurſum Spiritus ſancti ad
fundendam orationem, quomodo poſteſt
impetrare, qui ne petit quidem; neque, ſi
petat, cum reuerentia aut recta vlla animi
diſpoſitione petit? Grauitè & appoſitè ad
hanc rem Auctor Operis imperfecti in
Matthæum, Homilia 14. *Et homo Deum ne-
ceſſarium habet, & Deus hominem, ad iuſti-
tiam faciendam. Nam, ſicut homo non poſteſt
facere bonum, niſi habuerit adiutorium Dei;
ſic nec Deus bonum operatur in homine, niſi*

homo voluerit. Sicut nec terra sine semine, nec semen sine terra fructificat: sic nec homo sine Deo, nec Deus sine homine, iustitiam operatur in homine. Semina fructus ex oratione colligendi sunt, sanctæ cogitationes, pii affectus, seria humilitas & abiectio sui, attentio mentis, deuotio erga Deum, interna animi reuerentia: quæ neque nasci prorsus in homine, neque progerminare, aut adulescere in frugem possunt, nisi ea Deus infuderit, & assiduis incrementis aluerit, ac feruore charitatis animauerit. Ergo affectata videtur euagatio mentis & indeuotio in eo, qui negligit se initio præmunire mediis necessariis ad eam euitandam.

Est quoque reus summæ irreuerentiæ apud Deum, qui sine præparatione orat. Cum enim oratio sit actus latræ & supremi cultus Deo debiti, summam requirit in orante reuerentiam maiestatis diuinæ, quam adorat. Quomodo autem potest quis reuereri eum, quem neque præsentem sibi cogitat, neque eius potestatem aut gloriam attendit, neque circumspicit quantum tremere in conspectu eius, quantum eum venerari debeat? Contemnit igitur Deum, & parui æstimare se ostendit, qui ad eius colloquium accedit imparato animo, & in nullam speciem reuerentiæ aut honoris

compoſito : qui præſtantiffimum Dei opus, perinde atque profanum quodpiam negotium, tractat, & in conſpectu ſummi Regis verſatur ſine ullo pudore aut decentia, haud ſecus ac ſicum viliffimo homuncione congrederetur.

Accedit ad hæc genus quoddam iniuſtitiz erga proximum. Nam, cùm Sacerdotes ſint publici Eccleſiæ ac Religionis miniſtri, pro hominibus conſtituti in iis que ſunt ad Deum, vt offerant dona & ſacrificia pro peccatis, vt loquitur Paulus Hebr. c. 5. ij non mediocre damnum afferunt populo Chriſtiano, cùm publicas orationes pro neceſſitatibus eius tam negligenter & indeuotè peragunt, vt prodeſſe ei, prout debent, non poſſint. Hinc enim ſæpe fit, vt in publicis calamitatibus, quantumuis clameamus ad Deum, experiamur id quod minatus eſt Deuteron. 28. *Calum quod ſupra nos eſt aneum, & terram quam calcamus ferream;* quia Sacerdotum oratio coram eo eſt abominabilis. Iniuriam etiam faciunt ipſi Eccleſiæ, cuius nomine orant, legationem eius mala fide apud Deum obeuntes, & eiufdem poſtulata ſua præuariatione corrum-pentes: quaſi iis propoſitum eſſet, cauſam ſupplicantis populi malè orando facere deteriorem.

His adiungimus circumstantiam scandalī, quæ speciale peccatum facit. Qui enim non collecto & attento animo ad orandum prouolat, quemadmodum interna cogitatione vagus est, incompositus, & Dei minime reuerens; ita externo habitu corporis necesse est, ut animi instabilitatem & euagationem, indeuotionem & irreuerentiam prodat. Hinc oculi assidue discurrentes, & ad obuia quæque prosilientes; caput ad omnem motum versatile, & in omnem partem circumagitatum; hinc petulantia, hinc risus, & intermissi sæpe ioci atque dicteria; hinc confabulationes; hinc ex incogitantia præpostera suffragiorum usurpatio, & rerum agendarum confusio; hinc cantus inconditi, hinc precandi intempestiua interruptio, hinc crebra ex ordine digressio; hinc denique genus omne immodestæ & irreuerentiæ; quæ quantum scandalī & offensionis afferat laicis, quantumque eorum pietatem conturbet, dici non potest. Intelligent igitur qui legatione funguntur apud Deum pro populo Christiano, ita se comparare ad publicas supplicationes debere, ut, quantum in ipsis est, sicut oportet, orent, id est, attentè, reuerenter, & fructuose.

Incumbit autem iis hac in re præparatio duplex: altera interna, externa altera. Et

laria parata habeant; Responsoria, Antiphonas, & alia canenda præuideant, de quæ eorum ordine inter se consentiant: *Cum ad processionem Clerus vocatur* (ait Concilium Mediolanense quartum) *quid psallendum, quid canendum, &c. ei sit, ut opportunum erit, significetur.*

Habet Ecclesia ad eundem usum præparationis, tum asperersionem aquæ benedictæ, qua lustratur populus, ne ad processionem sacram illotis animis accedat, cum adiunctis propriis Antiphonis & Orationibus; tum etiam, diebus quibus non fit asperio, alias Antiphonas & Orationes in eandem rem: è quibus ratio Antiphonæ, *Asperges me*, explicata habetur inferius c. 12. & Antiphonæ, *Vidi aquam*, c. 15. quæ duæ è Scriptura desumptæ sunt.

Quod verbò spectat ad Antiphonam, *Sanctus Deus*, eam initium habuisse ex miraculo, & cœlitus demissam fuisse imperante Theodosio iuniore, narrant, Felix Papa tertius Epistola 3. Quintianus in duodecim Anathematismis ad Petrum Cnaphæum, qui habentur tomo 2. Concil. post Concilium Romanum sub eodem Felice, Acacius Archiepiscopus Constantinopolitanus, & Asclepiades Episcopus Trallensis, in suis Epistolis quæ referuntur post

Concilium Conſtantinopolitanum habi-
tum ſub eodem Felice, Paulus Diaconus
Miscellæ hiftoriæ lib. 14. Nicephorus hi-
ſtoriæ Eccleſ. lib. 14. c. 46. & Sigebertus in
Chronico, anno 444. Cùm enim terra
motibus horrendis affiduè per ſex meſes
quaſſaretur, Conſtantinopoli tantus ex eo
terror omnem ciuitatem inuaſit, muris &
ædificiis paſſim cotruentibus, vt, reſta vr-
be, ciues cum ipſo Imperatore Theodoſio,
Pulcheria Auguſta, & Proclo Patriarcha, in
agrum ſuburbanum, cui Campo nomen
eſt, ſecederent, ibique rei euentum expe-
ctantes conſiderent; donèc quodam die
terra inſolito tremore agitata uſque adeo
fluſtuare viſa eſt, vt à fundamentis conuelli
& collaſcere crederetur. Tum verò ad
Deum conuerſi, dum omni genere litania-
rum & ſupplicationum eius miſericordiam
exorare contendunt, circa horam tertiam,
inſpectantibus omnibus, puer è media tur-
ba repente in ſublimem cœli regionem
abripitur. Ad cuius rei conſpectum vniuer-
ſa plebe miſerabili eiulatu in cœlum cla-
mante, *Kyrie eleiſon*; poſt horam idem
puer, eadem via qua aſcenderat, è ſublimi
delabitur; ſtanſque per tres horas ſecus pe-
des Patriarchæ, nuntiat, ſe in cœlo chorum
Angelorum audiuiſſe hoc garmen iubiſſa-

tionis in Dei laudem concinentium, *Sanctus Deus, Sanctus fortis, Sanctus immortalis, miserere nobis*; iussúmque diuina quadam voce ipsi Episcopo & populo edicere, vt litanias ad eundem modum cahendo celebrarent. Quod cum iubente Proclo illico factum esset, eodem momento & puer animam reddidit, & terræ motus conquieuit. Inde loco nomen apud posteros mansit; Ὑψωμα θείον, *Exaltatio diuina*. Addit Nicephorus, Theodosium, tanto miraculo perculsum, Constitutione imperiali mox decreuisse, vt diuinus iste Hymnus per vniuersum orbem deinceps caneretur; & ex eo tempore Ecclesiam eum acceptum, non quolibet tantum die vsurpasse, sed etiam cuiuslibet carminis & laudis initio ante omnia pleno ore præmisisse. Quare non est mirum, Ecclesiam Andegauensem eum solenni more in Festis præmittere processionem matutinæ, quasi præcationem præparatoriam. Celebris est idem Hymnus apud Græcos in Liturgiis, & ibi appellatur *Cherubicus*, & similiter ab Acacio epistola citata, alias Ὕμνος, quasi *triumphalis*, vulgò *Trisagium*, id est, *ter-sanctus Hymnus*. Quod nomen primum tributum est Hymno illi Angelico, quem duo Seraphim Isaïæ 6. clamabant in conspectu Dei alter ad alte-

rum, *Sanctus, Sanctus, Sanctus, Dominus Deus exercituum*, plena eſt omnis terra gloria eius: de quo dicit Concilium Vaſenſe c.4. *Tam dulcis & deſiderabilis vox, etiamſi die noctuque poſſit dici, ſaſtidium non poterit generare.* Inter vtrumque tamen Hymnum diſcrimen quoddam ponit Felix Papa in Epistoſa citata: *Ab Angelis* (inquit) *nobis laus iſta profluxit, qui ante crucem dicebant, Sanctus, Sanctus, Sanctus; poſt crucem verò cum laude clamabant, Sanctus Deus, Sanctus fortis, Sanctus immortalis.* Quàm citò autem iſ ab Eccleſia probatus & receptus fuerit, ex Concilio Chalcedonenſi diſcitur, in cuius Actione prima ſub finem inter publicas Patrum acclamationes hæc potiſſimum celebrata fuit, *Sanctus Deus, Sanctus fortis, Sanctus immortalis, miſerere nobis.* Cuius tertio membro, *Sanctus immortalis*, cùm Petrus Cnaphæus ſeu Fullo, Antiochiæ Epicoſopus, temetè addidiſſet, *Qui crucifixus eſ pro nobis*, totam Trinitatem in cruce paſſam eſſe inſinuans, & quaternitatem pro Trinitate introducens, hæreſis in Concilio Conſtantinopolitano, & duobus Romanis habitis ſub Felice tertio, damnatus eſt. Idem Hymnus uſurpatur ab Eccleſia in die ſancto Paraſceues, & canitur alternis verſibus Græcè & Latinè, quæ duplex

plex lingua est Ecclesiæ congregatæ ex gentibus, Orientalis & Occidentalis; exclusa Hebraica, quæ Iudæorum est, quia illi in infidelitate obdurati Christum Dei filium nolunt agnoscere: & prior canit Ecclesia Græca, ὁ ἴσος, et. c. quia prior ad fidem vocata est. Canitur autem dictus Hymnus eo die, tum ad tollendum scandalum crucis, profitendo Christum crucifixum, in humanitate *Deum*, in calumniis accusantium impiorum *Sanctum*, in passione & cruciatibus *fortem*, in morte *immortalem*, æquè ac Patrem & Spiritum sanctum: tum etiam ad obtinendam efficacius misericordiam Dei per merita Crucifixi, in prece subnexa, *Miserere nobis*; quia is Hymnus singularem quamdam vim ad id habere creditur ex diuina institutione, vt apparet exemplo terræmotus Constantinopolitani. Reliquæ Antiphonæ præparatoriæ sumptæ sunt de Scriptura.

Quod attinet ad populi præparationem, qui processionum religione primùm delectatur, libentèrque ad eas convenire solet; pastorum curæ erit, Dominica præcedente, dum eas denuntiabunt, parochianos suos de earundem institutione & causa, mysterio, significatione, & fine, edocere; hortarique ad eas piè & religiosè, vt decet.

obeundas; & si qui abusus in eas praua consuetudine aut fecus irreperint, de iis tollendis præmonere.

Atque hæc quidem de processionibus in genere sumptis dicta sint. Sequitur ut de singulis in specie differamus.

*De Processione ad Altare, quæ
fit in Missa solenni.*

C A P V T V.

INter processiones legitimas seu ordinarias primo loco ponimus duas illas quæ sunt in Missa solenni, quia in Ecclesiis Cathedralibus & Collegiatis ex quotidianæ sunt: quanquam non pari solennitate celebrantur in ferialibus & profestis diebus, atque in Festis maioribus.

Prior est, qua Episcopus seu Sacerdos à Secretario prodiens vadit ad Altare, in quo publicè celebraturus est: quod fit solenni pompa, & instructo ordine procedentium cum eo ministrorum. Et huiusmodi processio, quia terminatur ad ingressum Altaris, *Introitus* dicitur: unde Antiphona, quæ introeunte Sacerdote canitur, *Introitus* quoque nominatur, in Ordine Missæ Ambro-

fianæ, *Ingressa*; sicut apud Græcos εἰσόδου appellatur, id quod canitur ad introitum Sacerdotis in Sacrarium, quem illi vocant εἰσόδου.

Eius processionis ordo hic est. Præcedit Thuriferarius; sequantur duo Acolythi cum candelabris & cereis accensis; tum Capellanus crucem ferens; post eum Subdiaconus cum codice Evangelij, cui succedit Diaconus; ac postremo loco Celebrans. In Ecclesia Andegauensi, si solennitas fuerit, post crucem incedunt duo Subdiaconi, & his proximi duo Diaconi minores: deinde Subdiaconus maior librum Evangelij gerens, ac post eum maior Diaconus, vterque ex ordine Canonicorum. Si autem Episcopus celebret sollemniter, ex præscripto Ordinarij seu Cæremonialis, debent præcedere septem Acolythi cum septem cereis ardentibus, septem Subdiaconi, totidemque Diaconi (qui ritus sumptus est ex Ordine Romano, & refertur ab Honorio in Gemma animæ, lib. 1. cap. 4.) & proximè ante Episcopum duo Archidiaconi, alter pro maiore Subdiacono gerens librum Evangeliorum, alter pro Diacono maiore. Tum demum, præeunte baculo pastorali, procedit Episcopus in Pontificalibus: cuius latus regunt duo Assistentes, à dextra Canoni-

cus, à sinistra Pœnitentiarius, cui ex officio incumbit mitram capiti imponere, & de capite tollere. Et hæc processio est, quæ ab Ordine Romano appellatur *Plenaria*. In die sancto Parasceues, ad hanc processionem non portantur cerei, neque incensum, ante Euangelium, ut notatur in Ordine Romano, propter dici mœstitiâ, & luctum occisi Christi; in cuius morte visa est lux veritatis extincta, & odor diuinus doctrinæ eius dissipatus.

In Ecclesia Turonensi (quæ, iuxta Canonem Toletanum, totæ Prouinciæ, & *Sacerdotalis dignitatis mater*, & *Ecclesiastica rationis magistra* est) magno splendore & apparatu procedit hæc pompa. Agmen ducit Thesaurarius, longo intervallo præcedens, & cereum accensum candelabro argenteo præferens, affectante apparitore, qui turbam submoueat. Sequuntur, ordine singulatim incedentes, sed longo ab inuicem spatio disiuncti, septem pueri symphoniaci, albis & tunicis vestiti, cum singulis candelabris & cereis ardentibus: his succedunt sex Subdiaconi, tunicis quoque & cætero sui Ordinis cultu insignes; quorum vnus crucem sublimem effert, tres deinde Sanctorum Reliquias, duo reliqui libros argenteos inauratos Epistolarum & Euangelio;

rum Missalium gestant: tum Diaconus & Subdiaconus maiores, ad præcipuum Altaris ministerium accincti: post hos qui crucem Archiepiscopalem, & pastorem baculum præferunt. Extremo loco progreditur Archiepiscopus, Pontificali ornatu conspicuus, cum duobus Assistentibus Canonicis, & totidem Clericis seu Capellanis pluuiæ Pontificium ab vtraque parte subleuantibus. Hoc ordine procedunt à Secretario in naui Ecclesiæ secundum dextrum Chori latus, atque inde per medium Chorum ad Altare; exceptis duntaxat pueris cæroferariis, qui cum ad summum Chorum venerint, ibi ad lineam directi consistunt; quatuor à dextra, tres à sinistra parte; &, præterueto Pontifice, omnes candelabra sua ordinatim disposita in solo ante aquilam pulpiti collocant: atque inde secedentes, duo ad Altare pergunt, reliqui scholæ cantorum se adiungunt. Atque hunc procedendi ritum antonomastice *Ordinem* vocant.

Progressus Pontificis seu Sacerdotis è Secretario cum apparatu descripto, significat exitum filij Dei à Patre, & aduentum in mundum, tanquam sponsi procedentis de thalamo suo. Ita explicant, Innocentius tertius lib. 2. de officio Missæ c. 2. Amalaris

lib. 2. c. 1. Rupertus lib. 1. c. 28. Honorius in Gemma animæ, lib. 1. c. 84. Durandus Rational. lib. 4. c. 6. & inter Græcos S. Germanus Constantinopolitanus in Theoria rerum Ecclesiasticarum, & Maximus Monachus lib. de Ecclesiastica mystagogia, c. 25.

Thuriferarius & cæteri ministri, qui antecedunt tunicis & splendidioribus vestibus ornati, significant comitatum Angelorum assistentium ac ministrantium filio Dei, & cum vt Saluatorem mundi in ipsa Incarnatione adorantium, iuxta testimonium S. Pauli Hebr. c. 1. Cum iterum introducit primogenitum in orbem terræ, dicit; Et adorent eum omnes Angeli Dei: quæ verba hac in rē vsurpat S. Germanus Constantinopolitanus loco citato: & Simeon Thesalonicensis in libro de diuino templo, c. de Mystagogia, ita scribit. Hierarcha igitur sacra factururus, de throno, in quo alius circumstantibus sedet, descendens, Dei Verbi ad nos condescensionem figurat. Indutus autem sacram stolam, sacratissimam eius Incarnationem; & ad portas etiam templi vsque gradiens, eiusdem in terras aduentum præsentiamque. & quomodo vsque ad mortem & Inferos se demiserit, animi oculus ingerit. Hoc enim sibi vult, quod occasum versus, & ad portas vsque deorsum præcedit. Extra sacrarium porro diuinas

preces ineunti Diaconi assistunt, qui non modò Apostolorum, verum-etiam Angelorum, quos Christus in mysteriis suis ministros habuit, locum tenent. Vnde in Liturgia S. Iacobi in Hymno Cherubico canitur: Rex regnantium, & Dominus dominantium, Christus Deus noster progreditur ut immoletur, ac detur in cibum fidelibus: ipsum autem antecedunt Angelorum chori, cum omni imperio & potentia: Cherubim multorum oculorum, ac seraphim sex alarum, faciesque velantia, & cum clamore canentia hymnum, Alleluia, alleluia, alleluia.

Thuris suffitus significat bonum odorem doctrinæ quam attulit Christus in mundum, cuius suauitate & fragrantia perfusæ & illectæ gentes in eum crediderunt. Quo de ritu thurificandi ita S. Thomas 3. p. q. 83. art. 5. Secundò pertinet ad representandum effectum gratiæ, qua, sicut bono odore, Christus plenus fuit (secundum illud Genes. 27. Ecce odor filij mei, sicut odor agri pleni) & à Christo deriuatur ad fideles officio ministrorum, secundum illud 2. Corinth. 2. Odorem notitiæ spargit per nos in omni loco. Et ideo thurificato Altari, per quod Christus designatur, thurificantur omnes per ordinem. Sic Simeon Thessalonicensis in libro de diuino templo: Per suffitionem ab Altari inchoatans

(intelligitur) communicans sese & fragrans Spiritus gratia. Quare, ut in incensationibus Ecclesiasticis conuenienter exprimitur hoc mysterium plenitudinis gratiæ Christi, & fragrantia ac sanctitatis eius effusio in vniuersum mundum, non parè, sed copiosè infundendum est thus in thuribulum, ut vniuersa Ecclesia suauitate odoris eius repleatur.

Doctrinæ Christi aduenientis symbolum præfert liber Euangelij, qui subsequitur. Post thuribula (inquit Ordo Romanus) portatur Euangelium propius Episcopo. Eadem autem processio fit ab Austro in Septentrionem. Plenius Alcuinus lib. de diuin. offic. c. de celebratione Missæ: Præcedentibus ad Altare ministris, in medio eorum propter debitum honorem Euangelium Christi deferatur, tanquam persona præpotentis, præcedentibus ac sequentibus ministris constipata, cum procedit in publicum. Cerei quoque Euangelium præcedentes demonstrant, gratia Euangelij mundum, qui exat in tenebris peccatorum, illuminatum. Quod autem eadem processio Euangelij ab Australi parte fit in plagam Septentrionalem, declarat, Dominum Iesum Christum, qui Verbum salutis mundo intulit, à parte Meridionali ortum esse: nam Ierusalem, in qua Dominus Iesus Christus primò Verbum

salutis annuntiavit, in Meridie habet Bethleem, à quo loco ipse Saluator venit, sicut scriptum est, Deus ab Austro veniet, Habacuc, c. 3. Quod ante Alcuinum obseruauerat S. Cyrillus Ierosolymitanus, in Oratione de occurſu Domini: *Ab Austro*, inquit, *Ierosolyma ex Bethlehem nunc in Sionem ingressus est.* Et iuxta hanc obseruationem, Sacristiæ maiorum Ecclesiarum collocari solent ad partem Australem. Vnde colligitur, etiam ad debitum solennis sacrificij ritum pertinere, vt Ecclesiæ Christianæ orientem solem spectent.

Crux prælata, mysterium passionis denotat, quam habuit Christus ante oculos à natiuitatē suā, ad cuius sacrificium incruentum modo celebrandum hīc progreditur. Quā de causa apud Græcos Episcopus ad celebrandum venit indutus Phelonio crucibus palam intexto, quod ideo πολυκρίνου, id est, *Multum. uicium*, dicitur: quoniam (inquit Simeon Thessalonicensis libro citato) passionis Domini signum est, quo docet Episcopus se illum imitari, qui p. passionem & crucem veram iustitiam consummavit, & libertatem nobis, tyrannico iugo depulso, recuperauit: hinc & cum induit illud Sacerdos, dicit, *Sacerdotes tui Domine induantur iustitiam, & sancti tui exultent: re vera enim iustitia per crucem no-*

his exultationem peperit. Et huc ſpectat, quòd in Eccleſia Romana Sacerdos celebraturus Miſſam, priuſquam induat amiſtum, oſculatur crucem eius medio intextam: vt intelligat, ſe cum crucis amore & veneratione ad myſterium crucis & paſſionis Chriſti peragendum accedere debere. Ob eandem cauſam etiam iubet Miſſale, crucem eminentem in medio Altari conſtitui, quam ſemper ob oculos habeat Sacerdos celebrans:

Flammantes cerei, lumen reuelationis fidei & doctrinæ Euangelicæ ſignificant, de qua Iſaias c. 60. Surge, illuminare Ieruſalem, quia venit lumen tuum, & gloria Domini ſuper te orta eſt: & ambulabunt gentes in lumine tuo, & reges in ſplendore ortus tui.

Numerus ſeptenarius cereorum luxentium reſpicit ad caput 1. Apocalypſis, vbi Ioannes vidit ſeptem candelabre aurea, & in medio candelabrorum ſimilem filio hominis, veſtitum podère, id eſt, veſte Pontificali, quaſi accinctum ad ſacrificandum: Vt (inquit Innocentius tertius lib. 2. de Officio Miſſæ c. 5.) *per hoc adueniſſe monſtretur, ſuper quem requieſcit ſpiritus gratiæ ſeptiformis, ſecundum vaticinium Iſaiæ Prophetæ, c. 11.*

Quòd verò in Eccleſia Turonenſi The-

faurarius cum prælucente cerco Archie-
 piscopi processionem antecedit, id ex Græ-
 cæ Ecclesiæ imitatione tractum videri po-
 test; in qua quatuor Patriarchis, Constanti-
 nopolitano, Alexandrino, Antiocheno, &
 Ierosolymitano, id iuris præ aliis Prælati-
 s fuit, vt, quocumque procederent, Lampa-
 darius iis anteiret facem ardentem præfe-
 rens, aurea corona in medio præcinctam, in
 significationem Dominici præcepti Matth.
 5. *Sic luceat lux vestra coram hominibus, vt
 videant opera vestra bona, & glorificent pa-
 trem vestrum qui in celis est.* Præter eos, id ex
 priuilegio datum est solis Archiepiscopis
 Bulgariae & Cypri, & paucis quibusdam
 Metropolitanis, qui erant ἀρχιεπίσκοποι, id
 est, suo iure viuebant, Superiorem non
 agnoscentes; vt legitur apud Theodorum
 Balsamonem, in Melete prima, quæ est de
 priuilegiis Patriarcharum, initio libri septi-
 mi Iuris Græco-Romani. Potuit igitur &
 hoc olim speciali priuilegio concessum esse
 Archiepiscopo Turonensi in processionib-
 us Pontificalibus, vt illic in iis quas Balsa-
 mon ἀρχιεπισκοπικὸν πρῶτον vocat: nisi forte
 visum est priscis Institutoribus æquum esse,
 vt, ad quem pertineret custodia totius the-
 sauri Ecclesiastici & luminarium (vt habe-
 tur c. vniço de officio Sacristæ) is dux lumi-

num eſſet in ſolemnioribus feſtiuitatibus.

Ingreſſus ad Altare, ſignificat acceſſum Chriſti vt ſummi Pontificis ad aram crucis, in qua ſe victimam pro ſalute mundi offerens, virtute meritorum ſuorum ingreſſus eſt in ſanctuarium cæli, vt ſedeat ad dexteram Patris, & ibi appareat vultui Dei pro nobis, *Sacerdos factus in æternum*, iuxta illud Pauli c. 9. eiſdem Epistolæ: *Chriſtus aſſiſtens Pontifex futurorum bonorum, per proprium ſanguinem introiuit ſemel in ſancta, æterna redemptione inuenta.*

Subdiaconus qui præcedit (inquit Innocentius tertius lib. 2. de officio Miſſæ c. 1.) *Ioannem Baptiſtam ſignificat, qui præceſſit in ſpiritu & virtute Eliæ, parare Domino plebem perfectam. Hic ante Pontificem portat codicem Euangelij: quia Ioannes ante Chriſtam prædicationem Euangelicam inchoauit; Pœnitentiam, inquit, agite, appropinquabit enim regnum cælorum. Cùm ad altare ventum fuerit, interea dum confeſſio fit* (inquit Durandus lib. 4. Rational. c. 6.) *Subdiaconus tenet librum Euangeliorum clauſum ante faciem eius* (Pontificis ſeu Sacerdotis celebrantis) *à parte ſiniſtra. Fieret enim irreuerentia ſanctiſſimo Sacramento, ſi (quod in quibuſdam locis fieri ſolet) idem Subdiaconus ſtaret aduerſus Sacerdotem, obuertens dorſum Al-*

tari, in quo illud quiescit. Neque verò etiam æquum est, Christo iam ingresso Sancta sanctorum virtute proprii sanguinis, & eius morte disrupto velo quod ea operiebat, eorum conspectum illi adimi interiectū legis veteris, quæ antecessit quidem, sed iam reiecta est ad sinistram, ut videri quidem possit tanquam figura prænuntia Euangelicæ veritatis, sed non pro obiecto haberi: Subdiaconus enim hoc loco in persona Ioannis Baptistæ legem veterem significat, ut rectè Durandus loco citato. *Deinde* (inquit) *sequitur vnus Subdiaconus, codicem Euangelij baulans, qui significat legem: qui ideo Pontificem præcedit, quia lex, continens in se passionis Euangelicæ sacramentum, præcessit Christi aduentum: & portat illum clausum, ad notandum quòd illud fuit in lege obscurum, priusquam Agnus septimi libri sigilla aperiret. Quod quidem consentaneum est doctrinæ S. Augustini, libro de catechizandis rudibus, c. 4. In veteri Testamento est occultatio noui; & in nouo Testamento est manifestatio veteris. Neque verò etiam illud fidei mysteriis satis consentaneum esset, ut, cum Christus summus Pontifex, qui solus est Mediator inter Deum & homines, venerit in Sanctuarium, vbi Deus cum gloria habitat, obtueri cogeretur aliquem intermedium*

- inter se & Deum, quem propitiavit sanguine suo; quasi aliquis esset alius Mediator Mediatoris.

Liber Euangelij clausus, qui aperitur à Subdiacono in conspectu Episcopi seu Sacerdotis, ut cum osculetur, significat id quod habetur Apocalypsis cap. 5. solum Agnum inuentum fuisse dignum qui aperiret librum arcanorum prædestinationis æternæ, & solueret signacula eius, quia occisus est, & redemit nos in sanguine suo. Vbi recte animaduertit Innocentius tertius loco citato, melius fore, ad perfectam huius mysterij repræsentationem, si Episcopus ipse, seu Sacerdos celebrans, aperiret propria manu librum Euangelij: quia in Apocalypsi dicitur, *Nemo poterat, neque in cælo, neque in terra, neque subtus terram, aperire librum, neque respicere illum.* Vnde Durandus lib. 4. Rationalis, c. 6. scribit: *Episcopus, vel Sacerdos, ad Altare perueniens, mitram deponit, confessionem facit, codicem aperit, & deosculatur apertum:* quod idem repetit inferius eodem capite, & c. 9. eiusdem libri. In Ordine Romano ita scribitur: *Dehinc, inueniente Episcopo, cantetur Introitus: & Pontifex à custode Ecclesiæ, qui alba indutus esse debet, incensum accipiens, ponat in thuribulum, & Archisubdiacono apportante Euangelium*

complicatum osculetur: quo tamen à plerisque reuoluto, illud Euangelium, quod illo die legendum est, osculatur. In Ecclesia Rhemensis, Subdiaconus Euangelium porrigens Sacerdoti osculandum in ingressu Altaris, dicit; *Hæc est lex sancta, pater: Sacerdos autem respondet; Credo, & confiteor.*

Osculum eidem libro impressum à Celebrante, indicat Christum annuntiâsse mundo legem gratiæ & pacis, iuxta illud Psal. 71. *Orietur in diebus eius iustitia & abundantia pacis; & in eiusdem rei symbolum statim idem Sacerdos osculatur Altare, vice Christi implentis illud Cantic. 1. Osculetur me osculo oris sui, & hoc signo fœdus perpetui amoris cum Ecclesia in sanguine suo ferientis, ut habeat sibi gloriosam sponsam, non habentem rugam aut maculam, Ephes. 5. Quo de ritu Stephanus Eduensis libro de Sacramento Altaris, c. 12. *Osculatur Euangelium & Altare, significans illum qui osculo suæ Incarnationis fecit vtraque vnum, conuersione Iudeorum & gentium.* Hac de causa in Liturgia S. Iacobi, Sacerdos ingressus ad Altare, ante omnia dicit, *Pax omnibus: & ex usu S. Romanæ Ecclesiæ, quando Episcopus solenniter celebrat, in prima salutatione ad populum dicit, Pax vobis, non, Dominus vobiscum.**

Antiphona verò, quæ in Choro canitur ad Introitum, repræsentat voces & desideria Patriarcharum, Prophetarum, & aliorum Sanctorum, qui ab initio mundi votis expectauerunt, gestis præfigurauerunt, dictisque aut scriptis prophetauerunt aduentum Christi, vt interpretantur Rupertus, lib. 1. de diuin. offic. c. 28. Honorius in Gemma, lib. 1. c. 6. & Innocentius tertius lib. 2. de officio Missæ c. 14. Et ideo omnes propemodum eiusmodi Antiphonæ sumuntur ex Psalmis prophetis Davidis, qui olim toti canebantur in exordio Missæ antiphonatum, id est, alternis choris, ex constitutione Cælestini Papæ 1. vt est apud Damasum in Pontificali in eius vite, & Sigebertum in Chronico anno 426. vnde in Antiphonario S. Gregorij, in Ordine Romano, & apud alios priscos Auctores, Introitus perpetuò vocatur *Antiphona*. Apparet verò ex eodem Ordine Romano, etiam antiquitus id obseruari solitum, vt Præcentor non prius intonaret Versum, *Gloria Patri*, ad Introitum, quàm Pontifex nutu id ei significasset: quod pertinet ad reuerentiam mysterij sanctissimæ Trinitatis, cuius professionis regula ex auctoritate Ecclesiæ accipienda est.

Ex eodem quoque libro discimus, antiquum

quum in Ecclesia Romana morem fuisse, ut Archiparaphonista, seu maximus Præcentor, staret ante faciem Pontificis se comparantis ad celebrandum in Secretario, expectans nutum eius ad psallendum; cumque ille annuisset ut psalleret, solitum Præcentorem egredi ante fores Secretarii, & dicere ministris, *Accendite*; ac demum, incensis luminaribus, Pontifice foras prodeunte, Chorum cum suis ingredi, & incipere Antiphonam ad Introitum. Qui ritus etiamnum servatur in Ecclesia Andegauensi: sed Versus, *Accendite*, quasi à Præcentore impositus; cani solet à Psaltis & pueris symphonicis in aditu Chori.

Ex antiquo ordine huius processionis manavit etiam, quòd in eadem Ecclesia, dum Tertia solennis canitur, Diaconi & Subdiaconi, ac reliqui administri, qui Episcopum in Chorum præcesserunt, ex ytraque parte Chori lineatim dispositi stent. Nam Ordo Romanus statuit, ut, Pontifice ad Altare veniente, septem Subdiaconi in Choro ad lineam stent, quatuor à dextra parte, & tres à sinistra; similiterque septem Diaconi, & septem Ceroferarii diuidantur. Pontifex enim olim pergens ad Altare transibat per caput scholæ seu Chori, qui propè ab Altari distabat: ut

posset Pontifex Præcentori innuere, quotiescumque usus posceret, & quæ agenda essent insinuare: vnde in quibusdam maioribus Ecclesiis ostium patet in latere dextero Chori, quo Episcopus ingressus, per caput eiudent Chori procedit ad Altare. In Ordinatione autem seu Cæremoniali antiquo Ecclesiæ Andegauensis, sic præscribitur: Dum dicitur Tertia, stent pueri in Choro cum septem cereis ardentibus, iuxta sepulturam Guillelmi Pontificis, & habeant duo candelabra argentea, & duo thuribula: & finitis Psalmis, ferant omnia ante Altare ubi sunt cruces & Reliquiæ: similiter septem Diaconi, & septem Subdiaconi, & clerici, qui stabant reuerti, recedant, & accipiant cruces, Textus, & Reliquias, & ad processionem sequantur.

*De Processione ad
Euangelium.*

CAPVT. VI.

Posterior processio Missæ ea est, quæ fit ab Altari ad Ambonem, ad legendum Euangelium; ipsa quoque & apparatus

insignis, & significatione mystica: cuius or-
do hic est.

Diaconus, dicto, *Munda cor meum*, acci-
pit librum Euangeliorum de Altari, & cum
vtraque manu tenens, clausum super pe-
ctus, sistit se in secundo gradu ante me-
dium Altaris; ubi stans versus illud, expe-
ctat donec veniat Præcentor annuntiaturus
Ante-euangelium. Quo, accedente,
facta Altari reuerentia, conuertit se ad eum,
& annuntiato Ante-euangelio, ad partem
Euangelij genuflexus, & conuersus ad Ce-
lebrantem, petit benedictionem more soli-
to. Quia accepta, & osculata manu Cele-
brantis, surgit, & redit ad priorem locum
ante medium Altaris: ubi stans, finito, *Al-
leluia*, Tractu, vel Sequentia, facta Altari
profunda reuerentia, conuertit se ad Cho-
rum, & intonat Ante-euangelium; statim-
que procedit per dextrum Chori latus ad
Ambonem, gestans librum Euangeliorum
in pectore, subiecto puluillo, præeuntibus
duobus Thuriferariis continenter per viam
incensantibus, & totidem, Ceroferariis
cum cereis accensis, minore Diacono cum
cruce, & post eum Subdiacono maiore,
Psaltis interea Ante-euangelium graui te-
nore concinentibus. Consecro Ambone,
cum ad pluteum seu Analogium ventum

fuerit, Subdiaconus maior librum de manu Diaconi acceptum aperit, cumque in pluteo componit, & Euangelium, quod recitandum est, ei digito designat. Tum Diaconus in summo gradu Ambonis consistens, medius inter duos Thuriferarios & Ceroferarios, dicto, *Dominus vobiscum*, signum crucis Euangelio: primum, tum fronti, ore, & pectori suo, extremo pollice imprimens, incipit, *Sequentia*, vel, *Initium sancti Evangelij*, &c. & libro ex more indentato, & pergit cantare Euangelium, iuandis manibus ante pectus: eoque finito, eodem ordine quo venerat, per sinistram Chori partem redit ad Altare, ibique librum apertum Celebranti porrigit, qui eum in principio Evangelij recitati deosculatur: & mox eundem librum tradit Diacono minori, qui eum per Chorum circumfert: Angulis osculandum ordine consueto, atque inde ad Altare reuersus, ibi eum deponit in cornu Evangelij.

Similis est apud Græcos processio, quæ appellatur *μικρὸς εἰσόδος*, id est, *parvus Introitus*, alias *εἰσόδος τῆς εὐαγγελίου*, seu *μετὰ τῆς εὐαγγελίου*, *Introitus Evangelij*, seu cum *Euangelio*, de qua processione habetur in *Liturgis sancti Marci*, & sancti Ioannis *Chrysostomi*, in *Euchologio*, & aliis ritua-

libus libris Græcorum. Ibi enim Sacerdos, tollens librum Euangelij de Altari, tradit illum Diacono: & ambo, exeuntes è Sacratio per ostium boreale, veniunt ad locum consuetum, vbi Sacerdos dicit Orationem ad processionem pertinentem. Quæ finita, Diaconus intendens dextram versus Orientem, & orarium seu stolam tribus digitis apprehendens, dicit Sacerdoti: *Benedic Domine sanctam processionem.* Tum Sacerdos faciens signum crucis versus Orientem, dicit, *Benedicta sit processio sanctorum tuorum,* &c. Quo factò, Diaconus accedit ad Episcopum, eique offert librum osculandum, si præsens fuerit; sin secus, ipsi Sacerdoti: &, ultimo Tropatio dicto, progressus in medium, & stans ante Sacerdotem, sublati paululum manibus, ostentat Euangelium, dicens, *Sapientia re-cta:* & sanctum Euangelium deponit in Altari. Deinde, cantato Trisagio, & aliis Orationibus ac benedictionibus completis, ac demùm ipsa lectione Apostolica, quam nos Epistolam dicimus, idem Diaconus, postquam quinquies per interhalla Orationum ante ostium Sacratio inclamauit, *Attenti simus,* incensato Altari, & omni Sacratio, atque insuper ipso velo quod obrenditur sacris donis, accedens ad Sa-

E iij

cerdotem ante Altare, iussceptio in manu
 Euangelio, prono capite petit benedictio-
 nem. Qua accepta, egressus è Sacrario,
 præeuntibus lampadibus & thure, accedit
 ad Ambonem: Sacerdos verò ante sacrum
 Altare consistens, conuerso vultu ad occi-
 dentem Solem, intenta voce dicit, *Sapien-*
tia recta, audiamus sanctum Euangelium; &
 postquam Diaconus dixit, *Lectio sancti*
Euangelij secundum N. Sacerdote interfa-
 to, *Attenti simus,* pergit, & legit Euan-
 gelium: còque finito, rediens ad ostium Sa-
 crarij, librum ipsum Euangelij reddit Sa-
 cerdoti, qui ei pacem concepit verbis ap-
 precatur. Processionis huius prodeuntis
 ordinem sic describit Simeon Thessaloni-
 censis in libro de diuino templo. *Præse-*
runtur faces, & Diaconi bini, iterumque bini,
cum sacro Euangelio præcedunt, & Episcopi
latus utrumque Diaconi tegunt: à tergo ap-
tem Sacerdotes reliqui sequuntur; & illud,
Venite, Christum adoremus, clarissima voce
cantant: & Episcopo faustum acclama-
tur.

In Missa Æthiopum, similiter ante reci-
 tationem Euangelij Diaconus circuit Ec-
 clesiam, clamando; *Surgite, audite, Euan-*
gelium sanctum, & bonam annuntiationem
Domini nostri, & Salvatoris nostri Iesu Chri-

stri: Sacerdos autem, accipiendo Euangelium versus populum, illud ter incensat, & facta solenni precatione ad benedictionem Introitus in Ecclesiam, ipse cantat Euangelium, accensis luminaribus, & alio omni apparatu ex more adhibito.

Inter cetera (ait Concilium Valentinum c.1.) hoc esse censuimus observandum, ut sacro-sancta Euangelia, ante munerum illationem, in Missa Catechumenorum, in ordine lectionum post Apostolum legantur: quatenus salutaria praecepta Domini nostri Iesu Christi, vel sermones Sacerdotis, non solum fideles, sed etiam Catechumeni ac poenitentes, & omnes qui è diverso sunt, audire licitum habeant: nempe ut ex ea lectione, tum diuinorum praeceptorum, tum mysteriorum fidei notitiam, & Christianae vitae disciplinam hauriant. Hoc iam ab ipsis Apostolorum temporibus in Ecclesia observatum fuisse docet Clemens Romanus, Apostolic. Constitut. lib. 2. c. 57. & Liturgia S. Marci. Et ita sentit Valafridus Strabo libro de exord. & increm. c. 22. his verbis. Lectiones Apostolicas, vel Evangelicas, quis ante celebrationem sacrificij primum statuerit, non adeo certum est. Creditur tamen à primis successoribus Apostolorum eandem dispensationem factam, ea praecipue causâ, quia in Euangelis

eadem sacrificia celebrari iubentur : & in Apostolo, qualiter celebrari debeant, docetur : & ut, ante sanctissimæ actionis mystorium, ex Euangelio salutis & fidei suæ recognoscerent fundamentum ; & ex Apostolo eiusdem fidei, & morum Deo placentium, caperent instrumentum. Honorius autem in Gemma lib. i. c. 88. scribit : Epistolam & Euangelium Alexander Papa legi ad Missam constituit : Hieronymus autem, presbyter Lectionarium & Euangeliarium, ut hodie habet Ecclesia, collegit. Sed, quia Euangelium caput est & complementum Scripturarum, ut loquitur idem Clemens lib. i. c. 5, est arca testamenti æterni, est thesaurus omnium Sacramentorum, consiliorum & præceptorum salutis, eum repræsentans docentem in quo sunt omnes thesauri sapientiæ & scientiæ absconditi : idcirco Ecclesia, ut fidelium attentionem & reuerentiam erga illud excitet, singulari utitur cæremoniæ apparatus, & ordine quodam mystico, in eius recitatione.

Processio Diaconi, ab Altari ad legendum Euangelium euntis, significat missionem Apostolorum in vniuersum mundum, ad prædicandum omni creaturæ. Idcirco, antequam ab Altari proficiscatur, benedictionem accipit à Celebrante, tanquam à

Christo potestatem euangelizandi, qui *dat*
verbum euangelizantibus virtute multa, Psal.
 67. & osculatur eiusdem manum, quasi de
 manu Christi accipiens præceptum eu-
 angelizandi ex charitate, vt operibus exhi-
 beat id quod verbo prædicat. Vnde dicit
 Amalarius lib. 3. cap. 18. *Intendat diligenter*
Diaconus, vt cor eius cum dominicis verbis
vadat, & non sit infructuosa oratio Sacerdo-
tis; Dominum in mente teneat, quem suscipit
per benedictionem Sacerdotis. Cur verò Dia-
 conus lecturus Euangelium petat benedi-
 ctionem à Celebrante, non autem Subdia-
 conus lecturus Epistolam, hanc rationem
 reddit Rupertus lib. 1. de diuin. offic. c. 36.
Legem enim (inquit) & Prophetas inuisibilis
inuisibiliter misit: Apostolos autem & Evan-
gelistas, quorum Diaconus personam gerit, vi-
sibilis factus, & sanctam Ecclesiam, sponsam
videlicet suam, osculans osculo oris sui, visi-
biliter misit & docuit. Possumus addere
 aliam rationem: quia nempe lex vetus, in
 officio Subdiaconi per Ioannem Bapristam
 representata, cum adueniente Euangelio
 defierit (*Lex & Prophetæ vsque ad Ioannem,*
& ex eo regnum Dei euangelizabitur, Lucæ
 16.) iam non est opus missione vlla ad
 eam prædicandam.

Codicem Euangelij accipit de Altari, sicut

tabulæ Testamenti de monte Sinai acceptæ sunt à Mose, & corā populo portatæ, Exodi 34. & 35. ait Durandus lib. 4. Rational. c. 6. Eundem codicē fert in pectore; quia præcipuum studium Euangelici præconis esse debet, vt sciat legem Christi, & Euangelicæ doctrinæ amorem in corde gerat, quemadmodum S. Antonius de Padua, quem summus Pontifex *Arcam Testamenti* appellauit. Sed, vt codex iste mollius infideat pectori, puluillus substernitur, de quo Ordo Romanus, Rupertus lib. 1. c. 36. Hugo à sancto Victore, lib. 2. Eruditionis Theologicæ c. 20. & Durandus Rational. lib. 4. c. 24: vt indicetur, iugum legis Christi suauē esse, & onus præceptorum eius leue, mediante gratia quæ datur in nouo Testamento, de qua S. Augustinus libro de perfectione iustitiæ: *Perfecta charitas foras mittit timorem, & facit præcepti sarcinam leuem, non solum non prementem onere ponderum, verum-etiam subleuantem vice pennarum.* In Ordine Romano Diaconus, accepta benedictione à Sacerdote, osculans Euangelium, leuat in manus suas codicem in quo lecturus est, & partem eius in dextro humero ponens, vadit ad Ambonem; ob eandem haud dubiè causam, quasi iugum legis Christi faciliè & alacriter in humeros

tollens, & non grauâtè ferens.

Defertur idem liber cum pompa & insigni ornatu, propter debitum honorem (inquit Alcuinus) tanquam persona præpotentis, præcedentibus ac sequentibus ministris constipata, cum procedit in publicum, scilicet quasi ferculum Regis Christi, in prædicatoribus suis per vniuersum mundum cum honore delati. Etenim (vt est apud Nicephorum lib. 12. c. 34.) *Euangelium perfectam Christi refert imaginem: & Simeon Thessalonicensis in libro de templo, c. de sacra mensa; Per Episcopum Iesus significatur: quem & sacrum Euangelium in Altari conspicuum, & crux sacrificium eius indicat. Qua de causa olim in Conciliis in sublimi throno, vel in Altari ad id exstructo, cum regio quodam apparatu constitui solitum fuit, vice Christi præsentis & iudicantis; vt in Ephesino, Calchedonensi, Lateranensi sub Martino 1. & Florentino. De Ephesino Cyrillus Alexandrinus, qui ei auctoritate Apostolica præfuit, in Apologetico loquens, Sancta, inquit, Synodus in sancta Ecclesia, que Maria vocatur, congregata est, Christumque confessorem capitis loco adiunxit. Venerandum enim Euangelium in sancto throno collocauit, tantum non in aures Sacerdotum clamans, iustum iudicium*

indicate. Ideo, Sanctus Isidorus Pelusiota Epist. 136. libri primi, vocat *εὐαγγέλια* *ἀδωρεῖα*, id est, adoranda Evangelia: & in Milla, quacumque Diaconus incedit cum Evangelio, omnes ei, vt Christo prættereunti, honoris causa assurgunt: & in c. Apostolica. de Consecrat. dist. 1. ab Anastasio primo statutum est, vt, dum sancta Evangelia in Ecclesia recitantur, Sacerdotes & ceteri omnes præsentés, non sedentes, sed venerabiliter curui in conspectu Evangelij stantes, Dominica verba intente audiant, & fideliter adorent. Quod iam olim in exordio nascentis Ecclesiæ ab ipsis Apostolis sancitum fuerat, apud S. Clementem lib. 2. Constitut. Apost. c. 57. Atque hinc profecta est religiosa illa Ecclesiæ consuetudo, vt ad tria Cantica, *Benedictus*, *Magnificat*, & *Nunc dimittis*, qui vulgò Plalori Evangelici dicuntur, & ad lectionem Evangelicam in Matutino officio, stent omnes in pedes; quia illa de Evangelio sumpta sunt. Vbi obseruare conuenit quod Canon, Apostolica, præcipit, vt venerabiliter in conspectu Evangelij stent, id est, erecti in pedes, eo statu & compositione corporis quæ reuerentiam præ se ferat: contra quod faciunt qui interea desident, aut supini acubant suis subselliis, aut proclinati in alte-

rum latus incumbunt, etiam dum legitur Passio Domini:

De thure & cereis præcedentibus, in superiori processione dictum est: quibus addimus testimonium Simeonis Thessalonicensis de thure, citato libro de templo: *Ante Evangelium* (inquit) *thymiama*, id est, incensum datur, propter datam à Christo gratiam Spiritus toti mundo. Et S. Hieronymi lib. contra Vigilantium, de cereis: Per totas Orientis Ecclesias; quando legendum est Evangelium, accenduntur luminaria, iam Sole rutilante & non. Utique ad fugandas tenebras, sed ad signum lætitiæ demonstrandum. Rupertus lib. 1. c. 36. de varisque. Præcedunt (inquit) Ceroferarii, cum thuribulo; per quæ significantur gaudium & bona opinio. Gaudium enim semper est in bono nuntio. Bonæ quoque opinionis se esse nouerunt, qui hoc bonum portant nuntium; qui & confidenter dicunt, Christi bonus odor sumus Deo in omni loco. Quapropter incensum, bonæ opinionis signum locum ipsum aspergit in quo legendum est Evangelium. Quo loco alludit Rupertus ad notationem nominis, Evangelium, quod significat Græcè bonum nuntium. Apud Græcos, Deputati dicuntur duo illi ministri, qui, mandatis induti, cum lampadibus procedunt ante Evangelium, quando in

Missæ defertur ad Ambonem, vel in magna ecclesia ante sacra dona, ut scribit Ioannes Citrius in Responsis ad Constantinum Cabasilam, lib. 5. Iuris Græco-romani.

Crux vero hîc sublimis ante Euangelium portatur; quia gloria Euangelij est, prædicare Christum, & hunc crucifixum.

Progrediente Euangelio, canitur in Choro Antiphona, quæ Ante-euangelium dicitur, significans applausus & acclamationes populorum Euangelicam veritatem cum gaudio & admiratione suscipientium, ad instar puerorum Christo Ierusalem venienti acclamantium; Benedictus qui venit in nomine Domini; quæ ipsa verba in Liturgia sancti Ioannis Chrysostomi canuntur à Sacerdote & Diacono in secunda statione processionis Euangelij. Huius Antiphonæ meminit Durandus Rational. lib. 4. c. 24. eamque testatur in quibusdam Ecclesiis in præcipuis festiuitatibus cantari, Diacono proficiscente ad legendum Euangelium. Radulphus Tungrensis libro de Canonum obseruantia, propositione 23. de eadem sic: Tertia (lectio Missæ) de sancto Euangelio: ante quod, & post quod, cantantur Antiphonæ, quæ dicuntur Ante-euangelium, & Post-euangelium, quibus carent Romani.

Lecturus Euangelium Diaconus sugge-

stium seu locum editiorem conscendit, ad imitationem Christi in monte docentis, iuxta illud Isaia 4. *Super montem excelsum ascende tu, qui euangelizas Sion, exalta in fortitudine vocem tuam, qui euangelizas Ierusalem: ut è sublimi loquens ab omnibus exaudiatur, & significetur virtus Euangelij, quæ è cælo profecta omnes orbis partes Apostolorum prædicatione peruasit, In omnem terram exiuit sonus eorum, & in fines orbis terræ verba eorum.* Amalarius lib. 3. de Eccles. offic. c. 18. *Excellentior locus, in quo Euangelium legitur, eminentissimam doctrinam Evangelicæ prædicationis, atque manifestissimam auctoritatem iudicandi, signat.* Obseruandum autem hîc est ex Ordine Romano, sôli Diacono licere ad pronuntiandum Euangelium ascendere in summum gradum Ambonis, propter sublimitatem & eminentiam doctrinæ Evangelicæ: Subdiaconum autem pro legenda Epistola, & alios qui veniunt ad cantandum Responsorium, seu *Alleluia*, debere consistere in inferiore gradu: atque hæc causa est cur Responsorium appelletur *Gradale*, seu, *Graduale*; quia in gradu ascensionis Ambonis canitur: αὐτὸν enim Græcis dicitur quasi ἀναβαίνον, τὸ πρὸς τὸ ἀναβαίνειν, locus ad quem ascendendo peruenitur: quo vi-

detur alluisse Concilium Laodicenum canone 15. πλείον τῶν χειροκῶν ψαλτῶν, τῶν ὅτι τὸν ἁμβωνα ἀναβαινόντων, id est, præter cantores ordinarios, qui ad pulpitum seu ambonem ascendunt. Quo de ritu sic vetus Expositio Missæ, quæ habetur tomo 6. Bibliothecæ Patrum: *Vbi autem Evangelium legitur, ibi Epistola legi non debet, sed in subteriori gradu: quia Ioannis prædicatio ad Euangelij Christi altitudinem ascendere non potuit. Atque idem dicit de Responsorio, & Alleluia.*

Præcedit Subdiaconus Diaconum, atque adeo manibus vacuis, sine ullo gestamine; significans legem (ex interpretatione Stephani Eduentis, lib. de Sacramento Altaris, c. 12. Innocentij & Durandi suprà) quæ præcessit Evangelium, & illud multiplicibus figuris præsignavit; sed, adueniente Evangelio, umbra eius evanuit, quia eius vacua & egena elementa transierunt in veritatem & efficaciam Sacramentorum gratiæ Evangelicæ. Vnde S. Iustinus Martyr, in Responionibus ad Orthodoxos, resp. 101. *Quid enim ex lex? Evangelium prænuntiatum: Quid Evangelium? lex completa. Atque eadem de causa idem Subdiaconus, librum aperiens Diacono, Evangelium legendum digito præmonstrat, desinentis legis*

gis extremum præconium indicans, quo Ioannes Baptista Messiam iam præsentem digito designauit, dicens, *Ecce agnus Dei, ecce qui tollit peccatum mundi.*

Diaconus incipiens Euangelium, primò librum, deinde seipsum, in fronte, ore, & pectore, crucis impressione signat: quia Christiani instituti est, omnem actionem, præsertim sacram, à crucis signo auspicari tum vt ea hoc ritu sanctificata Deo dicatur; tum vt vis aduersaria Dæmonis, ne operi noceat, effugetur. Signat prius librum quàm seipsum: quia crucis mysterium ab Euangelio discimus, vt sciamus qua ratione Christi mortificationem in corpore nostro, iuxta Pauli dictum, portare debeamus. Signat se in fronte, quæ sedes est pudoris, profitens se non erubescere Euangelium Christi, vt idem Paulus loquitur, sed crucis eius ignominiam in gloriam deputare: *Vsq̃ue adeo de cruce non erubesco* (inquit S. Augustinus Enarrat in Psal. 141.) *Vt non in occulto habeam crucem Christi, sed in fronte portem.* Signat in ore, vt munden- tur labia sua ad dignè pronuntiandum eloquium Dei; sicut S. Porphyrius, qui disputaturus cum Manichæo, sumpto Euangelio, signum crucis ori suo impressit, apud Marcum Diaconum in eius vita. Signat in

pectore; vt omnis vana & immunda cogitatio à corde pellatur, ne quid impediatur, quominus puro corde Euangelium Dei annuntiare possit. Sic de signo crucis quo notantur Christiani in Baptismo, Guillelmus Parisiensis, libro de Sacramentis, in fine Tractatus de Baptismo. *Quia crux Christi & Iudeis scandalum erat, & gentibus stultitia: ideo in fronte vt gloria, & in pectore vt sapientia vera pingitur Christianis: siquidem pectus sapientiæ sedes, & frons gloriæ dicitur, quemadmodum pudor & ignominia.* Singulare est quod scribit Simeon Thessalonicensis libro citato, Hierarcham seu Episcopum signare Euangelium *τρίκιν*, id est, triplici seu trifido cereo: vt significetur, illuminatione per Incarnationem Christi non solum in terra homines, sed in cælis quoque Angelos illustratos fuisse; & eum ipsum, qui caro factus sit, Dei filium esse; & in eodem Euangelio Trinitatis prædicationem contineri, & sanctificationem per Trinitatem factam; & Christum, vbi in cælum migravit, splendorem Trinitatis (cuius typus est lumen) & benedictionem nobis tribuisse. Triplex illud in vno cereo lumen exprimit id quod S. Gregorius Nazianzenus dicit de Deo, Orat. 43. *ὁ δὲ τριλάμπης, lumen trino splendore fulgens: quæ*

voce etiam vtuntur libri rituales Græcorum; qui ob eandem rationem Deum indigitant *τρίλιος*, id est, triplicem Solem.

Salutat populum, dicens, *Dominus vobiscum*; quatenus (ait Alcuinus) corda illorum à mundanis cogitationibus emundet, & ad suscipienda verba salutifera aperire dignetur. Honorius in Gemma, lib. 1. c. 13. id ita interpretatur: Diaconus, inquit, cum ascenderit in Analogium, primum salutat populum per, *Dominus vobiscum*; quia Apostoli, quamcumque domum prædicaturi intrauerunt, primum per, *Pax huic domui*, auditores salutauerunt. Rupertus autem lib. 1. c. 36. sic explicat. Summa verò reuerentia debetur ad audiendum Euangelium, quod maximè est Verbum Dei: quam Diaconus prima voce, quam emittit, satis venerabiliter exigit, dicendo, *Dominus vobiscum*. Cuius enim melius, quam Domini præsentia, reuerentes & religiosi auditores petitiu debent præstare silentium? Attenti ergo & beneuoli sunt illico, & eò cordibus conuersi & vultibus, respondent, *Et cum spiritu tuo*. Ad hanc salutationem Sacerdos & circumstantes se in fronte signant; vt profiteantur post Diaconum, se quoque non erubescere Christum crucifixum, sed gloriari in eius cruce, in quo est salus, vita, &

reſurrectio noſtra : in peſtore verò, vt muniant ſe, ne veniat Diabolus, & tollat verbum de corde eorum, ne credentes ſalvi ſiant. Innocentius tertius, lib. 2. de offic. Miſſæ, cap. 38. dicit, Diaconum ſignare librum & oſculari, quaſi dicat, *Hic eſt liber Crucifixi, per quem reconciliationem accepimus.* Scribit Simeon Theſſalonicenſis libro citato, apud Græcos Episcopum, dum Euangelium legitur, ὁμοφώριον deponere, ſervitutem ac ſubiectionem ſuam erga Dominum demonſtrantem. Quoniam enim ille per Euangelium loqui cognoscitur, & tanquam coram adest, ipſe tunc monumentum Incarnationis eius geſtare non audet, ſed ab humeris ablatum Diacono tradit, neque illud ſumit niſi poſt communionem. Eſt autem ὁμοφώριον (vt idem Auctor exponit) veſtis genus ex lana confeſtum, in orbem humeros antè & retrò conueſtiens: quod carnem à Verbo ex Virgine propter nos ſuſceptam, humanæque naturæ aſſumptionem demonſtrat. Ideo enim ex lana textitur, quoniam erraticam ouem, hoc eſt, naturam noſtram ſignat, &, quoniam ipſe quoque Agnus pro nobis occiſus vocatus eſt: vnde Episcopus, cū illud induit, dicere ſolet: *Sublata in humeros, Chriſte, natura que errauerat, aſſumptus, Deo & Patri illam obſeru-*

listi. Idem planè scripsit ante Simeonem S. Iudorus Pelusiota Epist. 136. lib. 1. Omophorium autem Episcopi (inquit) cùm ex lana, non ex lino, contextum sit, ouis illius, quam Dominus aberrantem quasiuit, inuentamque humeris suis sustulit, pellem designat. Episcopus enim, qui Christi typum gerit, ipsius munere fungitur, atque ipso etiam habitu illud omnibus ostendit, se boni illius ac magni pastoris imitorem esse, qui gregis infirmitates sibi ferendas proposuit. Ac diligenter attende. Nam, cùm ipse verus pastor per adorandorum Euangeliorum apertionem accedit, tum demùm Episcopus assurgit, atque imitationis habitum depouit: significans, adesse Dominum ipsum, pastoralis artis ducem, & Deum, & herum quidem suum.

Addit Alcuinus ex Ordine Romano: Perlecto Euangelio, iterum se signo crucis populus munire festinat; ut, quod ex diuinis eloquiis ad salutem percepit, signatum sigillo crucis atque munitum permaneat, ne a mentibus eorum diabolica fraude euacuari valeat.

Diaconus reuersus ad Altare, Celebranti offert librum Euangelij apertum, dicens, *Hæc sunt verba sancta*: Celebrans autem osculatur Euangelium, respondens, *Credo* & confiteor, & subdens, *Per euangelica dicta deleantur nostra delicta*. Deinde qui sunt in Choro, Diacono minore circumferente

per superiora subsellia librum clausum, & singulis insinuante, *Hæc sunt verba sancta*, eundem dato osculo venerantur, dicentes similiter, *Credo & confiteor*. Quo de ritu ipse alios egregie Ionas Aurelianensis, in Præfatione libri 2. de cultu imaginum: *Volo ergo* (inquit, Claudium Taurinensem alloquens) *ut mihi respondeas, cuius causâ caput inclinasti* (codici Evangelii) *pellium, vel atramenti, an Dei auctoris legis eiusdem? Nam sacræ religionis usus in sancta Ecclesia adhuc servatur (si tamen apud te) ut, perlecta sacri Evangelij lectione, ab Episcopo, vel Presbyteris, ceterisque sacri ordinis religiosis, codex, in quo Evangelij lectio recitata est, multiplicibus osculis veneretur. Sed hoc cuius causâ, nisi illius, cuius esse verba creduntur, agimus? Oculum istud Christo in Evangelio datum significat actum fidei internum, quo assensum præbent omnes veritati Evangelicæ annuntiatae, eam acceptando: verba autem osculo superaddita, actum externum, quo eandem fidem palam profitentur, iuxta illud Roman. 10. *Corde creditur ad iustitiam, ore autem fit confessio ad salutem*: quam singulorum confessionem statim subsequitur communis & publica Ecclesiæ professio, omnibus vno ore canentibus Symbolum Concilij Nicæni. Qua de re sic*

S. Thomas 3. p. q. 83. art. 4. *Perfectè autem populus instruitur per doctrinam Christi in Euangelio contentam, quæ à summis ministris legitur; scilicet à Diaconibus. Et, quia Christo credimus tanquam diuinæ veritati, (secundum illud Ioann. 8. Si veritatem dico vobis, quare non creditis mihi?) lecto Euangelio, Symbolum fidei cantatur, in quo populus ostendit, se per fidem Christi doctrinæ assequere.*

De Processione in Festo Purificationis B. Mariæ.

CAPVT VII.

Festum Purificationis Beatæ Mariæ Græco nomine *Hypante*, seu, *Hypante* dicitur, quasi *Occursus*, quo alicui obuiam itur honoris & officij gratia: quod ab Ecclesia institutum fuit in memoriam illius diei, quo Christo, cum matre & Iosepho ad templum accedenti, obuiam venerunt Simeon & Anna, gratulantes, & benedicentes Deum, Lucæ 2. vnde huius solennitatis Officium exorditur Ecclesia ab Inuitatorio, *Ecce venit ad templum sanctum suum dominator Dominus; gaude & letare*
F. iij.

per superiora subsellia librum clausum, & singulis insinuante, *Hæc sunt verba sancta*, eundem dato osculo venerantur, dicentes similiter, *Credo & confiteor*. Quo de ritu inter alios egregie Ionas Aurelianensis, in Præfatione libri 2. de cultu imaginum: *Volo ergo* (inquit, Claudium Tautinensem alloquens) *ut mihi respondeas, cuius causâ caput inclinasti* (codici Evangelii) *pellium, vel atramenti, an Dei auctoris legis eiusdem? Nam sacræ religionis usus in sancta Ecclesia adhuc servatur* (si tamen apud te) *ut, perlecta sacri Evangelij lectione, ab Episcopo, vel Presbyteris, cæterisque sacri ordinis religiosis, codex, in quo Evangelij lectio recitata est, multiplicibus osculis veneretur. Sed hoc cuius causâ, nisi illius, cuius esse verba creduntur, agimus? Oculum istud Christo in Evangelio datum significat actum fidei internum, quo assensum præbent omnes veritati Evangelicæ annuntiatae, eam acceptando: verba autem osculo superaddita, actum externum, quo eandem fidem palam profitentur, iuxta illud Roman. 10. *Corde creditur ad iustitiam, ore autem fit confessio ad salutem*: quam singulorum confessionem statim subsequitur communis & publica Ecclesiæ professio, omnibus vno ore canentibus *Symbolum Concilij Nicæni*. Quod de re sic*

S. Thomas 3. p. q. 83. art. 4. *Perfectè autem populus instruitur per doctrinam Christi in Euangelio contentam, quæ à summis ministris legitur; scilicet à Diaconibus. Et, quia Christo credimus tanquam diuinæ Veritati, (secundum illud Ioann. 8. Si Veritatem dico vobis, quare non creditis mihi?) lecto Euangelio, Symbolum fidei cantatur, in quo populus ostendit, se per fidem Christi doctrinæ assequere.*

De Processione in Festo Purificationis B. Mariæ.

CAPVT VII.

Festum Purificationis Beatæ Mariæ Græco nomine *Hypante*, seu, *Hypapante* dicitur, quasi *Occursus*, quo alicui obuiam itur honoris & officij gratia: quod ab Ecclesia institutum fuerit in memoriam illius dici, quo Christo, cum matre & Iosepho ad templum accedenti, obuiam venerunt Simeon & Anna, gratulantes, & benedicentes Deum, Lucæ 2. vnde huius solennitatis Officium exorditur Ecclesia ab Inuitatorio, *Ecce venit ad templum sanctum suum dominator Dominus; gaude & letare*
F. iiii.

Sion, occurrens Deo tuo. Cuius occurſus myſterium vt ritè celebretur, inſtituta eſt ſolemnis proceſſio cum luminaribus ad eum uſum benediſtis: qua fideles, Chriſto ſalutis ſuæ cauſa in mundum venienti occurrentes, vt cum pio affectu, & grati animi complexu, excipiant ac venerentur, lucentium candelarum ſymbolo profitentur fidem ſuam de veritate humanitatis & diuinitatis eius; carnis ſanctitatem purâ cerâ, diuinitatis gloriâ lumine ex benedictione indito ſignificantes: ac ſimul eidem gratiarum actionis & laudis hymnos accinunt de cordibus ſuis, quod venerit *Lumen ad reuelationem gentium, & gloriâ plebis ſuæ Iſraëls*; conſidentes, ſe de eius plenitudine omnem gratiam ſanctificationis & doctrinæ cœleſtis accepiffe, ſicut de igne Cerei Sacerdotalis, qui Chriſtum reſ præſentat, omnes omnium cerei lumen concipiunt; atque, in tanti beneficii gratiam, ei ſua corda, ſinceræ charitatis igne ardentia, offerunt.

De cauſa inſtituendæ huius proceſſionis ita Venerabilis Beda, libro de temporum ratione, c. 10. *Secundum menſem Numa dicitur Februo, id eſt, Plutoni, qui luſtrationum potens credebatur, luſtrarique eo menſe ciuitatem neceſſe erat; quo ſtatuit vt iuſta (id eſt,*

sacrificia, vt ipse interpretatur libro de diuisionibus temporum) Diis manibus solue-
rentur. Sed hanc lustrandi consuetudinem be-
nè mutauit Christiana Religio, cum in men-
se eodem, die sanctæ Mariæ, plebs vniuersa
cum Sacerdotibus ac ministris, hymnis modu-
lata vocis per Ecclesias, perque congrua vr-
bis loca procedit, datosque à Pontifice cuncti
cereos in manibus gestant ardentes: & , au-
gescente bona consuetudine, idipsum in cate-
ris quoque eiusdem beatæ Matris & perpetuæ
Virginis festiuitatibus agere didicit; non vti-
que in lustrationem terrestris imperij quin-
quennem, sed in perennem celestis regni me-
moriæ; quando, iuxta parabolam Virginum
prudentium, omnes electi, lucentibus bonorum
actuum lampadibus, obuiam sponso ac regi
suo venientes, mox cum eo ad nuptias super-
næ ciuitatis intrabunt. Quod ibi de subla-
tis Lupercalibus scribit Beda, id præstitum
est à Damaso 1. vt constat ex libello eius-
dem aduersus Andromachum tomo Con-
ciliorum. Notandum præterea, quod dicit
idem Beda, fideles datos à Pontifice cereos
gestare, id eò pertinere vt significetur my-
sterium illuminationis gratiæ & fidei, quam
omnes à Christo accipimus: vnde in Mis-
sali Romano Celebrans distribuit cande-
las accensas singulis ad se accedentibus, &

cum osculo manus ipsius accipientibus : & similiter in antiquo Ordine Romano : quod idem repetit Alcuinus libro de diuin. offic. c. de Purificatione. Et similiter in Dominica Palmarum, iuxta Ordinem Romanum, Sacerdos populo diuidit ramos benedictos.

Auctorem eiusdem processionis Sergium Papam primum extitisse tradit Ordo Romanus ex Gestis Pontificalibus : sed eam ante id tempus in Gallia vsitatam fuisse, argumento esse potest sancti Eligij Nouiomensis, qui Sergij pontificatum antecessit, Homilia secunda de vsu luminarium, habita in die Purificationis, in qua ita scribit : *Consuetudo est Ecclesiastica, vt hac die gestantes manibus lumina, Missarum solennia celebremus.* Et cerè verba libri Pontificalis in vita Sergij videntur tantum significare, Romæ ipsum Sergium instituisse, vt ab Ecclesia Sancti Adriani ad sanctam Mariam Maiorem supplicatio procederet. Sic enim habent : *Constituit autem vt diebus Annuntiationis Domini, Natiuitatis, & Dormitionis sancte Dei Genitricis semperque Virginis Mariae, ac sancti Simeonis, quod Hypapanten Græci appellant, Litania exeat à S. Adriano, & ad sanctam Mariam populus occurrat.*

Festum verò ipsum apud Constantino-
polim colendum edixisse Iustinianum Se-
niores, auctor est Nicephorus, lib. 17. Hist.
Eccles. c. 28. & ita habet Vsuardi Martyro-
gium 2. Februarij : *Hypante Domini, &
Purificatio beata Virginis: quod Festum tem-
pore Iustiniani Imperatoris apud Byzantium
seu Constantinopolim sumpsit exordium. Cui
consentanea scribit Siffridus, Epitomes lib.
1. anno 551. Atque id Sigebertus in Chro-
nico, anno Christi 542. factum scribit,
exorta apud Constantinopolim graui pe-
stilentia, quæ ea ratione sedata fuerit. Idem
testatur Landulphus Sagax in vita Iustinia-
ni, his verbis. Anno quintodecimo Imperij
Iustiniani, mense Octobri, facta est mortali-
tas Byzantijs. Et eodem anno Hypapante Do-
mini sumpsit initium, ut celebraretur apud
Byzantium secunda die Februarij mensis.*

*De Processione in die
Cinerum.*

CAPVT VIII.

ORiginem traxit hæc processio ex an-
tiquo ritu publicæ & solennis pœni-

tentia. Eo enim die olim (vt patet ex c. *In capite*. diſt. 50. ex Ordine Romano, & Pontificali) Pœnitentes, id eſt, ij quibus ob grauius aliquod crimen admiſſum publicè agenda pœnitentia imponebatur, repræſentabant ſe Epifcopo ante fores Eccleſiæ, ſacco induti, nudis pedibus, vultu in terram demifſo, reos ſe eſſe ipſo habitu proteſtantes; &, cùm iis pœnitentia pro modo culpe iniuncta fuiſſet, introducti in Eccleſiam humi proſternebant ſe: Pontifex autem in genua procidens, cum vniuerſo Clero Pſalmos pœnitentiales cum lacrymis pro eorum abſolutione decantabat; ac poſtmodum ſurgens manus eiſdem imponebat, cinerem capitibus immittebat, ac, ſuperfuſa aqua benediſta, eadem cilicio obuoluebat; denuntiabatque iis, quòd, ſicut Adam eiectus fuerat de paradifo propter tranſgreſſionem ſuam, ita ipſi à ſinu matris Eccleſiæ propter peccata ſua eiciebantur: atque illicò iubebat miniſtris vt eos extra ianuas Eccleſiæ expellerent: exeuntes verò illos Clerus proſequiebatur, cantans Reſponſorium, *In ſudore vultus tui veſceris pane tuo*; vt videntes ſanctam Eccleſiam pro facinoribus ſuis tremefactam atque commotam, non parui penderent pœnitentiam.

Et si autem vltus iste eiectionis Pœnitentium iam desitus sit, retinuit tamen Ecclesia expressam eius imaginem in processione quam hoc die obseruat, iuxta Ordinem Romanum, & Alcuinum lib. de diuin. offic. benedicendo cineres, & eos aspergendo capitibus fidelium in signum pœnitentiæ (omnes nimirum pro reis accipiens, quia omnes peccauerunt) cantando Responsoria quibus inuitantur ad pœnitentiam; deducendo eos foras, vt intelligant, se peccatis suis esse commeritos vt à facie Dei, & communione sanctæ Ecclesiæ, eicerentur; ac subinde eos intra Ecclesiam reducendo, vt sperent Dei benignitate se in gratiam receptum iri, si pœnitentiam egerint; ac demùm super eos recitando Psalmos pœnitentiales cum Litanis; vt ille, tot repetitis Sanctorum suffragiis exoratus, faciat cum seruis suis secundum multitudinem misericordiæ suæ.

De Proceſſione Palmarum.

CAPVT IX.

PROCEſſio Dominicæ Palmarum (quæ Græcis βασιλόπος dicitur, ſeu *μεγαλὴ τῶν βαίων*, & *ἐορτὴ τῶν βαίων*) ex eo nomen accepit, quòd inſtituta fuerit in memoriam celebris illius triumphī, quem egit Chriſtus aſino inſidens, cum Bethania Ieroſolymam venienti obuiam proceſſerunt populorum turbæ cum ramis palmarum, laudantes Deum voce magna ſuper omnibus quas viderant ab eo fieri virtutibus, progredienti veſtes ſuas honoris cauſâ ſubſternentes, vi- rentes ramos paſſim toto itinere ſpargentes, regem cum conſalutantes, acclamantesque, *Hofanna, benedictus qui venit in nomine Domini Rex Iſrael*: cūque hac pompa inuectus in urbem templum eſſet ingreſſus, eiectiſque inde negotiatoribus, cæcos & claudos in oculis omnium ſanāſſet, puero- rum quoque concors acclamatio erupit, ei accinentium, *Hofanna filio David*: vt ex ore infantium & lactentium laus à maioribus

natu inchoata, iuxta propheticum vaticinium, perficeretur; Matth. c. 21. Marci 11. Luca 19. & Ioan. 12.

Cuius triumphi mysterium ita breuiter explicat Isidorus lib. 1. de Eccles. offic. c. 27. *In ramis palmarum significabatur victoria, qua erat Dominus mortem moriendo superatus, & trophæo crucis de diabolo mortis principe triumphaturus: in asello autem, super quem sedendo Ierosolymam venit, indicabat simplicitia corda Gentilitatis, quæ presidendo atque regendo perducebat ad visionem pacis.* Copiosius S. Ambrosius Sermone 45. de Tempore. *Veniente Domino nostro Iesu Christo ad urbem Ierusalem ante sex dies passionis suæ, turba multa, quæ conuenerat Ierusalymis, ut secundum præceptum Moysi Pâscha celebraret, accipiens ramos palmarum occurrit illi obuiam: ut in palmis victoriam Christi ostenderent, velut terreni regis in populo Israel: consuetudo enim est ut victoribus palma offeratur.* Alij autem de eadem turba ramos cadebant de arboribus, maxime oliuarum, quia in monte Oliueti res agebatur: & eos portabant, ut, ubi opportunum esset, venienti Domino planum sternerent iter. Hinc descendit consuetudo hodiernæ festiuitatis, ut psallentes ramos palmarum siue oliuarum portemus in manibus, & eandem festiuitatem Palmarum siue

Oliuarum vocitemus. Sed non absque magno Sacramento rami istarum arborum feruntur. Oliua enim, quia oleum, ut solamen dolorum atque laborum, portat in fructu. Oleo enim quia & vulnera curantur, & aestus leuatur, opera designantur misericordiae: siquidem & ipsa misericordia Gracè dicitur iudeos. Palma autem radix aspera est, sed nitorem maximum habet in fine: ostendens, per huius vitae asperitatem in decorem caelestis patriae nos debere sustolli. Vnde & Dauid Propheta Psalmographus de iusto viro canit: Iustus ut palma florebit. Ramos ergo oliuae portemus in manibus, virtutem misericordiae exhibentes in operatione. Sumamus & ramos palmarum: ut pro misericordiae bono, non terrena delectamenta, sed supernae patriae pulchritudinem expectemus, quod nos praecessit Christus Dominus noster, qui est, iuxta Apostolum, finis legis ad iustitiam omni credenti. Nec praetereundum est à Psalmi versiculo, quem occurrens turba Domino decantabat: Hosanna filio Dauid, benedictus qui venit in nomine Domini, hosanna in excelsis. Aduentus enim Domini eiusque Incarnatio, non solum hominum salus fuit in terra, sed etiam Angelorum in caelo: quia, dum homines in terra saluantur, Angelorum numerus, qui Diabolo cadente minoratus fuerat, integratur in caelo. Hosanna ergo in excelsis, tantumdem est,

est, tanquam si dicatur: Salua nos, qui etiam
 es salus in calis. Et Sermone 46. Super as-
 nam igitur Dominus sedet, & Ierusalem ten-
 dit, cum animas nostras inhabitans, mundum
 istum despicere, & caelestem patriam diligere
 facit. Vestimenta in via ante Deum iactatis,
 si viam illi ad vos veniendi preparando, cor-
 pora vestra per abstinenciam castigatis. Ra-
 mos verò de arboribus præciditis, si sancto-
 rum Patrum virtutes amando, viam ad vos
 venienti Domino præparatis. Quid fuit Abra-
 ham? quid fuit Ioseph? quid David? quid re-
 liqui iusti? nisi fructiferae arbores Ecclesie
 Dei? Discite ab Abraham obedientiam, à
 Ioseph castitatem, à David humilitatem, si
 perpetuam desideratis adipisci salutem. Et,
 quia palma victoriam significat, palmas in
 manu rectè portamus, si ita ei laudes victo-
 riæ decantamus, ut etiam benè viuendo Dia-
 bolum vincere studeamus, &c.

Hunc igitur Saluatoris triumphum, &
 sub eius symbolo triumphum passionis
 eiusdem repræsentat Ecclesia procedens
 cum ramis benedictis ad stationem cru-
 cis. Quo in itinere populus quidem silen-
 ti agmine incedit præ reuerentia, sed Sa-
 cerdotum chori eius nomine triumphan-
 tem Christum per vias faustis acclamatio-
 nibus prosequuntur: pueri autem hymn

num gloriæ ad templi ingreſſum concinentes, puerorum Iudaorum vicem agunt. Sacerdos fore templi ſeu portas ciuitatis puſans, & impacta cruce aperiens; Chriſtum exprimit virtute paſſionis ſuæ portas cæli aperiентem, & de diabolo victoriam in cruce reportantem: ſicut hac die diuina virtute effecit, vt, patentibus portis ciuitatis Ieruſalem, cum honore ab vniuerſo populo, quaſi Rex Iſraël, intra mœnia exciperetur. Alias huius ritus explicationes proferimus inferius c. 14. Idem ritus portas aperiendi eodem proſus modo obſeruatur in Dedicatione Eccleſiæ, tum apud Græcos, tum apud Latinos, vt videre eſt in Pontificali Romano, in Ordine Romano, & apud Nicolaum Cabasilam lib. 5. de vita in Chriſto

Quod verò in ipſa ſtatione ante crucem, ſurculi de ramis benediſtis decerpti paſſim in terram, & ad eius ſtipitem, quaſi ad pedes Chriſti, laſtantur, vel in eodem ſtipite depanguntur; eo ſymbolo populus Chriſtianus, imitans Iudaos ſternentes ramos in via, proſitetur, omnem ſpem ſalutis ſibi in Chriſti morte & paſſione poſitam eſſe, omnem gratiam, omnem vim merendi & ſatisfaciendi ab illius virtute proficiſci, quaſi ſurculos ab arbore ſua pronascentes; ac

proinde omnia se opera sua ad eius cul-
tum & gloriam referre, omnes pios affec-
tus in eius amorem profundere. Vnde dum
id agit populus, duo chori, diuisis inter se
partibus crucem adorantes, alternis versi-
bus sapius ingeminant, *hosanna*, id est,
salua quesos; alij quidem ante crucem, alij
verò post eam ex aduerso constituti, sed
vtrique eandem reuerenter obtuentes: vt
oculis spectandum exhibeant id quod Euan-
gelistæ scripserunt; *Turbæ autem quæ præ-*
cedebant, & quæ sequebantur, clamabant,
dicentes, Hosanna filio David. Quod olim
dum fieret, Canonici Ecclesiæ Andega-
uentis cappas, quibus eo tempore amicti
esse solent, exuebant, quasi vestimenta
sua Christo subternentes, iuxta Ordinem
Romanum; in quo scholastici, id est, can-
tores, lento gradu venientes ante crucem,
& cum omni reuerentia casulas vel cappas
in terram iactantes, proni adorant Cruci-
fixum, Clero interim cantante Antipho-
nam; *Pueri Hebraorum vestimenta proster-*
nebant in via, &c. alia verò ex parte pue-
ri cantantes, *Kyrie eleison,* succedunt an-
te crucem, & ramos palmarum humi ster-
nentes, proni quoque adorant Cruci-
fixum, Clero interim canente Antipho-
nam, *Pueri Hebraorum, tollentes ramos oli-*

uarum, &c. Et tunc (ait Ordo Romanus) prosternit omnis populus hinc inde flores seu frondes, Clero cantante *Antiphonam*, Cum *Angelis & pueris*. Quod idem refert Alcuinus in Officio huius diei.

Iuxta Ordinem Romanum extra ciuitatem fit processio, & id ferme omnibus in locis obseruatur ad imitationem populi Ierosolymitani, qui extra ciuitatem progressus obuiam Christo aduenienti exiit. Et ita habuit prima institutio processionis Ecclesiæ nostræ. Nam olim, etiam tempore Ludouici Pij (de quo inferius hoc capite) tumulus S. Michaëlis, in quo statio hodierna celebratur, extra pomerium erat.

In eadem Ecclesia nostra, reuersa processione, in statione ante Crucifixum, cantatur à Psaltis è sublimiore suggestu Versus, *Vnus autem ex ipsis Caiphas*, ex Responsorio, *Collegerunt Pontifices*, quasi publicè denuntiantibus vniuerso populo prophetiam illam Caiphæ, *Expedi vobis vt vnus moriatur homo pro populo, & non tota gens pereat*: qui ritus sumptus est ex antiquo Ordine Romano, vbi duo ex paraphonistis ascendentes in pulpitum imponunt idem Responsorium.

Scribunt, Sigebertus in Chronico, anno Domini 841. & Hugo Floriacensis Chro-

nle. lib.6. Theodulphum Abbatem Floriacensem, qui postea fuit Episcopus Aurelianensis, cum Andegavi in carcere detineretur, ipso die Palmarum, processione Ecclesiæ Andegauensis secundum eum locum prætereunte, Hymnum cui initium est, *Gloria, laus & honor*, à se in eam rem compositum, clara voce per fenestram cecinisse: ipsum verò Imperatorem Ludouicum Pium, qui tum aderat, admirabundum restitisse, & eius carminis suauitate ac pietate usque adeo fuisse delectatum, vt Abbatem è vestigio liberaret. In cuius rei memoriam, cum postea is Hymnus vniuersæ Ecclesiæ vsu in Officium huius processionis receptus fuisset, cum Ecclesia Andegauensis, apud eundem locum, vbi primum auditus fuit, id est, ad portam Andegauinam, canere consuevit, & ritum pulsandæ atque aperiendæ portæ ciuitatis peragere.

Apud Græcos hæc processio cum insigni apparatu & reuerentia celebratur. Scribit enim Codinus in libro de Officiis aulæ Constantinopolitanæ, c.10. proximis diebus ante Dominicam Palmarum exstrui solere publicam ambulationem à palatio Imperatoris vsque ad Ecclesiam; ipsa autem nocte, quæ eam antecedit, om-

nes ambulationis columnas myrteis, laurcis, vel oleaginis ramis ornari, & iisdem pauimentum ſterni: tempore autem matutini Officij ſupplicationem per eam viam hoc ordine inſtrui, vt ante omnes procedat Lampadarius manu lampadem ardentem geſtans, & modulata voce cantans hoc Idiomelon: *Egredimini gentes, egredimini populi, contemplantini hodie Regem calorum; Chriſti enim figuram gerens Euangelium progreditur.* Sequitur Imperator diademate coronatus, & ſacco, id eſt, feſta veſte, indutus, dextera crucem præferens, ſiniſtra lampadem: deinde vniuerſus aulae comitatus: tum Archidiaconus Euangelium geſtans; cui ſuccedit Patriarcha; poſt eum Sacerdotes quinque, vel plures, ſacras inagines portantes, &c. Quod ibi dicitur, Euangelium in proceſſione deferri ad Chriſtum repræſentandum, id quoque refert Alcuinus in lib. de diuin. offic. à pleriſque Eccleſiis uſurpari, vt Euangelium (quod, inquit, intelligitur Chriſtus) in geſtatorio decenter ornato portetur à Diaconis, cum exultatione ſubeuntibus iugum Chriſti ſuaue, & onus eius leue. Id verò apud nos ſuper pedus geſtatur à Diacono, ex quo apud crucem publicè legitur textus ſancti Matthæi de myſterio hodierno. In Ordine

Romano, & apud Alcuinum, quoties canitur Versus, *Gloria, laus & honor tibi sit rex Christe*, conuertuntur ad sanctum Euangelium, quasi Christum adorantes. In Triodio autem Græcorum, in Officio huius Dominicæ, Præposito Ecclesiæ distribvente ramos benedictos, singuli osculantur Euangelium.

Quod pertinet ad ritum claudendi fores Ecclesiæ, & eas cum statis & solennibus verbis aperiendi, cum obseruant Græci in die Paschæ, ut est apud Codinum libro citato c. 14. & describitur à nobis inferius, c. 14.

*De Processione in die Cænæ Domini,
ad consecrationem Chrismatis,
& Olei sancti.*

C A P V T X.

VNgendi ritu vititur Ecclesia in quatuor Sacramentis, in Baptismo, Confirmatione, Ordinatione Sacerdotum, & Extrema vnctione; ac præterea in consecratione Episcopi, Ecclesiæ & Altaris, Fon-

tis baptismalis, patenæ & calicis, & benedictione campanarum. Et harum quidem vñctionum omnium materia est oleum ex oliuis expressum: sed in Chrismate balsamum oleo admiscetur, ex S. Gregorio, Expos. in Cantica c. 1. Innocentio tertio, c. unico de sacra vñctione, Concilio Bracarenfi 2. c. 4. Concilio Florentino in Decreto Eugenij quarti, & Concilio Lateranensi sub Leone decimo, Sessione 11. vñda apud Gregorium Turonensem lib. 1. de gloria Martyrum, c. 41. Christianus, qui frontem Chrismatis inscriptione signatam fert, dicitur, balsamo vñctus. Chrismatis solius vsus est in Sacramento Confirmationis, & consecratione Episcopi, patenæ & calicis: Chrismatis & Olei Catechumenorū simul, in Baptismo, in consecratione Fontis baptismalis, Ecclesiæ & Altaris: Olei Catechumenorum solius, in Ordinatione Sacerdotum: Olei infirmorum solius, in Sacramento Extremæ vñctionis: Olei infirmorum & Chrismatis, in benedictione campanarum. Sed triplex istud genus Olei, vt idoneum sit organum diuinæ misericordiæ ad vngendum spiritualiter, & sanctificandum ea quibus ritè adhibetur, id accipit ex Ecclesiastica benedictione, & solenni consecratione quæ fit quotannis ab Episcopo

fecia quinta in Cœna Domini, de Consecrat. dist. 3. c. *Literis. c. Te referente*, de celebrat. miss. Clementina vnica de reliq. & veneratione sanct. Concilio Aquisgranensi secundo c. 8. in Pontificali Romano, & in Euchologio in Ordine sacri vnguenti: etiam tempore Interdicti, c. *Quoniam*. de sent. excom. in Sexto: nec alio die fieri debet, ex Concilio Meldensi, c. 46. & fieri debet in Missa, & in Ecclesia Cathedrali, dicto c. *Te referente*.

Cur autem hac die eiusmodi consecratio celebretur, hanc causam produnt, Isidorus lib. 1. de Eccles. offic. c. 28. Alcuinus lib. de diuin. offic. c. de cœna Domini, & Rabanus lib. 2. de Instit. cleric. c. 36: *Quia antequam Pasche Maria Magdalena caput ac pedes Domini vnguento perfudisse perhibetur*, Rupertus lib. 5. de diuin. offic. c. 17. aliam reddit rationem; vt nempe res significata figuræ respondeat. Etenim, cum hic dies quartum-decimum diem primi mensis referat, quo Exodi c. 12. agnus immolari ad vesperam iussus est, & de sanguine eius vterque postis ostij signari, & superliminaria domorum, in quibus comedendus esset, vt, eo signo viso, Angelus exterminator Egypti sacri conuiuij domos intactas præteriret: consequens quidem erat, vt hac

ipſa nocte domus eorum in quibus Agnus comedendus eſt, id eſt, frontes eorum in quorum mentibus fides Agni Dei Chriſti reconditur, ſacro Chriſmate ſignarentur. Sed, quia interueniente die mortis Chriſti, quæ luctui & ſilentio dicata eſt, conuiuium illud Paſchale in tertium diem, qui eſt Reſurrectionis, differri oportuit; idcirco ipſa quidem ſignatio frontis ex Chriſmate in noctem Reſurrectionis, in qua Baptiſmus ſolenniter adminiſtratur, neceſſariò dilata fuit: ſed in feria quinta eiſdem Chriſmatis conſecratio anticipatur, quia ipſa die Paſceus, quæ ſola intermedia eſt, Miſſæ ſacrificium non celebratur, ſine quo Chriſma conſici nefas eſt, ex Gloſſa in c. *Te referente.* & Hoſtienſi ibidem; quandoquidem ex præſcripto Sacramentarij S. Gregorij, Ordinis Romani, & Pontificalis, hic ritus intra Miſſæ Canonem perficiendus eſt; vnde Amalarius lib. 1. c. 12. eum vocat *ἐπιβολὴν*, id eſt, *inſertionem* Officij conſecrationis corporis & ſanguinis Domini. Cuius rei ratio eſt, quia Chriſtus in vltima cœna Sacramentum Chriſmatis ſimul cum Euchariftia inſtituit: vnde eiſdem conſecratio fit immediatè poſt communionem Episcoporum. Qua in ſententia Ruperti obſervandum eſt, cum reſpicere ad morem pri-

mitiuræ Ecclesiæ, quo cum Baptismus ab Episcopis ordinariè administraretur, ab iis etiam baptizati sacro Chrismate statim à Baptismo in fronte consignabantur; ut eo Sacramento plenius sanctificati, dignius ad percipiendam Eucharistiam accederent, iuxta doctrinam Dionysij Arcopagite Eccles. Hierarch. c. 3. In libro de vñctione Chrismatis, qui inter Cypriani opera recensetur, *Hinc diei assignata dicitur tanti operis causa, ut quo die in Sacramento calicis Christi Ecclesiæ unitas, in lauacro pedum concors societas, & donans inuicem charitas, & subiecta humilitas data est; in vñctione quoque Christiani nominis, dignitas excellentiæ spiritualis propriè daretur, & confirmaretur filius adoptionis perpes auctoritat. & dignitas perseverans.* Quartam rationem adiungimus, quia hac die Christus id fieri instituit: sic enim scribit Fabianus Papa, Epist. 2. c. 1. si quidem hæc illius est: *In illa die Dominus Iesus, postquam cœnauit cum discipulis suis, & lauit eorum pedes, sicut à sanctis Apostolis prædecessores nostri acceperunt, nobisque reliquerunt, Chrisma conficere docuit. Et statim subdit. Sicut ipsius diei solennitas per singulos annos est celebranda, ita ipsius sancti Chrismatis confectio per singulos annos est agenda, & de anno in annum*

renouanda, & fidelibus tradenda. Et paucis interiectis : *Hæc ſancta Romana Eccleſia, & Antiochena, à temporibus Apoſtolorum guſtodit : hæc Ieroſolymorum & Epheso-rum tenet ; in quibus Apoſtoli præſidentes hæc docuerunt, & vetus Chriſma incendi, & non ampliùs quàm vno anno vti permiſe-runt.* Cuius rei argumento eſt, quòd conſecrationis Chriſmatis meminerunt S. Cle-mens Romanus, Epist. 3. & Conſtit. Apoſt. lib. 7. c. 43. & 45. Dionyſius Arcopagita Eccleſ. hierarch. c. 6. Cyprianus Epist. 70. Cyrillus Ieroſolymitanus Catecheſi myſtagog. 2. & Baſilius lib. de Spiritu ſancto, c. 27. Vt autem ſacrum Chriſma in conſpe-ctu totius populi publicè conſecraretur, ſcri-bit Nicephorus hiſtoriæ Eccleſ. lib. 15. c. 28. id à Petro Cnaphæo Epifcopo Antiochena primùm fuiſſe introductum.

In hac conſecratione præ cæteris obſeruatu digna eſt proceſſio illa, qua, Oleo infirmorum antiè benedicto, ampullæ Olei chriſmalis & Olei catechumenorum, cum baſſamo, à Secretario ſeu Sacriſtia ad Alta-re deferuntur, & ab Altari ad Secretarium reportantur; eſt enim eius ordo & forma planè ſingularis.

Antequàm omnes Thuriferarius cum thuri-bulo fumigante : ſequitur Subdiaconus cru-

cem ferens, medius inter duos Acolythos cum cereis ardentibus: tum alij duo pueri cantantes Versus præscriptos, & post eos Psalter cum Magistro Psallere, alternis repetentes versum intercalarem, *O Redemptor*: quos subsequitur Succentor, cum duobus Psaltis in cappis hinc inde assistentibus, præintonans singulis vicibus dictum Versum, *O Redemptor*. Succeedunt Subdiaconi, & post hos Diaconi, induti dalmaticis, bini procedentes: deinde vnus Subdiaconus portans vasculum cum balsamo: tum duo Diaconi simul, alter à dextris ampullam Olei ad sanctum Chrisma, alter à sinistris ampullam Olei Catechumenorum, sinistro brachio circumdatam, gestans, pendente ab humeris velo candido obuolutam. Extremi veniunt duodecim Sacerdotes, quos Cardinales vocant (in Ordine Romano, apud Honorium in Gemma, lib. 1. c. 4. & Durandum lib. 4. Rational. c. 6. dicuntur duodecim Priores) bini similiter incedentes. Hoc ordine à Sacristia procedunt in nauim Ecclesiæ, ac circuitu facto per eam, vt sit locus cantandis Versibus supradiictis, per medium Chorum accedunt ad Altare: vbi, reliquis suo ordine, vt in Pontificali habetur, circa Pontificem dispositis, Diaconus dexter, facta Altari

& Pontifici reuerentia, ampullam Olei chriſmalis tradit Archidiacono, qui eam Pontifici oftendens in menſa ante eum deponit; & mox vaſculum baſami de manu Subdiaconi accipiens, id ſimiliter Pontifici oſenſum in eadem menſa collocat. Alter verò Diaconus ſtans expectat, donec peracta fuerit Chriſmatis conſecratio. Qua peracta, ampullam Olei Catechumenorum porrigit Archidiacono, qui eam, vt ſuprà, oſenſam Pontifici, deponit in menſa. Oleo Catechumenorum benedicto, vtraque ampulla eodem ordine proceſſionis, quo antè venerat, reſportatur in Sacriſtiam, pueris pergentibus cantare Verſum, *Vt no-*
netur, & alios ſequentes: quibus *Psaltæ,*
vt ſuprà, intercinunt Verſum, *O Redem-*
ptor.

Proceſſio hæc ritus eſt publicæ oblationis; qua Sacerdotes & miniſtri Eccleſiæ, nomine populi Chriſtiani, offerunt Pontifici Oleum ad benedictionem & conſecrationem, iuxta illud Exodi 27. *Præcipe fili-*
us Iſraël, vt offerant tibi oleum de arboribus
olinarum puriſſimum. Sic enim interpreta-
tur Amalaris, lib. 1. c. 12. & refert in Sacra-
mentario ita ſcribi: *Antequàm dicatur, Per*
quem hæc omnia Domine ſemper bona creas,
lenantur de ampullis quas offerunt populi, &

benedicit tam Dominus Papa, quàm omnes Episcopi. Quod idem habetur in Ordine Romano, ubi scribitur: Tunc offeratur Pontifici oleum de ampullis quas offerunt populi. Et deinde subdit Amalarius: Quando à populis offertur, simplex liquor est: per benedictionem Sacerdotum transfertur in Sacramentum, id est, in mysticum vsum, & legitimam materiam Sacramenti. Quibus ex verbis constat, primis temporibus in more fuisse, ut Oleum eiusmodi oblationis nomine à populo deferretur ad Altare in ampullis, de quibus ab Archidiacono sumebatur quantum satis esset ad consecrationem. Sic olim in sancto Missæ sacrificio fideles offerebant vinum, cantores aquam in calice miscendam, ut est apud eundem Amalarium, eodem lib. I. c. 19. Quod ille hausisse videtur ex libro Ordinis Romani, in quo ita scribitur: Interim cantores cantant Offertorium cum Versibus, & populus dat oblationes suas, id est, panem & vinum; & offerunt cum fanonibus (id est, mappulis) candidis, primò masculi, deinde femine: novissimè verò Sacerdotes & Diaconi offerunt, sed solum panem, & hoc ante Altare. Subdiaconus verò (qui ab hoc munere eodem in libro vocatur oblationarius) cum calice vacuo sequitur Archidiaconum, & Pontifice oblationes po-

palorum ſuſcipiente, Archidiaconus ſuſcipit poſt eum amulas, & refundit in calicem maiorem, tenente eum Subdiacono. Et patris in-
teriectis ſubiungit: Ornato verò Altari, Archidiaconus ſumit amulam Pontificis cum vi-
ro de Subdiacono, & refundit ſuper eum in calicem: deinde deſcendit Subdiaconus ſe-
quens in ſcholam, (id eſt, in Chorum) & accipit fontem de manu Archiparaphoniſte, & deſert Archidiacono, & ille ex amula in-
fundit, faciens erucem, in calicem. Et infe-
rius: Vt Pontifex, qui tunc celeſtem panem accepturus eſt, à terreno pane, quem iam à lai-
cis accepit, manus lauando expurget. Ad quod genus oblationum ſpectat quod ſcri-
bit Gregorius Turonenſis lib. 1. de gloria Martyrum, c. 38. Ferunt etiam, quòd eo tem-
pore, quo ad ſancta ſolennia incluſi ſunt (Martyres) vrceos argenteos ex metallo for-
matus, cum vino, quod ad oblationem ſacrifi-
cij diuini offertur, ſecum homines detuliſſent, argentumque ibi remanſiſſe manifeſtum eſt. Iam verò ea oblatio Olei ex uſu Eccleſiæ, tranſiit in miniſterium Sacerdotum, Diaconorum & Subdiaconorum, qui vice po-
puli eam Pontifici repræſentant.

Pertinet autem ad ſanctitatem myſterij quod celebratur, vt materia illius reueren-
ter & cum omni decòre (vt loquitur Ordo Romanus)

Romanus) portetur in huiusmodi processione. Sic apud Græcos non sine pompa & apparatu deferitur vnguentum sacrum, quod vocant, ad consecrationem. Primum enim, quia in magna feria quinta, vt loquuntur, propter ieiunium & tempus Quadragesimæ celebratur Missa Præ-sanctificationum (de qua capite sequenti) instituitur processio sanctissimi Sacramenti, ea forma quæ describitur à nobis infra c. 25. Ante eam procedit is qui appellatur primus Sacerdos, vnguentum illud, (Græco more ex oleo quidem & balsamo, sed admistis variis liquoribus & aromatibus, confectum) gestans in alabastro, id est, vase vitreo minime ansato, disco seu patena operto; septem paribus Diaconorum hinc inde cum flabellis muscariis affectantibus, præcuntibus autem Domestico & Diaconis aliis cum lampadibus. Cum autem ad fores Sanctuarij ventum fuerit, duobus Diaconis ex eo numero qui flabella gerunt introgressis, reliqui ex utraque parte consistunt, porrecto ordine ab ipsis foribus ad Altare. Sacerdote autem ante fores manente, Patriarcha adueniens de eius manu accipit alabastrum, atque illud ad lauam Altaris collocat: statimque, excepta processione sanctissimi Sacramenti, Dia-

cono ex ambone signum dante benedicendi, alabastrum discooperit, atque illud ter impressione crucis signans, mysticas preces consecrationis absoluit: iisque deum peractis, sanctum Chrisma tradit Protopapæ, qui illud in vas præparatum infundit; cæteri verò eo ordine, quo venerant, reuertuntur. Ita describitur eius processionis ritus in Euchologio, in Ordine sacri vnguenti. Sic apud eosdem Græcos materia sacrificij Eucharistici, nempe panis & vinum, solenni apparatu à Sacerdote & Diacono defertur in modum oblationis, à prothesi seu mensa propositionis ad sacrum Altare, longo circuitu procedendo per Ecclesiam (licet ipsa mensa, vnde profertur, sit intra sacrarium proxima Altari in quo sacrificatur) Lectoribus, Diaconis, Sacerdotibus, cum lampadibus & sacris vasis, præeuntibus ac sequentibus, & adhibito thuris suffitu, Choro interim canente proprium Hymnum, quæ processio vocatur ab iis *μεγάλη εἰσόδος*, id est, *magnus Introitus*, ut videre est in Liturgia sancti Ioannis Chrysostomi, apud Nicolaum Cabasilam in Expositione Liturgiæ, c. 24. Simeonem Thessalonicensem in libro de diuino templo, c. de Missa fidelium, Ioannem Cantaguzenum lib. 1. Historiæ Andronici, c. 41.

Codinum de Official. aulæ Constantinop.
c. 17. & in Concilio Florentino, sessione vlti-
ma in fine. Sic etiamnum in Ecclesiâ
Andegauensi, ex prisco ritu Romanæ Ec-
clesiæ (vt constat ex Ordine Romano su-
prâ, Alcuino lib. de diuin. offic. c. *Quid signi-
ficent Vestimenta*, & Amalario lib. I. c. 19.)
Præcentor diebus solennioribus ad obla-
tionem deferre solet cum apparatu amu-
lam aquæ in calicem fundendæ, Offertorio
seu velo setico ab humeris pendente inuo-
lutam, præeunte Subdiacono, qui eam at-
tulit è Secretario. Sic in Ecclesiis paro-
chialibus panis eulogiarum in populum
distribuendus, sertis & floribus ornatus, ac
lineo velo opertus, cum candela cerea ar-
dente, offerri solet ad Altare. In Ecclesiâ
Turonensi cum insigni quoque apparatu
defertur ad Altare omnis supellex & vasa
sacrificij; quem ritum vulgò appellant *Or-
dinem minorem*, imitatione Græcorum, qui
maio rem & minorem *εὐδοκῶν* in Liturgia
distinguunt. Facto initio procedendia Se-
cretario circa finem Euangelij, antecedunt
pompa apparitores duo. Tum princeps
Ordinis progreditur Thesaurarius cappa in-
dutus, seu quisquis è Dignitatum numero in
Introitu Missæ præiuit maiori Ordini, de
quo suprâ c. 5. Sequitur vnus Ceroferarius,

inde Subdiaconus, viceolos vini & aquæ, velo inducto, ferens: post hunc alius Ceroferarius; cuius vestiigiis insistit Diaconus, peluim argenteam gerens velo similiter opertam, cum patena superposita. Huic, prælucente Ceroferatio, succedit Diaconus alter, cui pro gestamine Calix sacer, cum Corporali, velo inuolutus, duabus paciferis tabellis velo impositis. Agmen claudit quartus Ceroferarius. Hi omnes eadem via, qua in Ordine maiore, in navim procedunt, & inde, traducto Choro, ad Altare pergunt, ibique sua quisque vasa seu gestamina cum summa reuerentia offerunt. Tam splendidi & instructi apparatus in his omnibus causa est, quia oblatio est actio sacra & religiosa, qua res oblata ab hominum dominio & profano usu secernitur, & Dei cultui tota dicatur; atque ideo cum decenti ordine & reuerentia fieri debet.

Eodem spectat quod Chrisma ipsum, & Oleum sanctum; postquam consecratum fuit, ab Episcopo & duodecim Sacerdotibus assistentibus ter cum honore salutatur, his verbis, *Ave sanctum Chrisma, Ave sanctum Oleum:* & post salutationem, osculum ampullæ ab iis libatur. Debetur enim reuerentia rebus sacris ratione sanctitatis: quia ex eo quod ad cultum Dei deputa-

te sunt, diuinum quiddam in se habere
censentur: unde honor qui iis defertur,
suapte natura redundat in Deum, vt do-
cet S. Thomas 2. 2. q. 99. art. 1. & 3. iuxta
Definitionem Concilij Nicæni secundi in
fine Actionis 7. quæ habet: *Sanctus Euan-*
gelis, & reliquis eiusmodi rebus sacris ac Deo
dicatis; thurificationum & luminum oblatio-
nem fieri, ad earum honorem, sicut antiquo-
rum pia fert consuetudo. Præcipue verò
dignum hac veneratione est sanctum
Chrisma, vtpote symbolum diuinæ vn-
ctionis, & instrumentum diuinitus institu-
tum ad communicandam fidelibus gra-
tiam Christi; qua de re S. Cyrillus Iero-
solymitanus Catechesis mystagogicæ ter-
tiæ initio: *Et vobis similiter, postquam è la-*
uacro sacrorum fluentorum ascendistis, da-
tum est Chrisma, similitudinem gerens illius
qui vnctus est Christus, quod est Spiritus
Sanctus, de quo beatus Isaias, in ea quæ de
ipso est prophetia, ex persona Domini dixit,
Spiritus Domini super me, eo quòd vnixerit
me, euangelizare pauperibus misit me. Oleo
enim & unguento corporali Christus ab ho-
minibus vnctus non est; sed Pater, Saluato-
rem illum mundi constituens, vnxit eum Spi-
ritu Sancto; quemadmodum Petrus inquit,
Act. 10. Et post pauca: *Vos verò vncti*

estis unguento, facti participes & confortes Christi. Sed vide, ne illud esse putes unguentum nudum. Quemadmodum enim panis Eucharistia, post sancti Spiritus inuocationem, non amplius est panis simplex, sed corpus Christi: sic & sanctum hoc unguentum, non iam simplex est, & ut ita dicam, commune, post inuocationem; sed Christi gratia, & Spiritus sancti quaedam presentia, qua diuinitatis ipsius vim & efficientiam tribuit. Quod verò Chrisma & Oleum Catechumenorum in secunda persona salutetur, tamquam res animata, id fit honoris causâ, per quamdam prosopopeiam; ut cum S. Andreas, crucem sibi paratam aspiciens, dicebat, *Salue crux pretiosa*: cum Daniel. 3. tres pueri creaturis inanimatis, *Benedicite sol & luna Domino, benedicite ignis & aestus Domino*: & David Psal. 148, *Laudate eum sol & luna, laudate eum omnes stella & lumen*. Communis enim vsus loquendi est, ut ex magnitudine affectus sensum affingamus iis rebus, ad quas volumus sermonem dirigere. Et id genus alloquii, non ad materiam olei anima carentis refertur, sed (ut fert natura adorationis relatiuæ) respectum habet ad Christum, cuius unctionis imago & similitudo est, ut loquitur Cyrillus. Sic de veneratio-

ne Altaris S. Athanasius, in Opusculo contra eos qui dicunt, cognoscere Christum Dominum secundum humanam naturam, esse spem suam in homine collocare: *Qui ad sanctum Altare, inquit, accedunt, idque amplectuntur, & cum timore ac letitia saluant, non lapidi aut ligno simpliciter inhaerent, sed gratia, quam sibi per lapidem aut lignum per homines in mentem reuocant.*

Magnam partem huius pompæ faciunt Sacerdotes duodecimi, septem Diaconi, & totidem Subdiaconi; qui à latere Pontificis discedentes, quasi à Christo ad id muneris delegati, veniunt in Sacristiam.

Et Sacerdotes quidem consecranti Episcopo assistunt, tanquam testes & cooperatores sacrosancti Chrismalis mysterij, ut loquitur Ordo Romanus, representantes Collegium Apostolorum, cum quibus cœnans Dominus extrema Sacramenta instituit. Qua de re sic Amalarius citato c. 12. *Benedicit tam Dominus Papa, quam omnes Presbyteri. Mos est Romanæ Ecclesie, ut in confectioe immolationis Christi adsint Presbyteri, & simul cum Pontifice verbis & manibus conficiant. At, quia in ipsa periocha concluditur consecratio Olei huius, oportet ut simili modo, sicut & cetera,*

H iiii

cum Pontifice Presbyteri Oleum conficiant. Similiter Ordo Romanus: Exorcizet (Pontifex) & benedicat illud, tam ipse, quam omnes Presbyteri qui adsunt. Idcirco omnes halant in utramque ampullam, æque ac Pontifex, ad exemplum Domini Ioan. 20. qui, ut Apostolis Spiritum Sanctum daret, in eos insufflauit. Rupertus autem lib. 5. de diuin. offic. c. 18. eam rem ita explicat. Duodecim Presbyteri, qui ordinantur iuxta Episcopum testes & adiutores eiusdem mysterij, duodecim Apostolos significant, quorum in presentia Summus Pontifex Christus hodie testamentum conscripsit, totamque hereditatem salutis, suæque discessionis fructum, id est, Spiritum Paracletum, ostendit, dicens: Nisi ego abiero, Paracletus non veniet ad vos; si autem abiero, mittam eum ad vos. Eius namque gratia Sacramentum Chrisma continet. Simili modo in ordinatione Sacerdotum, Presbyteri circumstantes simul cum Episcopo manus ordinandis imponunt, & ipsi postmodum qui ordinati sunt, quasi facti sacerdotes, cum eodem Sacramentum Corporis & Sanguinis Christi conficiunt. Apud Græcos in consecratione Olei infirmorum, quam illi vocant εὐχέλαιον, adhibentur tantum septem Sacerdotes. Consenta-

neum ergo erat, vt qui ad hoc munus Apostolicum in consecratione Chrismatis obeundum à Pontifice delecti sunt, iidem ad conquirendam & afferendam materiam consecrationis delegarentur.

Obseruandum verò hîc est nomen Cardinalium, quo insigniuntur duodecim isti Sacerdotes. Id enim argumento est, antiquissimam esse Ecclesiæ Andegauensis consuetudinem, & à primis Christianitatis temporibus receptam, vt Rectores parochiarum ciuitatis Episcopo sacra facienti, & Chrismatis consecrationem peragenti, adsint. Nam (vt pluribus explicat Onuphrius Panuinius in libro de Episcopatibus, titulis & Diaconis Cardinalium, & libro de interpretatione vocum Ecclesiasticarum,) cùm beatissimus Apostolorum princeps Petrus, sacerdotio in Orientalibus Ecclesiis, præcipuèque Ierosolymis & Antiochiæ, ritè instituto, Romam ad iacienda Ecclesiæ vniuersalis fundamenta venisset, è numero fidelium viros quosdam seniores, spectatæ fidei & probitatis, plenosque Spiritu sancto, delegit, eosque partim Presbyteros, partim Diaconos, manus impositione consecrauit, quorum opera ipse & Romanus Pontifex, in instruenda nascente Ecclesiâ, vteretur: di-

uisique inter eos ſacris muneribus, ani-
 marum curandarum negotium Presbyte-
 ris commiſit, vt Sacramenta Eccleſiaſti-
 ca plebi Dei adminiſtrantes, orationi &
 miniſtrationi verbi vacarent : Diaconis
 autem viduarum, pupillorum, & reliquo-
 rum pauperum alendorum ac ſubſeuiden-
 dum curam demandauit : eiſque iniunxit,
 vt Presbyteris ſacra facientibus præſto ef-
 ſent. Ne autem Presbyterorum admini-
 ſtratio in promiſcuo eſſet, Euaristus (qui
 quintus à beato Petro Romanæ ſedis Pon-
 tifex fuit) paræcias, ſiue Eccleſias aut ti-
 tulos, per varias vrbs regiones diſtinxit,
 ſinguliſque ſingulos Presbyteros attribuit,
 qui intra fines ſibi deſcriptos paſtorum
 munere fungerentur, & fidelibus Sacra-
 menta verbumque Dei miniſtrarent. Sed,
 augeſcente in dies numero Chriſtiano-
 rum, cum vnus Presbyterei muneri per
 ſingulos titulos non ſufficeret, Hyginus
 Papa (qui quartus poſt Euaristum ſedit)
 plures Presbyteros illis aliis in ſubſidium
 adiunxit; prout neceſſarium cuique vi-
 ſum eſt: qui vt aliqua diſcriminis nota fe-
 cernerentur, princeps ille Presbyter, qui
 alijs præerat, *Presbyter Cardinalis*, id eſt,
primarius, appellatus fuit, quo nempe ve-
 lut cardine vniuerſa adminiſtratio Eccle-

ſæ vertebatur, ſicut apud Seruium in
Æneid. cardinales venti appellantur qua-
tuor principales. Hunc Romanæ Eccle-
ſiæ ordinem ſequuti ſunt Epifcopi, qui per
vniuerſum orbem ad prædicandum Euan-
gelium dimiſſi ſunt: & ſinguli in ſuis ciui-
tatibus Presbyteros pro numero parœcia-
rum conſtituerunt, qui in ſubſidium vicis
ſuæ populos ad fidem accedentes baptiza-
rent, eôſque verbo & doctrina ſalutari
paſcerent, atque iſtis Epifcopis ſacra fa-
cientibus aſſiſterent: qui quidem Romano
more *Presbyteri Cardinales* ſunt appellati.
Perſeuerat igitur in hunc vſque diem, cum
ſacerdotali miniſterio, nomen Cardina-
lium in Eccleſia Andegauenſi, pro Re-
ſtoribus parochialibus ciuitatis, qui per
ſingulos titulos parochiarum ad regimen
animarum conſtituti, quaſi organica mem-
bra Pontificatus, Epifcopi latus cingunt
in publicis & ſolennibus myſteriis cele-
brandis, quaſi Apoſtoli Chriſto miniſtran-
tes: quod in aliis quoque nonnullis cele-
brioribus Eccleſiis Galliarum etiamnum ſi-
militer obſeruatur, cum ipſo nomine Car-
dinalium. Vnde patet, quàm malè de
ſeipſis, & de Eccleſiæ diſciplina atque or-
dine ſentiant, qui hoc Apoſtolicum mu-
nus obire apud Epifcopum in celebriori-

bus ſolennitatibus detrectant, prærogati-
uam dignitatis ſuæ ignominia loco ducen-
tes.

Quia verò Diaconi & Subdiaconi ex
inſtitutione ſua ſunt miniſtri ſacerdotalis
officij (vnde Iſidorus de Diaconis loquens
lib. 2. de Eccleſ. offic. c. 8. *Sine ipſis Sacer-
dos nomen habet, officium non habet*) idcir-
co illi Sacerdotibus in hac proceſſione ad-
iunguntur, eundemque ordinem proce-
dendi ex ſymbolo geminæ charitatis ob-
ſeruant. Septenarij autem numeri ratio
ex prima Diaconorum creatione ſumpta
eſt: ſeptem enim primùm electi ſunt ab
Apoſtolis Act. c. 6. Ex hinc (inquit Iſido-
rus loco citato) iam decreuerunt Apoſtoli,
*vel ſucceſſores Apoſtolorum, ut per omnes
Eccleſias ſeptem Diaconi, qui ſublimiore gra-
du eſſent cæteris, circa aram Chriſti, quaſi
columnæ Altaris, aſſisterent; & non ſine
aliquo ſeptenarij numeri myſterio.* Et idem
habetur diſt. 93. c. Diaconi, qui. & ſeq. &
apud Stephanum Eduenſem, libro de Sa-
cramento Altaris, c. 7. Quo loco Iſido-
ri, per omnes Eccleſias, intelligendæ ſunt
maiores Eccleſiæ, in quibus Episcopi ſe-
dem habent. Et ita explicat Iuo Carno-
tenſis ſerm. 2. qui Iſidori verbis in eadem
re vtens, ubi ille dicit, *per omnes Eccle-*

fas, scribit ipse, in omni matrice Ecclesia. Cui explicationi conformis est Glossa in dictum Canonem, *Diaconi, qui*. Et ita esse intelligendum Ecclesie usus & ratio docet, & clarum est ex Canone 6. Concilij Romani secundi, in quo Silvester Papa constituit, ut, cum septem urbis Diaconi essent, in parochiis tamen duo tantum ordinarentur; nempe ut sua Pontificali sedi prerogativa seruarietur. Quot autem in ministerio Ecclesiastico Diaconi adhibentur, totidem ex æquo Subdiaconi esse debent, qui suo ordine deseruiant, ut rectè obseruauit Honorius in Gemma animæ lib. I. c. 9. quippe cum eorum functiones subordinatæ sint, & inuicem connexæ. Hic igitur, sicut duodecim Sacerdotes, ita septem Diaconi, & septem Subdiaconi, ab Altari ad processionem offerendi Chrismatis aduocantur; ut ea omni ex parte solennis sit, & plenaria, ut loquitur Ordo Romanus in Officio huius diei. Idem verò in consecratione ipsa Chrismatis adhibentur, tamquam ministri & inspectores, ut est in Pontificali.

Sed, quòd Episcopus sacris operans numeroso comitatu Sacerdotum & alio-

rum ministrorum Ecclesiasticorum stipatus esse debeat; id ab initio decreuit Anacletus in Canone, *Episcopus*, qui habetur de consecr. dist. 1. *Episcopus*, inquit, *Deo sacrificans testes secum habeat, & plures quam alius Sacerdos*. Sicut enim maioris honoris gradu fruitur, sic maioris testimonij incremento indiget. In solennioribus quippe diebus, aut septem, aut quinque, aut tres Diaconos, qui oculi eius dicuntur, & Subdiaconos, atque reliquos ministros secum habeat, qui sacris induti vestimentis, à fronte, & à tergo, & Presbyteri è regione dextra laevaque, contrito corde, & humiliato spiritu, ac prono stent vultu, custodientes eum à maleuolis hominibus, & consensum eius præbeant sacrificio. Vbi variatio numeri, septem, aut quinque, aut tres, accipienda est pro modo facultatum cuiusque Ecclesiae, ut rectè interpretatur Glossa loco superius citato: quia plerisque non suppetit facultas alendi septem Diaconos, & septem Subdiaconos. Idem scribit Damasus de Zephyrino in eius vita: *Et fecit, inquit, constitutum in Ecclesia, ut patenas vitreas ministri ante Sacerdotes portarent, dum Episcopus Missam celebraret, & ut Sacerdotes omnes adstarent, dum sic Missa*

celebrarentur. Quin Lucius apud eundem Damasum in eius vita, & c. *Iubemus. de consecr. dist. 1. Præcepit, ut duo Presbyteri, & tres Diacones, in omni loco Episcopum non desererent, propter testimonium Ecclesiasticum: & Euaristus septem Diaconos ordinavit, qui custodirent Episcopum prædicantem, propter stylum veritatis, ut scribit idem Damasus in eius vita: & hos quidem Diaconos testimoniales appellatos scribit Onuphrius Panvinus in libello de interpretatione vocum Ecclesiasticarum.* Retulimus superius sententiam Simeonis Thessalonicensis, qui ait, chorum Sacerdotum & Diaconorum celebranti Episcopo assistentium, Apostolos Domini præsentem, eumque intuentem, sanctissimosque Angelos significare.

Sunt etiam in parte huius processionis Psalter & pueri symphoniaci, alique cantores, qui hymnum Christo canentes, ei oblationem commendant, vice Levitarum & cantorum, qui 2. Paralip. c. 29. & Ecclesiastici c. 50. *Cum offerrentur holocausta, omni turba adorante, erant in officio suo, canentes laudes Domino, donec completur oblatio.*

Cæterum profertur Oleum è Secreta-

estus unguento, facti participes & confortes Christi. Sed vide, ne illud esse putes unguentum nudum. Quemadmodum enim panis Eucharistia, post sancti Spiritus invocationem, non amplius est panis simplex, sed corpus Christi: sic & sanctum hoc unguentum, non iam simplex est, & ut ita dicam, commune, post invocationem; sed Christi gratia, & Spiritus sancti quaedam praesentia, quae divinitatis ipsius vim & efficientiam tribuit. Quod verò Chrisma & Oleum Catechumenorum in secunda persona salutetur, tamquam res animata, id fit honoris causa, per quamdam prosopopœiam; ut cum S. Andreas, crucem sibi paratam aspiciens, dicebat, *Salve crux pretiosa*: cum Daniel, 3. tres pueri creaturis inanimatis, *Benedicite sol & luna Domino, benedicite ignis & astus Domino*: & David Psal. 148. *Laudate eum sol & luna, laudate cum omnes stella & lumen*. Communis enim usus loquendi est, ut ex magnitudine affectus sensum affingamus iis rebus, ad quas volumus sermonem dirigere. Et id genus alloquij, non ad materiam olei anima carentis refertur, sed (ut fert natura adorationis relatiuæ) respectum habet ad Christum, cuius unctionis imago & similitudo est, ut loquitur Cytillus. Sic de veneratio-

ne Altaris S. Athanasius, in Opusculo contra eos qui dicunt, cognoscere Christum Dominum secundum humanam naturam, esse spem suam in homine collocare: *Qui ad sanctum Altare, inquit, accedunt, idque amplectuntur, & cum timore ac letitia saluant, non lapidi aut ligno simpliciter inhaerent, sed gratia, quam sibi per lapidem aut lignum per homines in mentem reuocant.*

Magnam partem huius pompæ faciunt Sacerdotes duodecim, septem Diaconi, & totidem Subdiaconi; qui à latere Pontificis discedentes, quasi à Christo ad id muneris delegati, veniunt in Sacristiam.

Et Sacerdotes quidem consecranti Episcopo assistunt, tanquam testes & cooperatores sacrosancti Chrismalis mysterij, ut loquitur Ordo Romanus, representantes Collegium Apostolorum, cum quibus cœnans Dominus extrema Sacramenta instituit. Qua de re sic Amalarius citato c. 12. *Benedicit tam Dominus Papa, quam omnes Presbyteri, Mos est Romanae Ecclesiae, ut in confectioe immolationis Christi adsint Presbyteri, & simul cum Pontifice verbis & manibus conficiant. At, quia in ipsa periocha concluditur consecratio Olei huius, oportet ut simili modo, sicut & cetera,*

H iiii

neum ergo erat, ut qui ad hoc munus Apostolicum in consecratione Chrismatis obeundum à Pontifice delecti sunt, iidem ad conquirendam & afferendam materiam consecrationis delegarentur.

Obseruandum verò hîc est nomen Cardinalium, quo insigniuntur duodecim isti Sacerdotes. Id enim argumento est, antiquissimam esse Ecclesiæ Andegauensis consuetudinem, & à primis Christianitatis temporibus receptam, ut Rectores parochiarum ciuitatis Episcopo sacra facienti, & Chrismatis consecrationem peragenti, adsint. Nam (ut pluribus explicat Onuphrius Panuinius in libro de Episcopatibus, titulis & Diaconis Cardinalium, & libro de interpretatione vocum Ecclesiasticarum,) cum beatissimus Apostolorum princeps Petrus, sacerdotio in Orientalibus Ecclesiis, præcipuèque Ierosolymis & Antiochiæ, ritè instituto, Romam ad iacienda Ecclesiæ vniuersalis fundamenta venisset, è numero fidelium viros quosdam seniores, spectatæ fidei & probitatis, plenosque Spiritu sancto, delegit, eosque partim Presbyteros, partim Diaconos, manus impositione consecrauit, quorum opera ipse & Romanus Pontifex, in instruenda nascente Ecclesiâ, vteretur: di-

uiſiſque inter eos ſacris muneribus, animarum curandarum negotium Presbyteris commiſit, vt Sacramenta Eccleſiaſtica plebi Dei adminiſtrantes, orationi & miniſtrationi verbi vacarent : Diaconis autem viduarum, pupillorum, & reliquorum pauperum alendorum ac ſubleuandorum curam demandauit : eiſque iniunxit, vt Presbyteris ſacra facientibus præſto eſſent. Ne autem Presbyterorum adminiſtratio in promiſcuo eſſet, Euaristus (qui quintus à beato Petro Romanæ ſedis Pontifex fuit) paræcias, ſiue Eccleſias aut titulos, per varias vrbiſ regiones diſtinxit, ſinguliſque ſingulos Presbyteros attribuit, qui intra fines ſibi deſcriptos paſtorum munere fungerentur, & fidelibus Sacramenta verbumque Dei miniſtrarent. Sed, augeſcente in dies numero Chriſtianorum, cum vnus Presbyterei muneri per ſingulos titulos non ſufficeret, Hyginus Papa (qui quartus poſt Euaristum ſedit) plures Presbyteros illis aliis in ſubſidium adiunxit ; prout neceſſarium cuique viſum eſt : qui vt aliqua diſcriminis nota fecernerentur, princeps ille Presbyter, qui aliis præerat, *Presbyter Cardinalis*, id eſt, *primarius*, appellatus fuit, quo nempe velut cardine vniuerſa adminiſtratio Eccle-

ſua verteatur, ſicut apud Seruium i.
Æneid. cardinales venti appellantur qua-
tuor principales. Hunc Romanæ Eccle-
ſiæ ordinem ſequuti ſunt Epifcopi, qui per
vniuerſum orbem ad prædicandum Euan-
gelium dimiſſi ſunt: & ſinguli in ſuis citi-
tatibus Presbyteros pro numero parœcia-
rum conſtituerunt, qui in ſubſidium vicis
ſuæ populos ad fidem accedentes baptiza-
rent, eoſque verbo & doctrina ſalutari
paſcerent, atque ipliſ Epifcopis ſacra fa-
cientibus aſſiſterent: qui quidem Romano
more *Presbyteri Cardinales* ſunt appellati.
Perſeuerat igitur in hunc uſque diem, cum
ſacerdotali miniſterio, nomen Cardina-
lium in Eccleſia Andegauenſi, pro Re-
ctoribus parochialibus ciuitatis, qui per
ſingulos titulos parochiarum ad regimen
animarum conſtituti, quaſi organica mem-
bra Pontificatus, Epifcopi latus cingunt
in publicis & ſolennibus myſteriis cele-
brandis, quaſi Apoſtoli Chriſto miniſtran-
tes: quod in aliis quoque nonnullis cele-
brioribus Eccleſiis Galliarum etiamnum ſi-
militer obſeruatur, cum ipſo nomine Car-
dinalium. Vnde patet, quàm malè de
ſeipſis, & de Eccleſiæ diſciplina atque or-
dine ſentiant, qui hoc Apoſtolicum mu-
nus obire apud Epifcopum in celebriori-

bus ſolemnitatibus detrectant, prerogati-
uam dignitatis ſuæ ignominia loco ducen-
tes.

Quia verò Diaconi & Subdiaconi ex
inſtitutione ſua ſunt miniſtri ſacerdotalis
officij (vnde Iſidorus de Diaconis loquens
lib. 2. de Eccleſ. offic. c. 8. *Sine ipſis Sacer-
dos nomen habet, officium non habet*) idcir-
co illi Sacerdotibus in hac proceſſione ad-
iunguntur, eundemque ordinem proce-
dendi ex ſymbolo geminae charitatis ob-
ſeruant. Septenarij autem numeri ratio
ex prima Diaconorum creatione ſumpta
eſt: ſeptem enim primùm electi ſunt ab
Apoſtolis Act. c. 6. *Ex hinc* (inquit Iſido-
rus loco citato) iam decreuerunt Apoſtoli,
*vel ſucceſſores Apoſtolorum, ut per omnes
Eccleſias ſeptem Diaconi, qui ſublimiore gra-
du eſſent cæteris, circa aram Chriſti, quaſi
columnæ Altaris, aſſiſterent; & non ſine
aliquo ſeptenarij numeri myſterio.* Et idem
habetur diſt. 93. c. *Diaconi, qui. & ſeq. &
apud Stephanum Eduenſem, libro de Sa-
cramento Altaris, c. 7. Quo loco Iſido-
ri, per omnes Eccleſias, intelligendæ ſunt
maiores Eccleſiæ, in quibus Episcopi ſe-
dem habent.* Et ita explicat Iuo Carno-
tenſis ſerm. 2. qui Iſidori verbis in eadem
re vtens, ubi ille dicit, *per omnes Eccle-*

suas, scribit ipse, in omni matrice Ecclesia. Cui explicationi conformis est Glossa in dictum Canonem, *Diaconi*, qui. Et ita esse intelligendum Ecclesie usus & ratio docet, & clarum est ex Canone 6. Concilij Romani secundi, in quo Silvester Papa constituit, ut, cum septem urbis Diaconi essent, in parochiis tamen duo tantum ordinarentur; nempe ut sua Pontificali sedi prerogativa seruetur. Quot autem in ministerio Ecclesiastico Diaconi adhibentur, totidem ex æquo Subdiaconi esse debent, qui suo ordine deseruiant, ut rectè obseruauit Honorius in Gemma animæ lib. 1. c. 9: quippe cum eorum functiones subordinatæ sint, & inuicem connexæ. Hic igitur, sicut duodecim Sacerdotes, ita septem Diaconi, & septem Subdiaconi, ab Altari ad processionem offerendi Chrismatis aduocantur; ut ea omni ex parte solennis sit, & plenaria, ut loquitur Ordo Romanus in Officio huius diei. Iidem verò in consecratione ipsa Chrismatis adhibentur, tamquam ministri & inspectores, ut est in Pontificali.

Sed, quòd Episcopus sacris operans numeroso comitatu Sacerdotum & alio-

rum miniſtrorum Eccleſiaſticorum ſtipendius eſſe debeat; id ab initio decreuit Anacletus in Canone, *Episcopus*, qui habetur de conſecr. diſt. I. *Episcopus*, inquit, Deo ſacrificans. teſtes ſecum habeat, & plures quam alius Sacerdos. Sicut enim maioris honoris gradu fruitur, ſic maioris teſtimonii incremento indiget. In ſolennioribus quippe diebus, aut ſeptem, aut quinque, aut tres Diaconos, qui oculi eius aſcuntur, & Subdiaconos, atque reliquos miniſtros ſecum habeat, qui ſacris induti veſtimentis, à fronte, & à tergo, & Presbyteri è regione dextra laeuâque, contrito corde, & humiliato ſpiritu, ac prono ſtent vultu, cuſtodientes enim à maleuolis hominibus, & conſenſum eius præbeant ſacrificio. Vbi variatio numeri, ſeptem, aut quinque, aut tres, accipienda eſt pro modo facultatum cuiusque Eccleſiæ, vt rectè interpretatur Gloſſa loco ſuperius citato: quia plerique non ſuppedit facultas alendi ſeptem Diaconos, & ſeptem Subdiaconos. Idem ſcribit Damascus de Zephyrino in eius vita: Et fecit, inquit, conſtitutum in Eccleſia, vt patenas Vitreas miniſtri ante Sacerdotes portarent; dum *Episcopus* Miſſam celebraret, & vt Sacerdotes omnes adſtarent, dum ſic Miſſa

celebrarentur. Quin Lucius apud eundem Damasum in eius vita, & c. *Iubemus.* de consecr. dist. 1. *Præcepit,* ut duo Presbyteri, & tres Diacones, in omni loco Episcopum non deferrent, propter testimonium Ecclesiasticum: & Euaristus septem Diaconos ordinavit, qui custodirent Episcopum prædicantem, propter stylum veritatis, ut scribit idem Damasus in eius vita: & hos quidem Diaconos testimoniales appellatos scribit Onuphrius Panuinius in libello de interpretatione vocum Ecclesiasticarum. Retulimus superius sententiam Simeonis Thessalonicensis, qui ait, chorum Sacerdotum & Diaconorum celebranti Episcopo assistentium, Apostolos Domini præsentem, eumque intuentem, sanctissimisque Angelos significare.

Sunt etiam in parte huius processions Psaltæ & pueri symphoniaci, alique cantores, qui hymnum Christo canentes, cibationem commendant, vice Levitarum & cantorum, qui 2. Paralip. c. 29. & Ecclesiastici c. 50. *Cum offerrentur holocausta,* omni turba adorante, erant in officio suo, canentes laudes Domino, donec completur oblatio.

Cæterum profertur Oleum è Secreta-

rio seu Sacristia, iuxta antiquum morem Ecclesiæ; quo, ut observauit Baronius, oblationes fidelium in Secretario primum deponerentur, ut ubi inspicerentur & examinerentur, an admittendæ & ad Altare deferendæ, an repudiandæ essent. Vnde apud S. Clementem Apost. Constitut. lib. 4. c. 5: *Oportet ut sciat Episcopus, à quibus accipere oblationes debeat, & à quibus accipere non debeat.* Neque enim hæreticorum oblationes accipi fas erat, R. q. 1. c. *Sic populus, & seqq.* neque eorum qui odiis inter se dissiderent, iuxta præceptum Domini, Matth. 5. aut qui pauperes opprimerent, c. *Oblationes*, dist. 90. neque eorum qui de alieno raperent, 14. q. 4. c. *Immolans*, & apud Gregorium Turonensem lib. de gloriâ Confess. c. 79. neque qui immunitatem Ecclesiæ violarent, 17. q. 4. c. *Miror.* ubi S. Augustinus oblationem domus eius, qui quemdam de Ecclesia per vim abstraxerat, suscipi à clericis vetuit, donec pœnitentiam sibi definitam peregisset: neque qui Gentilium superstitioni participassent, ut apud S. Ambrosium Epist. 30. qui Valentiniano Imperatori scribens dicebat: *Licebit tibi ad Ecclesiam conuenire: sed illic non inuenies Sacerdotem,*
dub

aut inuenies resistentem. Quid respondebis Sacerdoti dicenti tibi, Muncra tua non querit Ecclesia, quia templa Gentilium muneribus adornasti? Ara Christi dona tua respuit, quoniam aram simulacris fecisti. Et apud eundem Epist. 15. ubi munera Eugenij Imperatoris ait repudianda à Sacerdotibus, quia ille pecuniam dederat in sumptus sacrificiorum ad aram Victoriæ: quod etiam recenset Paulinus in vita Ambrosij. Præterea nequè ex omni genere rerum offerre licebat ad Altare, ex Canone 3. & 4. Apostolorum: idcirco rerum offerendarum delectum haberi oportebat. Hinc apud Græcos id obseruatur, vt oblatio panis in Missa consecrandi fiat in Secretario, priusquàm in mensam propositionis inferatur, vt tradit S. Germanus Constantinopolitanus in Theoria rerum Ecclesiasticarum.

Cæteræ circumstantiæ huius processionis communem rationem habent cum alijs processionibus.

*De Processione sanctissimi Sacramenti,
qua fieri solet in die Cæne Domini,
& die sancto Parasceues.*

CAPVT XI.

ANtiqui moris est in Ecclesia Græca, totò tempore Quadragesimæ sanctum Missæ sacrificium non celebrare, præter quàm diebus Sabbati & Dominicis, & in Festo Annuntiationis beatæ Mariæ, quibus non ieiunatur, ut constat ex Canone 52. Concilij in Trullo, & 49. Laodicensi: aliis enim diebus celebrant tantum id quod appellant λειτουργία των προηγιασμένων, *Missam Pra-sanctificatorum*, cuius Ordo & Officium habetur in Euchologio cum aliis Liturgiis; id est, offerunt ad Altare cum mysticis precibus panem antè consecratum, sine sanguine, & de eo communicant more solito. Rationem huius instituti reddunt Theodorus Balsamon & Ioannes Zonaras, in suis Commentariis ad dictum Canonem Trullanum: quòd ieiunio-

ritum dies sint dies luctus & compunctionis; Deo autem sacrificium offerre, sit festum agere, quod est hilaritatis & lætitiæ. Cum itaque non conueniant inter se penitentis lamenta & festiue celebratis hilaritas, existimarunt quoque sanctum Missæ sacrificium ieiuniis Quadragesimalibus non conuenire. *Præ-sanctificatorum* enim ministerium (ait ibidem *Bassamon*) *incruentum sacrificium non dicimus, sed oblationem prius oblatis & perfecti sacrificij, & sacre actionis iam peractæ* (quia nempe ratio sacrificij Missæ consillit in consecratione, & in consecratione vtriusque speciei) vnde panem illum ante consecratum, qui ad huiusmodi Liturgiam reservatur, Græci in Missa *Præ-sanctificatorum* ἁγία λείψαρα; id est, *sanctas reliquias*, vocant. Ob eandem etiam causam illi neque Sanctorum membras, neque nuptias, aut natalitia celebrant in diebus ieiuniorum; vt patet ex Canonibus 51. & 52. eiusdem Concilij *Laodicensi*.

Eadem ratione ducta sancta Romana Ecclesia hunc ritum Missæ *Præ-sanctificatorum* obseruat in die sancto *Parasceues*, sacrificio & consecratione. prorsus abstinens, vt etiam traditur in Concilio *Tolentino* 16.c.8. quia ille est dies luctus publici:

& complorationis omnium Christianorum de morte patris sui, Regis sui, Pastoris sui, Saluatoris sui. Ideo, sicut silent signa seu æra campana, quæ sunt tubæ festiuitatis, diuina Officia languenti voce, & lugubri tenore, aut sub mæsto silentio dicuntur, cessant cæremoniaæ splendoris & celebritatis: ita occiso Pontifice cessat sacrificium, quod est caput & decor omnis gloriæ filia Regis, sponsæ Dei. Id docet Innocentius primus c. *Sabbato*. de consecratione, dist. 3. his verbis: *Nam Vtique constat, Apostolos biduo isto (id est, feria sexta & Sabbato mortis ac sepulturæ Christi) & in mærore fuisse, & propter metum Iudeorum se occuluisse: Quod Vtique non dubium est eos ieiunasse biduo memorato; ut traditio Ecclesiæ habeat, isto biduo Sacramenta penitus non celebrari.* Quibus in verbis duo attendenda sunt: alterum, Innocentij tempore (qui Pontifex creatus fuit anno Christi 402.) antiquam traditionem Ecclesiæ fuisse, ut feria sexta in Parasceue sacrificium non fieret, quod indicio est id ex Apostolica institutione fluxisse: alterum, neque in Sabbato sancto fieri solitum sacrificium, quod quidem etiam nunc verum est; quia Missa quæ eo die celebratur, non pertinet ad ipsum Sabbatum, sed ad Officium notis Resurrectionis Domini, ut patet ex to-

to contextu eiusdem Officij, & his verbis Ordinis Romani in Officio diei Parasceues: *Feria sexta Parasceues, quæ & sexta Sabbati dicitur, Missa non cantatur; sed neque in Sabbato sancto vsque ad vigilias noctis.* Cui suffragatur Durandus lib. 6. Rationalis, c. 77. *Missa enim (inquit) quæ in ipso Sabbato celebratur, non ad ipsum Sabbatum, sed ad diem pertinet subsequenter. & capite sequenti: Hæc autem dies, sicut præcedens, nullum habet Officium diurnum, in quo constat Apostolos fugisse, & in mœrore fuisse, de consecrat. dist. 3. c. Sabbato. Nam officium quod cantatur, est noctis diei Dominicæ.* Et post pauca profert in testimonium hæc verba S. Hieronymi. *Reor traditionem Apostolicam permanuisse, ut in die vigiliarum Paschæ, ante noctis medium, dimittere non liceat populos expectantes Christi aduentum: ut resurgenti Salvatori occurrant, postquam tempus illud transierit, securitate præsumpta, festum cunctos agere diem.* Et addit Durandus: *Sed, quia quod pro deuotione fuerat institutum, in minus honestas actiones, quibus nox facultatem præbet, conuersum est, institutum fuit, ut Officium ipsius noctis de die celebraretur.* Quod non satis attenderunt, qui dixerunt, Canonem, Sabbato, contraria consuetudine abrogatum esse quoad publicum & solenne Officium; ut inde suo modo infer-

rent, licere Missam priuatam celebrare in Sabbato sancto, quod est planè contra mentem & institutionem Ecclesie. Nam, cum primitus ex traditione Apostolica Missa, iuxta exigentiam mysterij, celebraretur in nocte Paschæ; sublati nocturnis conuentibus Christianorum propter scandala quæ ex tenebrarum licentia oriebantur, eius Officiu reiectum est in tempus proximè antecedens, scilicet in Sabbatum, vt obseruatum est à Durando loco citato. Sed quod necessitate factum est, vt daretur locus Officio mysterij Paschalis, malè trahitur ad celebrationem Missarum priuatarum, in quibus sine vlla necessitate violatur sancta Ecclesie institutio, & pro libitu priuatorum alienissima quæque Officia intruduntur in diem quem sancti Patres vacare voluerunt, & in eo *Sacramenta penitus non celebrari: penitus*, ait S. Innocentius; ergo neque priuatum.

Innocentium sequuti sunt, Amalarius lib. 1. de Eccles. offic. c. 13. Rabanus lib. 2. de Instit. cleric. c. 37. Rupertus lib. 6. c. 22. Durandus Rational. lib. 6. c. 77. & Hugo de S. Victore, Eruditionis Theologicæ lib. 3. c. 20. & Miscellaneorum lib. 5. c. 43. cuius verba digna sunt quæ legantur. *Hac ergo tristi die, inquit, contristemur ad poenitentiam: ferrum*

lancea dominica pertranseat animam nostram;
 clavi manuum & pedum carnem nostram trans-
 figant; crux nostram suspendat concupiscen-
 tiam; compatiatur ut conregnemus: hodie non
 sacrificemus, dum nobis hostia de manibus tolli-
 tur: non sacrificent amici, dum trucidant ini-
 mici: differatur usque in diem illum, quo tantus
 victor resurgens suam nobis victoriam nun-
 tiabit: profundum interim teneamus silentium,
 mœrori amicum: quæ eadem verba leguntur
 apud Rupertum, lib. 6. de diuin. offic. c. 3. De
 ieiunio verò in feria sexta & Sabbato ante
 Pascha, & eius causa, sic ipsi Apostoli lo-
 quuntur apud S. Clementem lib. 5. Constit.
 Apost. c. 17. & 18. Abstinetis his diebus vino
 & carne: dies quippe luctus, & non festi, sunt.
 Sexta tamen feria & Sabbato ex toto manete
 ieiuni: Et statim: Ait enim Dominus de se,
 Quando ablati fuerit eis sponsus, tum ieiuna-
 bunt in diebus illis. His itaque diebus ablati
 fuit nobis Dominus à Iudeis, quos sic falso vo-
 cant, & in crucem actus, & cum maleficis de-
 putatus. Quamobrem monemus vos, ut his die-
 bus ieiuni maneatis usque ad vesp̄eram, sicut &
 nos ieiuni mansimus, cum ablati fuit nobis. Si-
 milit̄ Petrus Damiani Ep. 35. lib. 6.

Sanctus Thomas 3. parte Summæ Theo-
 logicæ, quæst. 83. art. 2. aliam huius sacræ ob-
 servationis causam affert, ita scribens. Dicen-

dum, quòd Veniente Veritate ceſſat figura. Hoc autem Sacramentum eſt figura quedam, & exemplum Dominicæ paſſionis. Et ideo in die, quo ipſa paſſio Domini recolitur pro vt realiter geſta eſt, non celebratur conſecratio huius Sacramenti. Ne tamen Eccleſia ea etiam die ſit ſine fructu paſſionis per hoc Sacramentum nobis exhibito, corpus Chriſti, conſecratum in die præcedenti, reſervatur ſumendum in illo die: non autem ſanguis, propter periculum, & quia ſanguis ſpecialius eſt imago Dominicæ paſſionis: quippe qui effuſus, & ſeparatus à corpore, clariùs nobis exhibeat vulneta Chriſti manantia, & mortem inde ſequutam. Et ſententia igitur S. Thomæ, & eius ratio, pugnat cum celebratibus priuatim ſacrificium Miſſæ in Sabbato ſancto.

Cùm itaque ratione myſterij, non liceat in die Veneris ſancta ſacrificium incruentum peragere: vt ſit, de quo Sacerdos ea die in publico Eccleſiæ conuentu oblationem facere poſſit ad Altare, pro dirigendis ad Deum orationibus, quæ pro vniuerſo populo Chriſtiano fiunt, & iuxta ſolemne ſactorum ritum communicare, ad demonſtrandum fructum ſalutis & gratiæ quem ex ſacrificio crucis percepimus, ex ſententia Sancti Thomæ, conſuevit Eccleſia ex priuato ſacrificio hoſtiam conſecratam reſer-

uare, quæ post Missam Cernæ Domini processionallyter honoris causa deferretur ad locum destinatum, Clero per ordinem sequente cum hymnis & canticis, & in tabernaculo decenter ornato componitur, quasi corpus Christi in sepulcro conditum: Ipsa autem die Parasceues, adorata cruce, duo Sacerdotes, induti alba, stola & manipulo, præeunte Subdiacono cum cruce, & duobus Acolythis cum cereis accensis, atque aliis duobus ministris intortitia similiter accensa ferentibus, procedunt ad locum ubi positum est Sacramentum; &, facta thurificatione, cæterisque ritibus ex ordine seruatis, illud cum reuerentia ad Altare afferunt, duobus Acolythis continuè incensantibus, cantantes per viam, *Hoc corpus quod pro vobis tradetur*, &c. & Celebranti in manum tradunt; qui, eo in Altari oblato, & ritè incensato, Missam Præ-sanctificatorum peragit, ac demum illud in comunione sumit.

Similis processio celebratur à Græcis in omnibus Missis Præ-sanctificatorum, cuius descriptio habetur infra c. 25.

De sanguine autem Christi, cur in hunc diem non reseruetur, aut separatim in propria specie sumatur, præter rationes S. Thomæ, aliam quamdam addit Hugo à S. Victo;

re, lib. 3. Eruditionis Theologicae c. 20. ita ſcribens: *Quæritur iterum, quare hac die non ſumatur ſanguis Chriſti, ſicut & caro Chriſti. Ad quod dico, quod Vtrumque ſub Vtraque ſpecie ſumitur: ſed, quia ſpecies Vini labilis non poteſt tutò reſervari, ſine ea corpus Chriſti reſervari conſtitutum eſt: vel quia Dominus in Cœna dixit, Non bibam amodò de hoc genimine Vitæ uſque in diem illum, cùm illud bibam nouum vobiscum in regno meo; Eccleſia à die Cœnæ uſque ad diem Paſchæ (quæ in Veſpere incipit, vnde in Cerei benediſtione dicitur, Hac nox eſt, quæ peccatorum, &c.) de hoc genimine Vitæ bibere non conſuevit. Porro de ſanguine ſuo, quem Diſcipulis porrigebat, loquebatur Chriſtus, quem, quantum ad ſpeciem, genimen appellabat: hoc poſt reſurreſtione in regno ſuo, id eſt, in regia claritate, bibit ipſe cum Diſcipulis ſuis; quia in reſurreſtione totus Chriſtus, quantum ad corporalem ſubſtantiam, innouatus eſt. Græci ſimiliter in Præ-ſanctificatis ſuis ſola ſpecie panis vtuntur, licet extra diem Dominicæ Paſſionis celebrent.*

2. In Eccleſia Romana Celebrans ipſe ſanctiſſimum Sacramentum à tabernaculo affert ad Altare, ſicut pridie illud intulit in tabernaculum: ſed antiquitus id fiebat à duobus Presbyteris eo modo quo apud nos fit, vt videre eſt apud S. Gregorium in Sa-

amentario, in Ordine Romano in Officio
huius dici, apud Alcuinum lib. de diuin. of-
fic. in Officio Parasceues, & Amalarium
lib. 1. de Eccles. offic. c. 15. Vnde Rupertus
lib. 6. de diuin. offic. c. 23. dicit, *Duos Presby-
teros, qui corpus Domini ad Altare deferunt,
significare Ioseph iustum ab Arimathia, &
Nicodemum, qui petrum & concessum sibi à
Pilato corpus Iesu detulerunt ad sepeliendum.*

*De Processione ad lauanda
Altaria.*

C A P V T XII.

POtest & inter processiones iure nume-
rari antiquus ille vsus obeundi Altaria,
& lauandi vino & aqua, cuius meminerunt
Isidorus lib. 1. de Eccles. offic. c. 28, Alcu-
nus lib. de diuin. offic. c. de Cœna Domini,
Rupertus lib. 5. de diuin. offic. c. 31. & Duran-
dus Rational. lib. 6. c. 76. Habet enim &
progressionem religiosam per Ecclesiam,
& ritum mysticum, & solennes preces, sicut
alia.

Pertinet autem eiusmodi processio ad
mysterium passionis Domini: vnde Du-

randus loco citato refert, quibufdam locis in uſu eſſe, vt Altaria denudentur hac die ſub noctem; poſtridie autem, id eſt, in Paraſceue, lauentur. Et ob eandem cauſam ait, inter lauandum cani ſolere Antiphonas ſeu Reſponſoria ſpectantia ad paſſionem. Et ratio myſterij hoc confirmat.

Rupertus enim libro citato c. 30. denudationem ita explicat. *Cur Altare nudetur, ſcire uolentibus facile liquet, ſi prius animaduertuerint quid ipſum Altare ſignificet. Significat autem Chriſtum: quia ſic illud in templo, quomodo Chriſtus toti corpori Eccleſiæ, dignitate & honore præminet. Et ſtatim: Cum itaque nudum Altare conſpicimus, dignum illud memoria, quod magnifice Propheta flebiliterque deplorat, noſtris intimis perſonare auribus, noſtris internis præſentialiter debet apparere conſpectibus: Ecce uidimus eum, & non eſt ſpecies ei, neque decor, & nos conſiderauimus eum deſpectum & nouiſſimum virorum: Et paucis interiectis: Ille enim ſpecioſus forma præ filiis hominum, qui ſemetipſum exinaniuit, formam ſerui accipiens, maxime in paſſione ſua uſus eſt non habens ſpeciem neque decorem, & quaſi abſconditus uultus eius. Alcuinus loco citato aliter explicat. Nudantur, inquit, Altaria iam circa noctem, & ſic permanent uſque ad Sabbatum ſanctum. Altare Chriſtum ſignificat.*

qui tunc nudatus est à vestimentis, hoc est, à Discipulis, quando relicto eo omnes fugerunt. Et in eadem sententia est Amalarius lib. i. c. 12. Vbi notandum est, iuxta obseruationem Durandi, Altaria sua sindone spoliari sub noctem: quod similiter præscribitur in Sacramentario S. Gregorij.

Ablutionem autem Altarium sic interpretatur idem Rupertus citato capite 31. Idcirco illa lauari institutum est, quia Dominus noster, quem Altare significat, ut dictum est, de latere suo lancea militis perforato sanguinem & aquam effudit. Ideo lauantur vino & aqua. Vinum pro sanguine in Sacramento quoque sacrificij, ipso Domino auctore, ascitum est. Sanguinem, inquam, & aquam effudit de latere suo summus nostræ opifex salutis, quæ prima sunt eiusdem elementa salutis: sanguine redimimur, aqua abluimur. Et ratione istius mysterij in hac processione cantatur Antiphona, Dum fabricator mundi, sumpta ex Antiphonario S. Gregorij, & Ordine Romano, cuius extrema hæc verba sunt: *Aper-
to ergo lancea militis latere crucifixi Domini,
exiuit sanguis & aqua in redemptionem salu-
tis nostræ. Quare parum congruenter factum
videtur ab iis, qui in hunc ritum intruserunt
Antiphonam, Mandatum nouum do vobis,
quæ pertinet ad ablutionem pedum, non*

autem ad ablutionem Altarium.

Quod verò Altare Christum significet, id consentaneum est doctrinæ S. Pauli, qui Hebr. c. 13. de corpore Christi loquens, ait: *Habemus Altare, de quo edere non habent potestatem qui tabernaculo deseruiunt.* Sic S. Ambrosius Enatr. in Psal. 118. Octonariis 3. *Mirabile illud Altare, in quo vnius Agni sacrificium tulit peccata mundi.* Eius rei hanc rationem affert Amalarius citato libro, c. 13. *Quia in eo nostras oblationes Patri offerimus: in eo, id est, in fide eius, in nomine eius, in fiducia meritorum eius, quorum virtute acceptantur preces & sacrificia nostra à Deo.* Vnde dicit Honorius in Gemma animæ lib. 1. c. 134. *Altare, super quod sacrificatur, est Christus, super quem sacrificium Ecclesiæ acceptatur.* Ideo Sacerdos, incipiens Canonem Missæ, manibus iunctis super Altari, dicit: *Te igitur, clementissime pater, per Iesum Christum filium tuum Dominum nostrum supplices rogâmus ac petimus, uti accepta habeas & benedicas hæc dona, hæc munera, hæc sancta sacrificia; atque hæc dicens osculatur Altare, Christum videlicet hoc symbolo adorans: & in toto ordine Missæ, quoties idem Sacerdos ad populum conuertitur, ut eum salutet, ei benè precetur, aut benedictionem impertiat, prius osculatur Altare, quasi à*

Christo pacem accipiens, quam cum populo communicet: Hinc est etiam quod Altare debet esse lapideum, c. *Altaria*. de consecrat. dist. 1. propter stabilitatem & perpetuitatem Sacerdotij Christi: *Iesus autem, eo quod maneat in aeternum, sempiternum habet Sacerdotium*, Hebr. 7. quamquam aliam rationem assignat S. Thomas 3. p. q. 83. art. 3. ad 5. tum quia 1. Corinth. 10. dicitur, *Petra autem erat Christus*; tum etiam quia corpus Christi in sepulcro lapideo fuit reconditum. Et eodem pertinet, quod in Missa priuata, dum legitur Euangelium, liber ita positus esse debet, vt obuertatur cornui seu angulo Altaris; quod nonnullæ Ecclesiæ obseruant etiam in Missa solenni: quia Christus in sua Incarnatione factus est lapis angularis Ecclesiæ, coniungens vtrumque pauperem, id est, Gentium & Iudæorum populum in vnum religionis ædificium commitrens, iuxta prophetiam Davidis Psal. 117. *Hic factus est in caput anguli*. Hoc eleganter explicat Simeon Thessalonicensis in libro de diuino templo, his verbis. *E lapide porro est Altare, quia Christum refert, qui & petra nominatur, tanquam fundamentum nostrum, & caput anguli, & lapis angularis: & quia petra, quæ olim profluentibus ex se aquis Veterem Israël potauit, huius imago fuit. Nunc*

enim nos nonum Israël potat, non petra aquam scaturiens, sed eterna vita fluente præbens, Vinum, inquam, Verbi sanguinem.

Ad idem mysterium passionis spectat, quod hyssopus adhibeatur ad spargendam commixtionem istam vini & aquæ per mensam Altaris, ut ea penitus lauetur. Sicut enim in lege veteri, quoties de sanguine victimæ legalis, Christi passionem præfigurantis, aspersio facienda erat, adhibebatur in eum vsum fasciculus hyssopi, ut patet exemplis, Exodi 12. in sanguine Agni Paschalis, & c. 24. eiusdem libri in ritu fœderis initi inter Deum & populum Israëliticum; iuxta interpretationem S. Pauli Hebr. c. 9. ac similiter in purificationibus legalibus Leuitici 14. & Numer. 19: ita in lege gratiæ, quoties aspersio seu ablutio mystica facienda est in symbolum sanguinis Christi effusi ad emundationem & sanctificationem animarum, Ecclesia uti solet hyssopo, quasi instrumento ad id diuinitus in figuris instituto; ut in præsentī mysterio ablutio-
nis Altarium, in consecratione Ecclesiæ & Altarium, tum stabilium, tum portatiliū, in benedictione & reconciliatione Ecclesiæ, & aliis eiusmodi. Ea de causa Dauid, remissionem peccati sui petens virtute sanguinis Christi in cruce fundendi, propheticè

tice dicebat Psal. 50. *Asperges me hyssopo, & mundabor: id est (vt interpretatur S. Bruno in Expositione eius Psalmi) Facies me similem illi qui aspergitur hyssopo, & sic facies me similem, quod mundabor: quod est dicere, mundabis me per asperisionem sanguinis Christi, qui erit sparsus hyssopo, id est, humilitate. Quem versum Psalmi usurpat Ecclesia in asperisione aquæ benedictæ, quia illa eandem significationem habet asperisionis sanguinis Christi per Baptismum. Cur autem hyssopus significet humilitatem Christi, explicat S. Ambrosius Commentariis in Epist. ad Hebræos, ad c. 9. his verbis: *Hyssopus enim herba humilis est, & in petris nascens. Humilitas Christi significatur per hanc herbam, & fortitudo, qua interiora nostra purgantur. Nam hoc genere herbe pulmonum vitia purgari solent. Et similiter S. Augustinus Enarratione in eundem Psalmum, Hyssopum (inquit) herbam nouimus humilem, sed medicinalem. Saxo haerere radicibus dicitur: inde in mysterio mundandi cordis similitudo assumpta est. Apprehende, inquit, & tu radicem dilectionis petram tuam: esto humilis in humili Deo tuo, ne sis excelsus in glorificato Domino Deo tuo. Aspergeris hyssopo, humilitas Christi te mundabit: quia nempe per summam humilitatem subiecit se Christus passioni & morti.* Sic Be-*

da interpretatur Homilia in feria 3. Palmā-
rum: Christi namque humilitate mundamur
quia, nisi humiliasset semetipsum, factus obe-
diens Patri usque ad mortem crucis, non vi-
que sanguis eius in peccatorum remissionem, hoc
est in nostri mundationem, fuisset effusus. Iuo
Carnotensis, in Sermonē de Sacramentis
neophytorum, loquens de aqua lustratio-
nis, de qua Numer. 19. habetur, hyssopus
interpretatur eadem, per quam videlicet ap-
plicatur nobis meritum sanguinis Christi.
Quod autem, inquit, hyssopus huic aspersioni
admiscetur, hoc significatur, quia in fide mortis
Christi peccata mundantur: Unde Apostolus,
Fide mundans corda eorum: quia, cum sit herba
humilis, firmiter haeret in petra. Viramque in-
terpretationem de humilitate & fide lequa-
tus est S. Thomas, i. 2. q. 102. art. 5. ad 5. ex-
plicans ritum cremandae vaccae rufae in sa-
crificium, iuxta Dei praeceptum, Numero-
rum c. 19. ex cuius vaccae cineribus permixtis
aqua vitæ fiebat dicta aqua lustrationis seu
expiationis, ad purgandas immunditias le-
gales. Adduntur autem (inquit) tria: scilicet
cedrus, quod significat altitudinem spei, vel
contemplationis: hyssopus, quod significat hu-
militatem, vel fidem: coccus bis tinctus, quod
significat geminam charitatem. Per hanc enim
debemus Christo passo adherere. Adhibebatur

etenim hyssopus, tum in comburenda vac-
ca cum aliis lignis, tum etiam in asperſione
aquæ luſtrationis, quæ fiebat ex commiſtio-
ne cinerum eius. Helychius verò lib. 4. in
Leuiticum, c. 14. ſic interpretatur: *Hyſſopus*
boni odoris, gratia ſpiritus cooperatrix emun-
dationis noſtræ eſt. Deficiente tamen hyſſo-
po in hac Altarium ablutione, in locum eius
ſubſtituantur, vel etiam eidem adiungun-
tur, rami ex aliis herbis ſeu fruticibus odora-
tis, puta ex ſalua, roſe marino, & lauro, &
ſi quæ alia huiusmodi, in quæ quadrare po-
teſt ſignificatio ſymbolica eiufdem myſte-
rij.

Porro non eſt hic omittendum, in veteri
lege, quando ſanguis victimarum asperge-
batur hyſſopo, permilceri ſoliſſimam fuiſſe
aquam ſanguini, quò liquidior & ſparſibilis
eſſet, vt conſtat ex c. 9. Epistolæ ad He-
bræos: qua in re perfectè præfigurabatur
myſterium ſanguinis & aquæ ex latere
Chriſti ſcaturientis, & effudentis ſe in vni-
verſam Eccleſiam. Nam, vt in effuſione ac
diffuſione vini & aquæ per menſam Altaris,
ſignificatur communicatio virtutis paſſionis
Chriſti; ita per ablutionem & emundatio-
nem, quæ per eam efficitur, intelligendum
eſt ſubordinate exprimi purificationem &
ſanctificationem Eccleſiæ, quæ in vinctio-

ne ſanguinis Chriſti dedicata fuit.

Apud Græcos hoc eodem die fit ſolennis ablutio Altaris, ſed longè maiore apparatu quàm in Eccleſia Latina. Prodit Patriarcha è Diaconico, & Sacrarium ingreſſus à dextra parte, conſiſtit ante Altare. Deinde veniunt Chartophylax, Hypomnematographus, & Hieromnemon, præeuntibus Notariis, & citant Metropolitæ atque Archiepiſcopos: ingreſſique Sacrarium cum penulis, facta Patriarchæ reuerentia, ſacrum Altare in orbem ambiunt, adiunctis ſibi Presbyteris & Diaconis. Tum Patriarcha, Altari incenſato, & ſigno crucis benediſto, dicit Orationem ſolitam pro denudatione Altaris: & ea dicta, ſpoliat Altare, manum præbentibus & adiuuantibus Metropolitanis, Archiepiſcopis, Presbyteris, & Diaconis, canentibus interea Pfalmos, *Miſerere mei Deus, Iudica me Deus, quoniam in innocentia, & Quàm dilecta tabernacula.* Quibus finitis, menſa Altaris ſpongiis abſtergitur. Deinde, porrigente Charulario vrceolum cum aqua, benedicat Patriarcha, & ſtatim effundit in menſam; diuiditque Metropolitanis, Archiepiſcopis & Presbyteris, linea mantilia, quibus illi eandem perfricant & detergunt: ac demùm, infuſa aqua odorata ex roſis, diuidit ſingulis ſpongiæ, quibus illi poſtquam

eamdem mensam absterferunt, Altare sacra veste induunt, Patriarcha interea statas preces recitante. Quibus absolutis, idem Altare circumquaque incensat, & signat: egressusque extra Ecclesiam, occlusis foribus, facit mandatum ablutionis pedum, ut habetur in Euchologio. Et in utraque quidem Oratione, tum quæ fit in denudando, tum quæ in vestiendo atque ornando Altari, significat Pontifex, per Altare figuram exprimi sepulcri Dominici: atque in prioré petit à Deo, ut circumstantes Sacerdotes mystici conuiuij, & cœlestis regni participes efficiat: in posteriore autem, ut per ablutionem Altaris lauet ab omni pollutione mentis & corporis, sensus purificet ab omni sorde peccati, atque irreprehensibiles & immaculatos constituat perficiendo diuino ac tremendo sacrificio viuificantis sanguinis & corporis Domini, quod in sepulcro conditum, & cum gloria subinde tertio die resurgens, fontem nobis perennem excitauit vitæ & immortalitatis, conculcata morte, & sublato eius stimulo.

De Processione in Sabbato sancto, ad
benedictionem Fontis baptismalis.

CAPVT XIII.

SANCTUS Gregorius Nazianzenus Ora-
tione 43. scribit, solennitatem Sabbati
sancti esse μεθόριον τῆς ταφῆς & τῆς ἀναστ-
ασεως, confinium sepulture & resurrectionis
Christi: quia, cum media sit inter diem mor-
tis & resurrectionis, utriusque mysterij re-
presentationi participat: vnde hac die Ec-
clesia celebrat solennitatem Baptismi, qui
figuram gerens sepulture Christi, à morte
vivi abluendi à peccatis, à resurrectione vi-
tæ innouanda gratiam accipit, ut iuxta my-
sticam analogiam obseruauit Durandus lib.
6. Rational. c. 82. Quod sic explicat Ru-
pertus, de diuinis offic. lib. 6. c. 26. Duae sunt
(inquit) istæ Paschalis magnæ & innumera-
biles causæ festiuitatis; redemptio animarum,
quæ die Parasceues morte Christi parata est; &
resurrectio corporum, quæ prima Sabbati Chri-
sto resurgente data atque confirmata est. Addi-
tur his tertiâ necessaria baptismatis solennitas,
omnium nobis illarum conferens vtilitatem vel
fructum, quæ pro eo quod ab illis exordium ro-
gumque suæ rationis sumpsit Sacramentum,

rectè in eisdem Paschalibus gaudiis addita est. Atque illud idem repetit c. 32. Eadem est doctrina S. Leonis in Epistola 4. quæ est ad uniuersos Episcopos per Siciliam constitutos, & habetur in Canone, Proprie. de Consecrat. dist. 4. Proprie in morte Crucifixi, & resurrectione ex mortuis, potentia baptismi nouam creaturam condidit ex veteri: Ut in renascentibus & mors Christi operetur & vita, dicente beato Apostolo Paulo (Rom. c. 6.) An ignoratis, quia quicumque baptizati sumus in Christo Iesu, in morte ipsius baptizati sumus? Consepulti enim sumus cum illo per baptismum in mortem; Ut, quomodo surrexit Christus à mortuis per gloriam Patris ita & nos in nouitate vite ambulemus: si enim conplantati facti sumus similitudini mortis eius, simul & resurrectionis erimus, & cetera, quæ latius Magister gentium ad commendandum Sacramentum baptismatis disputauit: Ut appareret ex huius doctrine spiritu, regenerandis filiis hominum, & in Dei filios adoptandis, illum diem esse & illud tempus electum, in quo per similitudinem formamque mysterij ea quæ geruntur in membris, huius quæ in ipso sunt capite gesta congruerent, dum in baptismatis regula & mors interuenit interfectione peccati, & sepulturam triduanam imitatur trina demersio, & ab aquis eleuatio resurgens instar est de sepulcro. Ipsa

igitur operis qualitas docet, celebranda generali-
ter gratia cum eſſe legitimum diem, in quo orta
eſt & Virtus muneris, & ſpecies actionis.

Eccleſia itaque, vt vniuerſum Baptiſmi
myſterium hac die quaſi ſub oculos ponat,
in ipſa proceſſione omnia quæ ad illud per-
tinent, composito caeremoniarum ordine,
ſimul ſpectanda exhibet: figuram quæ ante-
ceſſit, inſtitutorem, cauſam ſanctificationis,
materiam, ritum, effectum. Quia de re ſic
Ordo Miſſæ Ambroſianæ in Sabbato ſan-
cto. Igitur in huius diei veſpere cuncta vena-
bilis Sacramenti plenitudo colligitur: & quæ
diuerſis ſunt præfigurata vel geſta temporibus,
huius noctis curriculo deuoluta ſupplentur. Nam
primum hoc veſpertinum lumen, ſicut illa dux
Magorum ſtella, præcedit: deinde myſtica rege-
nerationis vnda ſubſequitur, velut diſſante
Domino fluente Iordaniſ: tertio reſurrectionem
Chriſti vox Apoſtolica Sacerdotis annuntiat:
tum, ad totius myſterij ſupplementum, Chriſto
veſcitur turba fidelium, quæ reſurrectionis Do-
minicæ diem, Chriſto in omnibus proſperante,
ſuſcipiat. Vbi, quod dicitur, Sacerdotem an-
nuntiare reſurrectionem Chriſti, antequam
ad communionem populus accedat, referen-
dum eſt ad id quod idem Ordo Ambroſia-
nus paulò poſt habet, in Eccleſia maiore,
Miſſa inchoante, ter Sacerdotem publicè

denuntiare, *Christus Dominus resurrexit: cui respondetur à Choro, Deo gratias.*

Figura fuit, iuxta S. Paulum 1. Corinth. c. 10, traductio populi Israëliti per mare rubrum, præeunte columna nubis & ignis; demersio Pharaonis Ægyptiorumque persequentium, & populi ex abyssis emergentis liberatio.

Traductionem maris, incolum exercitu Hebræorum, repræsentat progressus Cleri & Catechumenorum ad Fontem baptismalem, & eorundem regressio in Chorum cum Cantico illo triumphali, quod cecinit Moyses cum filiis Israël, postquam in litore salui constiterunt, *Cantemus Domino.*

Columnam repræsentat Cereus benedictus, lumine suo ignem populo in nocte prælucentem exhibens, crassitudine verò, seu mole solito grandiore, nubem per æstum diei obumbrantem. Atque hæc est causa, cur idem Cereus apud nos columnæ imponi soleat, & eum columnæ forma olim fieri solitum conjici potest ex Eusebio, lib. 4. de vita Constantini, c. 22. vbi Constantinus sublimis è cera columnas passim tota urbe accendi mandavit ipsa nocte Paschalis solennitatis, in signum resurgentis Christi; & ex his verbis benedictionis, *Sed iam columnæ huius præconia novimus: De quibus sic Rupertus lib. 6. de diuin. offic. c. 29. Quod enim*

ait, Columna huius præconia nouimus, aperte nobis innuit, quod illud idem per hanc pretiosam lampadem intelligere debeamus, quod per illam præfigurabatur columnam, qua castra filiorum Israël de Ægypto exeuntium per mare rubrum præcedebat. Significabat autem illa columna nobis benè notam nobis humanitatem Christi, in qua propriè thronum suum posuit sapientia Dei, sicut ipsa dicit: Thronus meus in columna nubis. Si quidem nunc illa columna nubis populum suum, à Diaboli seruitute liberatum, & rubrum mare Baptismi transeuntem, præcedit dux itineris: ut inducat in terram veram re-promissionis, terram viuentium: quam (sicut Moyses ait) Dominus Deus noster die ac nocte inuetur; nunc cælestibus doctrinis compluens, ut Verè columna nubis: nunc igne sui Spiritus accendens, ut Verè columna ignis. Vbi obiter notandum est, quod dicit Rupertus, Sapientiam Dei posuisse thronum suum in humanitate, non ita esse accipiendum, quasi sentiat cum Nestorio, qui asseribat, beatam Virginem non esse Dei genitricem, sed genitricem templi in quo Deus inhabitat, ut refert S. Cyrillus Alexandrinus parte tertia Concilij Ephesini, in Defensione primi Anathematismi: ex quo sequebatur Verbo diuino non esse vnitam humanitatem in persona, sed illud in ea versatum per modum externæ cuiusdam habitationis: Sed loquitur ibi Ru-

pertus per quamdam similitudinem; quòd,
 sicut dicebatur Deus habitare in nube illa
 columnæ, & ex ea quid fieri vellet denuntia-
 re, & iter populo ad terram promissionis
 ostendere, ita Sapientia diuina, humanam
 naturam assumens, in ea quasi in throno
 quodam videtur sedem sibi collocasse, vnde
 doctrinam vitæ hominibus daret, & iis viam
 ad vitam æternam præmonstraret. Sic Al-
 cuinus lib. de diuin. offic. c. de Sabbato sancti
 Paschæ. *Concordat Cereus hic in significatione
 cum columna ignis, qui illuminabat populum
 Israel in nocte, ut illud in ipsa benedictione. Sed
 iam columna huius præconia nouimus. Colum-
 na illa Christum significabat. Illa columna præ-
 cedebat filios Israel: nostra columna, id est, Ce-
 reus, præcedit Catechumenos nostros. Lumen
 ipsius Christum significat, quo & præsens. nox
 illustratur, gratia scilicet resurrectionis, &
 Catechumeni ad Baptismum venturi. Quibus
 similia habet Ordo Missæ Ambrosianæ in
 Sabbato sancto, ex quo conijcere licet, Ce-
 reum Paschalem olim excera candida fingi
 solitum: sic enim scribit: Debet ergo in hac
 Domini Saluatoris nostri. Vespertinae resurre-
 ctionis aduentu ceream nos adolere. pinguedi-
 nem, cui superest candor in specie, suauitas in
 odore, splendor in lumine: quæ nec marcescenti
 liquore defluit, nec offensam terri odoris exhalat.
 Deinde sequentibus verbis rationem red-*

dit, cur eiufdem Cerei ſubſtantiam oportue-
rit ex floribus exprimi. Quid enim (inquit)
magis accommodum, magiſque feſtiuum, quam
Ieſſeico flori floreis excubemus vt tedis? præ-
fertim cum & Sapientia de ſemetipſa cecine-
rit; Ego flos agri, & lilium conuallium. Ceras
igitur nec pinus exuſta deſudat, nec crebris ſau-
ciata bipennibus cedrus illacrymat: ſed eſt illis
arcana de Virginitate creatio, & ipſa transfi-
guratione niuei candoris albeſcunt.

Demerſionem Pharaonis & Ægyptio-
rum ſignificat ablutio in aqua per gratiam
Sacramenti, qua projiciuntur in profundum
maris miſericordiarum Dei omnia peccata
baptizatorum, & cum iis omnis Diaboli vis,
quaſi in abyſſum depreſſa, demergitur, vt in-
terpretatur Tertullianus libro de Baptiſmo,
c. 9. his verbis: Quot igitur patrocinia nature,
quot privilegia gratiæ, quot ſolennia diſcipline,
figure, præſtructiones, precatationes, religionem
aqua ordinauerunt? Primò quidem, cum populus
de Ægypto liberè expeditus, vim regis Ægypti
per aquam tranſgreſſus euadit, ipſum regem cum
totis copiis aqua extinxit. Quæ figura manife-
ſtior in Baptiſmi Sacramento? Liberantur de ſe-
culo nationes, per aquam ſcilicet, & Diabolum
dominatorem priſtinum in aqua oppreſſum dere-
linquunt. Sanctus Hieronymus Epistoſa ad
Oceanum: Pharaon cum exercitu ſuo nolens po-
pulum Dei exire de Ægypto, in typo Baptiſmatis

suffocatur. Ordo Millæ Ambrosianæ loco citato: Ecce iam ignis columna resplendet, quæ plebem Domini beatæ noctis tempore ad salutaria fluentia præcedat, in quibus persecutor mergitur, & Christi populus liberatus emergit. Nam sancti Spiritus vnda conceptus, per Adam natus ad mortem, per Christum regignitur ad vitam. Imò ipse S. Ambrosius libro de initiandis, c. 3. Aduertis (inquit) quòd in illo Hebræorum transiit iam tunc sacri baptismatis figura præcesserit, in quo Ægyptius perit, & Hebræus enasit. Quid enim aliud in hoc quotidie sacramento docemur, nisi quia culpa mergitur, & error aboletur; pietas autem & innocentia pura manet?

Institutor & auctor Baptismi Christus representatur in eodem Cereo; cera quidem, quæ ex apibus matris substantia sine admissione matris concipitur, carnem humanitatis ex purissimo beatæ Virginis sanguine absque vlla viri cõmissione progenitam significante; lumine autem, quod ex igne per benedictionem sanctificato accensum est, diuinitatem eiusdem demonstrante, cuius vnione omni gratia in animam effusa, factus est Christus lux vera, quæ illuminat omnem hominem venientem in hunc mundum, & ductum ad vitam æternam præstat sequentibus se. De symbolo ceræ idem Rupertus ibidem: *Bonè ergo significationis ordo procedit, dum claræ resurgentis magnitudinem præclari signifi-*

tat magnitudo Cerei. Eo vel maxime Cereus ad
 Christi similitudinem accedit, quod paruula, quæ
 substantiam cere educit, apud mater absque con-
 cubitu concipit & parit: cui recte comparatur
 Virgo Maria Dei genitrix, quæ inuiolata nobis
 Deum in carne, quasi mel in cera, protulit. De
 symbolo, autem luminis sic adiungit: Dum
 ergo columnam ceream rutilans ignis accendit,
 illud innuitur, quod extinctam in sepulcro iacen-
 tem humanitatis Christi substantiam, de super-
 nis aspirans ignea diuinitatis potentia rursus ani-
 mauit; & sicut verè rutilans ignis, gloria beate
 resurrectionis hac nocte in perpetuum nobis gau-
 dium feliciter illuxit. Et multo ante S. Ambro-
 sius lib. i. de Sacramentis, c. 6. Tenebat Virgam
 Moyses, & ducebat populum Hebræorum, in no-
 cte in columna lucis, in die in columna nubis, Lux
 quid est, nisi Veritas, quæ apertum & plenum
 lumen effundit? Columna lucis quid est, nisi Chri-
 stus Dominus, qui tenebras infidelitatis depulit,
 & lucem veritatis & gratiæ spiritualis affecti-
 bus infudit humanis? Atque ea de causa sacer-
 dos in processione Cereo benedicto thus
 adolet, vt pote imagini Christi; & vbi ad
 Fontem ventum est, idem Cereus à parte
 orientali statuitur, quasi eum referens cuius
 nomen Oriens est, Zachar. 3. & 6. qui semper
 lucet, & nescit occasum: vnde in libro sacer-
 dotali Æthiopū, Sacerdos benedicēs aquam
 baptismalem iubetur aspicere ad Orientem.

sicut in ipsa administratione baptismi, iuxta Ecclesiæ Græcæ & Latinæ ritum, baptizandus, dum professionem fidei emittit, & sacra aqua abluitur, stat versus Orientem, vt est apud Clementē Rom. lib. 7. Constit. Apost. c. 45. Dionysium Arcopag. c. 3. Eccles. hierarch. Hieronymum in sextum caput Prophetæ Amos. Cyrillum Ierosolymitanum Catechesi mystagogica 1. & in Euchologio Græcorum in Ordine Baptismi.

Idem Cereus, dum à Sacerdote in aquam Fontis demergitur, exprimit Christum aquas Iordanis ingredientem, & eas humanitatis suæ contactu, & Spiritus sancti influxu sanctificantem, vt regenerandi vim habeant, iuxta doctrinam eiusdem Cyrilli, Catechesi mystag. 3. quare canit tunc Sacerdos, *Descendat in hanc plenitudinem Fontis virtus Spiritus sancti*, respiciens ad illud quod Euangelistæ scribunt, quando Christus in Iordane baptizatus fuit, Spiritum sanctum super caput eius in specie columbæ descendisse. Et hoc symbolo repræsentatur causa sanctificationis baptismi. Dum autem idem Cereus ex aqua post trinam demersionem educitur, eundem Christum significat post triduum sepultura à morte resurgentem.

Quod veto Neophytorum cerei, & alij per Ecclesiam, dato à pueris tertio signo, Ac-

cendite, de lumine Cerei benedicti accen-
 duntur, id ſignificat illuminationē fidei, quæ
 per Sacramentum Baptiſmi à virtute Chri-
 ſti deriuatur, vnde Baptiſmis ab antiquis *φω-
 τισμός*, *Illuminatio*, & baptizati *φωτιστοί*, *Illu-
 minati*, & recēns baptizati *νεοφωτιστοί*, dicti
 ſunt; & mos eſt Eccleſiæ, infantibus poſt ba-
 ptiſmum cereum ardentem in manum tra-
 dere: & apud Græcos dies Epiphaniæ Feſtū
 luminum appellatur, quod per eum diem
 Chriſtiani memoriam baptizati Chriſti, &
 Sacramenti Illuminationis per eundem in-
 ſtituti, cereis accenſis publicè celebrent. Ac-
 cenſionem autem illam cereorum fieri ad
 Verſū, *Agnus Dei*, ſcribit Amalaſius; vt de-
 monſtretur, quod per illum Agnum, qui tol-
 lit peccata mundi, vnusquiſque lumen acci-
 pere debet. Paulò aliter rem hanc explicat
 Rupertus loco citato. Eodem, inquit, igne con-
 ſecrati Cerei, cuncti, qui in Eccleſia ſunt, illumi-
 nari debent cereoli. Quod cum fit, opportune no-
 bis illud in mentem ſubuenit, quod Dominus no-
 ſtrea die, qua reſurrexit, cum eſſet ſerò, ſtans in
 medio diſcipulorum ſuorum, manusque & latus
 oſtendens eis, inſufflauit, & dixit eis, *Accipite
 Spiritum ſanctum*. Illic enim cœpit ille homi-
 nibus dari ignis, quem per hunc viſibilem ignem
 conſtat ſignificari, quem venit ipſe mittere in
 terram, & voluit vehementer accendi.

Duo autem cerei minores, qui, à Cereo benedicto illuminati, cum semper in processione hac die & sequentibus diebus per Octavam Paschæ antecedunt, Discipulos Christi designant, quos ille, à se doctrina veritatis illuminatos, misit binos ante faciem suam in omnem ciuitatem & locum quò erat ipse venturus, iussitque docere omnes gentes, baptizantes eos in nomine Patris, & Filij, & Spiritus sancti. Quia de re ita Alcuinus lib. de diuin. Offic. & de Sabbato sancti Paschæ: *Cereo benedicto, illiò illuminantur ab eodem alij Cerei duo, naturam hominis habentes. Cereus, qui nouo igne accenditur, nouam Christi doctrinam siue gratiam in nouo Testamento, nouamque gratiam qua nox Dominica illustratur, designat: duo illi qui illuminantur ab eo, doctrinam Apostolicam designant, quibus dicitur, Vos estis lux mundi.* In nonnullis tamen Ecclesijs vnicus cereus defertur, qui indicet Apostolos acceptam à Christo lucem veritatis per mundum sua prædicatione diffundentes. Et id quidem etiam antiquitus à plerisque fuisse obseruatum, conijcere est ex Amalario Fortunato, c. 20. lib. 1. de Ecclesiast. Offic. qui ea de re in hunc modum scribit: *Quoniam Christus lux vera, qui illuminat omnem hominem*

venientem in hunc mundum, dixit Choro Apostolorum, *Vos estis lux mundi, sit Cereus consecratus in Christi persona; sit alter Cereus illuminatus à primo Cereo; utrique præcedant nos ad terram promissionis: Et statim: Per se Christus illuminat Ecclesiam, illuminat & per Apostolos.* Idem tradit Durandus lib. 6. c. 8. Sed tractu temporis gliscente errore, factum est, ut alter iste addititius cereus eiusdē rationis esse crederetur atque principalis ille, & plerisque in locis eadem benedictione consecraretur, & aquis baptismalibus sanctificandis adhiberetur: quasi Apostoli perinde vñctione Spiritus sancti Christi essent, perinde Saluatores, perinde populi Israelitici in columna duces ac liberatores, perinde gratiam capitis & potestatem excellentiæ habentes, perinde sua luce lucentes, perinde baptismi auctores, & aquas propria virtute sanctificantes, perinde Patrem æternum sui oblatione placantes, perinde propria virtute à morte resurgentes, atque vñigenitus ille Dei Filius, in quo inhabitat omnis plenitudo diuinitatis corporaliter. Quod cum sine Christi iniuria, & Religionis scandalo tolerari videatur non posse, ad communem Ecclesiæ usum reuocandum est, ut vnus sit

Cereus grandioris formæ , qui Christi aquas sanctificantis, & cum gloria resurgentis, imaginem referat : duo minores, Apostolicæ prædicationis ministerium significantes, qui ei honoris causa præferantur, iuxta dispositionem Ordinis Romani, Missalis Romani, Ordinarij, Missalis, & Ritualis Andegauensis, & doctrinam Alcuini loco nuper citato, & Honorij in Gemma, lib. 3. c. 101.

Quinque grana thuris ; quæ igni admoda Cereo in modum crucis infiguntur, denotant Christum , igne charitatis ardentem, se in altari crucis pro nobis Deo Patri obtulisse in odorem suauitatis , & præ reuerentia meritorum suorum exaudium eius iram placauisse. Vnde Ecclesia thus illud adhibendo canit, *Suscipe, sancte pater, incensi huius sacrificium vespertinum.*

Stillatio Cerei in aquam Fontis, significat sanguinem è capite & vulneribus Christi rorantem in aquam baptismalem, vt eam virtute passionis suæ sanctificet, iuxta illud S. Augustini, Tract. 2. in Ioan. *Vnde rubet baptismus, nisi ex sanguine Christi?* & ita aqua Fontis verè est mare rubrum, vt exponit Concilium Tolosanum quartum c. 6. & Casarius Arelaten-

sis appositè ad hoc mysterium, Homilie
 3. quæ est de Paschate: *Sub hoc tempore ex-*
cutitur Pharaon cum exercitu in mari rubro:
pereuntibus sacro in Fonte peccatis, tam-
quam in rubras Ægyptij demerguntur vñ-
das: rubras, id est, Christi sanguine conse-
cratas. Quo modo etiam infusio Chris-
 matis & Olei sancti eidem adhiberi solet:
 vt vñctione Spiritus sancti fecundetur
 ad regenerandos populos in adoptionem
 filiorum Dei: vnde eadem aqua mater
 adoptionis appellatur à S. Dionysio, Ec-
 clesiast. Hierarch. c. 3.

Cætera quæ ad perfectam representa-
 tionem Baptismi hîc adhibentur, ex su-
 perioribus plana sunt: nam in aqua mate-
 ria, in demersione ritus, in illuminatione
 & ablutione effectus demonstratur.

Porro aquæ baptismalis consecrandæ
 ritus ab Apostolis manavit. Nam eius
 meminerunt, Clemens Romanus lib. 7.
 Const. Apostol. c. 44. & S. Dionysius
 Arcopagita Ecclesiast. Hierarch. c. 3. &
 Tertullianus lib. de baptismo c. 4. & S.
 Cyprianus Epist. 70. & S. Ambrosius lib.
 1. de Sacram. c. 5. de his qui myst. init. c. 3.
 lib. 1. de Spiritu Sancto c. 7. & alij anti-
 quiores Patres: & S. Gregorius in libro
 Sacramentorum eandem formam bene.

ditionis habet qua hodie vtitur Ecclesiâ;
cui similem etiam habet Ordo Missæ
Ambrosianæ.

Cerei verò Paschalis benedictionem
instituisse Zosimum Papam scribunt, Al-
cuinus, Amalarius, Rabanus Maurus,
Valafridus Strabo, Micrilogus, Ruper-
tus, Honorius, Sigebertus, Durandus.
Sed antiquiorem eius fuisse institutionem
arguit idem Ordo Missæ Ambrosianæ, &
Hymnus Prudentij in libro Cathemeriri-
on, qui inscribitur, *Ad incensum Cerei*
Paschalis, olim cantari solitus in Officio
Sabbati sancti, ut constat ex Ordine Ro-
mano, & Ruperto lib. 5. de divin. offic. c.
28: quo in Hymno, præter mysterium
transitus maris rubri, de quo supra, expli-
cat eleganter ritum excutiendi noui ignis
ex filice, his versibus.

*In cussu filicis lumina nos tamen
Monstrat saxigeno semine quærere:
Ne nesciret homo se sibi luminis
In Christi solido corpore conditam,
Qui dici stabilem se voluit petram,
Nostris igniculis unde genus venit.*

Zosimus ergo non constituit primitus
Cereum Paschalem benedici; sed, cum
eius benedictio apud maiores tantum ba-
siliacas in usu esset (ut de eulogiis olim fuit,

Etum est) eam quoque ad parochiales Ecclesias extendit. Hoc enim solum significare videtur liber Pontificalis in eius vita, cum scribit: *Et per parochias concessit licentiam benedicendi Cereum Paschalem: quem secutus Platina in eiusdem Zosimi vita, scripsit: Concessit item, ut in parochijs cerei Sancto Sabbato benedici possent.*

De causa benedicendi Cerei ita Concilium Toletanum quartum c. 9. *Propter gloriosum noctis ipsius Sacramentum solenniter hæc benedicimus: ut sacra Resurrectionis Christi mysterium, quod tempore huius votivæ noctis advenit, in benedictione sanctificati luminis suscipiamus.* Durandus verò lib. 6. c. 80. *Benedicitur ideo (inquit) quoniam ex simplici sui natura, absque benedictione, non potest transire ad significationem mysterij columnæ ignis: benedicatur etiã, propter gloriam Resurrectionis eius, quem & Pater benedicit; & quia per ipsum ipse Christus visibiliter ad memoriam reduci-*
tur.

Quod verò spectat ad formam benedictionis eiusdem, qua utitur Ecclesia Romana, ea vulgò adscribitur S. Ambrosio, ut auctores sunt, Honorius in Gemma animæ. lib. 3. c. 102. & Durandus Rational. lib. 6. c. 80. In Gotico Missali, tomo

6. Bibliothecæ Patrum, dicitur edita & decantata à S. Auguftino, cum adhuc Diaconus effer. In Ordine Miſſæ Ambroſianæ principium quidem eius iifdem prorfus verbis perſcriptum eſt: ſed reliquus textus longè à Romano diſſidet.

Cæterum id ſingulare in hac benedictione eſt, quòd fieri debeat per Diaconum, qui eſt minoris ordinis, etiam præſente Epifcopo vel Sacerdote, vt Alcuinus & paſſim antiqui Auctores docent, & id habetur in Ordine Miſſæ Ambroſianæ, loco citato: qua ratione, iuxta Ordinem Romanum, in Eccleſia Cathedrali id munus delegatur Archidiacono, vt Diaconorum principi. Cuius rei eam cauſam eſſe dicunt Rupertus lib. 6. de diuin. offic. c. 30. Durandus lib. 6. Rational. c. 80. & Ioannes Beletus Explicationis ſuæ c. 109. & poſt eos Sacerdotale Romanum, parte tertia; *quia bonum ſanctæ reſurrectionis Chriſti nuntium per minorem ſexum, id eſt, per mulieres, ſanctis Apoſtolis flentibus & lugentibus euangelizatum eſt.* Vnde in dicto Ordine Romano Archidiaconus, priuſquam benedicat Cereum, *humiliter inclinatus rogat unum de Sacerdotibus vel Iuuitis pro ſe orare*, id eſt, ſibi benedictionem impetiri; quod facit dicendo, *Iube*

domine benedicere, ut in Missali & Rituali præscribitur. Quapropter, licet hodie Archidiaconi in sacerdotali ordine sint constituti, quia tamen in hoc ritu Diaconali ministerio funguntur, & ratione mysterij repræsentare debent inferiorem sexum superiori, conditionem muliebrem dignitati Apostolicæ resurrectionem Domini annuntiantem; ideo à Celebrante, qui Christi Pontificis in Officio vicem tenet, missionem prædicandi tam boni nuntij, id est, benedictionem, suscipere debent: qua ratione in Ecclesia Andegavensi Decanus, quando recitat nonam lectionem in Choro, benedictionem accipere solet ab inferiori Dignitate, & Dignitates à Canonicis officiantibus, & Canonici in quotidiana recitatione lectionum ab Officiariis.

Memorabile est quod scribit Sigebertus in Chronico, anno Christi 417. Quidam (inquit) Occidentales, ultimo anno Cycli decennouenalis, pro embolismo communem annum tenentes, ac per hoc in Pascha celebrando aberrantes, diuino miraculo ad veritatem reuocantur. In una enim Italia Ecclesia, ubi annuatim Sabbato sancto Pascha hora baptizandi solebat, aqua diutius manare, & statim ex se secedere, nullo

deductoria penis apparente: tunc temporis iusto, id est, octauo Calendas Aprilis, Pascha celebrantes, aqua non emanans expectatione totius diei ac noctis sefellit: legitimo autem die Paschæ, hora baptizandi, aqua solito emanans, decimo Calendas Maij Pascha debere celebrari ostendit: quanquam paulò aliter idem Sigebertus rem narrat ad annum 573. controuersiam de die Paschæ ponens inter Hispanos & Francos, quæ secundum Francos miraculo dirempta fuerit. Et certè Gregorius Turonensis, qui anno 572. ordinatus fuit, fontem istum mirabilem in Lusitania fuisse scribit, rei vniuersæ ordinem narrans libro 1. de gloria Martyrum, c. 24. Est & illud (inquit) illustre miraculum de fontibus Hispaniæ, quos Lusitania provincia profert. Piscina namque est apud Osen campum antiquitus sculpta, & ex marmore vario in modum crucis miro composita opere. Sed & ædes magnæ claritatis ac celsitudinis desuper à Christianis constructa est. Igitur, cum dies sacer post curriculum anni decedentis aduenerit, quo Dominus confuso proditori mysticam Discipulis præbet cenam, conueniunt in locum illum tum Pontifice ciues, iam odorem sacri præsentientes aromatis. Tunc, data oratione, Sacerdos

ostia templi iubet mnniri signaculis, aduen-
tam virtutis Dominica præstolantes. Die
autem tertia, quod est Sabbati, convenienti-
bus ad baptizandum populis, adueniens E-
piscopus cum cimbis suis, inspectis signacu-
lis, ostia reseat clausa. Ac, mirum dictu;
piscinam, quam reliquerant vacuam, repe-
riant plenam: sed ita cumulo altiore refer-
ram, ut solet super ora modiorum triticum
aggregari: videasque huc illucque latices
fluctuare, nec partem in diuersam desluere.
Tunc cum exorcismo sanctificatum, consper-
sum de super Chrisma, omnis populus pro de-
votione haurit, & vas plenum domi pro sal-
uatione reportat, agros vincasque aspersio-
ne saluberrima tutaturus. Et, cum exinde
multitudo amphorarum sine collecto numero
hauriatur, numquam tamen vel cumulum
minuit: licet, ubi infans primus intinctus
fuerit, mox aqua reducitur, & baptizatis
omnibus, lymphis in se reuersis, ut initio pro-
dantur, nescio ita & sine clauduntur ignaro.
Et duobus sequentibus capitibus subdit
miracula facta aduersus hæreticos, qui
isti aquæ miraculo noluerant fidem adhi-
bere. Simile est quod scribit Ioannes Mos-
chus in Prato spirituali, c. 215. Est (inquit)
& in castello Cedebratis, quod sub monte
Enoandræ civitatis situm est, Baptise-

rium, quod in Paschali sanctæ Resurrectionis festiuitate, cum sit lapis unus, ex seipso continuè impletur. Duratque aqua illa usque ad Pentecosten: moxque transacta Pentecoste, euanescit. Idem quoque capite precedenti scribit de alio Baptisterio, quod in sanctis Epiphanijs sudat: qui sudor per tres horas continuè incrementis augetur, & post baptismum peractum decrescere incipit, & tribus alijs horis sensim deficit. In Epiphanijs dicit; quia ritu antiquo Ecclesiæ Græcæ solennis baptismus celebratur in dicto Festo, propter memoriam baptismi Christi, qui eo die factus recolitur.

*De Processione matutina ante Laudes,
in die Paschæ.*

CAPVT XIV.

SANCTVS Gregorius Nazianzenus, Oratione 42. sermonem habiturus ad populum in die Paschæ, narrat, sibi contemplanti visam huiusmodi speciem. Angelus quidam sublimis, amictus veste candida, ac splendenti in modum fulguris, nubes cursu transcendens, manum

versus Orientem protendit, ingenti voce:
 quasi buccinæ per aëra sonantis, clamans:
Hodie salus mundo, tam visibili, quam in-
visibili. Christus ex mortuis surrexit: & vos
eum eo surgite. Christus ad seipsum rediit: re-
dite & vos. Christus ex sepulcro liberatus est:
& vos è vinculis peccati liberamini. Porta
Inferi aperiuntur, & mors destruitur, & ve-
tus Adam deponitur, & novus perfectam
staturam consequitur: si qua in vobis est nova
in Christo creatura, & vos quoque renova-
mini. Hæc eo dicente, circumfusus alio-
 rum Angelorum exercitus canere cœpit:
Gloria in altissimis Deo, & in terra pax, in
hominibus bona voluntas. Cum quibus
 (inquit Gregorius, populum alloquens)
 & ego (vtinam & hac in parte vocem An-
 gelicæ parem, atque omnes orbis fines
 circumsonantem, sortiar) his verbis vos
 affabor. *Pascha Domini, Pascha, iterum-*
que Pascha, in honorem Trinitatis. Hæc
nobis festiuitatam festiuitas, & celebritas
celebritatum: tanto cæteris omnibus, non so-
lùm humanis, sed etiam ipsius Christi festis
superior, quanto sol stellas antecellit.

Antiquissima hæc est, & à primis sæcu-
 lis repetita Ecclesiæ Christianæ consue-
 tudo, vt gaudium festiuitatis Paschalis
 primo manè, solenni aliquo ritu, & sin-

gulari alacritatis signo, fidelibus populis boni ominis causâ nuntietur; atque adeo illi præ gaudio, in nomine tanti tamque salutaris mysterij, se inuicem saluent in osculo sancto. Ac de vsu quidem Romanæ Ecclesiæ in hunc modum scribit vetus Ordo Romanus. *In ipsa nocte* (Resurrectionis) *matutina luce rumpente tenebras, surgentes in Ecclesiam veniunt, & mutua charitate se inuicem osculantes, dicunt: Surrexit Dominus de sepulcro: & statim inchoatur Matutinum. Etiamque hodie Romæ in nocte Paschæ, circa horam quæ creditur Christus resurrexisse, quotannis in foro Agonali celebratur solennis processio, in qua non tantum hymnis & canticis Ecclesiasticis denuntiatur, sed etiam publico spectaculo exhibetur populo Romano, significatio festivæ exultationis & lætitiæ de Resurrectione Domini. In Ordine autem Missæ Ambrosianæ, pro die Paschæ, ita scribitur: *Ad Missam in Ecclesia maiore, Adnuntiatio Resurrectionis Domini ter repetita: Christus Dominus surrexit. R. Deo gratias.**

Græci similiter illucescente aurora eundem ritum obeunt, sed cum illustri & splendido apparatu. Nam (vt plenè describitur initio Pentecostarij, & apud Co-

dinum libro de official. aulae Constanti-
 nop. c. 14.) circa horam diluculi, pulsatis
 omnibus signis, Præpositus diuidit Cleri-
 cis cereos: & Sacerdote induto stola can-
 dida, simul cum Diacono antecedente,
 præeuntibus illi Ceroferariis, exeunt
 omnes ex Ecclesia per ostium boreale,
 perguntque in vestibulum, cereos geren-
 tes accensos: solo intus remanente Can-
 delapte, qui, accensis omnibus cereis &
 candelis per Ecclesiam, excitato igne
 foculum vnum ponit in medio navis Ec-
 clesiae, alterum ante fores Sacrarij: & in
 vtrumque immisso thure, thymiamate-
 rium similiter fumigans copioso thure
 intra Sacrarium suspendit. Sacerdos au-
 tem, incensatis sanctis imaginibus extra
 vestibulum, ac deinde omnibus à Clero
 circumstantibus per ordinem, consistit
 ante fores Ecclesiae clausas, & eas ducto
 in morem crucis thuribulo ter incenso
 adolet, simul dicens: *Gloria sanctæ,
 & consubstantiali, & viuificatrici, & indi-
 uisæ Trinitati, omni ex parte, nunc & sem-
 per, & in secula seculorum.* Responso à
 Clero, *Amen*, idem Sacerdos elata voce
 cantat hoc Troparium: *Christus resurrexit
 ex mortuis, morte mortem conculcans, & ipse
 qui in monumentis erans vitam largiens.*

Chorus idem cum concentu repetit;
Christus resurrexit, &c. Atque id secundò
& tertio ab utrisque alternis vicibus canitur.
Tum Sacerdos cantat tres primos
Versus Psalmi 67.

*Exurgat Deus, & dissipentur inimici
eius; & fugiant eum, qui oderunt eum, à
facie eius.*

*Sicut deficit fumus, deficiant, sicut fluit
cera à facie ignis.*

*Sic pereant peccatores à facie Dei: &
iusti delectentur in lætitia.*

Et singulis Versibus Chorus intercinic
Troparium, *Christus resurrexit, &c.* Quo
tertio repetito, Sacerdos maiori conten-
tione vocis solus cantat, *Christus resurre-
xit ex mortuis, mortem mortem conculcans: &
statim apposita manu fores aperiens, in-
greditur Ecclesiam, præeuntibus, ut su-
prà, lampadibus, & subsequentibus Præ-
posito ac cæteris Clericis, succinentibus
interea Versum, Et ihs qui in monumentis
erant vitam largiens: pergensque in Sa-
crarium facit magnam Synaptē, incen-
sat, & tandem, post multa Cantica vario
ordine repetita, dicit, quasi imitans S.
Gregorij vocem: *Dies resurrectionis.
Exultemus populi. Pascha Domini, Pascha.
Ex morte enim ad vitam, & ex terra ad cæ-**

*lum. Christus Deus nos traduxit. Expurgetur
 sensus, & aspiciamus lucem inaccessibi-
 lem Resurrectionis, Christum velut fulgur
 amicantem, & gaudeamus. Deinde, multis
 aliis interpositis Hymnis, longo inter-
 uallo tandem exclamat. Pascha incun-
 dum, Pascha Domini, Pascha omni ratio-
 ne venerandum nobis illuxit: Pascha in
 gaudios inuicem deosculemur: o Pascha, cu-
 ius pretio soluta est tristitia. Etenim ex se-
 pulcro, quasi ex thalamo, eluxisti. Christus
 mulieres gaudio impleuit, dicens: Nuntiate
 Apostolis. Et statim. Dies Resurrectionis.
 Exultemus in hoc celebri Festo, & inuicem
 deosculemur, & ijs qui oderunt nos condone-
 mus omnia, in gratiam Resurrectionis, &
 sic clamemus: Christus resurrexit ex mortuis,
 morte mortem conculcans, & ijs qui in mo-
 numentiis erant vitam largiens. Ac subin-
 de idem sæpius repetitur à Choro, tamdiu
 scilicet dum peragitur salutatio fraterni
 osculi: quod fit hoc modo. Accipit Sacer-
 dos sanctum Euangelium, & stat ante fo-
 res Sacrarij. Tum accedit Præpositus, &
 osculato primùm Euangelio, deinde ipso
 Sacerdote, de eius manu accipit Euange-
 lium, & stat illud tenens ad eiusdem dex-
 teram. Tum cæteri ordine accedentes,
 singuli osculantur, primùm Euangelium,
 deinde*

deinde Sacerdotem, & Præpositum: ac postremò omnes sibi inuicem fraternæ charitatis osculum impertiunt. Apud Codinum loco citato, in Processione Paschali, Imperator lampadem gestat, proceres verò aulici cereos arduentes: & matutinis Laudibus peractis, Protopapa & Archidiacono in vestibulo Sacrarij stantibus, alterò Euangelium, alterò crucem portante, idem Imperator accedens osculatur, primò Euangelium, deinde Protopapam, postea crucem, & Archidiaconum. Scribit etiam idem Auctor, apud Græcos plerisque in locis aperiendo fores Ecclesiæ pronuntiari à Sacerdote verba illa è Psalmo 23. *Attollite portas, principes, vestras, &c.* sicut moris est apud nos fieri in Processione Palmarum, & in Dedicatione Ecclesiæ.

In Ecclesia Andegauensi celebratur hoc mysterium finito tertio Responsorio Matutini, hoc modo. Paratur Altare maius vice monumenti Christi, velis suprâ & ab anteriori parte obtentis, quasi tabernaculum extemporaneum. Adhærent Altari duo maiores Capellani, superpellicio & cappa candida induti, alter ad cornu dextrum, alter ad sinistram, qui representent Angelos ad monumentum

ſedentes. Tum procedunt à Secretario duo Corbicularij, alba & dalmatica candida ornati, capite amiſtu circumteſto, ſed amiſtui ſuperinducta mitellà purpurea, mulieres ad monumentum venientes exhibituri, præcedentibus duobus pueris ſymphoniacis cum thuribulis. Hi, ubi in aditu Altariſ conſtiterint, illi canentes interrogant: *Quem quaritis in ſepulcro?* Reſpondent hi, ſimiliter canentes: *Ieſum Nazarenum crucifixum.* Tum illi: *Non eſt hic: ſurrexit, ſicut prædixerat. Venite, & videte locum, ubi poſitus erat Dominus.* Hoc audito, Corbicularii, introeunt in monumentum, & illud venerantur, oſculantes Altare in medio, quaſi Dominum ſuum, cuius deſiderio venerant, præ ſuauitate amoris baſiantes: atque interea duo pueri Altare terno ductu incenſant. Tunc Capellani: *Ite, nuntiate diſcipuliſ eius, quia ſurrexit.* Ad hanc vocem Corbicularii pergunt in Chorum, præcedentibus duobus pueris, cantantes elata voce: *Alleluia. Reſurrexit Dominus hodie, reſurrexit leo fortis, Chriſtus filiſ Dei.* Quibus vna voce reſponder omnis Chorus: *Deo gratias; dicite, eia.* Interea verò duo illi Corbicularii accedentes ad Epiſcopum, facta reuerentia, eum oſculo

salutant, submissa voce quasi in aurem dicentes : *Resurrexit Dominus , Alleluia.* Quibus respondet Episcopus osculum reddens: *Deo gratias , Alleluia.* Et statim præ lætitia in iubilum erumpens, intonat Hymnum, *Te Deum laudamus*; duobus pueris interea thus ei adolentibus. Deinde ambo Corbicularii simul procedentes, Cantori suo loco stanti eundem nuntium perferunt, osculumque libant: atque inde discedentes, alter ad dextram, alter ad sinistram partem Chori, aliis Dignitatibus, & Canonicis, cæterisque in Choro versantibus per ordinem, eadem verba insinuant, addito osculo, & pueris ad singulos incensum mittentibus. Respondent verò etiã singuli, osculum osculo reddentes: *Deo gratias , Alleluia*, quod est iuxta ritum Ambrosianum.

In Ecclesia Sueffionensi hæc denuntiatio Resurrectionis fit quoque post tertium Responsorium Matutini: sed illic sepulcrum adornatur in capella quadam, posito in Altari sanctissimo Sacramento: quò procedit Clerus cum Episcopo, præeuntibus crucibus, cereis, & thymiamateriis, populo ciuitatis cum Magistratibus subsequente. Et, cantata è superiore loco Antiphona de Resurrectione, Cantor,

M ij

feſto habitu conſpicuus , interrogat tres Vicarios, ante fores clauſas ſtantes in albis: *Dic nobis, Maria, quid vididiſti in via?* Cui reſpondet vnus ex iis: *Sepulcrum Chriſti viuentis, & gloriam vidi reſurgentis.* Alter: *Angelicos teſtes, ſudarium, & veſtes.* Tertius: *Scimus Chriſtum ſurrexiſſe à mortuis verè.* Tum Cantor, conuerſus ad Chorum & populum: *Credendum eſt magis ſoli Mariæ veraci, quàm Iudæorum turbæ fallaci.* Hoc dicto, Epiſcopus, apertis foribus, ingreditur capellam, & ſanctiſſimum Sacramentum cum debito ornatu de Altari tollens, duobus Canonicis in albis latus tegentibus, incipit Hymnum, *Te Deum laudamus*: &, præeuntibus de more luminaribus, ſequente Clero ac populo, illud deſert ad Altare maius, Eccleſiæ miniſtris ſolum per viam ſternentibus hedera & floribus. Deposito in Altari Sacramento, quaſi Domino in conſpectum diſcipulorum ſuorum poſt reſurrectionem prodeunte, Epiſcopus illud genu flexo reuerenter adorat, & oſculum in ima parte hierothecæ figens ſurgit. Idem faciunt duo aſſiſtentes Canonici, Cantor, & reliquus Clerus ex ordine; ac poſtremò Magiſtratus, & populus circumſtans.

Aliter celebrari hunc ritum in quibusdam Ecclesijs scribit Durandus lib. 6. Rationalis, c. 89. *In quibusdam Ecclesijs (inquit) in his septem diebus, duo in albis superpelliciis incipiunt Responsorium, Hac dies: & in aliis quosdam tropos retro Altare: quod repræsentat sepulcrum, pro eo quod corpus Iesu in eo sacramentaliter collocatur, & consecratur: gerentes typum duorum Angelorum, qui stantes in sepulcro, Christum resurrexisse retulerunt. Verba enim illa, Hac dies, &c. ad Resurrectionis diem pertinere noscuntur. Et post pauca. Fit autem hoc ad Laudes, & ad Tertiam, & Vesperas. Et paulo inferius. Fit etiam hoc in quibusdam Ecclesijs ad Missam: eo quod illa in Altari celebratur, super quod Christi corpus consecratur.*

Sunt in hoc ritu denuntiandæ Resurrectionis tres potissimum circumstantiæ obseruandæ.

Prima, qua monumentum sepulcri Domini in Altari repræsentatur. Id significant Græci feria quinta magnæ hebdomadæ in ritu lauandi Altaris, vt habetur in Euchologio, vbi Altare vocant, & σωτηρίας τοῦ & τοῦ πον, *salutaris sepulcri figuram*, & paulo inferius, Patriarcha solennem precationem faciens ante Altare,

dum illud poſt ablutionem ſacris pallis à circumſtantibus Sacerdotibus induitur, Chriſtum alloquitur his verbis: *Et ſiſtens nos* (huic Altari) *irreprehenſibiles & immaculatos, ad celebrandum tremendum ac diuinum ſacrificium viuificantis ſanguinis & corporis tui, quod, concilianda nobis immortalitatis cauſa, in ſepulcro depoſitum, & cum gloria tertio die reſurgens, fontem nobis inexhauſtum vitæ & immortalitatis preſtitit in ſanctiſſimo ſepulcro.* Germanus quoque Conſtantinopolitanus in Theoria rerum Eccleſiaſticarum: *Altare* (inquit) *eſt & dicitur præſepe, & ſepulcrum Domini.* Item Simeon Theſſalonicensis in libro de diuino templo, capite de ſacra menſa, recensens varia nomina Altaris, inter cætera dicit, illud appellari, *locum Dei, requiem, propitiatorium, magni ſacrificij officinam, Chriſti monumentum* monumentum; quia Chriſti corpus in eo, quaſi in ſepulcro, conditum quieſcit. Et ob hanc cauſam in ritu Eccleſiæ Senonenſis ſanctiſſimum Sacramentum in Altari capellæ ſepulcri proponitur: & c. *Conſulid.* de conſecr. diſt. I. Corporale, quod corpori Domini in ſacrificio ſupponi ſolet, dicitur ſupplere vicem ſindonis mundæ, qua illud à Iosepho & Nicodemò inuolutum

fuit. Quodquidem latius explicat S. Isidorus Pelusiota, Epist. 123. libri 1. his verbis. *Pura illa sindon, quæ in diuinorum donorum ministerio subijci solet, Iosephi Arimathensis est ministerium. Vi enim ille Domini corpus sindone inuolutum in sepulcrum demisit, per quod uniuersum genus nostrum resurrectionis fructum percepit: sic & nos propositionis panem in sindone consecrantes, Christi corpus sine dubitatione reperimus, illam nobis immortalitatem ad instar fontis proferens, quam Iesus Saluator, à Iosepho quidem funere elatus, sed ex mortuis resurgens, largitus est.* Quibus similia scribit Germanus Constantinopolitanus loco citato, & Beda c. 44. in Marcum.

Idem monumentum repræsentatur clausum, velis vndique oppansis in Ecclesia nostra, in Senonensi autem foribus capellæ obferatis: quodquidem respectum habet ad formam & situm Domini sepulcri, de quo sic Brocardus in Descriptione terræ Sanctæ. *Spelunca sepulcrum Domini continens habet in longum aliquot pedes; foris quidem marmore reſta, intus verò adhuc nuda conspicitur, sicut tempore passionis fuit. Ostium, quod ducit in hanc speluncam, ponitur ab Oriente, & est valde paruum. Et, cum ingressus fueris spe-*

luncam, sepulcrum ponitur ad dextram, hoc est, ad parietem spelunca Septentrionalem, factum de marmore grisei coloris, habens in longitudine octo pedes, sicut & spelunca ipsa. Necest in crypta illa lumen aliquod caeleste, sed lampades aliquæ accensæ reddunt eam illustrem. Et nota, quod ante speluncam Dominici sepulcri est alia crypta eiusdem magnitudinis & figuræ, solo pariete intermedio à priori segregata. Et ad hanc primò descenditur, deinde per ostium intermedij parietis venit in speluncam Dominici sepulcri. Et ostium illud fuit clausum, quando mulieres tempore Resurrectionis Dominicæ dicebant: Quis nobis reuoluet lapidem ab ostio monumenti? Sanctus quoque Augustinus libro 3. de consensu Euangelistarum, c. 24. probabiliter existimat, ante speluncam sepulcri fuisse septum aliquod maceria munitum. Sed asseueranter & disertè S. Cyrillus Ierosolymitanus Catechesi 14. Et unde resurget Saluator? Dicit in Canticis canticorum: Surge, propera amica mea: & in sequentibus: In foraminibus petra. Foramen petra dicit id, quod tunc ante ostium Saluatoris monumenti erat foramen ex eadem petra, sicut hic solet esse ante monumenta excisum. Nunc enim non apparet, quoniam crasum est vestibulum propter præsca-

sem ornatum. Nam ante regalem hunc ornatum & apparatus sepulcri, vestibulum erat ante petram. Ita in Senonensi ritu capella clausa vicem maceræ circum exstructæ, Altare cum Sacramento locum sepulcri refert. Ex quibus clarum est, licet sepulcrum Domini apertum esset cum eò venerunt mulieres, cuóluto lapide qui interioris speluncæ meatui appositus fuerat; nihil tamen obstare quin aditus speluncæ prioris, quæ pertrâseunda erat, obdito ostio clausus esset, quod vulgò creditur. Et hoc est consentaneum diligentiae Iudæorum, qui, ne qua vis per noctem pararetur ad auferendum corpus Christi, milites sepulcro custodes adhibuerunt, & saxum ei superpositum obsignauerunt, vt scribit S. Matthæus c. 27. probabile est eos quoque & ostium aditus in speluncam occlusisse, ne quis introrsum penetrare posset.

Aliò pertinent fores templi clausæ in ritu Græcorum, quæ manum admovente Sacerdote aperiuntur : nempe ad virtutem Resurrectionis Christi, qui conditus in sepulcro, cum sub mortis imperio captiuus esse videretur, quasi perruptis portis & repagulis Inferni, tertio die liber in vitam rediit, iuxta id quod in Sabbato

ſancto publicè ab Eccleſia canitur: *Hodie portas mortis, & ſeras pariter Saluator noſter diſrupit.* Hoc egregiè explicat S. Gregorius magnus Homilia 21. in Euangelia, his verbis. *Et, quem gaudebat occiſum, dolet mortuum: quia hunc ad ſuam gloriam cognoscit perueniſſe per pœnam.* Quod benè in libro Iudicum Samſon illius facta ſignificant: qui cùm Gazam ciuitatem Philiſtinarum fuiſſet ingreſſus, Philiſtæi ingreſſum eius protinus cognoscentes, ciuitatem repente obſidionibus circumdederunt, cuſtodes deputauerunt, & Samſon ſortiſſimum ſe iam comprehendiſſe gauiſi ſunt. Sed, quid Samſon fecit, agnouimus. Media nocte portas ciuitatis abſtulit, & montis verticem aſcendit: Quem, fratres chariſſimi, hoc in facto, quem, niſi Redemptorem noſtrum, Samſon ille ſignificat? Quid Gaza ciuitas, niſi Infernum designat? Quid per Philiſtæos, niſi Iudeorum perſidia, demonſtratur? qui, cùm mortuum Dominum viderent, eiùſque corpus in ſepulcro iam poſitum, cuſtodes illicò deputauerunt, & eum, qui auctor vita clarrucrat, in Inferni clauſtris retentum, quaſi Samſonem in Gaza, ſe deprehendiſſe letati ſunt. Samſon verò media nocte non ſolùm exiit, ſed etiam portas tulit: quia videlicet Redemptor noſter ante lucem reſurgens, non

solum liber de Inferno exijt, sed ipsa etiam Inferni claustra destruxit. Portas tulit, & montis verticem subiit: quia resurgendo claustra Inferni abstulit, & ascendendo cælorum regna penetrauit. Potest esse alia interpretatio, quòd Christus, laxatis portis Inferorum, limbum seu sinum Abraham ingressus, patres & iustos aduentum suum expectantes inde eduxerit. Et hanc esse mentem Græcæ Ecclesiæ in titu suo patet ex Pentecostario in hoc Hymno Paschali: Descendisti, Christe, ad ima terræ, & per fractis vestibus æternis, qui vinctos continebant, tertio die, vt Ionas ex ceto, ita ex sepulcro exsurrexisti. Et inferius in alio Cantico: Patuerunt tibi, Domine, præ metu portæ mortis. Ianitores inferni videntes te expauerunt. Nam portas æreas confregisti, & velles ferreos contriuiisti: & eduxisti nos è tenebris & umbra mortis, & vincula nostra dirupisti. Cui interpretationi licebit quoque tertiam adiungere, de apertione Paradisi. Vtramque his verbis complexus est idem Gregorius Homilia 22. in Euangelia. Hac festiuitas rectè dici potest Solennitas solennitatum. Ex hac quippe solennitate exemplum, nobis resurrectionis datum est, spes cælestis patrie aperta, & facta superni regni iamiam præ-

sedentes. Tum procedunt à Secretario duo Corbicularij, alba & dalmatica candida ornati, capite amictu circumtecto, sed amictui superinducta mitella purpurea, mulieres ad monumentum venientes exhibituri, præcedentibus duobus pueris symphoniacis cum thuribulis. Hi, ubi in aditu Altaris constiterint, illicanentes interrogant: *Quem queritis in sepulcro?* Respondent hi, similiter canentes: *Iesum Nazarenum crucifixum.* Tum illi: *Non est hic: surrexit, sicut prædixerat. Venite, & videte locum, ubi positus erat Dominus.* Hoc audito, Corbicularii, introeunt in monumentum, & illud venerantur, osculantes Altare in medio, quasi Dominum suum, cuius desiderio venerant, præ suauitate amoris basiantes: atque interea duo pueri Altare terno ductu incensant. Tunc Capellani: *Ite, nuntiate discipulis eius, quia surrexit.* Ad hanc vocem Corbicularii pergunt in Chorum, præcedentibus duobus pueris, cantantes elata voce: *Alleluia. Resurrexit Dominus hodie, resurrexit leo fortis, Christus filius Dei.* Quibus vna voce responder omnis Chorus: *Deo gratias; dicite, eia.* Interea verò duo illi Corbicularii accedentes ad Episcopum, facta reuerentia, eum osculo

salutant, submissa voce quasi in aurem dicentes : *Resurrexit Dominus , Alleluia.* Quibus respondet Episcopus osculum reddens: *Deo gratias, Alleluia.* Et statim præ lætitia in iubilum erumpens, intonat Hymnum, *Te Deum laudamus*; duobus pueris interea thus ei adolentibus. Deinde ambo Corbicularii simul procedentes, Cantori suo loco stanti eundem nuntium perferunt, osculumque libant: atque inde discedentes, alter ad dextram, alter ad sinistram partem Chori, aliis Dignitatibus, & Canonicis, cæterisque in Choro versantibus per ordinem, eadem verba insinuant, addito osculo, & pueris ad singulos incensum mittentibus. Respondent verò etiã singuli, osculum osculo reddentes: *Deo gratias, Alleluia*, quod est iuxta ritum Ambrosianum.

In Ecclesia Sueffionensi hæc denuntiatio Resurrectionis fit quoque post tertium Responsorium Matutini: sed illic sepulcrum adornatur in capella quadam, posito in Altari sanctissimo Sacramento: quò procedit Clerus cum Episcopo, præeuntibus crucibus, cereis, & thymiama-teriis, populo ciuitatis cum Magistratibus subsequente. Et, cantata è superiore loco Antiphona de Resurrectione, Cantor,

Aliter celebrari hunc ritum in quibusdam Ecclesijs scribit Durandus lib. 6. Rationalis, c. 89. *In quibusdam Ecclesijs (inquit) in his septem diebus, duo in albis superpelliciis incipiunt Responsorium, Hac dies: & in aliis quosdam tropos retro Altare: quod repræsentat sepulcrum, pro eo quod corpus Iesu in eo sacramentaliter collocatur, & consecratur: gerentes typum duorum Angelorum, qui stantes in sepulcro, Christum resurrexisse retulerunt. Verba enim illa, Hac dies, &c. ad Resurrectionis diem pertinere noscuntur. Et post pauca. Fit autem hoc ad Laudes, & ad Tertiam, & Vesperas. Et paulo inferius. Fit etiam hoc in quibusdam Ecclesijs ad Missam: eo quod illa in Altari celebratur, super quod Christi corpus consecratur.*

Sunt in hoc ritu denuntiandæ Resurrectionis tres potissimum circumstantiæ obseruandæ.

Prima, qua monumentum sepulcri Dominici in Altari repræsentatur. Id significant Græci feria quinta magnæ hebdomadæ in ritu lauandi Altaris, vt habetur in Euchologio, vbi Altare vocant, & *συνθηκὴ τοῦ τῷ τῷ τῷ, salutaris sepulcri figuram*: & paulo inferius, Patriarcha solennem precationem faciens ante Altare,

M iiij

dum illud post ablutionem sacris pallis à circumstantibus Sacerdotibus induitur, Christum alloquitur his verbis: *Et sistens nos* (huic Altari) *irreprehensibiles & immaculatos, ad celebrandum tremendum ac diuinum sacrificium viuificantis sanguinis & corporis tui, quod, conciliandæ nobis immortalitatis causa, in sepulcro depositum, & cum gloria tertio die resurgens, fontem nobis inexhaustum vitæ & immortalitatis prestavit in sanctissimo sepulcro.* Germanus quoque Constantinopolitanus in Theoria rerum Ecclesiasticarum: *Altare* (inquit) *est & dicitur præsepe, & sepulcrum Domini.* Item Simeon Thessalonicensis in libro de diuino templo, capite de sacra mensa, recensens varia nomina Altaris, inter cætera dicit, illud appellari, *locum Dei, requiem, propitiatorium, magni sacrificij officinam, Christi monumentum* monumentum; quia Christi corpus in eo, quasi in sepulcro, conditum quiescit. Et ob hanc causam in ritu Ecclesiæ Senonensis sanctissimum Sacramentum in Altari capellæ sepulcri proponitur: & c. *Consulto.* de consecr. dist. i. Corporale, quod corpori Domini in sacrificio supponi solet, dicitur supplere vicem sindonis mundæ, qua illud à Iosepho & Nicodemo inuolutum

fuit. Quod quidem latius explicat S. Isidorus Pelusiota, Epist. 123. libri 1. his verbis. *Pura illa sindon, quæ in diuinorum donorum ministerio subijci solet, Iosephi Arimathensis est ministerium. Vi enim ille Domini corpus sindone inuolutum in sepulcrum demisit, per quod vniuersum genus nostrum resurrectionis fructum percepit: sic & nos propositionis panem in sindone consecrantes, Christi corpus sine dubitatione reperimus, illam nobis immortalitatem ad instar fontis proferens, quam Iesus Saluator, à Iosepho quidem funere elatus, sed ex mortuis resurgens, largitus est.* Quibus similia scribit Germanus Constantinopolitanus loco citato, & Beda c. 44. in Marcum.

Idem monumentum representatur clausum, velis vndique oppansis in Ecclesia nostra, in Senonensi autem foribus capellæ obseratis: quod quidem respectum habet ad formam & situm Domini sepulcri, de quo sic Brocardus in Descriptione terræ Sanctæ. *Spelunca sepulcrum Domini continens habet in longum aliquot pedes; foris quidem marmore reclusa, intus verò adhuc nuda conspicitur, sicut tempore passionis fuit. Ostium, quod ducit in hanc speluncam, ponitur ab Oriente, & est valde paruum. Et, cum ingressus fueris spe-*

luncam, ſepulcrum ponitur ad dextram, hoc eſt, ad parietem ſpelunca Septentrionalem, factum de marmore griſei coloris; habens in longitudine octo pedes, ſicut & ſpelunca ipſa. Neceſt in crypta illa lumen aliquod caeſte, ſed lampades aliquæ accenſæ reddunt eam illuſtrem. Et nota, quòd ante ſpeluncam Dominici ſepulcri eſt alia crypta eiſdem magnitudinis & figuræ, ſolo pariete intermedio à priori ſegregata. Et ad hanc primò deſcenditur, deinde per oſtium intermedij parietis venit in ſpeluncam Dominici ſepulcri. Et oſtium illud fuit clauſum, quando mulieres tempore Reſurrecciónis Dominicæ dicebant: Quis nobis reuoluet lapidem ab oſſio monumenti? Sanctus quoque Auguſtinus libro 3. de conſenſu Euangelistarum, c. 24. probabiliter exiſtimat, ante ſpeluncam ſepulcri fuiſſe ſeptum aliquod maceria munitum. Sed aſſeueranter & diſertè S. Cyrillus Ieroſolymitanus Catecheſi 14. Et unde reſurget Saluator? Dicit in Canticis canticorum: Surge, propera amica mea: & in ſequentibus: In foraminibus petra. Foramen petrae dicit id, quod tunc ante oſtium Saluatoris monumenti erat foramen ex eadem petra, ſicut hic ſolet eſſe ante monumenta exciſum. Nunc enim non apparet, quoniam craſum eſt veſtibulum propter præſea-

gem ornatum. Nam ante regalem hunc ornatum & apparatus sepulcri, vestibulum erat ante peiram. Ita in Senonensi ritu capella clausa vicem maceræ circum exstructæ, Altare cum Sacramento locum sepulcri refert. Ex quibus clarum est, licet sepulcrum Domini apertum esset cum eò venerunt mulieres, cuóluto lapide qui interioris speluncæ meatui appositus fuerat; nihil tamen obstare quin aditus speluncæ prioris, quæ pertrâseunda erat, obdito ostio clausus esset, quod vulgò creditur. Et hoc est consentaneum diligentia Iudæorum, qui, ne qua vis per noctem pararetur ad auferendum corpus Christi, milites sepulcro custodes adhibuerunt, & saxum ei superpositum obsignauerunt, vt scribit S. Matthæus c. 27. probabile est eos quoque & ostium aditus in speluncam occlusisse, ne quis introrsum penetrare posset.

Aliò pertinent fores templi clausæ in ritu Græcorum, quæ manum admovente Sacerdote aperiuntur: nempe ad virtutem Resurrectionis Christi, qui conditus in sepulcro, cum sub mortis imperio captius esse videretur, quasi perruptis portis & repagulis Inferni, tertio die liber in vitam rediit, iuxta id quod in Sabbato

ſancto publicè ab Eccleſia canitur: *Hodie portas mortis, & ſeras pariter Saluator noſter diſrupit.* Hoc egregiè explicat S. Gregorius magnus Homilia 21. in Euangelia, his verbis. *Et, quem gaudebat occiſum, dolet mortuum: quia hunc ad ſuam gloriã cognoscit perueniſſe per pœnam.* Quod benè in libro Iudicum Samſon illius facta ſignificant: qui cùm Gazam ciuitatem Philistiinorum fuiſſet ingreſſus, Philistiæ ingreſſum eius protinus cognoscentes, ciuitatem repente obſidionibus circumdederunt, cuſtodes deputauerunt, & Samſon fortiſſimum ſe iam comprehendiffe gauiſi ſunt. Sed, quid Samſon fecit, agnouimus. Media nocte portas ciuitatis abſtulit, & montis verticem aſcendit: Quem, fratres chariſſimi, hoc in facto, quem, niſi Redemptorem noſtrum, Samſon ille ſignificat? Quid Gaza ciuitas, niſi Infernum designat? Quid per Philistiæ, niſi Iudeorum perfidia, demonſtratur? qui, cùm mortuum Dominum viderent, eiùſque corpus in ſepulcro iam poſitum, cuſtodes illicò deputauerunt, & cum, qui auctor vite clarruerat, in Inferni clauſtris retentum, quaſi Samſonem in Gaza, ſe deprehendiſſe letati ſunt. Samſon verò media nocte non ſolùm exiit, ſed etiam portas tulit: quia videlicet Redemptor noſter ante lucem reſurgens, non

solum liber de Inferno exijt, sed ipsa etiam Inferni claustra destruxit. Portas tulit, & montis verticem subiit: quia resurgendo claustra Inferni abstulit, & ascendendo cælorum regna penetrauit. Potest esse alia interpretatio, quòd Christus, laxatis portis Inferorum, limbum seu sinum Abrahæ ingressus, patres & iustos aduentum suum expectantes inde eduxerit. Et hanc esse mentem Græcæ Ecclesiæ in titu suo patet ex Pentecostario in hoc Hymno Paschali: Descendisti, Christe, ad ima terræ, & perfractis vestibulis æternis, qui vinctos continebant, tertio die, ut Ionas ex ceto, ita ex sepulcro exsurrexisti. Et inferiùs in alio Cantico: Patuerunt tibi, Domine, præ metu portæ mortis: Ianitores inferni videntes te expauerunt. Nam portas areas confregisti, & vinctes ferreos contriuiisti: & edu-xisti nos è tenebris & umbra mortis, & vincula nostra dirupisti. Cui interpretationi licebit quoque tertiam adiungere, de apertione Paradisi. Vtramque his verbis complexus est idem Gregorius Homilia 22. in Euangelia. Hac festiuitas rectè dici potest Solennitas solennitatum. Ex hac quippe solennitate exemplum, nobis resurrectionis datum est, spes cælestis patrie aperta, & facta superni regni iamiam præ-

sumptibilis gloria. Per hanc electi, qui, quamuis in tranquillitatis sinu, tamen apud Inferni claustra tenebantur, ad paradisi amœna reducti sunt. Quod ante passionem dixit, in Resurrectione sua Dominus impleuit: Si exaltatus fuero, inquit, à terra, omnia traham ad me. Omnia etenim traxit, qui de electis suis apud Inferos nullum reliquit. Omnia abstulit, utique electa. Neque etenim infideles quosque, & pro suis criminibus æternis supplicijs deditos, ad veniam Dominus resurgendo reparauit: sed illos ex Inferni claustris rapuit, quos suos in fide & actibus recognouit. Quæ doctrina clariùs intelligetur ex alia eiusdem Gregorij sententia, libri 4. Moralium c. 27. Priùs autem quàm Redemptor noster morte sua humani generis pœnam solueret, eos etiam, qui cœlestis patriæ vias sectati sunt, post egressum carnis Inferni claustra tenuerunt: non ut pœna quasi peccatores plecteret, sed ut eos in locis remotioribus quiescentes, quia nec dum intercessio Mediatoris aduenerat, ab ingressu regni reatus primæ culpæ prohiberet. Vnde, iuxta eiusdem Redemptoris nostri testimoniam, dices, qui apud inferos torquetur, in sinu Abrahe requiescere Lazarum contemplatur.

Secunda circumstantia est vsus lumi-

num. Soliti enim sunt prisca Christiani diem festum Paschæ, & nocturnum Officium Sabbati eius, frequentibus luminaribus & cereis accensis celebrare. Vnde in Pentecostario Græcorum canitur in nocte Paschæ: *Quàm verè sacra; & omni solennitate celebris, nox hæc salutaris, & clarissima luce splendescens, diei lucifera prænuntia, in qua lumen æternum ex sepulcro corporaliter omnibus illuxit.* Iustinus Martyr Epistola ad Diognetum, in fine: *Et Domini Pascha progreditur, & cerei coguntur.* Luculentiùs more suo Gregorius Nazianzenus Oratione 19. ubi de morbo patris sui loquitur. *Morbi tempus erat (inquit) sanctum & celebre Pascha, dies regina dierum, ac splendida illa nox peccati tenebras soluens, in qua nos, cum magna luminis copia, salutis nostræ Festum celebramus, atque cum luce propter nos mortua morte simul affecti, cum eodem quoque resurgente resurgimus.* Et Oratione 42. *Præclara quidem nobis quoque fuit hesternafaciæ ac luminum gestatio, quam priuatim iuxta publicèque pereginus; omne genus hominum ferme, atque omnes magistratu & dignitate insignes, largo igne noctem collustrantes.* Et post pauca. *At hodierna præclarior & excellentior. Nam hesternum lu-*

men magni illius luminis exurgentis prænuntium erat, ac veluti profesta quadam animorum letitia. Hodie autem ipsam Resurrectionem celebramus, non quidem in spe positam, sed iam mortam, mundumque totum sibi conciliantem. In quem locum Nicetas sic commentatur. *Præclara, inquit, etiam fuit hesternæ luminum celebritas, hoc est, cætus ille, qui ad vespæram magni Sabbati celebrabatur. Peruigilem enim noctem traducebant usque ad horam septimam, cantantes, ac lampades accendentes, atque imminuentem Seruatoris nostri Resurrectionem expectantes.* Et adhunc ritum referendum est id quod supra c. 13. protulimus ex Eusebio, de columnis cæteis tota vrbe accensis in nocte Paschali. Ratio eius rei affertur, quia lux est vitæ & resurrectionis symbolum. Quam ob causam accendi solent lampades & cerei ad Reliquias Sanctorum, vt iam olim proditum est à S. Hieronymo Epistola ad Riparium, Theodoreto lib. 5. Historiæ Eccles. c. 36. Paulino Nolano in Natali tertio S. Felicis, & aliis: & similiter in funeribus mortuorum. Quo symbolo significatur, animas eorum, qui à corporibus discesserunt, viuere, & corpora ipsa tandem aliquando in vitam immortalem esse resur-

rectura, & lucem denuò aspectura. In Pentecostario is ritus Processionis sic explicatur. *Prodeamus cum lampadibus obviam Christo, ex monumento prodeunti, tanquam sponso; & simul cum Ordinibus Angelorum, hac solennitate letantibus, festum agamus.*

Tertia circumstantia est osculum. Mos hic viguit ab ipsis Ecclesiæ primordiis inter Christianos, ut, ad indicandum sincerum charitatis affectum, quo se omnes inuicem in Christo prosequuntur, osculis mutuis, seu aduenientes, seu orantes, seu communicantes, seu sacra mysteria celebrantes, alij alios consalutarent, dicendo, *Pax tibi*, seu, *Pax vobis*. De osculo inter sacra & preces Cyrillus Ierosolymitanus Catechesi mystagoga 5. Deinde (postquam Sacerdos manus abluit, & antequam dicat, *Sursum corda*) clamat Diaconus: *Complectimini & osculamini inuicem: atque tunc mutua inter nos libamus oscula. Non hoc ita accipias, quasi osculum illud sit eiusmodi, quale in foro inter communes amicos esse consuevit. Neque enim tale est: sed animos mutuò conciliat, & omnem inter ipsos iniuriarum obliuionem spondet. Significat igitur osculum, animos velut commisceri & contemperari inter se, & omnem iniuri-*

riarum recordationem ablegari. Propter eam Christus dicebat (Matth. 5.) Si offers munus tuum ad altare, & ibi recordatus fueris, quia frater tuus habet aliquid aduersum te; relinque ibi munus tuum ante altare, & vade prius reconciliari fratri tuo: & tunc veniens offeres munus tuum. Igitur osculum hoc reconciliatio est, atque idcirco sanctum, ut alicubi (2. Corinth. 13.) beatus Paulus clamabat, dicens. Salutate inuicem in osculo sancto: & Petrus (Epist. 1. c. 5.) in osculo charitatis. Sic S. Augustinus Serm. 83. de diuersis (qui est in die sancto Paschæ) alloquens pueros pridie baptizatos: Ecce, ubi est peracta sanctificatio, dicimus Orationem Dominicam, quam accepistis & reddidistis. Post ipsam, dicitur, Pax vobiscum: & osculantur se Christiani in osculo sancto, quod est signum pacis; si, quod ostendunt labia, fiat in conscientia; id est, quomodo labia tua ad labia fratris tui accedunt, sic cor tuum à corde eius non recedat. Sanctus Iustinus Martyr, Apolog. 2. Finitis orationibus, nos inuicem osculis salutamus. Hinc eleganter Tertullianus, libro de Oratione, c. 14. osculum pacis vocauit signaculum orationis. Iuxta hunc morem, in Ordine Romano, c. Qualiter agatur. ubi agitur de dimittenda Synodo prouinciali, sic statuitur:

statuitur: *Quibus expletis, dum dictum fuerit ab Archidiacono, In nomine Domini nostri Iesu Christi eamus cum pace: omnes illud, ab ipso primum incipientes Episcopo, osculum sibi inuicem dabunt. Sicque, data sibi inuicem pace, conuentus Concilij absoluetur.* Idem habetur in Ordine celebrandi Concilij, qui præfixus est tomo primo Conciliorum. De osculo, quo aduenientes amici, fratres, & hospites excipiuntur, S. Hieronymus in vita Pauli eremitæ, c. 8. & Paphnutius in vita S. Oniphrij, c. 8. Sed admiratione dignum est exemplum charitatis Abbatis Hagioduli: qui cum vehementer doleret vnum ex fratribus sui Monasterij insalutatum ad Dominum abiisse, mortuum compellauit, vt rediret in vitam, ad recipiendum osculum pacis. Rem sic narrat Ioannes Moschus in Prælo spirituali, c. 11. *Cum is esset Antistes dux Monasterij beati Gerasimi, contigit fratrem quendam de illic residentibus mori. Quod cum senex ignoraret, pulsaretque Præfectus canonis lignum, quod fratres conuenientes mortuum efferrent: vt vidit senex cadauer in Ecclesia medio iacere, contristatus est valde, quod non illum salutasset, priusquam migraret ex seculo. Præfectusque secus lectulum ubi iacebat, ait defuncto: Surge frater;*

Et da mihi osculum. Qui protinus surgens osculatus est senem. Tum dixit senex: Dormi iam, quousque veniat Christus filius Dei. Et resuscitet te.

Fuit igitur, dum charitas feruebat, osculum inter Christianos commune symbolum & pignus mutuæ dilectionis & pacis: sed præcipuè in Festo Paschæ, quo erat communicandum corpori & sanguini Domini, qui est pax nostra: vt, odiis & simultatibus positis, animi inuicem reconciliarentur; &, vt loquitur Augustinus, corde ad cor accedente, omnes vnum fierent corpus, qui omnes de vno pane & de vno calice erant participaturi. Hoc discrimen est inter exempla superius proposita, quod in Senonensi soli Christo in sanctissimo Sacramento osculum datur: in Græco & Andegauensi, fratres oscula vicissim inter se accipiunt redduntque. Apud Græcos tamen est aliquid quod videri possint, Senonenses in ritu suo æmulari voluisse. Nam singulis diebus hebdomadæ Paschalis, quam illi vocant *τὴν διακαιήμερον*, id est, *hebdomadam renouationis*, in conuentu Ecclesiæ, Cellarites sanctissimum Christi corpus paulum è patena sublatum populo ostentat, dicens, *Christus surrexit*: deinde post-

quam responsum est à Choro, *Verè surrexit*, producit cum Sacramento signum crucis, dicens, *Veneremur ipsius triduanam Resurrectionem*: Clerus verò ter canit, *Christus resurrexit*: & omnes osculantur Sacramentum, ter repetendo eundem Versum, *Christus resurrexit*. Sed probabilius est, Senonenses in prostratione illa sua coram sanctissimo Sacramento, & adoratione osculi, exprimere voluisse id quod de mulieribus scriptum est à S. Matthæo c. 28. *Et exierunt citò de monumento, cum timore & gaudio magno, currentes nuntiare discipulis eius. Et ecce Iesus occurrit illis, dicens: Aue. Illæ autem accesserunt, & tenuerunt pedes eius, & adorauerunt eum. Tenuerunt pedes eius, & adorauerunt eum*: id est, pedibus Domini aduolutæ, eum deueneratæ sunt. Et voluisse Mariam Magdalenam in illa adoratione Saluatoris pedes eius amplecti & deosculari, conijcere est ex capite 20. S. Ioannis, vbi cum illa Dominum prope monumentum apparentem ex affatu agnouisset, & præ gaudio quasi in amplexum eius irrueret, impetum amoris mulierculæ repressit Dominus, dicens, *Noli me tangere*. Fuisse autem in more apud Iudæos, vt mulieres ad pedes eorum acciderent, quos

venerari & adprecari vellent, ipsosque pedes apprehenderent; patet, tum ex c. 4. lib. 4. Regum, ubi vidua Sunamitis, salutans Elizam, *apprehendit pedes eius*: tum etiam ex c. 7. Lucæ, ubi eadem Maria stans retrò secus pedes Domini, eos osculabatur. In Ecclesia Andegauensi servatur hoc in ritu ordo præcepti charitatis, quæ Deum primò, ut præcipuum obiectum, respicit; deinde ad proximum extenditur, quem propter Deum debemus diligere. Itaque, sicut in Missæ sacrificio Sacerdos, priusquam populo religiosæ salutationis officium impertiat, Christum Dominum Altaris osculo venerari solet, ei que summi amoris sponsonem obsignare: ita hîc, priusquam pacis & reconciliationis osculum inter fratres diuidatur, ab osculo Altaris, id est, Christi, sumitur initium: ut intelligant omnes, mutui amoris legem sibi ab amore Dei esse accipiendam. Et additur osculis communicatio thuris sacerdotali benedictione sanctificati: ut indicetur, omnem dilectionis Christianæ fructum & suauitatem à Dei benedictione proficisci; & efficacissimam conciliandorum inter se animorum illecebram esse, ut quisque proximo suo gratum benignæ & officiosæ conuer-

fationis odorem affundat, eúmque salutaribus exemplis in spiritu ædificet.

De Processione matutina ante Missam, in die Paschæ.

CAPVT XV.

IN Officio diei Paschæ, præter annuntiationem Resurrectionis è monumento, de qua egimus capite superiori, duplex est alia processio: altera matutina, altera vespertina.

Matutina, iuxta Ordinem Romanum, celebratur post Tertiam, ante Missam, in memoriam profectiois sanctarum mulierum ad monumentum, & à monumento ad Apostolos congregatos in Ierusalem, ut eis, iuxta Angeli mandatum, denuntiarent Dominum resurrexisse, & in Galilæam præcessurum, ut illuc pergentes eius viventis aspectu & alloquio fruerentur. Quare in ea processione cantatur Responsorium, *Cum transisset Sabbatum*, quod rei gestæ historiam continet ex S. Marco. De hac processione sic Ordo Romanus. *Die sancto Paschæ, induiti solen-*

nissimis vestimentis omnes Clerici, conuenientes ad stationem ad sanctam Mariam maiorem, primitus cantent Tertiam. Qua finita, respersi aqua sancta, qua pridie collecta est de Fonte, tam ipsi quam & omnis populus, procedunt cum omni decore, cum crucibus & thymiamaterijs, praecedentibus etiam sanctis Euangelijs, cantantes Antiphonas processionales, &c. De mysterio autem eiusdem processionis, Rupertus lib. 7. de diuin. Offic. c. 20. & 21. in hæc verba. Cum crucibus & vexillis, qua sunt insignia victoriae Christi, omnes albat, & exultantes in laude Resurrectionis sanctæ, procedimus cum tanta populi expectatione sexus utriusque, maiorum pariter & minorum, ut corporaliter quoque illud propheticum in nobis impleri videatur, Cum iucunditate exhibitis, & cum gaudio deducemini: nam & montes & colles exilient, expectantes vos cum gaudio. Vt autem processio ageretur, ex mystica Euangelij auctoritate tractum est, scilicet ex eo quod Angeli mulieribus præcipiunt, dicentes, Ite, dicite discipulis & Petro, quia præcedet vos in Galileam: & ipse Dominus, occurrens illis exeuntibus à monumento, cum tenuissent pedes eius, & adorassent eum, Ite, inquit, nuntiate fratribus meis ut eant in Galileam, ibi

me videbunt. Et c. 24. Sicque fit, ut tota hæc processio nihil aliud quàm gratiarum actio sit: eo quòd resurgens Dominus, statim memor nostri, qui vivamus absque Deo, discipulos suos in Galilæam ad hoc consilium evocavit, ut baptizarentur in nomine Patris & Filij & Spiritus sancti. Unde locum quoque, quo suprema statione (extra Ecclesiam) processionem terminamus, nos Galilæam nominamus.

Iuxta Ordinem Romanum statio est ad sanctam Mariam maiorem, & imitatione Ecclesiæ Romanæ in multis Ecclesiis processio hæc matutina vadit primò ad Altare seu Oratorium Sanctæ Mariæ: quòd ei credatur Christus ante omnes apparuisse, sicut scribit S. Ambrosius lib. 3. de Virginibus: *Vidit, inquit, Maria resurrectionem Domini, & prima vidit, & credidit*: quanquam nonnulli contendunt, non de Maria Deipara, sed de altera Maria, quæ cum Maria Magdalena iuit ad monumentum, hæc Ambrosij verba esse intelligenda. Sed Græci id disertè profitentur in Pentecostario hac die: *χρὶ πρῶτον μὲν ἡ ἀνάστασις τῇ τῷ θεῷ μητρὶ γνωσθεὶς γίνεται*, id est, & primùm resurrectio Dei matri manifestatur. Hoc mystrium egregiè observavit idem Rupertus

eiusdem libri c. 25. Quid, inquit, *Euangelica fidei conuenientius Christiana sedulitas comminisci potuit? quid pulchrius, quid venerabilius, quàm congratulari Matri Virgini super resurrectione Unigeniti iam non morituri, in cuius passione gladius animam eius pertransiuit? Perpendere gessit Christiana deuotio, quantus torrens gaudij repente inundans, locumque vulneris replens, animam eius ferro doloris confossam inebriauit, cùm rediit filius illi, ante omnes fortasse mortales, materno Virginem non defraudans honore, victoriam suam annuntiquit, & dalia carnis suæ vulnera, quam illa veram de carne sua carnem conceptam peperit, deosculanda præbuit. Et paulò inferiùs: Igitur pulchrè & laudabiliter traditum est à nostris maioribus, ut in hodierna, cunctisque per annum Dominicalibus processionibus, Beate Deigenitricis memoriam primæ statione visitemus, eandem ob causam, quæ in hodiernæ Missæ Officio statio ad Sanctam Mariam præscribitur; ut eam principio lætitiæ nostræ proponamus. Quibus similia scribit Durandus lib. 4. Rational. c. 6. Hæc causa est cur tam frequenter in hoc Festo, & toto tempore Paschali, canctetur Antiphona, Regina celi.*

In reditu processionis statio fit ante

Crucifixum, cantando Responsorium, *Sedit Angelus*, iuxta eundem Ordinem Romanum, & Durandum. Cuius rei rationem ita explicat idem Rupertus eodem c. 24. *Huius diei statio, qua processio terminanda est, in medio templi splendide ordinata, rem ipsam, de qua dictum est, pulchrè commendat, dum sacer Ecclesie Chorus totus festivus, sexus utriusque populo circumstante, totis viribus in vocem exultationis & solutis feliciter erumpit, cantando Antiphonam, Sedit Angelus ad sepulcrum Domini. Hæc enim Antiphona rem ipsam patenter exprimit, quam perdocere omnes gentes iussi sunt Apostoli, scilicet quòd Deus homo factus mortem nostram moriendo devicit, & vitam nobis resurgendo reparavit: Et statim. Hæc statio nobis illud festivo concentu commemorat, quòd in Galilæa iussi à Creatore suo cæli enarrauerunt gloriam Dei, gloriam Resurrectionis Christi, sicut legimus, quia virtute magna reddebant Apostoli testimonium Resurrectionis Iesu Christi Domini nostri. Apostolos autem prædicantes mundo gloriam resurrectionis in hac statione repræsentant in Ecclesia Andegavensi seni Sacerdotes, qui progressi ante Crucifixum cantant versum, Crucifixus in carne laudate, &c. Quod*

ideo (ait eodem loco Rupertus) totis viribus est concinendum, & toto corde, totoque ore, in auditu populorum circumstantium efferendum; quia in omnem terram exiuit sonus eorum, & in fines orbis terræ verba eorum.

Huic processioni præmittitur lustralis aspersio, in memoriam Baptismi, quo primum expiari oportet eos qui accedunt ad Deum, *asperfos corda à conscientia mala, & ablutos corpus aqua munda*, vt loquitur Paulus Hebr. 10. Vnde in ea adhibetur aqua, non vulgari benedictione sanctificata, sed hausta ex Fonte baptismali; & canitur Antiphona, *Vidi aquam egredientem de templo à latere dextro*, ex Ezechiel. c. 47. significans Baptismi Sacramentum ex latere Christi ad salutem hominum emanasse.

Processiones quæ fiunt in Ferijs Paschalibus, pertinent ad idem mysterium Resurrectionis Domini, & profectionis in Galilæam.

*De Processione ad Fontes,
in Vesperis Paschæ.*

CAPVT XVI.

EX antiquo Ecclesiæ Romanæ usu habemus, vt hac die, & consequentibus diebus vsque ad Sabbatum, Vesperarum Officium in tres partes diuidamus, & tribus duntaxat Psalmis in Choro decantatis, cum Graduali, Versu, *Alleluia*, & melodiâ seu Prosa, completa Oratione post, *Magnificat*, procedamus ad Fontes, reliquos Psalmos cantaturi. Ita enim habent, Ordo Romanus in Officio huius diei, Alcuinus lib. de diuin. Offic. Amalarius lib. de ordine Antiphonarj c. 52. Rupertus lib. 8. c. 2. Honorius in Gemma animæ, lib. 3. c. 129. & Durandus in Rationali, lib. 6. c. 89. Et hæc est processio vespertina Paschæ, quam idem Rupertus, eodem libro, c. 3. dicit esse *Pontificalem, & ad Pastores plebium pertinentem*, qui scilicet habent baptismales Ecclesias. Cuius processionis hæc ratio est, ex eodem Ruperto: quod, cum in vespera

Sabbati Paschalis (Officium enim eius ad noctem sequentem pertinet, vt supra notatum est, ideoque vespertinum dicitur) Baptisma solenni ritu celebratum fuerit, eadem hora per totam hebdomadam, qua solennitas Paschalis agitur, Ecclesia festiuam regenerationis iucunditatem eodem ordine progressionis continuandam censuit. Festiua autem hæc celebritas composita est ad imitationem triumphi Israëlitarum post transitum maris rubri. Quemadmodum enim, Exodi c. 15. Mose & Maria eius sorore præcuntibus, Israëlita vtriusque sexus diuisis choris, in litore maris carmen illud triumphale, *Cantemus Domino*, liberatori suo, in gratiarum actionem, tripudiantes & tympana pulsantes, cecinerunt: ita hîc Ecclesiastici chori, cum agmine puerorum pridie baptizatorum, seu Catechumenorum albis vestibus indutorum, & cereos ardentes gestantium, ad Fontem aquæ baptismalis procedunt, laudantes Deum de educatione sua ex abyssis peccati & mortis, & alternis modulationibus concinentes Psalmum, *Laudate pueri Dominum*, & illum alium, *In exitu Israël de Ægypto*, in quo admirabilis ille transitus maris describitur: quem

etiam Amalarius loco citato tradit in Romana Ecclesia sæpius repeti, propter multiplicia Altaria illius loci ad quæ illa die fit statio. Atque, vt Israëlita Deum in columna nubis venerabantur; ita hi Christum liberatorem suum, & spiritualis resurrectionis auctorem, in Cerei columna representatum, adorant, & hymnis suis celebrant. Ea de causa Cereus Paschalis quotidie in processione hac præfertur, quasi dux itineris & sanctæ peregrinationis ad terram promissionis, id est, beatitudinem, vt notauit Alcuinus libro de diuin. Offic. c. de Sabbato in albis: *Octo dies neophytorum* (inquit) *cursum præsentis vitæ monstrant. Sicut enim Hebraicus ille populus, transito mari rubro, columna ignis sibi præcedente noctu, per omne iter in terram repromissionis triumphans de hostibus introijt: ita nostri baptizati, extinctis peccatis præteritis, ducuntur quotidie ad Ecclesiam, columna Cerei illuminata præcedente eos. Vnde intelligitur, ad nullos alios vsus in quibuslibet locis eam debere accendi, nisi in recordatione luminis Spiritus Sancti, dum itur ad Ecclesiam.* Et similiter Amalarius lib. 1. de Ecclesiast. offic. c. 33. *Octo dies neophytorum cursum præsentis vitæ monstrant. Sicut enim iter filiorum Israël, post-*

quàm transferunt mare rubrum, usque ad terram repromissionis, significat omnem cursum presentis vitæ: ita & conuersatio neophytorum omnem cursum presentis vitæ; in quo nos oportet secundum Resurrectionem Christi viuere: de quo cursu dicit Augustinus in libro contra Faustum duodecimo: Rubet in mari rubro Baptismus, utique Christi sanguine consecratus; hostes sequentes à tergo moriuntur; peccata præterita; ducitur populus per desertum: baptizati omnes nondum perfruuntur promissa patria, sed quod non vident sperando, & per patientiam expectando, tamquam in deserto sunt: & illic laboriosa & periculosa tentationes, ne reuertantur corde in Ægyptum: nec ibi tamen Christus deserit, nam & illa columna non recedit. Secundum hæc verba baptizati nostri ducuntur quotidie ad Ecclesiam. Columna Cerei illuminata præcedens eos, illuminata est iam: quia in corpus Christi traiectione sunt baptizati, Spiritus Christi illuminat membra Christi. Et quidem conijcimus ex S. Ambrosio morem olim Ecclesiæ fuisse, ut parentes neophytorum filios suos in hac processione prosequerentur: quo fiebat ut longus esset ordo pompæ procedentis. Sic enim ille libro de mysterio Paschæ, c. 5. *Hinc casti*

patres, pudicæ matres, nouellam per fidem stirpem prosequuntur innumeram: hinc sub fidei arbore, ubi uero fontis innocui, cereorum splendet ornatus. De festiuius autem cantibus ad Fontem, ita Rupertus eodem libro, c. 2. Dicta Oratione, proceditur ad Fontes, cum Psalmo, Laudate pueri Dominum: & statim: Admonitio namque diuine laudis est ad pueros, id est, novos Ecclesie filios, qui per baptismum pueri, id est, puri facti sunt à uitijs: & paucis interiectis: Vnde nunc apud Fontes Ecclesia mater iubilans exultat, in laudem eius gratiæ, per quam meruit esse fons hortorum, puteus aquarum uiuentium. Quemadmodum verò Ecclesia quotidie per Octauam Paschæ pro baptizatis orat in processione ad Fontes; ita quotidie pro ijs commemorationem facit in Canone Missæ ad, Hanc igitur: imò in Ordine Ambrosiano quotidie habetur propria Missa pro baptizatis per totam hebdomadam.

Quòd autem in hac processione Diaconus & Subdiaconus post Cereum Paschalem incedunt, gestantes manibus ampullas Chrisinatis & Olei sancti, id pertinet ad renouandam fidelibus memoriàm causæ sanctificationis, quæ influxit in aquam ex infusione gratiæ

Chriſti per Spiritum Sanctum , in admixtione Chriſmatis & Olei Catechumenorum : vela autem candida , quæ à capite geſtantium in ampullas porriguntur , ſunt ſindones illæ de albo ſerico ; quibus Ordo Romanus præſcribit obtegi & inuolui eaſdem ampullas , quando offeruntur in die Cœnæ Domini, & earum partem reiſci in humerum ſiniſtrum , vt inde pertingant ad dextrum humerum ; & circumuolutæ ac dependentes poſſint retineri. Spectat etiam id ad myſterium Reſurrectionis , & ſignificat deuotionem piarum mulierum ; quæ cum aromatibus ad monumentum Domini venerunt , vt eius corpus more gentis vngerent.

In reditu huius proceſſionis , iuxta Ordinem Romanum, ſtatio fit ante Crucifixum , cantando Reſponſorium, *Chriſtus reſurgens ex mortuis* : & ita Officij ſolennitas terminatur publica profeſſione fidei de veritate Reſurrectionis Chriſti, inſultando Iudæorum incredulitati; & eos inuitando ad euindem, vt verè viuentem, adorandum cum Eccleſia; quod officium, vt in matutina ſtatione , apud nos præſtant ſelecti è Choro ſeni Sacerdotes , progreſſi in primam aciem. Et hæc

hac est tertia pars Vesperarum Paschali-
um, iuxta diuisionem Radulphi Tun-
grensis, in libro de Canonum obseruan-
tia, propos. 16. qui dicit B. Gregorium
ita ordinasse Vesperas huius hebdomade.
Certè in eius Sacramentario hac die &
reliquis per Cetauam, prater feriam sex-
tam & Sabbatum, ponuntur in Officio
vespertino tres Orationes: prima ad Ves-
peras, secunda ad Fontes, tertia ad san-
ctum Andream (vbi scilicet fit vltima sta-
tio) in feria autem sexta & Sabbato sunt
tantum duæ, altera ad Vesperos, altera
ad Fontes.

*De Processione ante Officium, in die
Paschæ, & alijs solennioribus
Festis.*

CAPVT XVII.

IN Ordine Romano, summo Pontifice
Irem diuinam faciente in die Paschæ,
hoc ritu proceditur ad Officium cele-
brandum. Primo manè omnis Clerus &
populus conuenit in Ecclesiam Patriar-
chalem S. Ioannis Lateranensis, exceptis

O

officialibus miniſtris, qui in obſequio Pontificis comitantur pro Pontificali dignitate, & illic expectant Pontificem. Eo autem accedente, Acolythi & Defensores regionis illius cuius dies fuerit ad officium in obſequio, ex Eccleſia exeunt, & progreſſi ad locum ſtatutum, cum Presbytero & Mansionario tituli ubi ſtatio fuerit, thymiamateria deferentibus; ibi opperiantur, & aduenientem excipiunt, inclinato capite thus in obſequium adolentes. Tum verò, petita & accepta benedictione, omnibus in vnum coeuntibus, diuiſis hinc inde partibus, ſuo quiſque ordine, per turmas præcedunt Pontificem ad Eccleſiam Sanctæ Mariæ maioris, in qua ſtatio eſt, & ibi Miſſa celebratur. Similiter fit in aliis diebus ſolennibus, mutando Eccleſias pro diuerſitate ſtationum: & huius rei exemplum habes apud Anaſtaſium Bibliothecarium in Vita Leonis tertij, ubi *Collektam* vocat congregationem Cleri ac populi in Eccleſiam è qua proceſſura eſt ſupplicatio: vnde Orationes dictæ ſunt *Collektæ*, quæ ſuper collectum populum dicuntur in publico Eccleſiæ conuentu. Qua de re ſic Micrologus libro de Eccleſiaſt. obſervat.

c.3. *Illæ tamen Orationes ſpecialiùs Colle-*

Et vocari videntur, quæ apud Romanos super Collectam populi fiunt, dum colligitur, ut procedat de una Ecclesia in aliam, ad stationem faciendam: ut in capite Ieiunij illa Oratio, Concede quasumus, apud Sanctam Anastasiam supra Collectam populi dicitur, qui stationem apud Sanctam Sabina celebraturus est. Idem scribunt, Radulphus Tungrensis libro de Canonum obseruantia, propof. 23. & Durandus Rational. libro 4. c. 15.

Ex hoc fonte originem sumpsit antiqua institutio Ecclesiæ Andegauensis, in qua eodem die Paschæ, Episcopo celebrante Officium, signo ad Tertiam dato, vniuersus eiusdem Clerus, cum cappis sericis & omni alio splendidiore apparatu, solenni ordine procedit ad Capellam curatam S. Mauritiij, præeuntibus Presbyteris Cardinalibus tredecim, id est, Rectoribus Ecclesiarum parochialium urbanarum & suburbanarum cis Medunam, & septem Diaconis, totidemque Subdiaconis, ac septem cereis prælucen-
tibus; & in aditu dictæ Capellæ expectat, donec se Episcopus vestibibus Pontificalibus induerit: Quo facto, eodem ordine rediens deducit Episcopum in Chorum ad celebrandum Officium, duobus pueris

symphoniacis, alba & tunica indutis, eum antegredientibus cum cercis accensis, & cantantibus Hymnum Paschalem; Clero autem alternis respondente Versum intercalarem, *Salve festa dies*: adeo ut canentibus pueris subsistat processio, respondente autem Choro progrediatur. Qui ritus processionis similiter observatur in Natiuitate Domini, & Festo Sancti Mauritij.

Manè autem ad Matutinum, & post meridiem ad Vesperas eiusdem Festi Pascha, insonante classico, processio fit in palatium Episcopale, vbi expectat Episcopus in loco qui aula Cleri dicitur, ornatu pontificali indutus, cum mitra & baculo pastoralis, consistentibus ante eum duobus pueris symphoniacis, solenni cultu ornatis, cum candelabris argenteis & cereis ardentibus. In ingressu salute ab omnibus data, & facta reuerentia, deducitur Episcopus in Chorum ad celebrandum diuinum Officium, eodem ordine quo supra: nisi quòd canentibus pueris fit progressio, respondente autem Choro statio. Sed in vespertina processione, confidente Clero in aula Episcopali, offertur singulis potus de triplici vino, albo, heluo, & rubro, quasi libamen charitatis

& vnanimitatis, & lætitiæ Paschalis sym-
bo u . . . Quæ bibendi consuetudo, neque
temere introducta, neque ex licentia nata
est, sed ex antiquiore disciplina sanctæ
Romanæ Ecclesiæ simul cum aliis festiuæ
solennitatis ritibus deriuata. Sic enim
scribit Ordo Romanus in descriptione
Vespertini Officij Festi Paschæ. *Deinde*
(scilicet peracta Statione ante Crucifi-
xum cum Responsorio, Christus resur-
gens) descendunt primates Ecclesiæ ad Accu-
bita, inuitante Notario Vicedomini: &
bibunt ter, de Graco primò, de Passi se-
cundò, de Proconia tertio. Postquàm bibe-
rint omnes, Presbyteri & Acolythi per singu-
los titulos, redeunt ad faciendos Vesperos,
secundos nempe : quia Romani eo die
antiquitus duplices Vesperas celebra-
bant ; alteras eo more quo nostras faci-
mus in Choro & ad Fontes ; alteras bre-
uiore, vt habetur in eodem Ordine Ro-
mano. Neque verò hic combibendi seu
conuiuandi ritus caret mysterio. Habet
enim rationem antiquæ Agapes, quæ fie-
bat post communionem sacram, & signi-
ficat conuictum Christi cum discipulis
post resurrectionem, de quo in hunc mo-
dum scribit Venerabilis Beda in Homilits
æstiuilibus de tempore, Homilia in Euan-

gelium, Cùm venerit *Paraclesus*. Quid enim, inquit, fratres mei, quid sibi vult horum coniunctio verborum, qua dicitur, *Apparens eis, & loquens de regno Dei, & conuescens; nisi quia patenter ostenditur, quòd ob hoc maxime conuictui sociabatur eorum, cùm de regno Dei loqueretur, ut terrenas inter eos epulas sumens, quibus cœleste corpus monstrabat, arctius eos vinculis suæ charitatis obligaret; atque illius temporis memoria roboraret, de quo eis ante passionem suam promittendo prædixerat, Et ego dispono vobis, sicut disposuit mihi pater meus, regnum, ut edatis & bibatis super mensam meam in regno meo. Merito ergo sacrosanctis diebus his nos quoque maioribus epulis atque hymnis cœlestibus vacamus, ob reuerentiam nimirum *Dominicæ Resurrectionis*, ob memoriam *Dominici conuictus cum discipulis, simul ob spem futuræ nostræ quietis ac viæ immortalis*. Quòd verò hîc dicit *Beda*, maioribus epulis, intelligendum est, tum respectu Ieiunij *Quadragesimalis*, quo soluti Christiani hilarius se excipiunt, ad significandam lætitiâ communem de *Resurrectione Christi*; vnde more antiquo *Ecclesiæ* ieiunium non indicitur toto tempore *Paschali*: tum etiam ratione habita *priscae Agâpes*, cui hodie-*

num Paschale conuiuium successit, in qua mensæ splendidius instruebantur, & festo cultu, ut pauperes quibus præcipuè alendis & subleuandis eæ apparabantur, honoratiùs & liberaliùs exciperentur. Sic Agapes Christianæ sumptus interpreta- tur Tertullianus in Apologetico, c. 39. *Cæna*, inquit, *nostra de nomine rationem suam ostendit. Vocatur ἀγάπη, id quod dilectio penes Græcos est. Quantiscumque sumptibus constet, lucrum est pietatis nomine facere sumptum.*

Cæterum *Vicedominus* in superiore textu Ordinis Romani intelligendus est Maior domus, nempe Sacerdos præfectus administrationi domus pontificalis Patriarchij Lateranensis, in cuius Ecclesia die festo Paschæ celebrari solet Vespertinum Officium: vnde & *Vicedominium*,¹ ea pars ædium Pontificiarum in qua habitabat Vicedominus, ut docet Onuphrius Panuinius in libello de interpretatione vocum Ecclesiasticarum.

Accubitorum autem nomine intelligitur cœnatio, seu locus in quo fieri solent conuiuia: quale illud fuit Accubitorium, quod Anastasius Bibliothecarius in Leone quarto scribit à Leone tertio ædificatum, ab ipso Leone quarto instaura-

ratum fuiſſe, in quo Pontifices diebus ſolennibus cum Clero ſuo epulabantur: quale illud etiam celeberrimum in aula Conſtantinopolitana, quod vocabatur *Nouemdecim accubita*, vt legere eſt apud Luitprandum lib. 6. Hiſtoriæ, c. 3. & Codinum libro de Originibus Conſtantinopolitanis, vel tribunal decem & nouem accubituum, vt apud Paulum Diaconum Hiſtoriæ Miſcellæ libro 21: *quoniam quidem* (ait Luitprandus) *nouemdecim menſæ, in ea quæ ſecundum carnem eſt Domini noſtri Ieſu Chriſti Natiuitate, apponuntur, in quibus Imperator pariter & conuiue, non ſedendo, vt cæteris diebus, ſed recumbendo epulantur: quibus in diebus, non argenteis, ſed tantum aureis vaſis, miniſtratur.* Cauſa appellationis iſtius deducta eſt ex more veterum, qui, non ſedentes, vt nos, ſed in lectis decumbentes, conuiuabantur. Cui modò diſcumbendi vſui erant lecti, vel diuerſi & ſeparati, vt in tricliniis, quæ à ternis lectis dicta ſunt; vel perpetui & ampliores, in quibus plures ſimul cubabant: & hoc poſterius genus *Accubita* nominauerant. Quæ appellatio etiam ad Græcos translata eſt, vt conſtat ex aula Nouemdecim accubitorum, ſuprà, & ex canonibus 74. Concilij Trullani, & 28.

Laodicensi, qui prohibent *feri in Ecclesijs Agapas*, vel *ad edendum accubita sternis*, ac similiter ex Commentariis Balsamoni & Zonaræ in eisdem canones; ubi Zonaras, & Ioannes Citrius in Responsis ad Constantinum Cabasilam, libro 5. Iuris Græco Romani, scribunt, *Accubita* dici omne genus strati mollis, quod à terra tollitur. A lectis igitur conuiuialibus, locus ipse, in quo conuiuia Pontificalia celebrantur, apud Anastasium *Accubita* dicitur.

De Processionibus Dominicalibus, & ijs quæ fiunt in Festis.

CAPVT XVIII.

SANCTUS Ambrosius Serm. 60. de tempore Paschali loquens, *Itaut* (inquit) *hoc omni tempore neque ad obseruandum indicamus ieiunia, neque ad exorandum Deum genibus succedamus: sed, sicut Dominica solemus facere, erecti & feriatî Resurrectionem Domini celebramus. Dominica enim nobis ideo venerabilis est atque solennis, quia in ea Saluator, velut sol oriens,*

*diſcuſſiſi infernorum tenebris, luce Reſurre-
ctionis emicuit: ac propterea ipſa dies ab
hominibus ſæculi dies Solis vocatur, quòd
ortus eam ſol iuſtitie Chriſtus illuminet.
Ereſti, dicit; quia die Dominica in Eccle-
ſia genua flectere ad preces publicas non
licet, ſed ſtando oportet fidem Reſurre-
ctionis profiteri. Qui ritus (vt eſt apud S.
Iuſtinum Martyrem in Reſp. ad quæſt.
115. Orthodox.) ſignificationem habet
reſurrectionis noſtræ, qua, virtute gra-
tiæ Chriſti, & à peccatis, & à morte, quæ
in ipſis interfecta eſt, liberati ſumus.
Vnde noctis Paſchalis ſolemnitas à Gre-
gorio Nazianzeno *σεβάσμιος ἑορτή*, *ve-
neranda ſtatio* appellatur, Oratione 19.*

Vt igitur dies Dominica à Paſchali ſo-
lemnitate propagata eſt, & inſtituta ad re-
nouandam per ſingulas hebdomadas me-
moriam Reſurrectionis Domini: ita pro-
ceſſio, quæ fit in Dominica ante celebra-
tionem Miſſæ, pertinet ad idem myſte-
rium quod in proceſſione matutina Paſ-
chæ diximus celebrari; vt ſcilicet Ieſum
quæramus cum mulieribus, eum cum
Apoſtolis ſequamur præcedentem in Ga-
lilæam, id eſt, in mutationem vitæ; atque
vt eum cognitum adoremus & reueræ-
mur, velut auctorem ſalutis noſtræ. Ita

enim Rupertus lib. 5. de diuin. offic. c. 8. *Singulis Dominicis à prima Sabbati, quæ Dominus resurrexit, dediatis, hoc nobis processions ordine significamus, quòd in Galilæam, id est, in transmigrationem, ad videndum Dominum cum Apostolis eius exire debeamus: scilicet, ut non simus vetusti homines, quod facimus, sed in nouitate vitæ ambulemus.* Et ad huius mysterij rationem pertinet consuetudo quæ in Ecclesiis quibusdam inueterauit, ut Sacerdos celebrans, qui personam Domini in Officio gerit, reliquum Clerum in processione antecedit, quasi Christus in Galilæam Apostolos præcurrens, iuxta id quod ipse Apostolis ante mortem promiserat, Matth. 26. & Marci 14. & post mortem mulieribus denuntiauerat, Matth. 28. & Angelus ijsdem prædixerat Matth. 28. & Marci 16. Hunc enim ritum ita interpretantur idem Rupertus lib. 7. c. 24. & Durandus Rational lib. 6. c. 88. Atque hanc Resurrectionis commemorationem, ita ad Dominicarum Officium pertinere scribit idem Rupertus lib. 5. c. 8. ut, quia processio Palmarum spectat ad recolendam Redemptoris nostri passionem, ne singulis mysteriis sua veneratio non reddatur, dicat quasdam Ecclesias in more ha-

bere, vt in Dominica Palmarum duplicem processionem obeant; alteram ante Tertiam, in memoriam Resurrectionis; alteram post Tertiam cum palmis, ad recolendum Dominicæ Passionis Sacramentum. Atque hæc causa est, cur idem in processione Dominicali ritus seruetur, qui in Paschali, vt obseruauit idem Rupertus lib. 7. c. 19. Nam & inchoatur ab aspersione aquæ benedictæ, & procedit ordine simili, & terminatur statione ante Crucifixum.

Quia verò Pascha est dies illa quam fecit Dominus, & (vt scribit S. Hieronymus Marci 16.) *primatum in diebus tenet*, est dies dierum, & festiuitas festiuitatum; ideo ab eius ordine & solennitate, non tantum Dominicæ, sed etiam cætera Festa, suum ordinem, suum cultum, suos ritus ac cæremonias, per quamdam imitationem mutuantur. Vnde, ad maiorem celebritatem, in iis quæ sunt solennia fit lustralis aspersio aquæ benedictæ, fit processio, & statio, & alia eiusmodi, sicut in Pascha & Dominica: de quo ritu habetur in Concilio Nannetensi, in Ordine Romano c. *Qualiter agatur*, &c. & Capitularium lib. 5. c. 120.

De Stationibus.

CAPVT XIX.

STationis nomen varium habet vsum
Sin rebus Ecclesiasticis. Apud Ter-
tullianum & primæ ætatis scriptores, ac-
cipitur pro conuentu Christianorum ad
templa, seu ad cœmeteria & sepulchra
Martyrum, vbi per diem stabant in ora-
tione & ieiunio perseverantes, donec
sumpta Eucharistia dimitterentur. Nam,
quod Cyprianus epistola 41. *Stationem*
vocat, idem ipsum epistola sequenti ap-
pellat, *religiosum fratrum conuentum, confi-*
dentibus Dei Sacerdotibus, & altari posito.
Qua in re standi verbum vsurpatum est,
non quòd perpetuò in pedes erecti ora-
rent, quod Græci dicunt ὀρθοστάτω, &
seruatur in Festo B. Mariæ quod vocant
Ἀκαθίστη, quia in eo sedere non licet,
(tum enim de geniculis etiam adorare
mos erat) sed pro eo quod est ad tempus
in loco aliquo assiduè manere: qua ratio-
ne apud Græcos Vigilia Festi appellatur
παρὰ μὲν, quasi *constans permanſio ad ora-*

tionem. Huius autem generis Stationibus dicata erant duæ feriæ, quarta & ſexta, vt teſtatur Tertullianus lib. de ieiuniis contra Pſychicos, c. 14: vnde manarunt ſtata illæ proceſſiones, quæ per Quadrageſimam ſingulis feriis quartis & ſextis ab Eccleſiis Cathedralibus & Collegiatis fieri conſueverunt.

Ex eo ritu poſtea in uſum introductum eſt, vt omnes publici conuentus ad orationem, qui ſtatis diebus, ſeu ferialibus & profectis, ſeu feſtiuis ac ſolennibus, ex ordine Pontificum fierent, Stationes nominarentur: quæ iam communis appellatio eſt in Eccleſia Romana. Vnde ab Innocentio tertio lib. 2. de Officio Miſſæ, c. 2. *ſtationalis ſolennitas* dicitur, dies cui ſolennis Statio assignata eſt: quo modo & *ſtationales Eccleſiæ* vulgò, in quibus habentur eiufmodi Stationes; & Diaconi, Subdiaconi, & Acolythi *ſtationarij*, in Ordine Romano, qui in ſua quique regione Stationibus inferuiunt: & in libro Pontificali in vita Hilari Papæ, *ſcyphus ſtationarius*, calix quidam aureus anſatus, ponderis octo librarum, qui ab eodem Hilario datus eſt in uſum Stationũ: ac ſimiliter in vita Hormiſdæ ſcyphi ſex ſtationales argentei. Et de hoc genere Stationum

intelligendum est quod diximus c. i. processionem ad Stationem pertinere.

Deriuatum quoque est id nomen ad significanda ea loca ad quæ pergunt processiones, & in quibus consistunt orandi causâ (cuiusmodi est statio crucis in die Palmarum, & ea quam suprà diximus in die Paschæ appellari Galilæam) ac simili modo ad significandam orationem & hymnodiam quæ in iis locis fit. Quæ denominatio etiam manauit ad pausationes illas seu mansiones quæ fieri solent in cursu processionum, quando ad aliquas Ecclesias, ædículas, altaria, & loca sancta, ex itinere subsistitur; sicuti in processione sanctissimi Sacramenti ad tabernacula & repausatoria passim per vicos & plateas constituta, & in Rogationibus, quibus ad diuersas Ecclesias fit supplicatio.

Postremò eo nomine vltimur ad significandum eum ritum, quo ad imaginem Crucifixi in medio Ecclesiæ positam procedimus, & in conspectu eius stantes, ipso standi actu profitemur, Redemptorem nostrum, qui in cruce mortuus fuerat, propria virtute reuixisse, & nos sperare, per eius passionis merita, tandem aliquando esse in vitam & statum immortalitatis resurrekturos. Atque hæc Statio propriè

pertinet ad solennitatem Paschæ, & ad Officiū Dominicarum, in quibus Resurrectionis memoria celebratur: vnde per Quadragesimam omittitur, quo tempore repræsentatur status hominis sedentis in tenebris & vmbra mortis. Nam quæ sit Dominica i. Quadragesimæ, instituta est tantum quasi via procedendi ad velationem Crucifixi.

Per imitationem tamen idem ritus ad Festa quædam, & insignes aliquo mysterio dies, deriuatus est; vt in matutinis processionibus Festorum solennium; in Vesperis Inuentionis & Exaltationis sanctæ Crucis, & octo dierum ante Natalem Domini, in quibus Antiphonæ maiores, *O O*, solenniter cantantur ante Crucifixum, repræsentando Patrum veteris Testamenti, & Prophetarum desideria, qui expectantes beatam spem & aduentum Domini, & quasi per fidem intendentes oculos in auctorem salutis & consummatorem Christum, eum assiduis vocibus inclamant, & compellant vt veniat, & iam nolit tardare. Recte enim obseruauit Micrologus, c. 32. explicans rationem Historiæ, *Clama*, & Antiphonarum singulare, quæ vsurpantur diebus proximis ante Natiuitatem, pro mysterij instantis grauitate factum.

Etum esse, *ut proxima hebdomada ante Natiuitatem Domini, sicut & ante Pascha, tanto plus in officijs habeat, quanto vicinior Dominica solennitati existit.* In Officio quidem Romano septem tantum Antiphonarum ad hoc instituta sunt: sed testis est Amalarius, in libro de ordine Antiphonarij, c. 13. antiquam esse Ecclesie Gallicanae consuetudinem, ut octaua ad Beatam Virginem pertinens adiungatur; in qua repraesentantur filiae Ierusalem stupentes miraculum, quod in ea per Incarnationem filij Dei complendum erat, & causam tanti mysterij quærentes. Ratio eius rei est: quia, ut sancta Virgo ex diuina electione præcipuum fuit organum Incarnationis Christi, & cum eo perfectissimè in eius mysterio coniuncta: ita visum est Ecclesie, ad perfectam eiusdem mysterij repræsentationem conueniens esse, ut, quoties filij Incarnatio recolitur, matris quoque, per quam incarnatus est, commemoratio adijciatur. Vnde de eadem fit Statio diebus Sabbati & Dominicis per Aduentum, & toto tempore post Festum Natiuitatis: de eadem utroque tempore fit commemoratio in Missis quotidianis; & per singulas hebdomadas toto tempore Aduentus in tribus

feriis de eadem dicitur Missa Chori, si non sit Officium nouem lectionum. Romani verò etiam in Officio Octauæ Natiuitatis Domini Orationem & Antiphonas Laudum sumunt de Beata Virgine. Simili ratione in Missis votiuis de Beata Maria, dicitur secunda Oratio de sancto Spiritu; quia illa operatione eiusdem filium Dei concepit.

Sunt autem huius postremi generis Stationum aliæ matutinæ, aliæ vespertinæ. Matutinæ, quæ fiunt in processione ante Missam: vespertinæ, quæ in fine Vesperarum. Illæ, quia ad processionem pertinent, fiunt prælata cruce, & aliis supplicationis insignibus: hæ nullum alium apparatus habent; quàm legitimum Chori habitum, & ordinem, cum propriis Suffragiis & Orationibus: nisi quòd in Ecclesia Cathedrali diebus Dominicis & solennibus de more fit incensatio.

De Litania Maiore.

CAPVT XX.

Quamuis Litanix nomen omnibus processionibus commune sit, quia

in iis Deo supplicatur; singulari tamen ratione tribui solet iis quæ fiunt in Fæsto Sancti Marci, & triduo ante Ascensionem; quarum prior *Litania maior*, posterior *Litania minor* appellatur.

Et illa quidem, quamquam institutione posterior, maioris appellationem præ alia sortita est, tum à dignitate auctoris, qui fuit summus Pontifex, cum is, qui Litaniam minorem instituit, Episcopus tantum fuerit: tum à dignitate loci, in quo fuit instituta, nempe Ecclesiæ Romanæ, quæ caput est omnium Ecclesiarum. Ita sentiunt, Honorius in Gemina animæ, lib. 3. c. 138. Iacobus de Vitriaco in Sermonibus de vtraque Litania, Durandus Rational. lib. 6. c. 102. & Ioannes Beletus in Explicatione diuin. offic. c. 122. Eandem Romanæ consuetudine vocari *Litaniam maiorem non in ieiunio*, referunt Ordo Romanus, Alcuinus, & Amalarius. Cuius rei ea videtur causa esse, quòd, licet eo die à carnibus abstinenceatur in signum pœnitentiæ, ieiunandi tamen præceptum non sit impositum, propter mysterium Resurrectionis quod eo tempore colitur. Atque id similiter de Rogationibus accipiendum est.

Institutorem eius fuisse Sanctum Gre-

gorium Magnum, tradunt Ioannes Diaconus in eius vita, lib. I. c. 41. idem Ordo Romanus, Valafridus c. 28. Micrologus c. 57. Rupertus lib. 9. c. 5. Honorius, Durandus, & Beletus, locis superius citatis, Paulus Diaconus lib. 3. de gestis Longobardi. c. 23. 24. & 25. & lib. 18. Additionis ad Eutropium, Beda & Ado in suis Martyrologijs. Cuius rei causam hanc afferunt: quòd, cùm, aquis omni ex parte Italiam inundantibus, serpentum vis ingens cum dracone portentosa magnitudinis per Tiberim affluxisset, & eluione fluminis atque aestus marini iactatione in terram eiecta, urbem Romam, atque adeo omnem circa regionem, tetra halitu ac foetore computrescentium corporum infecisset; exorta peste, quæ inguinalia dicta est, multisque iam ciuibus cò morbo extinctis, atque ipso in primis Pontifice Pelagio, tantæ cladi expiandæ Sanctus Gregorius, eius loco Pontifex designatus, supplicationes publicas in triduum per septem Ecclesias indixit, vniuerso Clero ac populo Romano in septem classes iuxta numerum Ecclesiarum dispertito: quam ipse Litaniam septiformem appellauit in Sermonem ea de re habito, qui subiectus est Epistolæ I. libri II. Epistola-

rum eiusdem, & refertur à Ioanne Diacono loco citato, & à Gregorio Turonensi initio libri 10. Historiæ Francorum, quibus in locis totius rei ordo plenè describitur. *Septiformis autem Litania* (ait Paulus Diaconus lib. 3. de gest. Longobard. c. 25.) *ideo dicta est, quòd totius urbis populus à B. Gregorio in septem partes, Deum deprecaturus, diuisus est.* Quarum in supplicationum vltima testatur ex antiquis Romanæ Ecclesiæ Ritualibus Baronius tomo 8. Annal. anno 590. delatam fuisse imaginem beatissimæ Virginis, quæ procedente aëris labes & contagio dissipabatur: vnde, cum ad molem Adriani ventum esset, visus est ex summa arce Angelus districtum enssem vagina recondens, in signum placatæ cælestis iræ. Quam sententiam sequuti sunt, Iacobus de Vitriaco Sermone in maiore Litania, & Baptista Mantuanus lib. 4. Fastorum, processionem hanc sic describens:

*Hac maior quoque luce meat Litaneæ per
urbes,*

*Ac per rura, procul clamore per aëre
misso,*

*It populus supplex longis per compita
pompis,*

*Mane recens viridi dum ros in gramine
lucet.*

*Prætulit hunc olim morem, dum peſtifer
annus*

*Mauritio Romam premeret ſub Cæſare,
maior*

*Gregorius, quando paſſis apparuit aliſ
Angelus auguſtæ ſuper alta cacumina
molis.*

Sigonius tamen lib 1. de regno Italia ſcribit, id contigſſe in die Paſchæ anno ſequenti, ac tum circa imaginem auditum eſſe Angelorum chorum. Deiparæ acci-
nentem Antiphonam illam celebrem, *Regina cæli*; cui Gregorius diuino ſpiritu ſubiunxit, extremum Verſum, *Ora pro nobis Deum, Alleluia.*

Sed hanc eandem proceſſionem ſuccedentibus deinceps annis in gratiarum actionem, & imminentium in dies calamitatum depulſionem, renouâſſe Gregorium, & anniuerſaria celebritate in poſterum ſtato ritu frequentari iuſſiſſe, argumento eſt charta ſeu ſchedula indiſtionis poſita in fronte libri 2. Episto-
larum eiufdem, his verbis: *Solennitas annuæ deuotionis, filij dilectiſſimi, admonet, vt Litaniam, quæ maior ab omnibus appellatur, ſolicitis ac deuotis debeamus, auxiliante Domino, mentibus celebrare: per quam à noſtris exceſſibus, eius miſericordiæ ſupplicantes, purga-*

ri aliquatenus mercamur: & statim: Ad beatum Petrum Apostolorum principem Domino supplicantes, cum Hymnis & Canticis spiritualibus properemus; ut ibidem sacra mysteria celebrantes, tam de antiquioribus, quàm de præsentibus beneficiis, pietati eius, in quantum possumus, referre gratias mereamur. Patet enim ex verbis ipsis Gregorij, iam tum, cùm formula illa pro foribus basilicæ Sanctæ Mariæ proposita fuit, eam processionem fuisse legitimam & ordinariam: tum quia eo iam tempore communi vsu loquendi ab omnibus appellabatur Litania maior, ut etiam patet ex Sacramentario eiusdem Gregorij; tum etiã, quia dicitur ibidem *solennitas annuæ deuotionis*. Hoc discrimen intercessit, quòd, quæ pro ingruente calamitate primùm edicta fuerat, in Septembrem incidit, ac per triduum tenuit; ex quo verò facta est anniuersaria, & verno tempori, & vni diei hæsit addicta. Postmodum verò, seu exempli religiosa quadam propagatione, seu speciali institutione eiusdem Gregorij, illius obseruatio ab Ecclesia Romana ad vniuersæ Ecclesiæ vsum & cōsuetudinem manauit. Scribunt enim Ordo Romanus, Alcuinus, Amalarius, & Valafridus, Romana consuetudine receptum esse vbi-

que, vt ea certo die, id eſt, ſeptimo Calendas Maij (qui incurrit in Feſtum ſancti Marci) celebraretur. Vnde lex Gallicana in Concilio Aquisgranenſi ſecundo, c. 10. & Capitularium lib. 6. c. 74. *Vt Litania maior, more Romano, ab omnibus in ſeptimo Calendas Maij celebretur.* Et Concilium Moguntinum, c. 33. *Placuit nobis, vt Litania maior obſeruanda ſit à cunctis Chriſtianis vno die, ſeptimo Calendas Maij, ſicut in Romana Eccleſia conſtitutum reperimus, & ſicut ſancti patres noſtri conſtituerunt; non equitando, non pretioſis veſtibus induti: ſed cinere aſperſi, & cilicio induti, ieiunemus, niſi infirmitas impedierit.* Certè ea de re ſic ſcribit Iacobus de Vitriaco Sermone in Litania maiore, de S. Gregorio loquens: *Et inſtituit hanc proceſſionem ſingulis annis fieri in Eccleſia Dei, & vbiq; terrarum ieiunia obſeruari: & Ioannes Belethus, Explicationis ſux c. 122. Fuit enim inſtituta Romæ, & publico decreto ſancitum vt vbiq; celebraretur.* Quod de ieiunio huius diei tradit poſt Concilium Moguntinum Iacobus Vitriacenſis, id aſſeueranter contendit Petrus Damiani Epift. 35. lib. 6. ſcribens, *Romam hoc ieiunium non modò decretalis pagine promulgatione corroborare, ſed & viuâ annuatim veneratione conſeruare.*

Sed apud nos omni memoria obtinuit tantum ut à carnibus abstineretur, quemadmodum superius insinuatum est.

Ei porrò celebrandæ vernum tempus assignatum creditur, quòd ea tempestas peccatorum licentiæ & publicis calamitatibus ut plurimum initia & causas præbeat. Tunc enim, efferuescente sanguine ex noui fideris influxu, lasciuia spiritus exardescunt, vnde ingens vitiorum seges; bella oriuntur, aëris intemperie morbi excitantur; flores & frugum atque arborum germina præ teneritudine facilè pruinis & alia quauis cœli iniuria dispereunt, & spem annui prouentus fallunt: Quibus malis auertendis huiusmodi supplicatio instituitur, ut notauit Alcuinus lib. de diuin. offic. c. de Litania maiore, & Iacobus de Vitriaco Serm. in Litania maiore; quod etiam de Rogationibus obseruatum est à Concilio Colonienfi parte 9. c. 7. & ab eodem de Vitriaco Sermonem in feria secunda Rogationum. Ea de re ita Ordo Romanus: *Pro importunitate autem bellorum potest procul dubio videri Litania instituta esse; & ex qualitate temporis colligimus, eam necessariam esse ad fruges conseruandas.* Honorius in Gemma animæ, lib. 3. c. 138. dicit, *hanc annuatim celebrari, ut Deus à populo*

& ab animalibus peſtilentiam auertat. Anaſtaſius Bibliothecarius ſimpliciter dicit, pro ſalute populi Chriſtiani, dum ita ſcribit in vita Leonis tertij: *Cum die quadam more ſolito in Litanjjs, quæ ab omnibus maiores appellantur, procederet, ubi ſibi populus obuiam ſacra religione occurrere deberet. & ſecundum annuam conſuetudinem Litanias & Miſſarum ſolennia cum Sacerdotibus celebraret, & omnipotenti Domino pro ſalute Chriſtiani populi preces funderet.* Colligere licet ex Sacramentario S. Gregorij, hanc proceſſionem ab initio diſtinctam fuiſſe per varias ſtationes. Ibi enim notantur plures Orationes, vna ad S. Laurentium in Lucinæ, altera ad S. Valentinum, tertia ad pontem Miluium, quarta ad Crucem, quinta & ſexta in atrio.

*De Litania Minore, ſeu
Rogationibus.*

CAPVT XXI.

Rogationes, ſeu triduanas ſupplicationes ante Aſcenſionem, inſtituit S. Mamertus Epiſcopus Viennenſis, vt ſcriptis prodiderūt, Alcimus Auitus Homilia

de Rogationibus, Sidonius Apollinaris
epist. 14. lib. 5. & 1. lib. 7. vterque eius æ-
qualis, Gregorius Turonensis lib. 2. hist.
Franc. Aimoinus lib. 2. de gestis Franc. c.
25. Ado Viennensis & Sigebertus in suis
Chronicis, Notgerus in vita S. Remacli,
lib. 2. c. 15. Ordo Romanus, Alcuinus, A-
malarius, Valafridus, Micrologus, Ru-
pertus, & cæteri. Cum enim Vienna vrbs
Allobrogum, toto anni spatio, assiduæ ter-
ræ motibus, incendijs, ferarum irruptioni-
bus, nocturnis fragoribus, ac cœlestium
ignium terroribus infestaretur; ac de-
mum ipsa nocte Paschalis solennitatis,
arce subito incendio correpta, extremum
exitum ciuitati impendere crederetur:
diffugiente ex Ecclesia populo, perseue-
rauit in oratione Mamertus, atque humi
stratus ante Altare, precibus & lacrymis
suis grassantes procul flammæ resinxit:
prospiciensque in futurum, in eodem ve-
stigio solennes supplicationes placandæ
cœlesti iræ animo concepit, & vniuersum
precandi ordinem cum Deo tacitus defi-
niuit; ac, modico intermisso tempore, Ni-
niuitarum exemplo, triduum proximum
ante Ascensionem Ecclesiastica lege in
perpetuum Rogationibus consecrauit.
Quod communi Episcoporum consilio ab

eo fuisse statutum tradit Alcuinus libro de diuin. offic. c. de diebus Rogationum, his verbis. *Nam, cum, exigentibus peccatis, Galliarum populi luporum rabie acriter interimerentur, nec huius flagelli aliquod remedium inueniretur: cōgregati traduntur Galliarum Episcopi apud Viennam, precipuam Galliae urbem: qui in commune statuerunt, ut triduo ieiunio misericordiam Domini implorarent, antiquorum Patrum vestigia sequentes. Cumque adeorum preces oculus diuinæ pietatis respiciens, flagelli huius pestem misericorditer abstulisset, hi dies in consuetudinem annuæ celebritatis venerunt, ut per Galliarum provincias ante Ascensionis diem celebrarentur: quæ consuetudo apud nos usque hodie pro diuersis calamitatibus deuotissimè recolitur.* Idem refertur in Chronico Cameracensi edito à Georgio Coluencio: *Huius temporibus habita Synodus Vienna urbe describitur, ad quam Galliarum Episcopi à Beato Mamerto conuocati penè omnes conuenerunt: ubi & ipsi B. Remigium, utpote diuinis eloquiis eruditissimum, & præstantioris gratiæ priuilegijs facundissimum, venire petierunt.* Et, post narrata prodigia, de quibus suprà, tandem subditur: *Hanc diuinæ indignationis animaduersionem ex offensa hominum accidisse*

aduertentes Episcopi, communi consilio decreuerunt seruari ieiunium, quod triduo ante Ascensionem Domini usque nunc per omnes Galliarum Ecclesias agitur: sicque ipsa tribulatio atque subuersio quieuit.

Eam institutionem omnium primos suscepisse Aruernos, conijcere licet ex epistola Sidonij ad ipsum Mamertum, quæ est prima lib. 7. qua scribit, Aruernos suos vestigia tam sacrosanctæ informationis sedulo fuisset amplexatos, petítque ab eó sibi transmitti formulam solennium precationum qua vsus fuerat. Certè breui pòst interuallo, nempe anno Domini 507. Concilium Aurelianense primum harum Rogationum obseruationem per Galliam edixit, Canone 29. his verbis: *Rogationes, idest, Litanias, ante Ascensionem Domini placuit celebrari, itaut præmissum triduum ieiunium in Dominica Ascensionis solennitate soluatur: per quod triduum serui & ancilla ab opere relaxentur, quò magis plebs vniuersa conueniat. Quo triduo omnes abstineant, & Quadragesimalibus cibis utantur.* Qui Canon iuri insertus habetur, de Consecrat. dist. 3. Atque ea religio omnes Galliarum prouincias tam celeriter peruasit, vt Cæsarius Arelatensis, qui eodem tempore vixit, in Homilia 37. quam

scripsit de Litanis, dicat; *Præcipue in istis tribus diebus, quos regulariter in toto mundo celebrat Ecclesia, nullus se à sancto conuentu subducatur, nullus Ecclesiam, cælestis medici scholam, occupatus terrenis actibus, derelinquat. Vbi, totius mundi nomine, intelligendus est, iuxta interpretationem Amalarii, orbis Gallicanæ Ecclesiæ, cuius postea exemplum sequuta Ecclesia Romana, eandem legem orbi Christiano dedit. Cùmque hæc agerentur (inquit Gregorius Turonensis loco citato) appropinquante Ascensione, ut iam diximus, maiestatis Dominicæ, indixit populis ieiunium, instituit orandi modum, edendi seriem, erogandi hilarem dispensationem. Cessantibus quoque exinde terroribus, per cunctas prouincias dispersa facti fama cunctos Sacerdotes imitari commonuit quod Sacerdos fecit ex fide: quæ usque nunc in Christi nomine per omnes Ecclesias in compunctione cordis, & contritione spiritus celebratur. Et Aimoinus: Exinde pulcherrimus in sancta vniuersali Ecclesia mos inoleuit, ut, quoquo terrarum Christi fides diffunditur, à cunctis fidelibus hæ Litanie cum exultatione peragantur. Et similiter Ordo Romanus: Tres dies Rogationum, inquit, qui celebrantur ante Ascensionem Domini iuxta morem Gallicanæ Eccle-*

sia, constituit Sanctus Mamertus Viennensis Episcopus. Idcirco Micrologus c. 57. dicit, has Litanias Romanas non esse, sed Gallicanas. Coniectura est ex Anastasio Bibliothecario, Leonem tertium eas in Ecclesiam Romanam inuexisse. Sicenim scribit ille in eius vita: *Ipse verò à Deo protectus & præclarus Pontifex constituit, ut ante tres dies Ascensionis Dominica Litanie celebrarentur; & cætera, quibus ordinem processionum præscribit: quamquam Iacobus de Vitriaco, Sermone in feria secunda Rogationum, id tribuit Liberio; sed tempora non consentiunt.*

Finis triduanæ huius supplicationis est idem qui in Litania maiore: ut scilicet operibus pœnitentiæ, & precibus assiduïs, propitiatur Deus peccatis fidelium, & iræ suæ flagella ab eis amoveat; pacem, aëris & corporum salubritatem, frugum vberitatem concedat, omnibusque populi Christiani necessitatibus benignè prospiciat, quemadmodum observauit Ordo Romanus, & Amalarius lib. 1. c. 37. & Honorius in Gemma animæ lib. 3. c. 139. Cæsarius Arelatenensis, qui longo tempore ante hos omnes vixit, Homilia 37. de hac re ita scribit: *Ut ad integrum Deo vacantes, & misericordiam illius suppliciter exo-*

rantes, & à cunctis infirmitatibus ſanari, & à peccatis omnibus erui, & de tam frequen-
 ti inundatione aquarum mecamur per Dei
 miſericordiam liberari. Itaque hi dies ſunt
 Expiationum, de quibus inferius c. 27. &
 dies pœnitentiæ: vnde preces, quas in ijs
 vſurpat Eccleſia ex præſcripto Antipho-
 narij & Sacramentarij S. Gregorij, omnes
 pertinent ad pœnitentiam; & miſeriarum
 ex peccato inſurgentium deprecationem.
 Et hæc cauſa eſt, cur Rituale Romanum
 vetet in his proceſſionibus & Lſtania ma-
 iore, aliſue pœnitentiæ cauſa inſtitutis,
 dici Hymnos vel Cantica lætitiæ. Eodem
 ſpectat ieiumum cum vſu ciborum Qua-
 drageſimalium, de quo in Canone Con-
 ciliij Aurelianenſis ſtatuitur; quod quidem
 primis temporibus per Galliarum Eccle-
 ſias religioſè ſeruatum fuit Mamerti ex-
 emplo: vnde Sidonius epiſt. 14. lib. 5. de vſu
 Eccleſiæ ſuæ loquens, ſcribit: *In his ieiunatur, oratur, pſallitur, fletur.* Cæſarius.
 Arelatenſis loco citato: *Conuiuioſa* (in-
 quit) *nobiſ etiam Quadrageſimali ordine*
preparemus. Et Amalarius de ſui temporis
 obſeruantia, lib. 1. de Eccleſ. offic. c. 37. *Ie-*
iumum triduanum in Vigilia Aſcenſionis
Domini. Miror, quomodo inoleuit conſue-
tudo præſentis ieiunij in noſtra Eccleſia, quæ
tamen

tamen non tenetur per omnes Orientales Ecclesias; cum sancti Patres, quos memorauimus, Ambrosius, Augustinus, Hieronymus, dicant relaxanda ieiunia tempore Pentecostes, id est, Quinquagesimæ dierum post Pascha. Quin etiam idem ieiunium in Ecclesia Romana seruatum fuisse docet Secreta Missæ feriæ quartæ Rogationum apud S. Gregorium in Sacramentario, quæ sic habet: *Ieiunantium; Domine quesumus, supplicum vota propitius intueri; & munera præsentia sanctificans, perceptione eorum occulta cordis nostri remedio tuæ clarifica pietatis: ut nec opera carnalia nec fluxa nos teneant, quos institutor ieiunij Christus Dominus reparauit, Qui tecum.* Sed, cum animaduersum esset, ex facris Canonibus ieiunia non indici toto tempore à Pascha ad Festum Pentecostes, propter lætitiā Resurrectionis Dominicæ, ut constat ex c. *Scire debet*, dist. 76. idcirco ieiunij Quadragesimalis observatio in his diebus relaxata fuit, & solum retenta abstinentia à carnibus, ad aliquant pœnitentiæ speciem. Vnde Iacobus de Vitriaco Serm. in feria 2. Rogationum: *In his autem litanij ieiunare solebant in principio in Quadragesimalibus cibis: nunc autem pauci ieiunant primis duobus diebus,*

nisi in caseo & ouis. Omnes autem debent ab operibus mundanis cessare, sicut in diebus festis, donec facta sit processio, cui debent interesse: quæ extrema verba respiciunt ad Canonem Concilii Aurelianensis, de quo superius. Si quibus tamen visum fuerit iis diebus ex deuotione ieiunare, nihil vetat, vt recte monuit Isidorus in c. Post Pascha. eadem dist. his verbis: Post Pascha usque ad Pentecosten, licet traditio Ecclesiarum abstinentia rigorem prandijs relaxauerit, tamen, si qui Monachorum vel Clericorum ieiunare cupiunt, non sunt prohibendi: quia Antonius & Paulus, & ceteri patres antiqui, etiam his diebus in eremo leguntur abstinuisset, neque soluisse abstinentiam, nisi tantum die Dominico. Scribit Valafridus, lib. de rebus Eccles. c. 28. Hispanos Litanias suas post Pentecosten reiecissee, quod intra Quinquagesimam Paschæ recusarent ieiunare.

Antiqui moris fuit in Ecclesia Romana, vt etiamnum apud nos, in his processionibus deferre Sanctorum reliquias, vt colligi potest ex Ordine Romano, c. de Litanis minore: vnde obtinuit passim in Ecclesijs Cathedralibus, vt hæ processiones incipiantur ab Antiphona, *Surgite Sancti, vel, De Ierusalem*; qui ordo sump-

tus est ex Antiphonario S. Gregorij in Officio Litaniarum maioris. Et hæc fortasse causa est, cur plerisque in locis pia consuetudo inualuerit flores & herbas suaueolentes in via spargendi adueniente processione, de qua Baptista Mantuanus his versibus lib. 4. Pastorum.

*Antè triumphali Christus quàm sidera
pompa*

*Conscendat, Litanèa minor per rura, per
vrbes*

*Incedit, tres manè dies pulsantibus æra
Turribus, & sparsis passim cum floribus
herbis.*

*De Processione in Festo Ascensionis
Domini.*

CAPVT XXII.

SANCTA præ cæteris ac mysterij plena
Sest hæc processio, atque vna de qua-
tuor illis præcipuis, quas Durandus Ratio-
nal. lib. 4. c. 6. speciali quodam iure solen-
nes vocat, scilicet in Purificatione, in Ra-
mis palmarum, in Pascha, & in Ascensio-
ne. Vbi animaduertit ille, Ecclesiam pri-

initium pari religione obſeruâſſe feri-
 am quintam ac diem Dominicum, & in
 illa celebrâſſe proceſſionem in memo-
 riam Aſcenſionis, ſicut die Dominico fa-
 cere ſolet in memoriam Reſurrectionis:
 ſed, multiplicatis Sanctorum feſtiuitati-
 bus, ſublatam fuiſſe ſolennitatem feriæ
 quintæ, & eius proceſſionem per Agape-
 tum Papam in diem Dominicum transla-
 tam. Ex quo fit, proceſſionem Dominica-
 lem duplici myſterio hodie inſignem
 eſſe, Reſurrectionis ſcilicet & Aſcenſionis
 Domini. Ad obſeruantiam illam feriæ
 quintæ ſpectat Canon, *Ieiunium*, de confe-
 crat. diſt. 3. quo prohibetur ieiunium in
 feria quinta, perinde atque in Dominica:
quia (inquit Gloſſa) in iſtis duobus diebus
fecit Dominus quidquid inſigne fecit, quia
die Iouis cælum aſcendit.

Inde patet, quanti Eccleſia faciat my-
 ſterium Aſcenſionis, ac proinde quanti
 apud eam ſit proceſſio huius Feſti, quam
 renouari certo die per ſingulas hebdo-
 madas voluit. Certè ratione huius my-
 ſterij Epiphanius, in Orat. de Aſcenſione,
 dicit, *Hoc Feſtum inter Feſta Dominica*
faſtigium obtinere, & eſſe Feſtorum decus:
 Bernardus verò Serm. 2. de eodem Feſto,
Conſummationem & adimpletionem eſſe re-

liquarum solennitatum, & felicem clausulam itinerarij Filij Dei.

Narrant Euangelistæ, Marcus c. 16. & Lucas c. 24. & Act. c. 1. Dominum quadagesimo die à Resurrectione sua vndecim Discipulos, in Ierusalem congregatos, extra urbem.eduxisse, & Bethaniam vsque progressum, inde in summum verticem montis Oliueti contendisse; & postquam eleuatis manibus iis benedixit, ex eo loco in cælum fuisse subuectum, prætendente se nube clara, quæ eum ex oculis spectantium eripuit.

Huius Christi & Apostolorum itineris mysticam imaginem repræsentat Ecclesia in hodierna processione; Christum, quasi præsentem, animis ac festiuo cantu deducens ad locum triumphi, in cuiusque honorem templi parietes & vias triumphali more virentibus ramis ornans, ac solum herbis suaueolentibus & floribus consternens, scandentem in cælos piis votis ac desiderijs prosequens, & ab eo benedictionem precibus flagitans. Quare, Clerus cum populo procedens, sanctum Apostolorum ac Discipulorum comitatum Christo adhaerentem demonstrat; Ecclesia ex qua procedit supplicatio, cœnaculum ipsum, ex quo à Christo edu-

ſti ſunt Apoſtoli; locus ubi fit ſtatio, montem Oliueti; capſa Reliquiarum, quæ in celebrioribus Eccleſiis præfertur, arcam illam ſacram noui Teſtamenti, id eſt, humanitatem Chriſti, quæ hodie in Sanctuarium templi cœleſtis eueſta, collocata eſt ad dexteram Dei Patris in gloria.

Quòd verò Chriſtus pergens ad montem Oliueti tranſit per Bethaniam, Rupertus lib. 10. de diuin. offic. c. 9. id ita interpretatur; *quòd Dominum noſtrum ſequi debeamus in cælum, quò præcurſor ipſe introijt, per eandem obedientiæ viam, qua ipſe, factus obediens uſque ad mortem, exemplo ſuo præmonſtrauit*: quando quidem Bethaniæ nomen apud Hebræos domum obedientiæ ſignificat.

Amalarius lib. 3. de Eccleſ. offic. c. 36. docet, benedictionem, quæ dari ſolet populo à Sacerdote ſub finem Miſſæ, poſt omnia Sacramenta conſummata, referre benedictionem illam, quam Chriſtus in cælum aſcendens Apoſtoliſ ſuis, poſt conſummatum Incarnationis ſuæ myſterium, impertiuit: & addit cap. ſequenti, hac in re impleuiſſe figuram Iacob & Moſis, quorum ille filiis ſuis, hic populo Iſraël, in fine vitæ ſuæ benedixit.

In quibuſdam Eccleſiis, procedente

supplicatione, mos est flosculos passim è sublimi in Clerum & populum spargere; quo ritu adumbratur id quod scribit S. Paulus Ephes. c. 4. *Ascendens in altum captiuam duxit captiuitatem, dedit dona hominibus*; dona nempe Spiritus sancti, & omnis generis gratiarum, quas Christus è cælo in yniuersam Ecclesiam larga manu effudit. Qua de re sic S. Ambrosius Serm. 61. explicans eadem verba Apostoli: *Quòd autem ait, Dedit dona hominibus: hoc victoris insigne est. Post triumphum enim victor semper dona largitur, & proprio regno residens seruulorum gaudia muneratur. Sic Christus Dominus victor, diabolicum post triumphum, residens ad dexteram Patris, hodierna die Discipulis dona largitus est, non auri talenta, non argenti metalla, sed Spiritus sancti cælestia munera, ut inter cæteras gratias Apostoli etiam variis linguis loquerentur.*

Pertinet etiam ad hoc mysterium, quòd Cereus Paschalis in Missa statim recitato Euangelio extinguitur, neque amplius accenditur, nisi in Sabbato Pentecostes ad benedictionem Fontis: ut significetur, iam tunc Christum è cōspectu suorum abiisse, & videri in mundo desiisse: quippe Cereus iste illuminatus index est Christi resur-

gētis, & post Resurrectionem Apostolis se manifestātis: quare post Pentecosten non videtur in publico cōspectu relinquendus.

De Processione ad Fontem in
Sabbato Pentecostes.

CAPVT XXIII.

Processio hæc instituitur ad consecrationem Fontis, & Baptismi solennis celebrationem, sicut ea quæ fit in Sabbato Paschæ. Cuius mysterij causam ita explicat S. Leo, can. *Proprie*, de consecrat. dist. 4. *Additur sanè huic obseruantia* (Baptismi in Sabbato Paschæ celebrandi) *etiam Pentecostes ex aduentu Spiritus sancti consecrata solennitas, quæ de Paschalis Festi pendet articulo. Et, cùm ad alios dies alia Festa pertineant, hæc semper ad eum diem, qui Resurrectione Domini est insignis, occurrit. Et paulò inferiùs: Hoc autem nos non ex nostra persuasione defendere, sed ex Apostolica auctoritate seruare, satis idoneo probamus exemplo, sequentes beatum Apostolum Petrum; qui eo die, quo omnem credentium numerum promissus Spiritus sancti repleuit aduentus, trium millium populum, sua prædicatione conuersum, lauacro baptismatis consecrauit.*

Valafridus lib. de exord. & increm. rerum
 Ecclesiasticarum, c. 26. eadem de re sic
 scribit. *Quia verò, secundum Apostolum.*
 (Rom. 6.) *in morte Saluatoris baptizamus.*
 & ipse Dominus intraturos regnum cælorum
 ex aqua & Spiritu sancto renasci debere præ-
 monstrat (Ioan. 3.) congruè à præsulibus Ro-
 manorum hæc duo tempora sola ad celebra-
 tionem præfixa sunt baptismatis, id est, Pas-
 cha & Pentecoste, quorum vno Passio Do-
 mini & Resurrectio, altero aduentus celebra-
 tur Spiritus sancti. Rupertus autem lib. 10.
 de diuin. offic. c. 2. hanc causam reddit:
*quia baptismatis regeneratio propria San-
 cti Spiritus operatio est.* Qua de causa in ipsa
 benedictione Fontis baptismalis dicitur:
*Descendat in hanc plenitudinem Fontis vir-
 tus Spiritus sancti, totamque huius aquæ
 substantiam regenerandi fecundet effectu.*
 Vnde per quamdam analogiam Christus
 ipse Act. c. 1. aduentum Spiritus sancti in
 Apostolos appellauit baptismum: *Vos au-
 tèm (inquit) baptizabimini Spiritu sancto non
 post multos hos dies.* Qua in significatione
 Hugo à S. Victore lib. 3. Eruditionis Theo-
 log. c. 34. fundat causam hodierni myste-
 rij: *In vigilia, inquit, Pentecostes celebratur
 baptismus, cò quòd Dominus ascensurus in
 cælum promissi discipulis suis, dicens: bapti-
 zabimini Spiritu sancto non post multos hos*

dies, ſcilicet poſt decem, quod & factum eſt. Hac de cauſa celebrat Eccleſia baptiſmum decima die poſt Aſcenſionem, ut Catechumeni noſtri baptizentur Spiritu ſancto, ſicut & ipſi Apoſtoli. Optima omnium cauſa hæc videtur eſſe, quam S. Leo leuiter perſtringit ex c. 2. Actuum Apoſt. ſcilicet institutionem Baptiſmi in Sabbato Pentecoſtes ſolenniter celebrandi ex eo. profectam fuiſſe, quòd præceptum Chriſti de ſuſcipiendo Baptiſmo primùm cœperit promulgari, & perfectè executioni mandari in die Pentecoſtes, quando nimirum S. Petrus, ſtatim poſt deſcenſum Spiritus ſancti, vno ſermone tria millia hominum ad fidem conuertit, & baptizauit, ſpectante non ſolùm ciuitate Ieroſolymitana, ſed etiam numeroſa multitudine populorũ, quæ ad Feſtum conuenerat ex omni natione quæ ſub cœlo eſt.

De hora celebrandi Baptiſmi in hac Vigilia, ſic Amalarius lib. 4. de Eccleſ. offic. c. 28. Notandum eſt, quòd ea hora diei nunc celebret ſancta Eccleſia baptiſmũ, qua hora Angelus Domini venit ad Cornelium, annuntians ei, quòd orationes eius & eleemoſynæ aſcenderāt in memoriam in conſpectu Dei, & ut mitteret ad Petrum, qui eum baptizaret: eadem hora venit baptiſta Petrus ad eundem Cornelium baptizandum, ſcilicet

hora nona. Atque id probat Amalarius ex Actibus Apost. c. 10. & tandem subdit. *Igitur eo in tempore circa primitivam Ecclesiam hora nona baptismus celebratus est: ut & ipsa, & imitatrix eius quæ hodierna die est, retineret in mente, quòd in morte Christi, qui hora nona emisit spiritum, oporteat eam baptizare, hunc morem tenet nunc nostra Ecclesia in Vigilia Pentecostes.*

Quod spectat ad ritum huius processions, is abundè explicatus fuit capite decimo 13.

De Processione in die Pentecostes.

CAPVT XXIV.

NArrat S. Lucas Act. c. 1. & 2. Apostolos post ascensum Christi in cælum Ierosolymam rediisse, & in eandem domum, vnde profecti fuerant, cum Maria matre Iesu ac reliquis Discipulis, numero centum viginti, se recepisse, ibique manentes simul in oratione perseverasse usque ad diem Festi Pentecostes: quo sub horam tertiam, id est nostro more, circiter nonam matutinam, derepentè in cœnaculum, in quo erant congregati, sonitus vehementis è cœlo quasi incumbentis procellæ intonuit, cum igneo quodam ful-

gore linguarum flammantium, quæ ſingulorum capitibus infederunt: ac tum repleti ſunt omnes Spiritu ſancto, & cœperunt loqui variis linguis, prout Spiritus ſanctus dabat eloqui illis. Tam inſolitæ rei fama commota ciuitate, vndique eò concurritur. Et erat tum Ieroſolymis multitudo ingens aduenarum ex varijs gentibus, qui ad Feſti' celebritatem confluxerant ex Dei præcepto Deuteronom. c. 16. vbi iubentur omnes Iudæi maſculini ſexus in tribus Feſtis ſingulis annis Ieruſalem conuenire, ſcilicet in Paſcha, in Pên-tecoſte, & Scenopegia. Iis attonitis miraculo linguarû, cum ſuam quiſque agnoſceret, ac ſeſcitantibus quid iſtud rei eſſet; Petrus, in medium progreſſus, longum de Chriſto ſermonem ad multitudinem habuit, tanta vi Spiritus in eò loquentis, vt ad tria vſque millia conuerterentur, & baptiſmum communi clamore poſtularent: qui omnes baptizati ſunt, & iuxta promiſſionem Petri, ſimul Spiritum ſanctum acceperunt.

Iure in canone, *Non liceat*, diſt. 44. in Eccleſiaſticis Officiis Hora tertia ſacra appellatur; quippe quæ myſterio aduentus Spiritus ſancti, quo omnimoda in Eccleſiam ſanctificatio influxit, conſecrata fuerit, & in eiſdem memoriam inſtituta. Ita

enim sensit S. Basilius in Regulis fusè disputatis, quæst. 37. *Rursus autem, inquit, iuxta tertiam horam ad orationem exurgamus, & fraternitatem congregemus, etiamsi alij ad alia opera sint dixi: & recordati doni Spiritus, qui circa tertiam horam Apostolis datus est, oremus omnes unanimiter; ut digni fiamus etiam ipsi susceptione sanctificationis, petentes ab ipso deductionem ac doctrinam ad id quod utile est, iuxta eum qui dixit, Cor mundum crea in me Deus, & spiritum rectum innoua in visceribus meis.* Et Basilio ad stipulantur Amalarius lib. 4. de offic. Eccles. c. 3. & Rabanus lib. 2. de instit. cler. c. 4.

In die igitur Pentecostes, in Officio, ad Tertiam, celebratur memoria descensus Spiritus sancti in Apostolos & cæterum Discipulorum Domini, unde speciali ordine canitur tunc Hymnus, *Veni creator:* sed processio quæ fit post Tertiam, pertinet præcipuè ad commemorandum concursum illum publicum ciuitatis Ierusalem ad locum ubi id miraculi acciderat; ut fideles, Iudæorum recens conuersorum exemplo, conuenientes in sanctam domum Apostolicam, id est, Ecclesiam, effusionis Spiritus sancti similiter particeps fiant. *Ac per hoc* (ut Bedæ verba usurpemus ex Homilia in festiuit. Pentecost.) *non se-*

*lūm veteris facti recordatio, verū etiam in
nouos adoptionis filios nouus in ea Spiritus
sancti celebratur aduentus. Idcirco proces-
sio ista terminatur Antiphonā, Veni san-
cte Spiritus, quæ solenniter cantatur in
Statione genibus flexis, ad inuocandam
gratiam Spiritus sancti.*

Vbi obiter notandum est, in hoc Festo
flecti quidem genua dum canuntur Hym-
nus, *Veni creator*, & Antiphona seu Ver-
sus, *Veni sancte Spiritus*, ad maiorem re-
uerentiam adorationis Spiritus sancti,
quasi eo momento visibiliter illabentis in
Ecclesiæ cœtum; & vt conuenienti humi-
liatione corda fidelium præparentur ad
recipiendam gratiam Spiritus sancti: sed
in reliquis precibus & Officiis Ecclesiasti-
cis per totam hebdomadam Pentecostes
nullam genuflexionem fieri. Id enim
priscū est Ecclesiæ institutum, vt tradunt,
S. Iustinus Martyr. Resp. ad quæst. 115. Or-
thodox. Hieronymus Prolegomenis in
Epist. ad Epiphan. S. Augustinus Epist. 119.
c. 15. Ordo Romanus in nocte Penteco-
stes, Amalarius lib. 1. de Eccles. Offic. c. 39.
Micrologus de Ecclesiast. obseruat. c. 58.
Durandus Rational. lib. 6. c. 107. & ex-
pressissimè Beda Homilia super Domini-
ca, *Exaudi*, quæ sic habet: *Verū hoc quo-
que, quod non statim peracta die quinquage-*

fima (quæ est Dominica Pentecostes) genu
ad orandū curuamus, sed & illa adhuc sep-
timania stantes Domino supplicamus; &
quamuis intermissa repetentes ieiunia, tamen
Alleluia quotidie personamus; nemo absque
discretionē apta, & congrua ratione mysterij,
putet acētari. Quia enim Spiritus sancti
septiformis est gratia, iure solennitas aduen-
tus eius per septem dies laude Hymnorum de-
bita, simul & Missarum celebratione, coli-
tur: Et paulò inferiùs: Meritò etiam tunc
stantes oramus, ob significationem videlicet
liberationis eorundem (Neophytorum in
Sabbato Pentecostes baptizatorum) quia,
per donū Spiritus sancti, de morte animæ ad
vitam resuscitari ac resurgere meruerunt.
Ratio generalis est, quia perseuerat tem-
pus Paschale vsque ad sequens Sabbatum
post Nonam, vt notat Breuiarium Roma-
num eo loco: idcòque per totam hebdo-
madam Pentecostes frequentatur *Alle-
luia*, & vniuersum Officium fit more Pas-
chali, ex institutione S. Gregorij, vt tradit
Micrologus libro citato, c. 54. & vsque in
dictum Sabbatum canitur Antiphona,
Regina cæli, in fine Horarum.

Quod autem dicti Auctores docent, pro-
pter mysticum numerum septem donorū
Spiritus sancti septem tantum diebus ce-
brari solennitatem Pentecostes, id etiam

tradunt Honorius in Gemma, lib. 3. c. 149.
 & Hugo à S. Victore Eruditionis theologi.
 lib. 3. c. 36: & Clemens tertius in c. *Capel-*
lanus, de feriis, ſeptem tantum dies tribuit
 Feſto Pentecoſtes, & dicit illud carere
 Octaua. Ad cuius rei ſignificationem Ec-
 cleſia Andegauenſis in Sabbato ſanctæ
 Trinitatis, ad Stationem veſpertinaſ
 cantare ſolet Antiphonam, *Hodie complē-*
ti ſunt dies Pentecoſtes.

Cæterum, quia in omnibus fermè paro-
 chialibus Eccleſiis non canitur Officium
 Tertiæ; vt in iis vtrumque myſterium deſ-
 cenſus Spiritus ſancti, in Apoſtolos videli-
 cet, & in plebem ex variis nationibus con-
 gregatam, ritè celebretur, in iis ante pro-
 ceſſionem cani ſolet genibus flexis Hym-
 nus, *Veni creator*, quo prior deſcenſus re-
 præſentatur.

De Proceſſione in Feſto Corporis
 Chriſti.

CAPVT XXV.

DE Feſto Conſecrationis Corporis
 Chriſti, & proceſſione quæ in eo ce-
 lebrari ſolet, ſic pronuntiat Concilium
 Tridentinum

Tridentinum Sess. 13. c. 5. *Declarat præterea sancta Synodus, piè & religiosè admodum in Dei Ecclesiam inductum fuisse hunc morem, ut singulis annis peculiari quodam & festo die, præcelsum hoc & venerabile Sacramentum singulari veneratione ac solennitate celebraretur, utque in processionibus reuerenter & honorificè illud per vias & loca publica circumferretur. Aquisissimum est enim, sacros aliquos statutos esse dies, cum Christiani omnes, singulari ac rara quadam significatione, gratos & memores testentur animos erga communem Dominum & Redemptorem, pro iam ineffabili & planè diuino beneficio, quo mortis eius victoria & triumphus representatur. Ac sic quidem oportuit vittricem veritatem de mendacio & hæresi triumphum agere: ut eius aduersarij in conspectu tanti splendoris, & in tantâ vniuersæ Ecclesiæ latitiâ positi, vel debilitati & fracti tabescant, vel pudore affecti & confusi aliquando resipiscant.*

Festum quidem per vniuersam Ecclesiam celebrari speciali ac solenni ritu feria quinta proxima post Octauam Pentecostes, sub præcepto sanxit Urbanus quartus Pontifex maximus, ut patet ex eius Constitutione, quæ habetur tit. *de Reliquiis & veneratione Sanctorum*, in Cle-

mentinis, his verbis. *Vniuersitatem vestram*
monemus & hortamur in Domino, & per A-
postolica scripta in virtute sanctæ obedientiæ
districte præcipiendo mandamus, in remissio-
nem peccaminum iniungentes, quatenus tam
excelsum & tam gloriosum Festum, prædicta
quinta feria, singulis annis deuotè ac solenni-
ter celebretis, & faciatis studiosè per vniuer-
sas Ecclesias ciuitatum vestrarum & diocesum
celebrari; subditos vestros in Dominica di-
ctam quintam feriam proximè præcedente sa-
lutaribus monitis sollicitè per vos & per alios
exhortantes, vt per veram & puram confes-
sionem, eleemosynarum largitionem, attentas
& sedulas orationes, & alia deuotionis &
pietatis opera, taliter se studeant præparare,
quòd huius pretiosissimi Sacramenti mereantur
fieri participes illa die, possintque ipsum susci-
pere reuerenter, ac eius virtute augmentum
consequi gratiarum. Nos enim Christi fideles
ad colendum tantum Festum & celebrandum
donis volentes spiritualibus animare, omnibus
verè pœnitentibus & confessis, qui Matutinali
Officio Festi eiusdem in Ecclesia interfuerint,
centum; qui verò Missæ, totidem; qui in pri-
mis Vesperis, similiter centum; qui in secundis,
totidem; illis verò qui Primæ, Tertiæ, & Sex-
tæ, Nonæ ac Completorijs Officijs interfuerint,
pro qualibet Horarum ipsarum quadraginta;

illis autem qui per Octavas illius Festi Marti-
nalibus, Vespertinis, Missa, ac prædictarum
Horarum Officijs interfuerint, centum dies
singulis Octavarum ipsarum diebus, de omnipo-
tentis Dei misericordia, ac beatorum Aposto-
lorum ipsius Petri & Pauli, auctoritate confisi,
de iniunctis sibi pœnitentijs relaxamus. Et
idem refertur à S. Thoma Opusculo 57.
in Officio eius diei, quod ipse iussu eius-
dem Urbani composuit.

Rationes instituendi (vt ex eadem Con-
stitutione patet) quatuor fuere. Prima;
quod, cum sanctissimum Sacramentum à
Christo institutum fuerit, vt esset in Ec-
clesia perpetuum memoriale summi sui
erga nos amoris, & potissimum illius
quam in passione monstravit excellentis-
simæ charitatis, æquum fuit tanto myste-
rio dignè & solenniter celebrandò certum
diem publico ritu consecrari. Licet enim
in die Cœnæ institutionis eius memoria
in Missæ Officio recolatur; quia tamen eo
die Ecclesia pœnitentium reconciliatio-
ne, Chrismatis & Olei sancti consecra-
tione, adimplerione Mandati Dominici
circa lotionem pedum, & alijs eiusmodi
ritibus atque Officijs occupata est, idcirco
plenè vacare non potest huius Sacramen-
ti celebrationi, quod in fine Missæ recon-

dendum est, iuxta Constitutionem Innocentij Papæ: neque verò etiam id illius temporis ratio patitur, quod est tempus tenebrarum, luctus & lamentationis de traditione & morte Christi. Altera ratio; *ut, quod in quotidianis Missarum Officijs circa solennitatem est forsitan prætermissum, deuota diligentia supplicatur; & fideles, Festiuitate ipsa instante, intra se præterita memorantes, id quod in ipsis Missarum solennijs, secularibus forsitan agendis impliciti, aut aliàs ex negligentia vel fragilitate humana, minùs plenè gesserunt, tunc attentè in humilitate spiritus, & animi puritate, restaurent.* Tertia, *ad confundendam specialiter Hereticorum perfidiam & insaniam.* Quarta tertiæ consequens est, *ad corroborationem & exaltationem Catholica fidei.*

Cur verò ei Festo celebrando selecta fuerit feria quinta post Octauam Pentecostes, hanc causam reddit S. Thomas dicto Opusculo 57. *Vt qui per totum anni circulum hoc Sacramento utimur ad salutem, eius institutionem illo tempore specialiter recolamus, quo Spiritus sanctus corda Discipulorum edocuit ad plenè cognoscenda huius mysteria Sacramenti: nam & in eodem tempore cæpit hoc Sacramentum à fide-*

libus frequentari. Quippe in Actibus Apostolorum c. 2. S. Lucas scribit, statim post illapsum in Apostolos Spiritum sanctum, fideles assidue versatos fuisse in communione sanctæ Eucharistiæ: *Qui ergo, inquit, receperunt sermonem eius, baptizati sunt: & appositæ sunt in die illa (Pentecostes) animæ circiter tria millia. Erant autem perseverantes in doctrinâ Apostolorum, & communicatione fractionis panis, & orationibus.*

Qua autem occasione adductus fuerit Urbanus ad hoc Festum instituendum, id ipse obscure insinuat in sua Constitutione: *quod scilicet, dum in minori officio esset constitutus, intellexisset quibusdam Catholicis diuinitus fuisse reuelatum, Festum huiusmodi generaliter in Ecclesia celebrandum.* Sed rei totius historiam diffusè narrant, Ioannes Diestemius Blarus Leodienfis in Tractatu à se de huiusmodi reuelatione conscripto, qui habetur editus in calce Magni Speculi exemplorum, & Bartolomæus Fisen, Societatis Iesu Theologus, in libello de origine prima Festi Corporis Christi: nimirum, sanctæ cuidam virgini Ordinis Cisterciensis, nomine Iulianæ, apud Monasterium Montis - Cornelij prope Leodium, cœlesti

quodam viso inter orandum reuelatum
fuisse huiusmodi Festum in vniuersa Ec-
clesia celebrandum esse: cūque de ea
reuelatione illa post vigesimum tandem
annum Iacobum Pantaleonem, Ecclesiæ
Leodiensis Archidiaconum, (qui postea
ad summum Pontificatum euectus Vrba-
ni quarti nomen sumpsit) Hugonem de
Sancto Caro Prouincialem Ordinis San-
cti Dominici, Guiardum Episcopum Ca-
meracensem, Cancellarium Academiae
Parisiensis, atque alios plerosque Theolo-
gos, & sanctos viros consulisset; rem eo-
rum iudicio probatam fuisse, & Festum
auctoritate Roberti Episcopi Leodiensis
in sua diœcesi institutum anno salutis
1246. Deinde verò, anno Pontificatus In-
nocentij quarti decimo, eiusdem observa-
tionem ab eodem Hugone, iam tum Car-
dinali & Sedis Apostolicæ Legato, per
vniuersam Germaniam edictam; ac sub-
inde anno salutis 1254. literis Petri Ca-
pocci, Cardinalis & Legati Apostolici,
confirmatam: ac demum ab Urbano
quarto, in eam rem iam ex prædicta reue-
latione inclinante, exorta noua quadam
occasione prodigij apud Vulsinium super
consecratione hostiæ facti anno 1264,
Pontificatus ipsius tertio & extremo (vt
patet ex eiusdem Epistola ad Euam reclu-

sam apud Diestemiū art. 8. & versu Thier-
rici Vallicploris, qui eo tempore scripsit,

Hocque sui ierno Papatus fecit in anno
vniuersæ Christi Ecclesiæ auctoritate A-
postolica præceptam fuisse, & Festum ip-
sum ab eodem cum omni splendore ac so-
lennitate Vrbe-veteri in Tuscia cele-
bratum, vt eadem Epistola continetur.

Vrbani ea de re Constitutionem con-
firmavit Clemens quintus in Concilio
Viennensi, vt constat ex eodem, c. vnico,
Clement. *de Reliq. & venerat. Sanct.*
quod Glossa in eum locum scribens dicit
ab eo factum esse, quia illa Urbani Con-
stitutio ab omnibus recepta non erat. Pro-
babile tamen est ex dicta Urbani San-
ctione, vt pote facta in Gallia, eius Festi
observationem in Ecclesias Gallicanas
breuī receptam fuisse: quandoquidem
Papirius Massonus lib. 5. de Episcopis vr-
bis, in vita Urbani quarti, refert ex vetu-
stis annalibus, id in Gallia coli cœptum
anno Christi millesimo tercentesimo de-
cimo octauo, qui fuit quartus post obitum
Clementis quinti. Et ex Concilio Seno-
nensi habito anno Domini 1320. constat
eiusdem Festi celebrationem iam eo tem-
pore in more prouinciæ Senonensis
fuisse. Sic enim habet. *Statuimus, ac etiam*

ordinamus, ut quilibet Diœceſanus in ſua diœceſi plebem à Deo ſibi commiſſam, tam per ſe, quàm per alios, loco & tempore congruis, ſalutaribus monitis inducat, ut quarta feria præcedente feriam quintam poſt Octavas Pentecoſtes, qua ſummi & magnifici Corporis & ſanguinis Domini noſtri Ieſu Chriſti Sacramenti memoria celebratur, ad honorem tam pretioſiſſimi Sacramenti, ac ipſarum plebium ſalutem animarum, ſe ab eſu carniū abſtineant, & ieiunent: omnibꝫſque ieiunantibus, verèque pœnitentibus & confeſſis, in remiſſionem ſuorum peccatorum, quadraginta dies de iniuncta ſibi pœnitentia duximus concedendos; totidèꝫſque eiſdem à quolibet Diœceſano in diœceſi ſua auctoritate Concilij huius concedantur. Circa verò proceſſionem ſolem-nem, quæ dicta feria quinta fit à Clero & populo in delatione dicti Sacramenti hiſ diebus, cùm quodammodo diuina inſpiratione introducta videatur, nihil quoad præſens iniungimus, deuotioni Cleri & populi relinquentes.

Martinus quintus eamdem Conſtitutionem ſpiritualibus gratijs auxit, & ſingulis verè pœnitentibus & confeſſis, qui & quoties in ipſius Sacramenti profeſſo ieiunium, vel loco illius aliud pium iuxta ſuorum conſilia Confeſſorum opus, fecerint,

centum; & qui diuinis Officijs in Ecclesijs, in quibus illa celebrari contigerit, interfuerint, pro Matutinali ducentos, & pro Missæ Officio totidem, ac pro qualibet Vesperarum etiam ducentos; reliquarum verò, videlicet Primæ, Tertiæ, Sextæ, & Nonæ, ac Completorijs Festi, octuaginta: rursus autem in quibuscumque Octauarum diebus, pro singulis Matutinalium, Missarum, & Vesperarum, similiter centum; necnon reliquarum Horarum Officiorum huiusmodi, quadraginta: Illis præterea qui processiones, in quibus ipsum viuificum Sacramentum dicto Festo deferetur, continuò secuti fuerint, ac quibuscumque in Festo & Octauarum diebus huiusmodi pro pace & tranquillitate Ecclesiæ Missas deuotè celebrantibus, pro singulis ipsarum, necnon alijs in eodem Festo Eucharistiæ Sacramentum deuotè sumentibus, etiam centum singulis annis, de iniunctis eis pœnitentijs relaxauit. Addiditque idem Pontifex hoc singulare priuilegium, ut in Festo & diebus Octauarum huiusmodi, etiam in terris & locis Ecclesiastico interdicto quauis auctoritate suppositis, pulsatis campanis, ianuis apertis, & alta voce (excommunicatis prorsus exclusis, sed interdictis, ut citius reconciliari studeant, admissis, & illis qui causam vel occasionem huiusmodi interdicti dederint, Altari tunc

nullatenus appropinquantibus) Miſſæ & Officia licitè celebrari poſſint. Eugenius autem quartus anno 1433. vtriuſque Pontificis Conſtitutiones confirmavit, & gratias à Martino conceſſas duplicans, *diebus ab eo relaxatis totidem dies indulgentiæ pariformiter à fidelibus conſequendæ adiecit.* Huius & Martini Conſtitutiones habentur in Bullario, tomo 1.

De proceſſione autem ſanctiſſimi Sacramenti nonnulli dubitant, an ab Urbano ſimul cum ipſo Feſto inſtituta fuerit, quòd de illa ab eo in ſua Conſtitutione non fiat mentio: quaſi verò ſummi Pontifices ſoliti ſint in Feſtorum inſtitutionibus de ſingulis Officij Eccleſiaſtici partibus ſpeciatiim præſcribere. Sed probabilius videtur, vtrique idem fuiſſe initium: quippe cùm publica proceſſio ex communi Eccleſiæ uſu ad Feſti ſolennitatem pertineat, vt ſuprà c. 18. notatum eſt. Urbano autem in inſtitutione ea mens fuit, vt omni genere ſolennitatis, & *plenè*, vt loquitur, hoc Feſtum celebraretur. Et certè plauſus ille populorum, & publica omnium ordinum tripudiatio, exultatio & iubilatio, quæ in celebratione huius Feſti commemorantur ab Urbano, non æquè videntur poſſe conuenire diuinis Officijs quæ ſtatariè in Choro à ſolis Clericis ca-

nuntur, ac pompæ ipsi processionis: & in sola euectione sanctissimi Sacramenti, quæ fit procedendo per vias & loca publica, cernitur imago triumphi illius Christi, cuius causâ ipsemet Institutor Urbanus & Concilium Tridentinum dicunt institutum fuisse hoc Festum, ad confundendam specialiter hæreticorum perfidiam & insaniam. Atque in hac sententia sunt, Ioannes Laziardus in Epitome Historiæ vniuersalis, c. 233. Hermanus Scheder in Chronicis, in sexta ætate mundi, Philippus Bergomas in Supplemento Chronicorum, Onuphrius Panvinius Annotationibus ad Platinam, in vita Urbani quarti, Federicus Nausca in Catechismo Catholico lib. 6. c. 38. Ioannes Molanus in Natalibus Sanctorum Belgii 5. Aprilis, Alfonsus Ciaconius in Vitis Pontificum & Cardinalium, in vita Urbani 4. Henricus Spondanus in Continuatione Annalium Baronij, anno Christi 1264. qui docent, *Urbanum instituisse solennitatem Corporis Christi cum processionibus & Octauis à cunctis fidelibus celebrari*: quanquam Diestemius art. 9. scribit, Ioannem vigesimum secundum, ultra Ordinationem Urbani Clementinis insertam, nouas indulgentias concessisse, atque processionem ordinasse. Sed eius

rei nulla prorsus mentio in Constitutionibus Ioannis, siue quæ inter Extrauagantes, siue quæ in Bullario habentur: neque verisimile est, eum, quando suas illas Constitutiones corpori Iuris inseruit; tanti momenti Ordinationem omissurum fuisse, si illam edidisset, cum ipse Constitutiones Urbani & Clementis de eiusdem Festi institutione & celebratione non omiserit. Et certè verba Concilij Senonensis, quæ superius citauimus, videntur perspicuè indicare, in vsu fuisse eam processionem in Gallia ante Pontificatum Ioannis, qui electus fuit septimo Idus Augusti, anno 1316. Ex his patet, quàm longè à vero exerrauerint, qui prima initia huius processionis retulerunt ad annum 1404. decepti verbis Donati Bossij, qui in Chronicis suis scribit, die Iouis vigesimo nono Maij eius anni, Corpus Christi solenniter per Papiam urbem circumferri cœptum esse: quasi quod tunc Papiæ nouum fuit, toti orbi antè ignotum & inusitatum fuisse oporteret.

Huius processionis ordo ac ritus omnis pertinet ad exhibendam oculis speciem publici triumphi: in primis verò circumductio illa seu vectatio sanctissimi Sacramenti hierotheca inclusi in humeris Sacerdotum, instar Arcæ fœderis, in vicem

curtus triumphalis. Quem ritum, non recens inuentum, sed iam inde à primis temporibus in Ecclesia vsitatum fuisse, docet Capitulum quintum Concilij tertij Bracarenfis, quod in hunc modum statuit. *Bona quidem res est diuina Sacerdotibus cō-
rectare mysteria: sed cauendum valdè est, ne
hoc quisque ad vsum prauitatis suæ intor-
queat, vnde soli Deo de bona conscientia pla-
cere debuerat. Scriptum est enim, Væ his qui
faciunt opus Domini fraudulentè. & desir-
diosè. Vt enim quorundam Episcoporum de-
testanda præsumptio nostro se cœtui intulit
dirimendam, agnouimus quosdam de Episc-
copis, quod in solennitatibus Martyrum ad
Ecclesiam progressuri Reliquias collo suo im-
ponant, & ut maioris fastus apud homines
gloria intumescant (quasi ipsi sint Reliquia-
rum Arca) Leuitæ albas induiti in sellulis eos
deportent. Quæ detestanda præsumptio abro-
gari per omnia debet: ne sub sanctitatis spe-
cie simulata vanitas sola præualeat, si mo-
dum suum vniuscuiusque ordinis reuerentia
non agnoscat. Et ideo antiqua in hac parte
& solennis consuetudo seruabitur, ut in festis
quibusque diebus Arcam Domini cum Reli-
quijs, non Episcopi, sed Leuitæ, in humeris ge-
stent, quibus & in veteri lege onus idem im-
positum nouimus esse & præceptum. Quod si
& Episcopus Reliquias per se deportare cle-*

gerit; non ipse à Diaconibus in sellula vehatur, sed potius, pedissequa una cum populis progressionem procedente, ad conuenticula sanctorum Ecclesiarum sancta Dei Reliquia per eundem Episcopum portabuntur. En anno salutis sexcentesimo septuagesimo quinto Concilium disertè significat, antiquam & solennem fuisse consuetudinem gestandi in humeris, & publico ritu honoris & adorationis causa, festis diebus, Arcam Domini, procedendo una cum populis ad Ecclesias sanctas. Si iam tunc antiqua & solennis fuit illa consuetudo, certum est aliquot antè seculis eius rei usum in Ecclesia Catholica fuisse receptum & obseruatum: quod quidem haud procul abest ab Apostolicis temporibus.

Ne quis verò hæreat in verbo *Reliquiarum*, quasi de Martyrum Reliquiis accipiendum foret (qua in re non pauci offenderunt) scire opus est, usum fuisse in primitiua Ecclesia, & subsequētis tēporibus, ut sanctum Domini Corpus, cum asseruabatur, nomine *Reliquiarum* appellaretur; quasi quod ex sacrificio antea cōto reliquū superesset. Ea appellatione vsi sunt, præter alios, S. Clemens Romanus, beati Petri discipulus, Epist. 2. ad Iacobum fratrem Domini, & Constit. Apostol. lib. 8. c. 13. & 31. ubi vtitur verbo *περισσυσμάτων*, & *πε-*

Ἐπιστολῶν ἐυλογιῶν; S. Cyrillus Alexandri-
 nus, qui præfuit Concilio Ephesino anno
 Christi 431. Epist. ad Calosyrium, quæ præ-
 fixa est libro contra Anthropomorphitas,
 ubi vocat λείψανον; & Liturgia Præ-sancti-
 ficatorum in Euchologio, quæ similiter
 vocat ἄγια λείψανα, *sanctas Reliquias*; & S.
 Germanus Cōstantinopolitanus in Theo-
 ria mystica, θεία λείψανα, *diuinas Reliquias*;
 & in Ecclesia Gallicana Concilium Ma-
 tisconense secundum (habitū anno 588.)
 quod c. 6. disertè appellat *Reliquias sacri-
 ficiorum*, & simpliciter *Reliquias*. Et, si ver-
 ba Concilij Bracarensis attendantur, cla-
 rum est, has denominationes quibus vti-
 tur, *diuina mysteria quæ contrectantur à Sa-
 cerdotibus, sanctæ Dei Reliquiæ, Arca Do-
 mini*, Reliquiis Martyrum conuenire ne-
 quaquam posse; sed soli Eucharistiæ Sa-
 cramento, quod Deum præsentem in se &
 cœlestis cibi manna continet, cuius figura
 extitit Arca veteris Testamenti, quæ cum
 religione & reuerentia portabatur à Le-
 uitis, quasi Dei sedes ex eius propitiatorio
 oracula edentis, & vota suorum exau-
 dientis: de quo solo Sacramento dici po-
 test, quòd in eo diuina mysteria contre-
 ctentur à Sacerdotibus.

Hic verò subit mirari, quid venerit in
 mentem Auctori cuidam scribenti media

in Gallia de cæremoniis Ecclesiasticis, ut hunc morem gestandi in humeris sanctissimum Sacramentum corruptelæ & abusus damnaret. Itane corruptelam & abusum vocemus, ritum à Deo institutum Exodi 25? ritum à Sacerdotibus & Levitis in veteri lege ex mandato Dei sapius observatum, Iosue 6. 3. Regum 8. 1. Paralipom. 15. & 2. Paralipom. 5? ritum ante mille paulo minùs annos in Concilio celebratissimo, pro antiquo & solenni, id est, pro traditione Ecclesiastica, commemoratum? ritum ab omni memoria per Galliarum prouincias, atque adeo in ipsa religiosissima, & regina ciuitatum Lutetia, in oculis tot Pontificum & Theologorum, cum summa antiquitatis reuerentia, publica omnium ordinum consensione & comprobatione, retentum ac celebratum? ritum denique per vniuersam Ecclesiam in deferendis Sanctorum imaginibus & Reliquiis, ab ipsis etiam summis Pontificibus, omnibus sæculis vsitatum? *Illud breuiter te admonendum puto* (ait S. Hieronymus ad Lucianum, & habetur dist. 12.) *traditiones Ecclesiasticas, præsertim quæ fidei non officiant, ita obseruandas, ut à maioribus traditæ sunt: nec aliquorum consuetudinem aliorum contrario more subuerti.*

Ad

Ad eundem modum in Ecclesia Græca antiquus mos fuit, quoties myfteriorū Præfanctificatorū Miſſa celebranda eſſet, vt Sacerdos, ſacris veſtibus indutus, hoſtiam conſecratam capiti venerationis ergo impoſitam in diſco velo cooperto geſtans, ac longiore circuitu per Eccleſiam lenitè & compoſito inceſſu progrediens, eam à tabernaculo ſeu reconditorio ad menſam propoſitionis à latere Altaris inſtructam deferret. (vnde poſtea Altari ad rem ſacram faciendam inferretur) præcumbens cereis accenſis, & Diacono capite reuerenter inclinato thus adolente; populus verò interea flexis genibus in adorationem procumberet, Præpoſito Eccleſiæ ter inclamante, *Venite, adoremus*; & Choro ſubinde accinente, ἰδοὺ θυσία μυſτικὴ, ἔτετελειωμένη, id eſt, *Eccæ ſacrificium myſticum, & conſummatum*. Id conſtat ex Liturgia Ante-conſecratorum; & eiſdem Declaratione, quæ habentur in Euchologio, & tomo 6. Bibliothecæ Patrum, ex Theoria myſtica rerum Eccleſiaſticarum Sancti Germani Archiepiſcopi Conſtantinopolitani, ex Nicolao Cabasila in Expoſitione Liturgiæ, c. 24. & Arcudio lib. 3. de concordia Eccleſiæ Occident. & Oriental. c. 19. 57. & 58. Et hæc ſanctæ Eucharistiæ circumgeſtatio, in Expoſitione

Liturgiæ Præ-sanctificatorum, appellatur
αἰὼδος τοῦ ἁγίου δώπου, processio sacrorum
 donorum.

Cæteræ circumstantiæ, quæ ad apparatus huius triumphî pertinent, & in Sacro Andegauensi observantur, hæc sunt: pegmata, seu machinæ gestatoriæ, circumlucen-
 bus in summo cereis, in quibus Christi mi-
 racula & mysteria, sancti Sacramenti figu-
 ræ & institutio, ac variæ similis argumēti
 historiæ ex utroque Testamento, cereis si-
 mulacris expressæ, spectantur; item alia
 pompæ fercula, cruces, vexilla, Sanctorum
 imagines, & insignia quæ à sodalitiis
 magistris & signiferis præferuntur; sarta,
 festæ frondes, corollæ è floribus in capiti-
 bus puerorum symphonicorum & aliorum
 Ecclesiæ administratorum; viæ linteis & velis
 instar perpetui conopei contextæ, & flori-
 bus omnis generis atque herbis odoratis
 constrata; parietes utrinque prætenti aulæis
 & ramis virentibus; longus ille ordo proce-
 dentis Cleri & populi, cum facibus, funali-
 bus, & cereolis ardentibus, ad modum illius
 ignis qui olim, pro symbolo regis maiesta-
 tis, Imperatoribus publicè procedentibus
 præferebatur, ut est apud Herodianum lib.
 2. Historiarum, & Codinum lib. de offic.
 Constant. c. 6. ubi Lampadarius appellatur

is qui eiusmodi ignem seu lampadem ardentem gestabat; lampadem, inquam, cuius summa pars cinnabari tincta, media inaurata erat, insertis in orbem cruciculis coccineis, & duplici corona circumducta, ut est apud eundem Codinum, & Balsamonem in Melete prima de privilegiis Patriarcharum. Quo genere luminis significatur professio publica fidei de diuinitate & gloria Regis triumphantis, qui est *Splendor gloriae Patris*, Hebr. 1. *Lux vera, quae illuminat omnem hominem venientem in hunc mundum*, Ioan. 1. & *Lux mundi*. Ioan. 8. & 9. Qua de causa etiam Honorius tertius, e. *Sancti*. de celebr. Miss. vult, semper lumen praecedere, quando salutaris hostia defertur ad infirmos. Deinde chori fidicinum, cornicinum, tubicinum, ac tibicinum, & omnis generis musicorum, ante curram triumphalem, id est, ante Arcam Sacramenti, ludentium in omnibus lignis fabrefactis, & citharis & lyris, ut 2. Reg. c. 6. & 1. Paralip. c. 13. atque in primis festiuae Sacerdotum & Clericorum acclamationes, cum laetitia canentium sacros Hymnos, instar sollemnis illius carminis, *Io triumphes*; tabernacula, quae secundum viam plerisque in locis per intervalla exstruuntur, ad faciendas stationes, in morem arcuum triumphalium; concio pu-

blica de honoribus victori Imperatori Christo decernendis; sacrificium solenne ad Altare; ac postremò epulum publicum Senatui populòque Christiano, magna videlicet illa cœna, omni genere deliciarum instructissima, quam fecit Rex regum homo Deus, omnibus inuitatis se in cibum & vitam præbens; ad quam cœnam publica hortatione inuitari fideles Dominica Festum præcedente iussit Urbanus in sua Constitutione. Reliquum foret ad perfectam imaginem triumphi, vt in singulis vrbibus via, qua euehitur hæc Christi triumphantis processio, *Via triumphalis more Romano* appellaretur. Vniuersum ordinem & pompam huius triumphi, iuxta ritum Ecclesiæ Andegauensis, *eleganter admodum & graphice* descripsit Ludouicus Cellotius, Professor Societatis Iesu, in libro tertio Mauritiados.

Atque hæc quidem sunt publicæ celebritatis ac lætitiæ, & externæ adorationis signa. Quibus autem deuotionis atque internæ pietatis officiis Regem suum triumphantem hac die prosequi debeant fideles Christiani, egregiè explicat S. Thomas Opusc. 57. his verbis: *Conuenit itaque deuotioni fidelium, solenniter recolere institutionem tam salutiferam tamque mirabilis Sacramenti: vt ineffabilem modum diuinæ præsentia in Sa-*

ramento visibili veneremur; & laudetur Dei potentia, quæ in Sacramento eodem tot mirabilia operatur; nec non & de tam salubri tamque suavi beneficio exoluantur Deo gratiarum debite actiones. Quæ eadem sententia est sacro-sancti Concilij Tridentini, loco antè citato: ut Christiani omnes, singulari ac rara quadam significatione gratos & memores testentur animos erga communem Dominum & Redemptorem, pro tam ineffabili, & planè divino beneficio, quo mortis eius victoria & triumphus representatur. Ad hos actus religionis referenda sunt omnia quæ in hac solennitate fiunt.

Cæterum, ad debitam huius processionis sanctificationem, operæ pretium foret in usum reuocare decretum Concilij Mediolanensis quarti, quod habetur superius c. 3. ut omnes sanctissimum Sacramentum venerabundi prosequantur, non verò, quasi ad otiosum aut ludicrum spectaculum vocati, id è fenestris, aut officinis seu tabernis, prospicerent.

*De Processione vespertina in Festo
Assumptionis B. Mariae, pro
Rege & Regno.*

C A P V T XXVI.

VT singulis regnis suos dedit Deus præ-
stitos Angelos ac tutelares, qui ca-
tueantur atque custodiant, Daniel c. 10.
Dionysius Arcopag. c. 9. celest. hierarch.
Clemens Alexandr. lib. 6. Stromat. ita Re-
gibus ac Principibus solenne est, è numero
Sanctorum in cælo regnantium certos sibi
suisque ciuitatibus ac regnis patronos deli-
gere, in quorum tutela sint.

Constantinus Imperator (vt est apud
Nicephorum lib. 8. Hist. Eccles. c. 26. & Zo-
naram tertia parte Annalium, in Constanti-
no Magno) cum Byzantiæ sedem imperij sui
collocare decreuisset, eam urbem Dei Ge-
nitrici dicauit, ac de suo nomine Constanti-
nopolim appellauit, accersitis è Concilio
Nicæno Episcopis, qui eius Dedicationis ri-
tum solenni more peregerunt: in cuius rei
memoriam Encæniorum solennitas, quasi
Natalis urbis, (vt appellatur in Anthologio,

& à Zonara) exinde in Ecclesia Græca singulis annis celebrari consuevit die vndecima Maij, vt constat ex vtroque Menologio, vbi Dedicationis annuæ hæc formulahabetur: τῆς θεοτόκου ἡ πόλις, τῇ θεοτόκῃ προσφύρας τὴν ἑαυτῆς αἰατῖνεται σῶσασιν: ἐν αὐτῇ γὰρ ἐστὶν κληίαι καὶ βασιλεύει; δι' αὐτῆς περιπατεῖται, κραταιοῦται, καὶ ἀσφαλίζεται; βοῶσα πρὸς αὐτὴν, χαῖρε ἡ ἐλπίς πάντων τῆς ἀφ' ἧς: Id est, Dei Genitricis Urbis, Dei Genitrici suam constitutionem propensis studiis dedicat: in ipsa enim firma stat, & regnat; per ipsam incolumis seruatur, potens est, & permanet; ei acclamans, Ave spes omnium finium terræ.

Eadem religione motus Sanctus Stephanus primus Hungarorum Rex, vt primum regio diademate coronatus est, se ac regnum suum publico voto sanctissimæ Virginis Mariæ nomini ac tutelæ consecrauit: inque eius rei memoriam Albæ, quæ regia Hungarorum ciuitas est, basilicam insigni opere atq; ie ornatu eius honori exædificauit: ex quo illi deinceps eam Dominam indigitarunt, & solennitatem Assumptionis eiusdem Festum Domine appellarunt, vt scribit Charituius in eius vita apud Surium.

Constantinianæ ac Stephanianæ pietatis imitator Ludouicus tertius-decimus, Gallia-

rum & Nauarræ Rex inuictissimus, cum euerfa rebellantium hæreticorum coniuratione, Regni magnam partem hæresim contaminatione purgasset, & instauratis templis atque Altaribus, legitimisque sacris restitutis, quasi alter Iudas Machabæus, nouum veluti templum imperij ac ditioris suæ Deo sanctificare instituisset, anno salutis millesimo sexcentesimo trigesimo octauo, se ac populum regnûmque suum, atque adeo vniuersam rem Francicam, in clientelam Deiparæ Virginis solenni voto dedit & dicauit, eamque Patronam regni publico edicto declarauit, cuius ope ac præsidio singulari rem à se eo bello prosperè gestam plurimis experimentis cognouerat; atque, in monumentum eius rei, processionem per vniuersam Galliam singulis annis die festo Assumptionis eiusdem Virginis fieri iussit. Cuius pietati obsecundans Claudius Episcopus Andegauensis, sicut olim Paralip. lib. 2. c. 29. mandante Rege Ezechia, in renouatione & purificatione templi Ierosolymitani, Sacerdotes & Leuitæ omnis generis sacrificia obtulerunt, pro regno, pro sanctuario, pro Iuda: ita ille de consilio Capituli sui statuit, quotannis ipso Festo Assumptionis B. Mariæ, post Vespertinum Officiû, solennem processionem,

in omnibus Ecclesiis Diœcesis, tam Cathedrali, Collegiatis & parochialibus, quàm Monasteriis, celebrari; in qua preces Deofundantur, pro salute & incolumitate Regis, pro pace & tranquillitate Regni, & prospero statu eiusdem; & simul agantur gratiæ de omnibus beneficiis in Regem Regnùmque collatis; ac de integro, nouâ veluti Dedicationis formulâ, vtriusque tutela eidem Virgini commendetur; & populus salutaribus hortamentis inuitetur ad Festum Assumptionis singulari deuotione celebrandum, & Dei Genitricem, vt Patronam Galliæ ac Dominam, speciali veneratione & cultu prosequendam.

Porro, quod plures Patroni eidem Regno successiuè assumantur (vt hęc beatissima Virgo post Sanctos Michaëlem, Dionysium, & Remigium) id deriuatum est ex antiquo ritu Ecclesiæ; quæ, quoties templorum Dedicationem renouat, toties novos iis Patronos ac tutelares Sanctos adsciscit; vt cernere est in Ecclesia Andegauensi, quæ primùm Deo dicata sub nomine & patrocinio beatissimæ Virginis, in secunda Dedicatione Sancti Mauritij & sociorum à sancto Martino, in tertia Beati Maurilij memoriæ ab Huberto Andegauensi Episcopo sacrata fuit: itémque in Ecclesia Turonen-

ſi, quæ Mauritium & Gatianum; & in Cenomanenſi, quæ Geruaſium, Protadium, & Iulianum, Patronos ſucceſſiuè aſſumpſit.

De Proceſſionibus menſtruis, anniuersariis, & aliis ſimilibus.

C A P V T XXVII.

IOb, veritus ne filij ſui quidpiaculi mutua viuendi conſuetudine contraherent, ſeptimo quoque die eos ad ſe conuocare, & certo ritu precibus ac ſacrificiis expiari ſolitus erat, Iob. c. i. In lege autem Moſaica, Leuit. c. 23. quotannis decimo die menſis ſeptimi, id eſt, Septembris, Feſtum Expiationum celebrabatur, in quo publico ieiunio & propitiatoriis ſacrificiis peccata populi toto anno commiſſa procurabantur. Ad eundem modum ſancta mater Eccleſia, pro filiorum ſalute ſollicita, ſtatis temporibus ſuos celebrat Expiationum dies, quibus eorum noxas & crimina expiare, iram Dei placare, & eius miſericordiam benignitatēque iis conciliare ſolet, publicis tum ieiuniis, tum orationibus & ſacrificiis: vt, iuxta Concilium Toletanum quin-

tum, c. I. quoniam, abundante iniquitate, & deficiente charitate, eousque protelatur malitia, ut noua exerceantur facinora, noua quoque hæc ipsa surgat consuetudo, quæ possit ante omnipotentis Dei oculos nostra esse purgatio. Sic septimo quoque die, nempe Dominico, purgandis singularum hebdomadarum piaculis, solenne sacrum, & lustrationem publicam aquæ sanctæ sparsione, per Ecclesias parochiales celebrat: qua ratione Stephanus tertius, apud Anastasium Bibliothecarium, pro salute prouinciæ, & omnium Christianorum, omni Sabbatorum die litaniam fieri statuit. Sic per singulas anni tempestates Ieiunia, quæ appellantur Quatuor temporum, obseruat, singulis mensibus singulos dies consecrando, ait Ordo Romanus: de quibus Ieiuniis ita Sanctus Leo Serm. 9. de ieiunio septimi mensis: Ideo ipsa continentia obseruantia, quatuor est assignata temporibus, ut in idipsum totius anni redeunte decursu, cognosceremus nos indesinenter purificationibus indigere; semperque esse nitendum, dum huius vitæ varietate iactamur, ut peccatum, quod fragilitate carnis & cupiditatum pollutione contrahitur, ieiuniis atque elemosynis deleatur. Sic processionem generalem, quæ certis diebus per annum concursu ciuitatum & Ecclesiarum fiunt,

In hoc genere ſunt illæ, quæ apud nos in primis Dominicis menſium celebrantur, deriuatæ (vt conſpicere licet) ex c. 6. Concilij Toletani decimi-ſeptimi, quod ſic habet: *Ideo ſecundum Euangeliftam, qui ait, Vigilate & orate, ne intretis in tentationem, in commune ſtatuentes decernimus, vt deinceps per totum annum in cunctis duodecim menſibus, per vniuerſas Hiſpaniæ & Galliarum prouincias, pro ſtatu Eccleſiæ Dei, pro incolumitate Principis noſtri, atque ſaluatione populi, & indulgentia totius peccati, & à cunctorum fidelium cordibus expulſione Diaboli, exomologeſes votis glifcentibus celebrentur: quatenus, dum generalem omnipotens Dominus afflictionem proſpexerit, & delictis omnibus miſeratus indulgeat, & ſeuientis Diaboli incitamenta ab animis omnium procul efficiat. Quo loco animaduertendum eſt, ex Concilio Moguntino habito ſub Leone tertio, c. 32. ſupplicationes publicas, quæ ſunt pro remiſſione peccatorum, olim ſpeciali nomine exomologeſes, id eſt, confeſſiones, appellari ſolitas fuiſſe: quòd in eis Chriſtiani, quaſi rei conſitentes peccata ſua, publicè pœnitentiam agerent.*

Ad hoc genus etiam pertinent proceſſiones anniuerſariæ: cuiuſmodi ſunt verno tempore Litanix maior & minor: & illæ

quas in Gallia Concilium Lugdunense primum, c. 6. prima hebdomada noni mensis, id est, Nouembris, quoque anno celebrari ab omnibus Ecclesiis seu parochiis sanxit: quas in Hispania Concilium Gerundense proxima hebdomada post Pentecosten, per triduum à feria quinta in Sabbatum, & quas Calendis Nouembribus simili ordine, cum abstinencia à carnibus & vino, celebrari statuit; & quas similiter Concilium Toletanum quintum, c. 1. iussit omni tempore ubique annua successione peragi triduo à die Iduum Decembrium, ut indulgentia delictorum lacrymis impetretur: ea quam describit Sidonius Apollinaris Epist. 17. lib. 1. Conueramus ad Sancti Iusti sepulcrum; sed tibi infirmitas impedimento ne tunc adesses: processio fuerat antelucana, solennitas anniuersaria, populus ingens sexu ex utroque, quem capacissima basilica non caperet, & quamlibet cineta diffusis cryptoporticibus: & quæ in ciuitate Andegauensi fieri solet die festo Sancti Sebastiani. Eodem referendæ sunt aliæ omnes, quæ pro expiandis ciuitatibus ac populis, & publicis calamitatibus deprecandis, quocumque tempore celebrantur: de quibus habetur hoc Decretum Liberij Papæ, post eius Epistolas, tomo 1. Conciliorum: *Si euenerit fames, inæqualitas aeris, pe-*

Stilentia, vel talis qualiscumque tribulatio; statim ieiuniis, elemosynis, & obsecrationibus, Domini misericordia deprecetur. De earumdem indieendarum diebus sic statuit Concilium Mediolanense sextum, c. Quæ ad processiones pertinent: Stati dies processionum, quæ pro gratiarum actione fient, ut antiquis rituum monumentis traditum est; hæ sunt: Dominicus scilicet dies; vel feria quinta. Si verò pro calamitatibus, peste, bello, fame, aliisque id generis, supplicandum est, processiones publicæ agantur feria quarta, sexta, & Sabbato.

Fiunt etiam sæpe processiones anniuerſariæ, ad agendas Deo gratias pro publico aliquo beneficio: ut pro ciuitatibus aut prouincijs seruatis, ab obsidione vel peste liberatis, aut ex hoste receptis; pro insigni aliquo miraculo, pro restituta religione & sacris; in memoriam obtentæ victoriæ, tum denique pro quouis prospero rerum successu.

*De Triduanis & Nonemdiolibus
Processionibus.*

C A P V T XXVIII.

IONÆ c. 3. ubi iuxta Hebraicum textum legitur, *Adhuc quadraginta dies, & Ninive subuertetur*; translatio Septuaginta Interpretum habet, *Adhuc tres dies, & Ninive subuertetur*. Et hanc lectionem sequuti sunt doctissimi à Græcis Patribus, Origenes Homilia 16. in Numeros, S. Athanasius lib. de passione & cruce Domini, Ioannes Chrysostomus Homilia 27. in Genesim, & Homilia 1. ac 10. de pœnitentia, Cyrillus Alexandrinus Commentario in Ionæ c. 3. & Homilia 1. de Festis Paschalibus, Isidorus Pelusiota Epist. 149. lib. 4. qui omnes scribunt, triduanum fuisse ieiunium ac pœnitentiam Niniuitarum, cuius intuitu veniam à Deo obtinuerunt: quod ante econtradidit S. Clemens Romanus, Constit. Apost. lib. 5. c. ultimo. *Niniuite*, inquit, *facto ieiunio trium dierum, & totidem noctium, impendens diuina iræ periculum effugerunt*. Et idem sentit Honorius in Gemma animæ, lib. 3. c. 139. Inde nata est antiquissima Ecclesiæ observatio, ut

in grauioribus necessitatibus, ad exemplum Niniuitarum, triduana ieiunia, & triduanas supplicationes indicat. Hoc docet S. Isidorus lib. 2. de Eccles. offic. c. 41. *Triduanis autem diebus ieiunare* (inquit) *de exemplo sumptum est Niniuitarum; qui, damnatis pristinis vitis, totos se tribus diebus ieiunio ac pœnitentiæ contulerunt, & operti saccis Deum ad misericordiam pronocauerunt.* Idem scribit Rabanus lib. 2. de Institutis clericorum c. 26. Et hoc ex Apostolica traditione promanasse colligitur ex ieiuniis triduanis Quatuor temporum, quæ Apostolicis & legalibus institutis electa fuisse asseuerat S. Leo Sermon. 2. de ieiunio Pentecostes, & Sermon. 8. de ieiunio septimi mensis. Eius rei exempla frequentissima passim occurrunt. Apud Gregorium Turonensem lib. 10. Histor. Franc. & in Concilio Moguntino sub Leone tertio, c. 33. supplicatio Litaniarum maioris cum ieiunio primum indicta fuit in triduum, exemplo Niniuitarum, vt colligere est ex his verbis Sermonis S. Gregorij quem tunc habuit ad populum: *Veternosas namque Niniuitarum culpas triduana pœnitentia absterfis; & ex Antiphona, Timor & tremor, quæ ex eiusdem Sacramentario canitur in processione eiusdem Litaniarum: & eò spectat inscriptio Homiliarum S. Maximi, In Litanis;*



De ieiuniis Niniuitarum, quæ habetur inter Homilias æstiuales. Ad eundem modum Litanía minor, quæ in hunc vsque diem mansit triduana, ad imitationem Niniuitici ieiunij instituta fuit, vt constat ex his verbis Sidonij Apollinaris ad ipsum Institutorem Mamercum Ep. 1. lib. 7. *Ad noua celer Veterum Niniuitarum exempla decurristi.* Et ob hanc causam Syri Christiani Rogationes vocant *Ieiunium Niniuitarum*, vt refert Genebrardus in Chronologia. Apud eundem Gregorium Turonensem lib. 9. eiusdem Historiæ, pro sananda lue inguinaría, quæ increbuerat in Gallia Lugdunensi, supplicatio & ieiunium in triduum decernitur. In Concilio Gerundensi, c. 2. triduana abstinencia post Octauam Pentecostes, & c. 3. litania per triduum in Calendis Novembris, cum abstinencia à carnibus & vino. In Concilio Bracarensi secundo, c. 9. ante Natiuitatem Domini, per triduum cum Psalmis per Sanctorum basilicas ambulantes, celebrant litánias. In Concilio Tolitano quinto, c. 1. omni tempore vbique annua successione litaniæ triduo à die Iduum Decembrium peraguntur. In Concilio Turonensi secundo, c. 17. triduum litaniarum in Calendis Ianuarij. In Matisconensi primo, c. 9. ieiunium cum Missa ritu. *Quadrage-*

geſimali ternis feriis per ſingulas hebdomadas, à Feſto S. Martini uſque ad Natale Domini. Hadrianus Papa primus, apud Anaſtaſium Bibliothecarium in eius vita, triduana orandi perſeuerantia Tiberis inundationem coërcuit. Idem Epist. 8. Carolum Magnum inuitat ad perficiendas triduanaſ litanias in vniuerſis finibus regnorum ſuorum. Ipſe Carolus Magnus in Capitulari Interrogationum, c. 1. commemorat ſe anno præcedenti tria triduana ieiunia feciſſe. Ludouicus Pius in ſuo Capitulari tertio, c. 3. generale triduanum ieiunium ſecunda feria poſt Octauam Pentecoſtes celebrandum denuntiat. In Epistola Episcoporum ad eundem Ludouicum in Concilio Pariſienſi ſexto, lib. 3. cùm mucro diuinus imperium interiùs exteriùsque multifariis attereret cladibus, triduanum ieiunium ad earum expiationem peragitur. In Concilio Metenſi triduanum ieiunium cum litaniiſ. Apud Nithardum lib. 3. hiſtoriæ diſſenſionis filiorum eiùſdem Ludouici, ipſe Ludouicus poſt victoriam triduanum ieiunium celebrat. In Epistola Concilij Moguntini primi ſub Rabano, triduanum ieiunium cum litaniiſ pro celebratione Concilij obſeruetur. In libro Sacramentorum Grimoldi Abbatis, in triduano ieiunio ternæ pro ſin-

gulis diebus habentur benedictiones ab
Episcopis faciendæ. Apud Anastasium Bi-
bliothecarium in vita Benedicti tertij, Cle-
rus & populus Romanus ieiuniis & oratio-
nibus tribus diebus & noctibus vacant, pro
dissolviendo schismate. Apud Petrum Cas-
sinensem in Chronico, triduanum ieiunium
cum orationibus & eleemosynis, pro eligen-
do summo Pontifice. Et etiamnum viget
sancta consuetudo Romanæ Ecclesiæ, im-
perandi in tres ferias per singulas hebdo-
madas ieiunium, cum processionibus & pre-
cibus, in generali Iubilæo. In legibus quæ
feruntur Æthelredi regis Anglorum, iube-
tur omnis Christianus, qui ætatem habet,
ieiunare tribus diebus, scilicet Lunæ, Martis,
& Mercurij, ante Festum S. Michaëlis, in pa-
ne & aqua, & herbis crudis: & omnis Pres-
byter ire cum populo suo ad processionem
tribus diebus, nudis pedibus. In Concilio
Mediolanensi quinto, iubetur *Episcopus;*
cum primum in locis suis pestis grassatur,
certain statasque publicas processiones triduanas,
non semel, sed iterum, atque adeo sæpius, si
opus erit, & in Urbe, & in diocesi indicere:
vbi etiam refertur præclarum hoc exem-
plum efficaciarum processionum; quod,
cum ciuitas Mediolanensis, funesta pestis con-
tagio, varia multiplicique strage diu affecta

atque afflicta, tandem nullo alio remedio sustentaretur, diuinitus liberata est publicarum processionum & triduanarum supplicationum officii, & ardentissimus pietatis pœnitentieque studiis atque operibus.

Et hæc quidem triduanæ supplicationes, ut alias superant, tum perseverantia orandi, tam veneratione mysterij sanctissimæ Trinitatis, & imitatione Niniuiticæ pœnitentiæ; ita præcipuam vim habere censentur ad placandum Deum, si cum seria conuersione & sincera deuotione fiant.

Sed in eo genere maximè insignes sunt Nouendiales processionēs, quæ ternæ dierum triade cultum & reuerentiam sanctissimæ Trinitatis multiplicantes, & orandi perseverantiā ipsa prorogatione augentes, & pœnitentiæ opera in longius spatium protendentes, vim quasi afferunt diuinæ iustitiæ, & noueno impetu humiliationum ac precum ad eius indignationem expugnandam summa vi incumbunt. Ideo hoc supplicandi genus in maximis calamitatibus & grauissimis necessitatibus adhibetur, quasi potentissimum & efficacissimum malorum remedium. Habet enim arcanam quandam vim & velut ineluctabilem triplicata ista superbenedictæ Trinitatis inuocatio. Quæ religione ductus S. Gregorius lib. 7.

Epist. ep. 63. instituit, vt solennis illa precandi formula, *Kyrie eleison*, quæ ter solum antè dicebatur, nouies in Missa repeteretur; imitatus ea in re cœlestem Angelorum symphoniam, qui nouem ordinibus dispersi, Hymnum illum ternarium, *Sanctus, Sanctus, Sanctus*, assiduè concinentes, nouena multiplicatione gloriam sanctissimæ Trinitatis in perpetuas æternitates prædicant.

De Processionibus ambarualibus.

CAPVT XXIX.

MOS est in rusticanis parochiis incunte vere agros lustrare, & earum fines circumeundo supplicationes agere, unde ab ambiendis aruis, ambaruales dicuntur: de quibus Concilium Colonienſe c. 8. *Quod processiones per agros & campos peraguntur, rationem quidem habet, nempe quod populus oret vt segetes ac fruges terræ à Domino conseruentur.* Earundem meminit Concilium Mediolanenſe primum c. de processionibus & supplicationibus, & Riſuale Romanum, c. de processionibus.

In his duo præcipuè spectari possunt, citj.

cuitus seu obambulatio religiosa per agros,
& oratio.

Circumeundi ritum habemus Iosue c. 6. vbi, Deo iubente, vniuersus exercitus Israël sex diebus urbem hostilem Iericho circuiuit, certo ordine procedens cum Arca fœderis, Sacerdotibus septem præeuntibus, & clangore tubarum quacumque incedebant personantibus: die autem septimo, septeno circuitu adhibito, cum ad strepitum tubarum vniuersi populi concitus clamor accessisset, repente omnes urbis muri conciderunt. Similiter lib. 2. Esdræ, c. 12. vbi in solennitate Dedicacionis urbis Ierusalem, Sacerdotes cum magistratibus & populo circa muros processionem agunt in hymnis & canticis. Inde exemplum sumpsit Ecclesia circumeundi cum hymnis & precationibus ea loca, quæ benedici & sanctificari, aut diuinæ protectionis præsidio aduersus ingruentia mala muniti, aut aliàs virtute diuina percelli cupit: vt apud Dionysium Areopagitam, Eccles. hierarch. c. 6. apud Euagrium, Eccles. hist. lib. 4. c. 25. vbi notanda sunt illa verba (*totum sanctuarium circumiens, vti in statis adorationis diebus fieri solebat*) apud Anastasium Bibliothecarium in Leone quarto, Gregorium Turorensem Histor. Franc. lib. 3. c. 29. lib. 1. de

gloria Mart. c. 13. libro de vitis Patrum, c. 4. & lib. de gloria Confess. c. 79. vbi, *ad arcendam pestem, circumueunt urbem Remorum cum vicis, nec pratercunt vllum hospitium, quod non hac circuitione concludant*; apud Ioannem Chrysostomum Homilia 19. ad populum Antioch. in Triodio Græcorum variis locis; apud Aimeinum lib. 2. de gestis Franc. c. 19. Capitularium lib. 5. c. 120. in Ordine Romano, in ordine consecrationis Ecclesiæ & Altaris; apud Honorium in Gemma animæ lib. 1. c. 70. in Concilio Mediolanensi quarto, c. de processionibus.

Oratio fit ad Deum, vt fructus terræ dare, conseruare, & tempestiuè maturare dignetur; vt, aëre purgato, noxia quæque à segetibus, vineis, arboribus frugiferis, & pecoribus depellat; nebulas, tempestates, & pestiferos syderum afflatus auertat. Quo precandi ritu, suo modo benedicuntur rustica prædia & possessiones, vt omnia in iis feliciter proueniant, iuxta benedictionem quam dedit Isaac Iacob filio suo, Genes. 27. *Det tibi Deus de rore calis, & de pinguedine terræ, abundantiam frumenti & vini.* Atque ideo præferuntur cruces & vexilla sacra, quorum aspectu territi Dæmones fugentur, ne quid exitij iis inferant: & in eundem vsum adhibetur sparsio aquæ benedi-

et per agros, iuxta Concilium Nannense, c. 5. quod etiam per mansiones, & agros, & vineas, & super pecora, atque super pabula eorum, conspergi statuit: & eius rei exempla sunt apud sanctum Gregorium in Sacramentario, in Oratione contra fulgura; apud Gregorium Turonensem lib. 1. de gloria Martyrum, c. 24. apud Petrum Damiani Epist. 15. de contemptu mundi, c. 18. sicut in Ordine Romano scribitur de usu cere benedictæ in Octava Paschæ: Similiter, inquit, in suburbanis ciuitatibus de cereo benedicto faciunt, ad suffumigandum scilicet in domibus suis, seu ponendum in agris, vel in vineis, propter illusiones diabolicas, siue contra fulgura & contrua. Permittuntur etiam ante signa ministri, qui manuales campanulas assidue pulsent, instar tubarum Iubilai in Ierichuntina processione clangentium; quibus significatur vox Domini in virtute orationis confringentis cedros Libani, id est, aëreas potestates, quæ maleficiis suis aërem inficiunt, & morbos & calamitates immittunt: quamquam etiam isto tinnitu circumquaque inuitantur accola, vt frequentes conueniant, & precantium se agminibus adiungant.

Vsitatum fuisse hoc genus processionum in Ecclesia Catholica tempore sancti

Gregorij Magni, inadet Sacramentarius eiusdem, qui post Officium feriæ secundæ in Litania minore, sub hoc titulo, *Orationes in campo*, ponit. Orationes quatuor, quibus à Deo petitur, ut benedicat, custodiat & defendat contra omnem infestationem inimici, non solum fruges, sed etiam fines seruorum suorum. Vnde facile conicitur, iam tunc in more positum fuisse, ut non tantum quibusdam locis in agris oratio fieret, sed etiam ut orando circa fines parochiarum procederetur, & earum custodia atque defensio sanctis Angelis commendaretur. Quare spectant hæ processiones, non tantum ad ubertatem frugum obtinendam, sed etiam ad depellendas omnes calamitates & morbos à finibus parochiarum, atque ad dissoluenda maleficia & immissiones quascumque per Angelos malos. Habentur supradictæ Orationes suo loco in Processionali.

De Litiis Sanctorum.

CAPVT XXX.

Litaniz nomen à Græcis sumptum est, & propriè sonat humilem miserorum ad genua procumbentium supplicationem. Vnde in eorum Liturgiis, in Ordine Romano, in Regula S. Benedicti c. 9. 12. & 13. & apud Valafridum Strabonem libro de exord. & increm. rerum Eccles. c. 22. formula illa precationis, *Kyrie eleison*, id est, *Domine miserere*, qua Ecclesia, velut de profundis clamans ad Dominum, eius misericordiam obnixè implorat, propria & singulari appellatione Litania dicitur, utpote habens in se nescio quid grandioris affectus & compunctionis, ut loquitur Concilium Vasense secundum, c. 3. Inde factum est, ut catenæ illæ precationum, longo ordine inter se connexarum, quibus Ecclesia ut plurimum in processionibus utitur ad inuocandam Sanctorum intercessionem, Litaniz quoque nominarentur; quia solenni more ab illa supplicatio-

ne, *Kyrie eleison*, inchoantur, & in eadem desinunt: qua ratione vulgari idiomate apud nos Kyriellarum appellationem sortitæ sunt. Ad eundem modum in Officio Ecclesiastico Versus illi, qui in Adventu & Quadragesima, & diebus ieiuniorum, flexis genibus recitantur in fine Matutini, & aliarum Horarum, post tertium, *Kyrie eleison*, communi usu Ecclesiæ, per quandam antonomasiam, *Preces*, id est, *Litaniæ*, dicuntur. Putant nonnulli Litaniæ nomen ideo processionibus tributum esse, quòd in iis ordinariè canantur illæ Sanctorum Litaniæ. Et sanè Ecclesia Romana nihil aliud canit in omnibus processionibus, præter quàm in Festo Purificationis B. Mariæ, Palmarum, & sanctissimi Sacramenti, & pro gratiarum actione, ut constat ex Rituali Romano. Atque id fortassis ea causa factum est, quòd in dictis Litanis omnis generis supplicationes contineantur, iuxta divisionem beati Pauli 1. Timoth. c. 2. Orationes, quando dicitur Deo, *Miserere nobis*, & Sanctis, *Ora pro nobis*; Postulationes, tum pro auertendis malis, ubi dicitur, *Ab omni malo libera nos Domine*, & sequentibus Versibus; tum pro obtinendis bonis, in illo Versu, *Ut nobis parcas, te rogamus audi nos*, & aliis sequentibus: Obsecrationes ibi, *Per*.

mysterium ſanctæ Incarnationis tuæ, & ſe-
quentibus Verſibus: ſic enim diſtinguit S.
Bernardus in Sermone de quatuor modis
orandi. Quippe, obſecrare eſt, cum rerum
ſacrarum adiuratione ad maiorem expreſ-
ſionem rogare; orare, preces ſuppliciter fun-
dere; poſtulare, petere bona humano gene-
ri tribuenda. Sanctus Thomas 2. 2. q. 83. art.
17. paulò aliis verbis interpretatur, ſed ta-
men in eundem ſenſum. Ad orationem, in-
quit, tria requiruntur: quorum primum eſt, ut
orans accedat ad Deum quem orat; quod ſigni-
ficatur nomine orationis, quia oratio eſt aſcen-
ſus intellectus in Deum. Secundò requiritur
petitio, quæ ſignificatur nomine poſtulationis.
Tertiò requiritur ratio impetrandi quod peti-
tur, & ad hoc pertinet obſecratio, quæ eſt per
ſacra conſeſtatio; ſicut cum dicimus, Per Na-
tivitatem tuam libera nos Domine. Itaque
Orationes omnes, quæ, tam in Miſſa, quàm
in Officio Eccleſiaſtico, terminantur hac
clauſula Per Dominum, verè obſecrationes
appellari debent. Iuuabit ad deuotionem
recitandarum Litaniarum hîc notare quod
piè monet Sanctus Bernardus in citato Ser-
mone: Prima, inquit, id eſt, obſecratio, Vere-
cundo fiat affectu: ſecunda, quam propriè di-
ximus orationem, affectu puro: tertia, id eſt,
poſtulatio, amplum querit affectum, & fiduciæ

latitudinem, sicut scriptum est, Postulet in fide, nihil hesitans.

Cæterum, quia temeritate multorum in suo sensu vana sapientium eò iam ventum est, ut Litanias sibi quisque pro arbitrio confingat & euulget, ut plurimum confartas ex sententiis ineptis, periculosis, & errorem sapientibus; quæ res & Catholicis scandali causam præbet, & hæreticis occasionem insultandi puritati Ecclesiæ: observandum est, Clementem octauum publico decreto anno 1601. cauissè; ne cuiquam liceat, præter Litanias communes, quæ in Breuiariis, Missalibus, Pontificalibus, ac Ritualibus continentur, & Litanias de B. Virgine, quæ vulgò Lauretanæ vocantur, vllas alias Litanias in publicum edere, aut publicè recitare, siue in Ecclesiis, siue in oratoriis, siue in processionibus, sine licentia Congregationis factorum rituum, sub pœnis arbitrio Ordinarij, vel Inquisitoris fidei, seuerè infligendis. Decretum extat apud Stephanum Quarantam in Summa Bullarj.

De Benedictionibus Eccleſiaſticis.

CAPVT XXXI.

QVando-quidem pleræque Eccleſiæ proceſſiones benedictiones aliquas habent adiunctas, vt putà in Dominicis, in Purificatione B. Mariæ, in die Cinerum, in Palmis, in ſupplicationibus & Stationibus quæ fiunt præſente Epifcopo; vel ad eas ex inſtituto referuntur, vt in Cæna Domini ad conſecrationem Chriſmatis, in Sabbatis Paſchæ & Pentecoſtes ad benedictionem Fontis baptiſmalis, in Dedicatione Eccleſiæ: ne quid ad perfectam propoſiti argumenti tractationem deſideretur, adiungendum duximus hoc Caput de benedictionibus, quarum ignoratio non raro ſanctarum Eccleſiæ inſtitutionum contemptum parit. Atque id eo libentiùs facimus, quòd earum explicatio in Rituali ſuo loco prætermiſſa fuerit.

Benedictio in Scripturis & Deo & hominibus tribuitur. Benedicere Dei, eſt benefacere: quia enim quod vult facit, cui be-

nè vult, aut benè dicit, eo ipso benè facit. In hominibus autem benedicere, est alteri benè precari, seu vt bona proueniant optare. Ex quo patet discrimen inter benedictionem diuinam & humanam. Etenim illa suo effectu numquam frustratur; vnde Genes. 12. dicit Deus Abrahæ, *Benedicam tibi, erisque benedictus*: hæc verò sæpe inefficax & inanis est, quia non est in potestate hominis præstare bona quæ alteri optat, sed ea à Deo petenda sunt, qui solus omnium bonorum auctor & largitor est.

Atque humana quidem benedictio duplex est. Altera priuata, qua quisque suo pectore, ex beneuolo erga alium affectu, ei felicia quæpiam à Deo precatur: & hæc tantam vim habet ad efficiendum, quantum sanctitatis est in eo qui benedicit, vt potest qui Deo factus coniunctior, magis idoneum est organum communicandæ eius virtuti, & propensius ab eo exauditur. Altera publica est, seu ex officio, quando quis, ratione muneris sacri quo fungitur, petit à Deo vt personis seu rebus aliquibus bona conuenientia tribuat: & hæc est quæ benedictio Ecclesiastica propriè appellatur; quippe quæ nomine Ecclesiæ, & ex auctoritate ei à Deo concessa, fiat. Posuit enim Deus Sacerdotes & ministros Ecclesiasti-

cos diſpenſatores benedictionum ſuarum; Numer. c. 6. vbi per Moysen ita loquitur Aaroni & filiis eius: Sic benedicetis filiis Iſrael, & dicetis eis: Benedicat tibi Dominus, & cuſtodiat te; oſtendat Dominus faciem ſuam tibi, & miſereatur tui: conuerſat Dominus vultum ſuum ad te, & det tibi pacem. Inuocabuntque nomen meum ſuper filios Iſrael, & ego benedicam eis. Quem locum ſic interpretatur Petrus Damiani, Epistoſa ad ciues Florentinos, quæ eſt vndecima libri octauo, Dominus in libro N. meri de Sacerdotibus ait: Inuocabunt nomen meum ſuper filios Iſrael, & ego benedicam eis. Sacerdos quippe Dominum ſuper hominem verbis inuocat, ſed ipſe ſuper eum Dominus benedictionem efficaciter format. Effectus itaque benedictionis non in merito Sacerdotis conſtat, ſed hanc inuocatio diuini nominis adminiſtrat: Vt, quod ex ore ſonat hominis, intus impleat creator; & per indigni ſæpe hominis miniſterium, diuina virtus ſuum veraciter efficiat ſacramentum. Quod quidem contentaneum eſt doctrinæ ſancti Auguſtini eundem locum Scripturæ exponentis, in libro Quæſtionum veteris Teſtamenti, c. 11. Per quod oſtenditur, inquit, ſpiritum gratiarum non perſonam ſequi, aut digni, aut indigni, ſed ordinationem traditionis: Vt, quamuis aliquis boni

boni meriti sit, non tamen possit benedicere, nisi fuerit ordinatus ut officium ministerij exhibeat: Dei autem est effectum tribuere benedictionis. Deo itaque operante in ministerio sacerdotali, benedictio Ecclesiastica habet effectum; non quidem ex opere operato ad instar Sacramentorum, sed ex vi precum Ecclesiæ; quæ cum sit sponsa Christi dilecta, non potest non exaudiri ab eo pro merito & dignitate sua, quando aliquid pro filiis petit. Tota vis igitur benedictionum Ecclesiasticarum est in oratione & inuocatione Ecclesiæ, quæ fit per eius ministros, ut de omni genere ciborum, qui à Christianis ante esum benedicuntur, dicit S. Paulus 1. Timoth. 4. *Sanctificatur enim per verbum Dei & orationem.* Ideo, quemadmodum loco citato è libro Numerorum, Deus certam formulam populo benedicendi Aaroni & Sacerdotibus veteris legis præscripsit; ita Ecclesia, diuino spiritu edocta, omnium rerum benedicendarum formulas conceptis verbis definiuit in libris ritualibus: ut sciant Sacerdotes, quid in singulis, & quomodo petendum sit: ne videlicet temerè & pro arbitrio loquendo, ab eius institutione, proposito, & fine exercent, & sic optatis decidant. Itaque omni ratione cauendum est iis, ne alias benedi-

tionum formas, ritus aut cæremonias vsurpent, quàm quæ in libris Ecclesiasticis, utpote Missali, Pontificali, & Rituali, continentur. Circumferuntur enim non pauca à superstitiosis & maleficis hominibus composita, & arte Dæmonum excogitata: quæ, ut latens venenum non faciliè produnt, ita multos incautos decipiunt, & in impietatem, prætextu deuotionis aut remedij necessarij, faciliè pertrahunt. Cauendum etiam, ne benedictiones Ecclesiasticæ quocumque prætextu ad alios fines detorqueantur, quàm ad quos ab Ecclesia institutæ sunt. Cum enim illæ vim non habeant nisi ex intentione & inuocatione Ecclesiæ, non autem ex proposito & voluntate vtentium; certum est, ex communi ordine prouidentiae diuinæ, easdem neque effectum sortiri alium quàm ab Ecclesia institutum, neque sine piaculo ad alienos & particulari præsumptione excogitados vsus posse applicari. Qui autem sint legitimi fines & effectus singularum benedictionum, intelligitur ex earumdem verbis, atque sententiis quibus concipiuntur.

Sunt autem illæ omnino in duplici differentia. Nam aliæ *Inuocatiuæ* à Theologis appellantur, aliæ *Constitutivæ*. *Inuocatiuæ* sunt, quibus Dei benignitas inuocatur,

ut personis seu rebus benedicendis, pro cuiusque conditione, usu, aut necessitate, aliquid boni tribuat, easve à malo vindicet, non immutato earumdem statu: cuiusmodi sunt, benedictio Episcopalis, benedictio quæ datur initio Confessionis, quæ post Baptismum & Communionem, quæ in fine Missæ, quæ ante lectiones divini Officii, quæ Diacono lecturo Euangelium, benedictio Regis & Reginæ, benedictio sponsi & sponse, annuli sponsalis, novi militis, armorum, & vexilli bellici, vestium Monachorum & Monialium, puerperæ, domus novæ, novæ navis, vinearum, frugum, atque adeo omnium esculentorum & potulentorum, & aliarum cuiusmodi rerum, quarum benedicendarum formulæ habentur in libro Sacramentorum S. Gregorij. Nam, licet harum benedictionum virtute nova quædam bona, seu temporalia, seu spiritualia, divinitus conferantur rebus seu personis, pro quibus nomen Dei invocatur: relinquuntur tamen illæ sibi & suæ conditioni præstinæ, atque usus consuetudo, neque ob hoc in ordinem rerum sacrarum transeunt. *Constitutiæ* dicuntur, per quas res seu personæ benedictæ constituuntur in esse permanenti rei sacræ, religiosæ & sanctæ, adeoque eum statum deinceps non mutant, neque

ad profanum vsum redire possint. Quo in genere nonnullæ ad significandum & representandum aliquid sacrum spectant; vt Cereus Paschalis, vt cruces, vt imagines Christi & Sanctorum, candelæ in die Purificationis, rami in Dominica Palmarum, cineres feria quarta in capite ieiunii, panis eulogiarum, sal qui adhibetur in Baptismo, anuli pro consecratione virginum: quædam verò ad cultum Dei, & certa religionis officia atque ministeria destinantur, vt Episcopi, Sacerdotes, & reliquorum Ordinum ministri, Abbates, Abbatissæ, Moniales, Ecclesiæ, capellæ seu oratoria ad vsum diuini sacrificij benedicta, cœmeteria, campanæ, sacerdotalia indumenta, mappæ Altarium, corporalia, ciborium seu custodia sanctissimi Sacramenti, & eiusdem tabernaculum, capsæ Reliquiarum, & alia vasa sacra: quædam denique ad aliarum rerum benedictionem & sanctificationem comparatæ sunt, vt Chrisma, & Oleum Catechumenorum atque infirmorum, thus, aqua benedicta, tum communis, tum baptismalis, & Gregoriana, cuius vsus est in Dedicatione & reconciliatione Ecclesiarum, de qua habetur c. *Proposuisti*, & c. *Aqua*, de consecr. Eccles. vel Alt. in Ordine Romano, & Pontificali Romano, & apud Ana-

Itanium Bibliothecarium in vita Leonis quarti. Hæc enim omnia, cum per benedictionem seu consecrationem in ius Domini transierint, & eius obsequio mancipata atque addicta fuerint, non possunt sine sacrilegio ad proprium hominis usum, & profanos actus transferri: *Non licet prorsus* (ait Alexius Comnenus Nouella 2.) *res sacras communes & profanas fieri, neque ea, quæ in manus Dei deposita sunt, rursus ex iisdem eripi, & in alios usus transferri atque conuer- ti.* Et in Concilio Bracarenſi tertio, c. 2. qui diuina vasa vel ministeria, Ecclesiastica ornamenta, vela, vel alia quælibet indumenta, atque etiam utensilia, sciendo in suos usus tranſtulerint, vel aliis donanda vel vendenda crediderint, si de secularibus fuerint, perpetua excommunicatione damnandi; si verò religiosi (id est Ecclesiastici ordinis) ab officio depoen- dendi decernuntur. Et 12. q. 2. c. Nulli liceat: *Quicquid semel fuerit consecratum, sanctum sanctorum Domino erit. c.* Ad hæc. de relig. dom. Si locus ad hospitalitatis usum, & pau- perum prouisionem, fuerit auctoritate Pontifi- cis destinatus, cum sit religiosus, non debet mun- danis usibus deputari, sicut de vestibus, & ligneis vasis, & aliis utensilibus ad cultum religionis per Pontificem deputatis, antiqua con- ſuetudo indubitanter obseruat, & venerabi-

lium patrum, edocent sanctiones. Et de regu-
 lus Iuris, in Sexto: Semel Deo dicatum, non
 est ad vsus humanos ulterius transferendum.
 Et ob hanc causam in Concilio Mediola-
 nensi vetitum est ne Altaria consecrata si-
 ne auctoritate Episcopi diruantur, aut loco
 moueantur? & c. Relinqui, extra, de custodia
 Eucharist. prohibetur ex Concilio Latera-
 nensi, ne supellestilia profana in Ecclesias
 admittantur, nisi propter hostiles incurfus,
 aut incendia repentina, seu alias necessita-
 tes vrgentes, ad eas oporteat haberi refu-
 gium: sic tamen, vt, necessitate cessante, res
 in loca pristina reportentur. Idcirco etiam
 ab Ecclesia constitutum est, vt ligna Eccle-
 siæ, palla Altaris, cathedra, candelabra, ve-
 la, & alia huiusmodi ornatui & ministerio
 templorum atque Altarium deputata, licet
 speciali benedictione sanctificata non fue-
 rint, si vsu detrita, aut vetustate consumpta
 sint, incendio dentur, cineresque ipsi in lo-
 cum sacrum & abditum inferantur; ne præ-
 tereuntium pedibus conculcari, aut quo-
 quo modo irreuerenter haberi possint, de
 consecr. dist. 1. c. Ligna, & seq. quia nimi-
 rum ipso vsu cultus diuini consecrata cen-
 sentur: cuiusmodi sunt illa de quibus scribit
 S. Augustinus in Psal. 113. concione 2. Sed
 enim & nos pleraque instrumenta & vasa ex

huiusmodi materia vel metallo habemus in
vsum celebrandorum sacramentorum, quæ
ipso ministerio consecrata sancta dicuntur, in
eius honorem cui pro salute nostra inde serui-
tur: quanto magis ea quæ Ecclesiæ benedi-
ctione ex destinato sancta sunt effecta?

Posterioris autem huius generis benedi-
ctionum instituendi causa fuit, quòd, cum
ea quæ ad cultum Dei, & vsum aliquem sa-
crum destinantur, sancta esse oporteat, id
est, talia quæ ei aptè conuenienterque de-
seruire possint; Ecclesia, prout quæque
rem ad eiusmodi vsum statuit adhiberi, ita
statis atque solennibus precationum for-
mulis à Deo petere solet, vt illam eo vsti-
dignam, & ad eum aptam perficere digne-
tur, impedimenta, si quæ sint, tollendo, &
vim ad efficiendum necessariam tribuen-
do: quod benedicere, sanctificare, dedi-
care, & consecrare, vulgò dicitur. Et hæc
virtutis diuinæ sanctificatione creaturæ à
simplici rerum naturalium conditione ele-
uantur ad statum quemdam quasi diui-
num, id est, supernaturalis cuiusdam ex-
cellentiæ, vt iam ad Dei cultum dignè &
congruenter applicari possint. Sanctus
Thomas 2. 2. q. 99. art. 1. *Ex hoc quòd ali-
quid deputatur ad cultum Dei, efficitur quod-
dam diuinum: & sic ei quadam reuerentia*

debetur, quæ refertur in Deum. Idem 3. parte q. 83. art. 3. Eccleſia, & Altare, & alia huiusmodi inanimata conſecrantur, non quia ſint gratiæ ſuſceptiva, ſed quia ex conſecratione adipiſcuntur quamdam ſpiritualem virtutem, per quam apta redduntur diuino cultui. Quibus verbis conſentanea ſcribit Simeon Theſſalonicenſis in libro de diuino templo. Ergo templum, inquit, quamuis lapidibus & lignis conſtet, tamen celeſti gratia præditum eſt. Ab Epifcopo enim myſticis præcationibus conſecratur, oleo ſacro perungitur, totumque Dei habitaculum redditur. Et ex hoc res Deo dicatæ appellantur ſanctæ. Sanctitas enim, vt diſſertit idem ſanctus Doctor 2. 2. q. 81. art. 8. duo importat, munditiam, & firmitatem: munditiam, vt res ipſa, quæ denominatur ſancta, ab omni labe & inquinamento pura ſit: firmitatem, vt Deo tamquam ultimo fini & ſummo principio firmiter coniungatur, & immobiliter adhareat. Mens autem humana inquinatur ex hoc, quod inferioribus rebus, id eſt, terreſtribus & mundanis, coniungitur, ſicut quælibet res ex immiſtione peioris ſordeſcit: res vero inanimatæ impuritatem inde contrahunt, quod in promiſcuo uſu creaturarum viliū, corruptibileū, & profanarum, verſentur; & prætereà,

quòd sæpe maleficiis & noxiis impressionibus Dæmonum, aut irreligioso usu pravorum hominum, vel infidelium, conspurcentur. Benedictione ergo Ecclesiastica, seu consecratione, res quæ diuino cultui inferuire debent, primum ab omni Dæmonis immunditia & contaminatione purgantur, & eiusdem infestatione liberantur (ad quem effectum pertinent exorcismi, qui in nonnullis benedictionibus præmittuntur, & signa crucis frequentia, quibus eiusdem Dæmonis vis pellitur) atque à communi, profano, & mundano usu seiunguntur; & in hoc munditia est: deinde abstractæ à colluione & contagio creaturarum, ad religionis ac pietatis usum applicantur, & Dei cultui in perpetuum addicuntur; & in hoc cernitur firmitas illa quæ veram sanctitatem perficit, ut res illæ à Sancto sanctorum diuelli amplius non possint. Quare illæ deinceps singulari protectione virtutis diuinæ, & speciali quadam Angelorum custodia munitæ creduntur, ut ab omni iniuria & contaminatione vindicentur: quemadmodum Altare illud apud Ioannem Moschum in Prato spirituali, c. 4. ad cuius cornu stantem Angelum cum conspexisset Abbas Leontius, & pauore correptus aufugisset, vox ad eum è cælo de-

lapſa eſt, dicens: *Ex quo ſanctificatum eſt.* Altare iſtud, ego iugiter illi adſtare iuſſus ſum. Cui ſimile eſt aliud exemplum eodem libro, c. 10.

De purificatione rerum benedicendarum ante ſanctificationem, digna eſt quæ huic loco inferatur Nicolai Cabasilæ explicatio, ex libro quinto de vita in Chriſto: ubi ritum conſecrationis Altaris deſcribens ita loquitur. *Hoc factò, aqua luſtrali menſam abſtergit. Quoniam enim hominem, dominum omnium quæ viſu percipiuntur, communis tyrannus in ſervitutem redegit, poſtea in omnia ſenſibilia, ceu in palatium rege proſtrato, irruit & inuaſit. Quamobrem, aſſumpta inde materia in vnoquoque myſterio, quodam purgatio aduerſus maligni vires opus eſt; ſicut & aquam, qua Initiatorem neceſſe eſt baptizare, Sacerdos ubi precibus ab omni diabolica malignitate purgavit, ſic demum cæmen rituale & initiatorium pronuntiat. Eadem ratione menſam prius aquis malorum depultricibus abluit, & ſimul modum demonſtrat quo ad bonum ſit currendum, qui eſt declinare prius à malo. Itaque & ſuper malis hominibus cantatum Pſalmum in hac expiatione recitat, *Aſperges me hyſſopo, & mundabor; lauabis me, & ſuper niuem dealbabor. Et poſt hoc, Deo gratias agit, cum veneratur,**

quod in omnibus consecrationibus facit.

Quod pertinet ad ministerium benedicens, quædam sunt benedictiones quæ communi iure & usu Ecclesiæ fieri à quibuscumque Sacerdotibus possunt: quædam verò Episcoporum propriæ. Et harum quidem nonnullæ eiusmodi sunt, ut simplicibus Sacerdotibus committi & delegari possint, ut benedictio imaginum, novæ Ecclesiæ, & cæteræ quæ in Rituali notantur: aliæ delegari non possunt, nisi auctoritate Apostolica, ut benedictio corporaliū & vestium sacerdotalium, iuxta communem doctrinam, consecratio calicis, Ecclesiæ & Altaris, & benedictio solennis super populum: de qua notandus est Canon 44. Concilij Agathensis, qui habetur c. *Ministrare.* 26. q. 6. *Benedictionem super plebem in Ecclesia fundere, aut pœnitentem (publicum) in Ecclesia benedicere (id est, reconciliare) Presbytero penitus non licebit. Penitus,* dicit, ut excludat omnem prætextum Reliquiarum, aut alterius cuiuscumque rei; quippe, cum neque in solennioribus Missis & Officiis id fieri liceat à quibuscumque Dignitatibus; exceptis duntaxat iis Abbatibus, qui ex speciali privilegio sedis Apostolicæ potestatem habent

publicè benedicendi in Ecclesiis quæ ad eos pleno iure pertinent, iuxta c. *Abbatres*, de priuileg. in Sexto, & si qui sint alij quibus simile priuilegium concessum fuerit. Atque ea de causa Rituale Romanum, licèt iubeat in Festo Corporis Christi, facta processione, Sacerdotem semel benedicere populum cum Sacramento in modum crucis, vetat tamen quidquam dicere id faciendo : ne scilicet benedictionem Episcopalem imitari videatur, in quâ Episcopus ter benedicit cum signo crucis, & pronuntiat formulam illam solennem, *Benedicat vos omnipotens Deus, Pater, & Filius, & Spiritus sanctus* : quem inodum sacerdotalem benedicendi seruari debere ait in aliis processionibus faciendis cum sanctissimo Sacramento. Si, etiam cum Sacramento, non licet Sacerdotibus pronuntiare formulam benedictionis Episcopalis, & ter signare populum; quanto minus cum Reliquiis Sanctorum?

Notatu illud dignum est, benedictiones Episcopales varias haberi in Sacramentario Grimoldi Abbatis, pro singulis Dominicis & Festis per anni circulum, imò etiam pro quotidianis & extraordinariis Officiis.

De origine autem benedictionis Episcopalis sic scribit Radulphus Tungrensis, libro de Canonum obseruantia, Propositione vltima in fine. *Benedictionem Episcopalem Martialis Episcopus, Apostolorum discipulus, ex magisterio Apostolorum tradidit: quas probabile studium seruientium auxit, Ambrosius dicere cœpit: isque mos ex eo vsquequaque conualuit. Apostolicus autem, hanc tantum, quæ finita Missa dicitur, dicit.*

Libet verò hoc loco addere obseruationem Nicolai Malaxi Protopapæ Nauplij, de conformatione digitorum in benedictionibus publicis apud Græcos, quæ habetur in fine Heirmologij. Scribit enim ille, in benedictione danda exprimi debere nomen *Iesu Christi*; quia ipse est in quo benedicuntur omnes gentes, ex sententia S. Pauli Galat. 3. *Vt in gentibus benedictio Abrahamæ fieret in Christo Iesu*: atque ideo Pontifices populo benedicentes solemus digitos dexterae ita inter se componere, vt eorum configuratione hæc duo sancta nomina exprimantur, *Iesus, Christus*: quod fit hoc modo. Indice recto constituto, medius à summo paulum inflectitur, ita vt ille rectitudine sua literam Græcam, *ι*, hic cur-

uitate literam, s, designet; quæ duæ literæ simul iunctæ compendiosa ſcriptione faciunt, Ιησοῦς: annulari autem obliquo deſidente, pollex ei tranſuerſus imponitur, qua figura litera, X, deſcribitur; auricularis verò ſeu minimus digitus, verſus utrumque incuruatus, literam, s, delineat; quarum duarum literarum compendio Græci nomen, Χεῖρος, ſignificare ſolent.

In Eccleſia Latinâ obſervatur ritus manus verſus cælum elcuan- di, & deinde ſuper eos qui benedictionem ſuſcepturi ſunt extendendi, atque eos crucis figura conſignandi: qui ritus à Chriſto acceptus creditur. Nam de eleuatione manuum teſtimonium eſt S. Lucæ eius aſcenſum in cælum deſcribentis, capite ultimo, *Elevatis manibus ſuis, benedixit eis*: de extensione verò in benedicendos, ex veteri lege exempla ſunt Levitici 9. & Eccleſiaſtici 50. De uſu autem Eccleſiæ Catholicæ diſertè S. Auguſtinus Ep. 59. quæſt. 5. his verbis: *Interpellationes autem, ſive, ut Veſtri codices habent, poſtulationes, ſunt cum populus benedicitur: tunc enim Antifites, velut Aduocati, ſuſceptos ſuos per manus impoſitionem miſericordiſſimæ offerunt poteſtati. De ſigno denique crucis ita ſcribit S. Hieronymus*

in hæc verba capitis 66. *Isaïæ*, Et ponam
in eis signum: *Hoc nobis*, inquit, *ad Patrem*
ascendens Dominus dereliquit, siue in nostris
frontibus posuit; *Vt liberè diceremus*, Signa-
tum est super nos lumen vultus tui Domine.

F I N I S.





INDEX RERVM HOC LIBRO CONTENTARVM.

A



| | |
|--|-------------|
| <i>Agape</i> , Festum B. Mariæ, | 221 |
| <i>Accendite</i> , Versus cur cantetur ante Missam solennem, | 65 |
| Accubita quid, | 215, & seq. |
| Agape Christiana, | 215 |
| Agius, cur cantetur in die Parasceues, | 49 |
| Altare Christum significat, | 142 |
| Altare cur osculetur Sacerdos in Missa, ante- quam se conuertat ad populum, | 142, 196 |
| Altare cur debeat esse lapideum, | 143 |
| Altare sepulcrum Christi <u>representat</u> , | 181, 182 |
| Altaris veneratio, | 119 |
| Altaris varia nomina, | 182 |
| Altarium denudatio quid significet, | 149 |
| Altarium ablutio quid significet, | 141 |



Index rerum

| | |
|---|--------------|
| Ambon unde dictus, | 79 |
| Angelus enseni districtum recondit in processione, | 229 |
| Angeli tutelares regnorum, | 278 |
| Angeli custodiunt res consecratas, 313, & seq. | |
| Ante-Euangelium, | 78 |
| Antiphona, <i>Regina celi</i> ; unde ortum habuit, | |
| 230 | |
| Antiphonarum preparatoriarum ad processionem, | |
| 45 | |
| Apostoli ieiunarunt biennio mortis & sepulture Christi, | 132 |
| Aqua benedicta in processionibus, | 27, 296 |
| Aqua offertur à Cantoribus in Missa, 111. ab Archiparaphonista, | 112 |
| Aqua baptismi est mater adoptionis, | 164 |
| Aqua Gregoriana, | 308 |
| Aquæ baptismalis consecratio quàm antiqua, | |
| 164 | |
| Aquæ benedictæ sparsio per agros, | 296 |
| Aquiliferi, | 30 |
| Arca Testamenti gestata à Sacerdotibus & Levitis; | 7, 8, 9, 272 |
| Arce Testamenti translationes variz, | 7, 8, 9 |
| Archidiaconus gerit Euangelium in processione Palmarum, | 24, 102 |
| Archidiaconus benedicit Cereum Paschalem; | |
| 167 | |
| Ascensio est Festorum decus, | 244 |

hoc libro contentarum.

B

| | |
|---|--------------|
| B Anasopos Dominica, | 24 |
| Balsamum oleo admiscetur in consecratio- ne Chrismatis, | 104 |
| Baptismi figura, 150, & seqq. | |
| Baptismus dicitur Illuminatio, | 160 |
| Baptismus dicitur aduentus Spiritus sancti, | 249 |
| Benedicere, quid sit, 302, & seqq. | |
| Benedictio cur detur ad legendum Euangelium, non autem ad Epistolam, | 173 |
| Benedictio in fine Missæ quid referat, | 246 |
| Benedictio Dei & hominis in quo differant, | 303 |
| Benedictio humana duplex, | 303 |
| Benedictio ecclesiastica quid, | 303 |
| Benedictionis vis est in invocatione Ecclesiæ, | 304, & seqq. |
| Benedictio Episcopalis non debet fieri à sim- plici Sacerdote, | 315, 316 |
| Benedictio cum Sacramento quomodo fieri de- beat, | 316 |
| Benedictionis Episcopalis origo, | 317 |
| Benedictionis super populum forma apud Græ- cos, 317, & seqq. | |
| Benedictionum formulæ cur ab Ecclesiâ defi- nita, | 305 |
| Benedictionum Ecclesiasticarum duo genera, | 306 |
| Benedictiones rerum sacrarum cur institutæ, | 311 |

Index rerum

Benedictionum varij ministri,

315

C

- C**ampanulæ in processionibus, 27, 296
 Cantores cur psallant in oblatione Chri-
 matis, 127
 Cardinales cur vocentur Presbyteri assistentes
 Episcopo, 121, 122, 123
 Cerei in processionibus cur deferantur, 25
 Cerei in summitate crucis delati, 26
 Cereos ardentes tenent Imperator & aulici,
 dum legitur Euangelium, 26
 Cerei cur non præferantur in Parasceue, 52
 Cerei in processione ad Altare quid significant,
 58
 Cerei ad Euangelium cur, 77
 Cereos cur fideles accipiant de manu Celebran-
 tis in Purificatione, 89
 Cereus Paschalis cur benedicatur, 166
 Cerei Paschalis benedictio cur fiat à Diacono,
 167
 Cerei Paschalis benedictio à quo instituta, 165
 Cereus Paschalis cur extinguatur in die Ascen-
 sionis, 247
 Cerei Paschalis particulæ suffumigantur contra
 daemones, 296
 Cerei Paschalis in aquam stillatio quid signifi-
 cet, 163
 Cerei duo minores cur antecedant Cereum Pas-
 chalem, 161
 Cereos gerit Clerus in processione Paschali apud
 Græcos, 174

hoc libro contentarum.

| | |
|--|---------------|
| Item aulici, | 177 |
| Cherubicus hymnus, | 47 |
| Chrismatis consecratio cur fiat in die Conz, | |
| 105, & seqq. | |
| est antiquissima, | 108 |
| Chrisma & Oleum sanctum cur salutetur cum | |
| veneratione, | 116 |
| Chrisma cur infundatur in Fontem baptisma- | |
| lem, | 164 |
| Christus conuescens Apostolis post Resurre- | |
| ctionem quid significet, | 214 |
| Circuitus in processionibus, | 294 |
| Collecta quid. | 210 |
| Consecratæ res non sunt transferendæ ad vsum | |
| profanum, | 302 |
| Constantinopolis dedicatio, | 178 |
| Constantinus crucem sumit pro signo militari, | |
| 22, 23 | |
| Constantinus urbem suam dicat B. Virgini, | 278 |
| Conuentuum Christianorum, alij statarij, alij | |
| ambulatorij, | 14 |
| Conuentus Christiani cur nomine stationum ap- | |
| pellati, | 14, 222 |
| Conuiuium Paschale, | 213, 214, 215 |
| Corporale quid significet, | 182, 183 |
| Crux quare in processionibus deferretur, 20, 21, | |
| quid significet, | 26 |
| Crucis publicè deferendæ origo, | 21 |
| Crucis signum apparet Constantino, | 21 |
| Crucis militaris signum, | 22 |
| Cruces plures in processionibus, | 24 |
| Cruces in processionibus qui portare debeant, | |
| 38 | |

Index verum

| | |
|--|-----|
| Crux in processione ad Altare quid significet, | 57 |
| Crux quare ad Euangelium portetur, | 78 |
| Crucis signo cur se <u>muniat</u> Diaconus legens Euangelium, | 85 |
| Crucis signo cur se muniant audientes Euan- gelium, | 83 |
| Cruce cur se signet populus lecto Euangelio, | 85 |
| Crucis signum in benedictionibus, | 118 |

D

| | |
|---|---------|
| D edicatio vrbis Ierusalem, | 18 |
| Dedicatio vrbis Constantinopolitanz, | 178 |
| Deputati ad Euangelium lampades præferunt apud Græcos, | 77 |
| Deus <u>τεὸς</u> , | 83 |
| <u>Διακαιήμιμος</u> hebdomada Paschalis dicitur, | 194 |
| Diaconi septem vnde, | 124 |
| Diaconi testimoniales, | 127 |
| Dominica cur venerabilis & solennis, | 217 |
| Dominica cur dicatur dies solis | 218 |
| Dominica Palmarum quibus nominibus vocetur, | 94 |
| Draco in processionibus, | 28, 29 |
| Draco sub pedibus Constantini, | 29 |
| Draconis infernalis epitaphium, | 30 |
| Draco pestem infert agro Romano, | 31, 128 |
| Draconis nomen pro quouis vexillo, | 31 |
| Draconarij, | 30, 31 |

| | |
|---|-------------|
| E <i>iusdixit</i> quid, | 13 |
| Ecclesiarum nomen, unde, | 14 |
| Ecclesia cur debet esse <i>ordinata</i> , | 19 |
| Ecclesiarum Christianarum tres partes, | 19 |
| Episcopus Euangelium gestat, | 24 |
| Episcopus apud Græcos signat Euangelium tri- plici cereo, | 82 |
| Episcopus cur deponat superhumera ad Euan- gelium, | 84 |
| Episcopo sacrificanti & prædicanti cur plores Sacerdotes & ministri assistant, | 126, 127 |
| Episcopi solennis deductio in Ecclesiam, | 215, 212 |
| Euangelium in processionibus defertur, | 24 |
| Euangelium prælatum ad Altare quid signifi- cet, | 56 |
| Euangelium cur non portetur ad Altare in die Parasceues, | 52 |
| Euangelij liber clausus cur offertur Celebranti in principio Missæ, | 61 |
| Euangelij liber apertus quid significet, | 62 |
| Euangelium cur osculatur Celebrans in Introi- tu Missæ, | 63 |
| Euangelium cur legatur in Missa, | 71, 72 |
| Euangelium cur gestetur in pectore, | 74 |
| Euangelium cur feratur cum pompa, | 75 |
| Euangelium Christi refert <i>imaginem</i> , | 75, 102 |
| Euangelium in sublimi throno, vel in Altari, constitui solitum in Conciliis, | 75 |

Index rerum

| | |
|--|---------|
| Euangelia adoranda, | 76, 103 |
| Euangelio prætereunti honoris causa assurgitur, | 76 |
| Euangelium cur in edito loco legatur, | 79 |
| Euangelium fertur in processione Palmarum, | 102 |
| Euangelij liber cur conuertatur ad angulum Altaris, | 143 |
| Eugenij Imperatoris oblatio reiicitur, | 129 |
| <i>Εὐχαιστ.</i> | 120 |
| <u>Exaltatio diuina</u> , locus apud Constantinopolim, | 47 |
| Exomologeses quæ processiones dicuntur, | 284 |
| Exorcismi cur adhibeantur in benedictionibus & consecrationibus, | 313 |
| Expiationis Festum, | 282 |
| Expiationum dies in Ecclesia, | 282 |

F

| | |
|---|--------------|
| F Anones, id est, mappulæ, | 112 |
| Feria quinta olim obseruata vt Dominica, | 244 |
| Festum Dominæ, | 279 |
| Festum Expiationis, | 282 |
| Festum Purificationis cur dicatur Hypante, | 87 |
| Flores sparsi significant dona Spiritus sancti, | 247 |
| Fons baptismalis est mare rubrum, | 163, 164 |
| Fontis baptismalis miracula, | 168, & seqq. |
| Foras Ecclesiæ aperiuntur in processione Palmarum, 98, & in die Paschæ, | 275 |
| qua decursa, 185, & seqq. | |

G

- G**enua non flectuntur in Dominica, nec
tempore Paschali, 218, hoc quid significet.
ibidem.
Genuflexio non seruatur in hebdomada Pen-
tecostes, 254
Graduale vnde dictum, 79
Græcorum ritus in die Paschæ, 174, & seqq.
Græci osculantur corpus Christi, 195

H

- H**æreticorum oblationes non accipiuntur,
128
Hagiodulus Abbas suscitatur mortuum, vt reci-
piat osculum pacis, 193
Hora tertia cur sacra, 252
Hymnus *Cherubicus*, 47
Hymnus, *Gloria, laus & honor*, vnde initium
habuerit, 101
Hysopus cur adhibeatur in ablutione Altaris,
144
Hysopus significat humilitatem Christi, & fi-
dem, 145
Hysopus adhibebatur in purificationibus le-
galibus, 144

I

- I**eunium seruandum in Parasceue & Sabbato
sancto, est institutionis Apostolicæ, 135
Ieiunia non indicuntur tempore Paschali, 217,

Index rerum.

| | |
|--|-------------|
| Ieiunium in Litania minore, | 240. |
| Ieiunare licet tempore Paschali, | <u>242.</u> |
| Ieiunium olim prohibitum feria quinta, vt Do- minica, | 244 |
| Ieiunium Niniuitarum triduanum, | 287, 288 |
| Ignis cur excutiat e filice in Sabbato sancto, | 285. |
| Imago B. Virginis dissipat pestilentiam, | 229 |
| Imperator fert altera manu crucem, altera lampadem in processione Palmarum, | 102 |
| Ingressa, | <u>51</u> |
| Ingressus Altaris quid significet, | 60 |
| Introitus Missæ quid significet, | 64 |
| Introitus Missæ unde dicatur, | 50 |

K

| | |
|--|------|
| K <i>Yrie eleison</i> , appellatur Litania, | 298. |
|--|------|

L

| | |
|---|-------------|
| L Abari descriptio, | 22 |
| Lampadem gestat Imperator in die Pal- marum, 102, & in die Paschæ, | 177 |
| <u>Lampadarius</u> præluens Patriarchis, | 59 |
| <u>Lampadarius</u> præfert facem in processione Pal- marum, | 102 |
| Lampadarius præluens Imperatori, 274, & seq. | |
| Ligna sacra, | 28 |
| Litaniz nomen unde, | 298 |
| Litania maior unde sic dicta, | 227 |
| non habet præceptum ieiunij, | <u>227.</u> |

hoc libro contentarum.

| | |
|---|--------------|
| eius institutio, | 238 |
| cur fiat vesno tempore, | 233 |
| in quos fines instituta, 233, & seq. | |
| Litaniæ maioris processio ab initio fuit anniver- | |
| saria, | 230 |
| Litania septiformis, | 229 |
| Litania minor à quo instituta, | 234 |
| Gallicana est, non Romana, | 239 |
| Litaniæ Sanctorum, | 298, & seqq. |
| Litaniæ quæ prohibitz, | 301 |
| Lumen cur præferatur sanctissimo Sacramen- | |
| to, 274, & seq. | |
| Luminaria in funeribus cur adhibeantur, | 190 |
| Luminum vsus in die Purificationis quid si- | |
| gnificet, | 88 |
| Luminum vsus in die Paschæ, 189, quid signifi- | |
| cet, | 190, 191. |

M

| | |
|---|----------|
| M Agdalena adorat Christum post resur- | |
| rectionem, | 196 |
| Mainercus instituit Rogationes, | 233 |
| Manuum eleuatio in benedictione publica, | 318 |
| Maria Virgo prima vidit Christum post resur- | |
| rectionem, | 199 |
| Missæ Præ-sanctificatorum, | 130, 131 |
| Missæ Præ-sanctificatorum cur celebretur in die | |
| Parasceues, 131, & seqq. | |
| Missæ quibus diebus apud Græcos non celebre- | |
| cur, | 130 |
| Missæ sacrificium non fit in die Parasceues, | |
| nec in Sabbato sancto, | 132 |

Index rerum

| | |
|---|--------|
| Modestia Cleri in processionibus, | 34, 35 |
| Modestia populi in processionibus, | 35 |
| Mortuus reuiuiscit, vt reddat osculum pacis, | 193 |
| Mulieres adorant Christum apprehendendo pedes eius, | 195 |
| <i>Musici instrumentis</i> vt in processione vetat | |
| <i>Concilium Mediolanense,</i> | 36 |

N

| | |
|--|------|
| N atalis dies vrbs Constantinopolitana, | 278 |
| Niniuitarum ieiunium triduanum, | 287 |
| Nouemdecim accubita, | 216 |
| Nox Paschalis cum luminibus celebratur, | 174, |
| 189, 190, 191 | |
| Nox Paschalis appellatur statio veneranda, | 218 |

O

| | |
|--|-----|
| O O, Antiphonæ quid significant, | 224 |
| Oblatio panis & vini ad sacrificium, | 111 |
| Oblatio panis & vini consecrandi in Missa apud Græcos, | 114 |
| Oblatio Ecclesiæ Turonensis, | 115 |
| Oblatio Chrismatismis cur prodit à Secretario, | 128 |
| Oblatio Olei ad consecrationem apud <i>Græcos,</i> | 113 |
| Oblationes explorandæ antequam deferantur ad Altare, | 128 |
| <u>Oblationes quæ repudiandæ,</u> | 128 |

hoc libro contentarum.

| | |
|---|-------------|
| Obsecrationes, | 299, & seq. |
| Oleum nomine populi offertur ad consecra- | |
| tionem Chrismatis, | 111 |
| <i>Omne</i> quid sit, | 84, 85 |
| Oratio requirit præparationem animi, | 39, & seq. |
| Ordo Cleri in processione, | 32, 33, 34 |
| Ordo inuersus in Vigilia Ascensionis quare, | |
| | 33 |
| Osculum cur detur Euangelio post eius recita- | |
| tionem, | 86 |
| Osculum signaculum orationis, | 192 |
| Osculum pacis reddit mortuus, | 193 |
| Oscula Christianorum in die Paschæ, | 173, 176, |
| | 191, 194 |
| Oscula in orationibus & in Missa, | 191, 192 |
| Oscula inter Sacerdotes in fine Synodi, | 193 |

P

| | |
|--|-----|
| P anis eulogiarum offertur cum apparatus ad | |
| benedictionem, | 115 |
| Pascha est festiuitas festiuitatum, | 220 |
| Patroni plures eiusdem Ecclesiæ, | 281 |
| <i>Pax vobis</i> , cur dicat Episcopus initio Missæ, | 63 |
| Pedes apprehendere, ritus adorantium mulie- | |
| rum, | 195 |
| Pestis extincta celebratione Festi Purificatio- | |
| nis, | 91 |
| Pestis causa fuit instituendæ Litaniz maioris, | |
| | 228 |
| Petrus Cnaphæus addit Hymno, <i>Sanctus Deus</i> , | |
| | 48 |

Index rerum

| | |
|--|----------|
| Petrus Cnaphheus primus auctor consecrandi pu- | |
| blicè Chrismatis, | 108 |
| Phelonium, | 57 |
| Pœnitentes publici quo die ex Ecclesia eici- | |
| soliti, | 92 |
| Ραλυσμειοι, | 57 |
| Portæ templi cruce adnota cur aperiuntur, | 98 |
| Post-euangelium, | 78 |
| Postulationes, | 299, 300 |
| Præfectus Euangelio in Ecclesia Græca, | 24 |
| Præparatio ad processionem duplex, | 44 |
| Preces in Officio Ecclesiastico quid, | 299 |
| Processio quid, | 1 |
| Processionum varia nomina, | 2 |
| Processio ad stationem pertinet, | 3, 122 |
| Processionum divisio, | 3 |
| Processiones pertinent ad externum cultum Re- | |
| ligionis, | 5 |
| Processio est oratio, | 6 |
| Processionum usus in veteri lege, 6, & seqq. | |
| Processio fit in Dedicatione, | 15 |
| Processiones in Ecclesia antiquissimæ, | 16 |
| Processiones ad celebritatem Martyrium, | 16 |
| Processionum varia exempla ex Historiis, | 17 |
| Processio est templum ambulans, | 20 |
| Processiones turbantium pœnæ, | 37 |
| Processiones non fiunt sine Sacerdotibus, | 37 |
| Processionis ad Altare descriptio, | 51 |
| Processio plenaria, | 52, 125 |
| Processio ad Altare cur à parte Australi inci- | |
| piat, | 56, 57 |
| Processio Euangelij, | 67 |
| eiusdem ordo secundum Græcos, 68, & seqq. | |

hoc libro contentarum.

| | |
|---|--------------|
| Processio Diaconi ab Altari ad Euangelium quid significet, | 72 |
| Processio in die Purificationis quid significet, | 88 |
| causa eiusdem processionis instituendæ, | 88, |
| | 89 |
| Processio in die Cinerum quid significet, | 92 |
| Processio Palmarum; | 94 |
| eiusdem significatio, 95, & seqq. | |
| Processio in consecratione Chrismatis, | 108, 109 |
| quid significet, | 110 |
| Processio summi Pontificis in die Paschæ, | 210 |
| Processio ante Officium in diebus <u>solenni-</u> <u>ori-</u> | 211 |
| bus, | |
| Processio Dominiæ quid significet, | 218, & seqq. |
| vnde ritus suos accipiat, | 220 |
| <u>Processio</u> duplex in die Palmarum, | 220 |
| Processiones Quadragesimales feriæ quartæ & sextæ vnde originem habuerint, | 222 |
| Processio Græcorum in Missa Præ-sanctifica- torum, | 273 |
| Processiones expiatoriæ, 283, quibus diebus in- dicendæ, | 286 |
| Processiones generales, | 284 |
| Processiones menstruæ quando institutæ, | 284 |
| Processiones annuerialiæ, 284, & seqq. | |
| Processiones <u>triduanæ</u> , 288, & seqq. | |
| Processio sanctissimi Sacramenti, 257, & seqq. | |
| Processio Ascensionis, 243, & seqq. | |
| Processio in Sabbato Pentecostes, | 251 |
| Processio in Festo Assumptionis pro Rege & Regno, | 278 |
| Processiones ambaturales, | 293 |

Index rerum

- Progressus Sacerdotis ad Altare quid significet, 53
Purificatio cur adhibeatur in benedictionibus
& consecrationibus, 313, 314
Purificationis Festum Constantinopoli primum
celebratum, & qua causa, 91

Q

- Quatuor Tempora instituta ad expiationem
animarum, 183

R

- Regna singula suos habent tutelares An-
geles, 278, 242
Reliquiæ Sanctorum in processionibus, 25
non deferendæ in processione sanctissimi Sa-
cramenti, 25
Ad Reliquias cur accendantur lampades & ce-
rei, 190
S. Remigius vocatus ad Concilium pro insti-
tuenda Litania maiore, 236
Resurrectionis Christi denuntiatio in die Pas-
chæ, 171, & seqq.
Resurrectionis memoria in feria quinta, ut in
Dominica, 244
Rogationes, 234, & seqq.
Gallicanæ sunt, non Romanæ, 239
appellantur Ieiunium Niniuitarum, 289

hoc libro contentarum.

S.

| | |
|--|--------------|
| S acerdotes duodecim cur assistant Episcopo Christina conficienti. | 119. 120. |
| Sacerdotes duo afferunt S. Sacramentum ad Al- tare in die Parasceues, 138. 139. ij quid signifi- cent. | 138. |
| Sacerdotes sunt dispensatores benedictionum Dei. | 304. |
| Sacris rebus debetur veneratio. | 117. 311. |
| Samson portas Gazæ auulsas fert in montem, & hoc quid significet. | 186. |
| Sanguis Christi cur non reseruetur in diem Pa- rasceues. | 137. 138. |
| Sanctitas rerum consecratarum in quo consi- stat. | 312. & seq. |
| <i>Sanctus Deus</i> , Antiphona, vnde originem habue- rit. | 45. |
| Sepulcri Dominici descriptio. | 183. |
| Sepulcrum Domini fuit clausum quando ad il- lud venerunt mulieres. 184. ante illud fuit ve- stibulum. | ibidem. |
| Sergius an sit auctor processionis luminum. | 90. |
| Stationum nomen vnde. | 14. |
| Stationis Pontificiæ exemplum. | 210. |
| Stationis variæ significationes. | 221. & seqq. |
| Statio ante Crucifixum quid significet. 223. cur in Quadragesima omittatur. | 224. |
| Statio cur fiat de B. Maria in Aduentu, & post Natiuitatem. | 225. |
| Stationes aliæ matutinæ, aliæ vespertinæ. | 226. |
| Stationalis sollempnitas. | 222. |

Y

Index rerum

| | |
|--|----------|
| Stationalis Ecclesia. | ibidem. |
| Stationarij Diaconi, Subdiaconi, & Acolythi. | ibidem. |
| Stationarius scyphus. | ibidem. |
| Subdiaconus præcedens Sacerdotem quid significet. | 60.61. |
| Subdiaconus cur antecedit Euangelium manibus vacuis. | 80. |
| Subdiaconus cur legendum Euangelium Diacono præmonstret. | 80. |
| Subdiaconus oblationarius. | 111. |
| Subdiaconi iuxta numerum Diaconorum ministrant. | 125. |
| Suessionensium processio in die Paschæ. | 179. |
| | 180.194. |
| Superhumerales laneum Episcopi quid significet. | 84.85. |
| Symbolum fidei cur cantetur post Euangelium. | 87. |

T.

| | |
|--|--------------|
| T abula legis diuinæ in Arca. | 24. |
| Templorum Christianorum tres partes. | 19. |
| Terræ motus horrendus Constantinopoli. | 47. |
| Tertia cur Hora sacra dicatur. | 152. |
| Thuris suffitus quid significet. | 55.77. |
| Thuris grana quinque cur fiantur in Cere Paschali. | 163. |
| Triduanæ processiones. | 287. & seqq. |
| Τεῦχος Deus. | 83. |
| Τριχίριον. | 81. |
| Trinitas sol triplex. | 82. |
| Trisagium. | 47. |

hoc libro contentarum.

| | |
|--|------------|
| Turonensis processionis ordo. | 52.59.115. |
| Turonensis Ecclesia quo ritu vtatur in oblatione | |
| Missæ. | 115. |


V.

| | |
|---|-------------|
| V Alentiniani Imperatoris oblatio reiicitur. | |
| | 128.129. |
| Vicedominus quid. | 215. |
| <u>Vicedominium,</u> | ibidem. |
| Viennæ prodigia. | 235. |
| Vigilia Festi cur dicatur <i>παρορνή</i> . | <u>221.</u> |
| Vnctio sacra quibus rebus adhibeatur. | 103.104. |

Z.

| | |
|--|------|
| Z Osimus an instituerit benedictionem Cerei | |
| Paſchalis. | 165. |

F I N I S.



Extraict du Priuilege.

PAr grace & Priuilege du Roy, il est permis à M^e Iacques Eueillon, Prestre, Chanoine en l'Eglise d'Angers, faire imprimer par tel Imprimeur que bon luy semblera, certain liure intitulé, *De Proceſſionibus Eccleſiaſticis*, qu'il auroit composé par l'ordre du Sieur Eueſque dudit lieu, & pour l'vſage de ſon Dioceſe: Auec defences à tous Libraires & Imprimeurs, d'imprimer ou faire imprimer, vendre ny diſtribuer ledit Liure, durant *cing ans*, à commencer du iour qu'il ſera acheué d'imprimer, ſoubs quelque pretexte & en quelque ſorte & maniere que ce ſoit, ſans le conſentement dudit Eueillon, à peine de conſſication des exemplaires, quinze cens liures d'amende payable ſans deport, applicable moitié à ſa Maieſté, & moitié à l'Hoſtel-Dieu de Paris, & enſemble de tous depens, domages & intereſts: Voulant ſa dite Maieſté qu'en mettant au commencement ou à la fin dudit Liure l'extraict des lettres du preſent Priuilege, elles

soient tenuës pour deuëment signifiées, & que foy y soit adioustée, & aux copies d'icelles deuëment collationnées, comme à l'original. Donné à Paris le quatriesme Octobre 1641.

Par le Roy en son Conseil.

LE BRVN.

Ledit Eueillon a cedé & transporté le droit du Priuilege cy-dessus pour la premiere edition à Matthieu Guillemot, Marchand Libraire & Imprimeur audit Paris, par acte passé entr'eux le quinzième d'Octobre presente année 1641.

ANT 1316929

Errata typographica.

In Epistola, pagina 9. *reuerentia*. Lege, *modestia*.

Pag. 14. *dicuntr*. Lege, *dicuntur*.

Pag. 28. *lla*. Lege, *vlla*.

Pag. 80. *ex lex*. Lege, *est lex*.

Pag. 89. in quibusdam exemplaribus ir-
replit, *Damaso*. Lege, *Gelasio*.

Pag. 160. *Baptismis*. Lege, *Baptismus*.

Pag. 182. *Senonenfis*. Lege, *Suessionenfis*.

Pag. 183. *Senonenfi*. Lege, *Suessionenfi*.

Pag. 194. *Senonenfi*. Lege, *Suessionenfi*: &
ibidem, pro, *Senonenses*, Lege, *Suessio-
nenses*.

Pag. 216. *vcl*. Lege, *vel*.


Pag. 218. *discussifi*. Lege, *discussis*.

Pag. 223. *ultimur*. Lege, *utimur*.

Pag. 253. *particeps*. Lege, *participes*.

Pag. 306. *Inuocatina*. Lege, *Inuocatinæ*.





7555

